

出三藏记集

僧祐

文硕阁

wenshuoge.com

目录

关于我们	3
卷一	5
卷二	13
卷三	37
卷四	49
卷五	78
卷六	88
卷七	95
卷八	104
卷九	118
卷十	132
卷十一	145
卷十二	156
卷十三	181
卷十四	190
卷十五	202

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

卷一

○出三藏记集序

夫真谛玄凝，法性虚寂，而开物导俗，非言莫津。是以不二默酬，会于义空之门；一音震辩，应乎群有之境。自我师能仁之出世也，鹿苑唱其初言，金河究其后说；契经以诱小学，方典以劝大心。妙轮区别，十二惟部，法聚总要，八万其门。至善逝晦迹，而应真结藏，始则《四含》集经，中则五部分戒，大宝斯在，含识资焉。然道由人弘，法待缘显。有道无人，虽文存而莫悟；有法无缘，虽并世而弗闻。闻法资乎时来，悟道藉于机至；机至然后理感，时来然后化通矣。

昔周代觉兴，而灵津致隔；汉世像教，而妙典方流。法待缘显，信有徵矣。至汉末安高，宣译转明；魏初康会，注述渐畅。道由人弘，于兹验矣。自晋氏中兴，三藏弥广，外域胜宾，稠叠以总至；中原慧士，晔晔而秀生。提、什举其宏纲，安、远震其奥领，渭滨务逍遥之集，庐岳结般若之台。像法得人，于斯为盛。

原夫经出西域，运流东方，提挈万里，翻转胡汉。国音各殊，故文有同异；前后重来，故显有新旧。而后之学者，鲜克研核，遂乃书写继踵，而不知经出之岁，诵说比肩，而莫测传法之人。授受之道，亦已阙矣。夫一时圣集，犹五事证经，况千载交译，宁可昧其人世哉！

昔安法师以鸿才渊鉴，爰撰经录，订正闻见，炳然区分。自兹已来，妙典间出，皆是大乘宝海，时竞讲习。而年代人名，莫有铨贯，岁月逾迈，本源将没，后生疑惑，奚所取明？佑以庸浅，豫凭法门，翘仰玄风，誓弘大化。每至昏晓讽持，秋夏讲说，未尝不心驰庵园，影跃灵鹫。于是牵课羸恙，沿波讨源，缀其所闻，名曰《出三藏记集》。一撰缘记，二铨名录，三总经序，四述列传。缘记撰则原始之本克昭，名录铨则年代之目不坠，经序总则胜集之时足徵，列传述则伊人之风可见。并钻研内经，研镜外籍，参以前识，验以旧闻。若人代有据，则表为司南；声传未详，则文归盖阙。秉牍凝翰，志存信史，三复九思，事取实录。有证者既标，则无源者自显。庶行潦无杂于醇乳，燕石不乱于荆玉。但并识管窥，多惭博练，如有未备，请寄明哲。

集三藏缘记第一十诵律五百罗汉出三藏记第二菩萨处胎经出八藏记第三胡汉译经文字音义同异记第四

前后出经异记第五

○集三藏缘记第一◇出《大智度论》

佛于俱夷那竭国萨罗双树间般涅槃，卧床北首，天地震动。师子等百兽悉大哮吼，诸天人号咷，山林树木皆悉摧裂，天女人女无量百千，噢咿交涕，不能自胜。诸三学人欻然不乐，诸无学人但念诸法一切无常。唯阿难亲属爱未除，未离欲故，心没忧海，不能自出。

尔时阿泥虑豆语阿难：“汝守佛法藏人，不应如凡人自没忧海。一切有为是无常相。又佛委付汝法，汝今愁闷，失所受事。汝当问佛：‘佛涅槃后，我曹云何行道？谁当作师？恶口车匿云何共住？佛经初首作何等语？’如是种种未来之事，汝当应问。”阿难闻是事，闷心小醒，得念道力。于佛卧床边，以此事问佛。佛告阿难：“若我现在，若我灭后，自依止法，不余依止。云何比丘自依止法，不余依止？内观身常念一心，智慧现前，勤修精进，除世间贪忧。外身内外身亦如是观，受心法念处亦复如是。是名自依止法，不依止余。从今解脱戒经即是大师，如解脱戒经所说。身业口业应如是行。画匿比丘如梵法治。若心软伏者，应教《删陀迦旃延经》，即可得道。我三阿僧祇劫所集法宝藏，是初应作是说：‘如是我闻，一时，佛在某方某国土某处树林。’何以故？过去未来诸佛经初亦称是语，现在诸佛临涅槃时，亦教称如是语。我今涅槃后，经初亦称‘如是我闻’之语。”

佛既灭度，诸大罗汉各各随意于诸山林、流泉、谿谷处处舍身而般涅槃。或有飞腾虚空雁行而去，现种种神变，令众人得信心清净而般涅槃。

尔时六欲诸天乃至遍净色界诸天见是事已，各心念言：“佛日既没，禅定解脱弟子，光晚亦复灭度。是诸众生种种烦恼淫怒痴病，是法药师今疾灭度，谁当治者？无量智慧大海之中，所生弟子诸妙莲华，今复乾枯，法树摧折，法云散灭。大智象王既已逝矣，象子亦随去。法商人已去，从谁求法宝？”各共集会来诣大迦叶，作礼已，说偈赞叹。叹已，白言：“大德仁者知不？法船欲破，法城欲颓，法海欲竭，法幢欲倒，法灯欲灭，行道者渐少，恶人力转盛，当以大慈，建立佛法。”尔时迦叶心大如海，澄静不动，良久而答：“汝等善说，实如所言。世间不久，无智盲冥。”于是大迦叶默然受请。诸天礼已，忽然不现，各自还去。

尔时迦叶思惟，云何使是三阿僧祇劫难得佛法久住于世？思惟已，“我知是法可得久住于世，应当结集修妒路、阿毗云、毗尼作三法藏，如是佛法可得久住，未来世人可得受行。所以者何？佛世世勤苦慈愍众生，学得是法，为人演说。我曹亦应承用佛教，宣扬开化。”迦叶作是语已，住须弥山顶，挝铜犍槌，说此偈言：

诸佛弟子，若念于佛，当报佛恩，莫入涅槃。

是犍槌音传大迦叶教，遍至三千大千世界，皆悉闻知。诸有弟子得神力者，皆来集会大迦叶所。尔时迦叶告诸会者：“佛法欲灭，佛从三阿僧祇劫种种苦行，慈愍众生，学得是法。佛涅槃已，诸弟子中知法、持法者及译法者，皆亦随般涅槃。法今

欲灭，未来众生甚可怜愍，失智慧眼，愚痴盲冥。佛大慈悲，愍伤众生，我曹应当承顺佛教，须待结集三藏竟已，随意灭度。”诸来众会，皆受教祝

时大迦叶选取千人，除去阿难，皆阿罗汉，得六神通，具三明智，诸禅三昧，自在出入，逆顺超越，诵读三藏，知内外经书，诸外道家十八种大经亦善读知，皆能论议，降伏异学。昔频浮娑罗王得道，八万四千官属亦各得道。是时王教敕宫中，常设饭食供养千人，阿闍维王不断是法。时大迦叶思惟言：“若我等常乞食者，当有外道强来难问，废阙法事。今王舍城常设饭食，供养千人，是中可住，订法藏。”以是故选取千人，不得多龠是时大迦叶与千人俱到王舍城耆闍崛山中，告阿闍维王：“给我等食，日日送来。今我订法藏，不得他行。”

是中夏安居，初十五日说戒时，大迦叶即入禅定，以天眼观视，今是众中，谁有烦恼应逐出者。唯有阿难一人不荆大迦叶从定起已，即于众中手牵阿难出，言：“今清静众结集法藏，汝结未尽，不得住此。”时阿难惭耻悲泣而自念言：“我二十五年随侍世尊，供给左右，初未曾得知是苦恼。佛实大德，慈悲含忍。”念已，白言：“我能有力，久可得道。但诸佛法，阿罗汉者，不得供给左右使令。以是义故，留残结不尽断耳。”又言：“汝更有罪，佛意不欲听女人出家，汝殷勤劝请，佛听为道。以是故，佛之正法，五百岁而衰微。是汝之罪。”阿难言：“我怜愍瞿昙弥。又三世诸佛法，皆有四众，我世尊云何独无？”又言：“佛欲涅槃，近俱夷城。佛时脊痛，四叠沍多罗僧敷卧。语汝言：‘我须水。’汝不供给。是汝之罪”阿难言：“是时五百乘车截流而渡，令水浑浊。是故不龠”又言：“正使水浊，佛有大神力，能令大海浊水清静。汝何以不与？”又言：“佛问汝：‘若有人四神足好修，可住世一劫，若减一劫？’佛四神足好修第一，欲住世一劫，若减一劫，汝默然不答。如是至三，汝亦默然。汝若答佛，四神足好修，应住世一劫，若减一劫。正由汝故，令世尊早入涅槃。是汝之罪”阿难言：“魔蔽我心，是故无言，非我恶心而不答佛。”迦叶又言：“汝与佛叠僧伽梨衣，以足蹈上。是汝之罪”阿难言：“尔时大风卒起，无人助我，风吹来堕我脚下，非不恭敬蹈佛衣。”又言：“佛阴藏相，涅槃后以示女人，是何可耻。是汝之罪”阿难言：“我尔时思：若诸女人见佛阴藏相者，便自羞耻女人之形，愿求男子之身，修行佛相，种福德业。故我示之，不为无耻故破戒也。”大迦叶言：“汝有六罪，应僧中悔过。”阿难言：“诺，谨随大迦叶及僧教。”是时阿难长跪合掌，偏袒右肩，即脱革屣，六罪忏。忏竟，大迦叶复于僧中手牵阿难出，语阿难言：“断汝漏尽，然后来入；残结未尽，汝勿来也”如是语竟，便自闭门。

尔时诸阿罗汉议言：“谁能结集法藏者？”阿泥卢豆言：“舍利弗是为第二佛，有好弟子，名憍梵波提，柔软和雅，常处闲居，善知法藏。今在天上尸利沙树园中，可遣使请来。”大迦叶语下座：“汝次应僧使，到大上尸利沙树园中憍梵波提住处。到已语憍梵波提：‘大迦叶诸漏尽阿罗汉，皆会闍浮提，僧有大法事，汝可速来。’”是比丘欢喜敬诺，受僧敕命，头面礼僧，右绕三匝，如金翅鸟腾空而往。到

已，礼足言：“大迦叶有语，今僧有大法事，可疾速来，观众宝聚。”是时憍梵波提心疑，语是比丘言：“僧将无斗争事唤我耶？无有破僧者不？佛曰灭度耶？”是比丘言：“宝如所言，大师世尊已灭度。”憍梵波提言：“佛灭度太疾，世间眼灭，随佛法轮大将我和尚舍利弗今在何所？”答曰：“先入涅槃。”憍梵波提言：“大师、法将各自别离，当可奈何！摩诃目犍连今在何所？”答言：“亦已灭度。”憍梵波提言：“佛法欲散，大人过去，众生可愍。长老阿难今何所作？”答曰：“阿难比丘忧愁啼哭，不能自喻。”憍梵波提言：“阿难懊恼，由有爱结，别离生苦。罗憍罗复云何？”答言：“得阿罗汉故，无忧无愁，但念诸法无常之相。”憍梵波提言：“难断之爱已能断故。”又言：“我失大师世尊，于是中住，亦何所为？我和尚大师复已灭度，我今不能下阎浮提。今即于此而般涅槃。”说此语已，即入禅定，踊在虚空。身放光明，种种神变，自心出火而烧于身。身中出水，四道流下，至大迦叶所，水中有声，说此偈言：

憍梵波提稽首礼，妙众第一大德僧。闻佛灭度我随去，如大象去象子随。下座比丘持衣钵还僧。

是时中间阿难思惟，求尽残结。其夜坐禅经行，殷勤求道。是阿难智多定少，不即得道。定智等者，乃可速得。后夜欲过，疲极偃息，却卧就枕。头未至枕，郭然得悟，如电光出，憍者见道。阿难如是入金刚定，破一切诸烦恼山，得三明六通，具八解脱，作大力阿罗汉。即夜到僧堂门，敲门而唤。大迦叶问言：“敲门者谁？”答言：“我是阿难。”又问：“汝何以来？”答言：“我于今夜得尽诸漏。”又言：“不与汝开门，汝从门钥孔来。”阿难言：“尔。”即以神力从非门而入，礼拜僧足，忏悔：“大迦叶莫复见责。”大迦叶手摩其顶，言：“我故为汝，使得道故，汝无嫌恨。我亦如是，以汝自证。譬如手画虚空，无所染着。阿罗汉心亦复如是。复汝本座。”

是时僧中复共议言：“憍梵波提已取灭度，更有谁能结集法藏？”阿泥卢豆言：“是长老阿难于佛弟子常侍近佛。闻经能持，佛常难誉。唯是阿难结集法藏。”是时大迦叶摩阿难头言：“佛嘱累汝令持法藏，汝应报佛恩。佛在阿处最初说法？佛诸大弟子能守护法藏者皆已灭度，唯汝一人在。今应随佛心怜愍众生，结集法藏。”是时阿难敬礼僧已，坐师子座。时大迦叶说此偈言：

佛圣师子王，阿难是佛子。师子座处座，观众无有佛。如是大德众，无佛失威神，如空无月时，有宿而不严。汝大智人说，汝佛子当演。何处佛初说，今汝当布现。

是时长老阿难一心合掌，向佛涅槃方作如是说：

佛初说法时，尔时我不见，如是展转闻：佛在波罗奈，佛为五比丘，初开甘露门，

说四真谛法，苦、集、灭、道谛。阿若憍陈如，最初得见道。八万诸天众，皆亦入道迹。

是千阿罗汉闻是语已，上各项虚空，高七多罗树，皆言：“无常力大，如我等眼见佛说法，今乃言‘我闻’。”便说偈言：我见佛身相，犹如紫金山。妙相众德灭，唯有名独存。

长老阿泥卢豆说此偈言：咄世间无常，如水月、芭蕉。功德满三界，无常风听坏。尔时，大迦叶复说偈言：

无常力甚大，愚、智、贫、富贵，得道及未得，一切无能免。非巧言、妙宝，非欺诳、力争。如火烧万物，无常相法尔。

大迦叶语阿难：“从《转法轮经》至大般涅槃，集作《四阿含》：《增一阿含》、《中阿含》、《长阿含》、《相应阿含》，是名修妒路法藏。”

诸阿罗汉更问：“谁能明了集毗尼藏？”皆言：“长老优波离于五百阿罗汉中持律第一，我等今请。”即请言：“起就师子座。”问：“佛在何处初说毗尼结戒？”优波离即受僧命，坐师子座。“如是我闻：一时，佛在毗舍离。尔时，须邻那迦兰陀长者子初作淫欲，以是因缘故，结初大罪。二百五十戒义作三部，七法，八法，比丘尼，毗尼增一，优波离问，杂部，善部。如是等八十部作毗尼藏。”

诸阿罗汉复共思惟：请阿难结集阿毗昙藏。即请言：“起就师子座。佛在何处初说阿毗昙？”阿难受僧命，说：“如是我闻：一时，佛在舍婆提城。尔时，佛告诸比丘：‘诸有五怖、五罪、五怨不灭，是因缘故，此生中身心受无量苦，复后世堕恶道中。诸有无此五怖、五罪、五怨，是因缘故，于今生种种身心受乐，后世生天上乐处。何等五怖应远？一者杀生，二者盗，三者邪淫，四者妄语，五者饮酒。’如是等名阿毗昙藏。”

三法藏集竟，诸天、人、鬼、神、诸龙王等，种种供养天花、天香、幡盖、衣服。供养法故，于是说偈：怜愍世界故，集结三法藏。十力一切智，说智光明灯。

略说三藏竟。

○十诵律五百罗汉出三藏记第二

又《十诵律》序云：“迦叶言：‘我先从波婆城向拘尸城，道中闻佛涅槃。有愚痴比丘言，我今得自在，所欲便作，不欲便止。又有比丘非法说法，法说非法。以此因缘，应集法藏。’即羯磨。五百罗汉，唯阿难在学地，共住王舍城安居。先令优

波离出律藏。一一事竟，即问阿若憍陈如，次问长老均陀及十力迦叶等五百罗汉乃至最下阿难，言：‘如优波离所说不？’皆答：‘我亦如是闻是事是法。’尔时，迦叶僧中唱言：‘大德僧听，初事集竟。是法是佛教，无有比丘言，非法非佛教。僧忍默然故，是事如是持。’乃至集律藏一切竟，后方命阿难出修多罗藏及阿毗昙藏，阿难方云‘如是我闻，一时’，五百罗汉皆下地胡跪，涕零而言：‘我从佛所面闻见法，而已言我闻。’迦叶语阿难：‘从今三藏初，皆称如是我闻。’”故复两存。

○菩萨处胎经出八藏记第三

菩萨处胎经云：“迦叶告阿难言：‘佛所说法，一言一字，汝勿使有缺漏。菩萨藏者集着一处，声闻藏者亦集着一处，戒律藏者亦着一处。’尔时阿难最初出经，胎化藏为第一，中阴藏第二，摩诃衍方等藏第三，戒律藏第四，十住菩萨藏第五，杂藏第六，金刚藏第七，佛藏第八。是为释迦文佛经法具足矣。”

○胡汉译经文字音义同异记第四

夫神理无声，因言辞以写意；言辞无迹，缘文字以图音，故字为言蹄，言为理筌，音义合符，不可偏失。是以文字应用，弥纶宇宙，虽迹系翰墨，而理契乎神。昔造书之主凡有三人：长名曰梵，其书右行；次曰佉楼，其书左行；少者苍颉，其书下行。梵及佉楼居于天竺，黄史苍颉在于中夏。梵佉取法于净天，苍颉因华于鸟迹。文画诚异，传理则同矣。

仰寻先觉所说，有六十四书，鹿轮转眼，笔制区分，龙鬼八部，字体殊式。唯梵及佉楼为世胜文，故天竺诸国谓之天书。西方写经，虽同祖梵文，然三十六国往往有异。譬诸中土，犹篆籀之变体乎。案苍颉古文，沿世代变，古移为籀，籀迁至篆，篆改成隶，其转易多矣。至于傍生八体，则有仙龙云；二十四书，则有楷草针爻。名实虽繁，为用盖渺。然原本定义，则体备于六文，适时为敏，则莫要于隶法。东西之书源，亦可得而略究也。

至于梵音为语，单复无恒，或一字以摄众理，或数言而成一义。寻《大涅槃经》列字五十，总释众义十有四音，名为字本。观其发语裁音，宛转相资，或舌根唇末，以长短为异。且胡字一音不得成语，必馀言足句，然后义成。译人传意，岂不艰哉。又梵书制文，有半字满字。所以名半字者，义未具足，故字体半偏，犹汉文“月”字，亏其傍也。所以名满字者，理既究竟，故字体圆满，犹汉文“日”字，盈其形也。故半字恶义，以譬烦恼；满字善义，以譬常祝又半字为体，如汉文“言”字；满字为体，如汉文“诸”字。以“者”配“言”，方成“诸”字。“诸”字两合，即满之例也；“言”字单立，即半之类也。半字虽单，为字根本，缘有半字，得成满字。譬凡夫始于无明，得成常住，故因字制义，以譬涅槃。梵文义奥，皆此类

也。

是以宣领梵文，寄在明译。译者释也，交释两国，言谬则理乖矣。自前汉之末，经法始通，译音胥讹，未能明练。故“浮屠”、“桑门”，遗谬汉史。音字犹然，况于义乎？案中夏彝典，诵《诗》执《礼》，师资相授，犹有讹乱。《诗》云：“有兔斯首”，“斯”当作“鲜”。齐语音讹，遂变《诗》文，此“桑门”之例也。《礼记》云“孔子蚤人”，“蚤”当作“早”。而字同蚤虱，此古字同文，即“浮屠”之例也。中国旧经，而有“斯”、“蚤”之异，华戎远译，何怪于“屠”、“桑”哉！若夫度字、传义，则置言由笔，所以新旧众经，大同小异。天竺语称“维摩诘”，旧译解云“无垢称”，关中译云“净名”。“净”即“无垢”，“名”即是“称”，此言殊而义均也。旧经称“众佑”，新经云“世尊”，此立义之异旨也。旧经云“乾沓和”，新经云“乾闥婆”，此国音之不同也。略举三条，馀可类推矣。

是以义之得失由乎译人，辞之质文系于执笔。或善胡义而不了汉旨，或明汉文而不晓胡意，虽有偏解，终隔圆通。若胡汉两明，意义四畅，然后宣述经奥，于是乎正。前古译人，莫能曲练，所以旧经文意，致有阻碍，岂经碍哉，译之失耳！

昔安息世高，聪哲不群，所出众经，质文允正。安玄、严调，既亹以条理，支越、竺兰，亦彬彬而雅畅。凡斯数贤，并见美前代。及护公专精，兼习华戎，译文传经，不愆于旧。逮乎罗什法师，俊神金照，秦僧融、肇，慧机水镜。故能表发挥翰，克明经奥，大乘微言，于斯炳焕。至昙谶之传《涅槃》，跋陀之出《华严》，辞理辩畅，明逾日月，观其为，继轨什公矣。至于杂类细经，多出《四含》，或以汉来，或自晋出，译人无名，莫能详究。然文过则伤丰，质甚则患野，野艳为弊，同失经体。故知明允之匠，难可世遇矣。

佑窃寻经言，异论咒术，言语文字，皆是佛说。然则言本是一，而胡汉分音；义本不二，则质文殊体。虽传译得失，运通随缘，而尊经妙理，湛然常照矣。既仰集始缘，故次述末译。始缘兴于西方，末译行于东国，故原始要终，寓之记末云尔。

○前后出经异记第五

旧经众佑新经世尊旧经扶萨（亦云开士。）新经菩萨旧经各佛（亦独觉。）新经辟支佛（亦缘觉。）

旧经萨芸若新经萨婆若旧经沟港道（亦道迹。）新经须陀洹旧经频来果（亦一往来。）新经斯陀含旧经不还果新经阿那含

旧经无着果（亦应旨，亦应仪。）新经阿罗汉（亦言阿罗诃。）旧经摩纳新经长者

旧经濡首新经文殊

旧经光世音新经观世音旧经须扶提新经须菩提旧经舍梨子（亦鹭鹭子。）新经舍利弗旧经为五众新经为五阴

旧经十二处新经十二入旧经为持新经为性旧经背舍新经解脱旧经胜处新经除入

旧经正断新经正勤旧经觉意新经菩提旧经直行新经正道旧经乾沓和新经乾闥婆

旧经除僮男、除僮女新经比丘、比丘尼

旧经怛萨阿竭阿罗诃三耶三佛新经多陀阿伽度阿罗诃三藐三佛陀

旧经阿耨多罗三耶三菩提新经阿耨多罗三藐三菩提

卷二

法宝所被远矣。夫神理想一寂，感而后通，缘应中夏，始自汉代。昔刘向校书，已见佛经。故知成帝之前，法典久至矣。逮孝明感梦，张骞远使，西于月支写经《四十二章》，韬藏兰台，帝王所樱于是妙像丽于城，金利曜乎京洛，慧教发挥，震照区寓矣。窃寻两汉之季，世构乱离，西京荡覆，坟典皆散，东都播迁，载籍多亡。子政所睹，其文虽没，而显宗所写，厥篇犹存。东流初法，于斯有徵。佑检阅三藏，访核遗源，古经现在，莫先于《四十二章》；传译所始，靡逾于张骞之使。洎章、和以降，经出盖阙。良由梵文虽至，缘运或殊，有译乃传，无译则隐，苟非其人，道不虚行也。迨及桓、灵，经来稍广。安清、朔佛之俦，支讖、严调之属，翻译转梵，万里一契，离文合义，炳焕相接矣。

法轮屈心，莫或条叙。爰自安公，始述各录，铨品译才，标列负月。妙典可徵，实赖伊人。敢以末学，响附前规，率其管见，接为新录。兼广访别目，括正异同，追讨支、竺，时获异经。《安录》所记，则为未尽，今悉更苞举，以备录体。发源有汉，迄于大梁，运历六代，岁渐五百，梵文证经四百有十九部，华戎传译八十有五人，鱼贯名第，略为备矣。或同是一经，而先后异出，新旧舛驳，卷数参差，皆别立章条，使无疑乱。至于律藏初启，则详书本源，审核人代，列于上录。若经存译亡，则编于下卷。将使传法之缘有孚，闻道之心无惑。敬贻来世，庶在不坠焉。

新集撰出经律论录第一新集条解异出经录第二

新集表序四部律录第三（阙）

○新集撰出经律论录第一

《四十二章经》一卷（《旧录》云，《孝明皇帝四十二章》。安法师所撰录阙此经。）

右一部，凡一卷。汉孝明帝梦见金人，诏遣使者张骞、羽林中郎将秦景到西域，始于月支国遇沙门竺摩腾，译写此经还洛阳，藏在兰台石室第十四间中。其经今传于世。

《安般守意经》一卷（《安录》云，《小安般经》。）《阴持入经》一卷《百六十品经》一卷（《旧录》云，《增一阿含百六十章》。）《大十二门经》一卷

《小十二门经》一卷

《大道地经》二卷（安公云，《大道地经》者，《修行经》抄也。外国所抄。）《

人本欲生经》一卷《道意发行经》二卷（今阙此经。）

《阿毗昙五法经》一卷（《旧录》云，《阿毗昙五法行经》。）

《七法经》一卷（《旧录》云，《阿毗昙七法行经》。或云《七法行》，今阙此经。）《五法经》一卷《十报经》二卷（《旧录》云，《长阿含十报法》。）

《普法义经》一卷（一名《具法行》。《具法行》作“舍利弗”，《普法义》作“舍利目”。余并同。）

《义决律》一卷（或云《义决律法行经》。安公云，此上二经出《长阿含》。今阙。）《漏分布经》一卷《四谛经》一卷（安公云，上二经出《长阿含》。）

《七处三观经》二卷《九横经》一卷《八正道经》一卷（安公云，上三经出《杂阿含》中。）

杂经四十四篇二卷（安公云，出《增一阿含》。既不标名，未详何经。今阙。）《五十校计经》二卷（或云《明度五十校计经》。）《大安般经》一卷

《思惟经》一卷（或云《思惟略要法》。）《十二因缘经》一卷《五阴喻经》一卷（《旧录》云，《五阴譬喻经》。）《转法轮经》一卷（或云《法轮转经》。）

《流摄经》一卷（《旧录》云，《一切流摄经》，或云《一切流摄守经》。）《是法非法经》一卷《法受尘经》一卷

《十四意经》一卷（《旧录》云，《菩萨十四意经》。今阙此经。）《本相猗致经》一卷（安公云，出《中阿含》也。）

《阿含中解》一卷（或云《阿含口解十二因缘经》，或云《断十二因缘经》。《旧录》云，《安侯口解》。凡有四名，同一本。）《阿毗昙九十八结经》一卷（今阙）。

《禅行法想经》一卷《难提迦罗越经》一卷（今阙。）

右三十四部，凡四十卷。汉桓帝时，安息国沙门安世高所译出。其《四谛》、《口解》、《十四意》、《九十八结》，安公云，似世高撰也。

《道行经》一卷（安公云，《道行品经》者，《般若》抄也，外国高明者所撰。安公为之序注。）

右一部，凡一卷。汉桓帝时，天竺沙门竺朔佛赍胡本至中夏。到灵帝时，于洛阳译出。

《般若道行品经》十卷（或云《摩诃般若波较蜜经》。或八卷，光和二年十月八日出。）《首楞严经》二卷（中平二年十二月八日出。今阙。）

《般舟三昧经》一卷《旧录》云，《大般舟三昧经》。光和二年十月初八日出。）

《饨真陀罗经》二卷（《旧录》云，《屯真陀罗王经》。《别录》所载，《安录》无。今阙。）方等部《古品曰遗日说般若经》一卷（今阙。）《光明三昧经》一卷（出《别录》，《安录》无。）

《阿閼世王经》二卷（安公云，出《长阿含》。《旧录》，《阿閼贯经》。）

《宝积经》一卷（安公云，一名《摩尼宝》，光和二年出。《旧录》云，《摩尼宝经》二卷。）

《问署经》一卷（安公云，出方等部。或云《文殊问菩萨署经》。）《胡般泥洹经》一卷（今阙。）《兜沙经》一卷

《阿閼佛国经》一卷（或云《阿閼佛刹诸菩萨学成品经》，或云《阿閼佛经》。）《孛本经》二卷（今阙。）

《内藏百品经》一卷（安公云，出方等部。《旧录》云，《内藏百宝经》。遍校群录，并云“内藏百宝”，无“内藏百品”，故知即此经也。）

右十四部，凡二十七卷。汉醒帝灵帝时，月支国沙门支谶所译出。其《古品》已下至《内藏百品》，凡九经，安公云，似支谶出也。

《成具光明经》一卷（或云《成具光明三昧经》，或云《成具光明定慧经》。）右一部，凡一卷。汉灵帝时，支曜译出。《法镜经》一卷（安公云，出方等部。）

《十慧经》一卷（或云《沙弥十慧》。）

右二部，凡二卷。汉灵帝时，沙门严佛调、都尉安玄共译出。《十慧》是佛调所撰。《中本起经》二卷（或云《太子中本起经》。）右一部，凡二卷。汉献帝建安中，康孟详译出。

《法句经》二卷

右一部，凡二卷。魏文帝时，天竺沙门维祇难以吴主孙权黄武三年赍胡本，武昌竺将炎共支谦译出。《维摩诘经》二卷（阙。）

《大般泥洹经》二卷（安公云，出《长阿含》。佑案，今《长阿含》与此异。）《瑞应本起经》二卷《小阿差末经》二卷（阙。）

《慧印经》一卷（或云《慧印三昧经》，或云《宝网慧印三昧经》。）《本业经》一卷（或云《菩萨本业经》。）《法句经》二卷

《须赖经》一卷（或云《须赖菩萨经》。）《梵摩渝经》一卷

《私阿末经》一卷（或作“私呵昧”。案，此经即是《菩萨道树经》也。）《微密持经》一卷（或云《无量门微密持经》。）

《阿弥陀经》二卷（内题云，《阿弥陀三耶三佛萨楼檀过度人道经》。）

《月明童子经》一卷（一名《月明童男》，一名《月明菩萨三昧经》。）《义足经》二卷《阿难四事经》一卷《差摩竭经》一卷

《优多罗母经》一卷（阙。）《七女经》一卷（安公云，出《阿毗昙》。）《八师经》一卷《释摩男经》一卷（《安录》云，出《中阿含经》。）

《孛抄经》一卷（今《孛经》一卷即是。）《明度经》四卷（或云《大明度无极经》。）《老女人经》一卷（安公云，出《阿毗昙》。）《斋经》一卷（阙。）

《四愿经》一卷《悔过经》一卷（或云《序十方礼悔过文》。）《贤者德经》一卷《佛从上所行三十偈》一卷（阙。）

《了本生死经》一卷（安公云，出《生经》。佑案，五卷《生经》无此名也。）《唯明二十偈》一卷《首楞严经》二卷《别录》所载，安录无。今阙之。

《龙施女经》一卷（《别录》所载，《安录》无。）《法镜经》二卷（出《别录》，《安录》无。）《鹿子经》一卷（《别录》所载，《安录》无。）

《十二门大方等经》一卷（《别录》所载，《安录》无。）

《赖咤和罗经》一卷（《别录》所载，《安录》无。或云《罗汉赖咤和罗经》。）

右三十六部，四十八卷。魏文帝时，支谦以吴主孙权黄武初至孙亮建兴中所译出。

《六度集经》九卷（或云《六度无极经》，或云《杂无极经》。）《吴品》五卷（凡有十品。今阙。）

右二部，凡十四卷。魏明帝时，天竺沙门康僧会以吴主孙权孙亮世所译出。《首楞严经》二卷（阙。）《叉须赖经》一卷（阙。）

《除灾患经》一卷（阙。）

右三部，凡四卷。魏高贵公时，白延所译出。《别录》所载，《安公录》先无其名。

《放光经》二十卷（晋元康元年五月十五日出，有九十品。一名《旧小品》。）

右一部，凡二十卷。魏高贵公时，沙门朱士行以甘露五年到于阗国，写得此经正品梵书胡本十九章，到晋武帝元康初，于陈留仓垣水南寺译出。《光讚经》十卷（十七品，太康七年十一月二十五日出。）

《贤劫经》七卷（《旧录》云，《贤劫三昧经》，或云《贤劫定意经》。元康元年七月二十一日出。）

《正法华经》十卷（二十七品。《旧录》云，《正法华经》，或云《方等正法华经》。太康七年八月十日出。）

《普曜经》八卷（三十品。安公云，出方等部。永嘉二年五月出。）

《大哀经》七卷（二十八品。《旧录》云，《如来大哀经》。元康元年七月七日出。）

《度世品经》六卷（或云《度世》。或为五卷。元康元年四月十三日出。）

《密迹经》五卷（或云《密迹金钢力士经》。或七卷。太康九年十月八日出。）

《持心经》六卷（十七品。一名《等御诸法》，一名《庄严佛法》。《旧录》云，《持心梵天所问经》。太康七年三月十日出。）

《修行经》七卷（二十七品。《旧录》云，《修行道地经》。太康五年二月二十三日出。）

《渐备一切智德经》十卷（或五卷。元康七年十一月二十一日出。）《生经》五卷（或四卷。）《海龙王经》四卷（或三卷。太康六年七月十日出。）

《普超经》四卷（一名《阿闍世王品》。《安录》亦云更出《阿闍世王经》。或为三卷。《旧录》云，《文殊普超三昧经》。太康七年十二月二十七日出。）

《维摩诘经》一卷（一本云《维摩诘名解》。）《阿惟越致苾刍经》四卷（太康五年十月十四日出。）

《严净佛土经》二卷（《旧录》云，是《文殊师利严净经》，或云《文殊佛土严净经》。）

《阿耨达经》二卷（一名《弘道广显三昧经》。《旧录》云，《阿耨达龙王经》，或云《阿教研室请佛经》。）《首楞严经》二卷（异出，首称阿难言。）

《无量寿经》二卷（一名《无量清净平等觉经》。）

《宝藏经》二卷（《旧录》云，文殊师利宝藏经，或云《文殊师利现宝藏》。太始六年十月出。）

《宝髻经》二卷（一名《菩萨净行经》，《旧录》云，《宝结菩萨经》，或云《宝髻菩萨所问经》。永熙元年七月十四日出。）

《要集经》二卷（或云《诸佛要集经》，天竺曰《佛陀僧祇提》。）《佛升忉利天品经》二卷

《等集众德三昧经》三卷（《旧录》云，《等集众德经》，或云《等集三昧经》。）《无尽意经》四卷《离垢施女经》一卷（太康十年十二月二日出。）

《郁迦长者经》一卷（或云《郁迦罗越问菩萨行经》，即《大郁迦经》。或为二卷。）《大净法门经》一卷（建始元年三月二十六日出。）《须真天子经》二卷（泰始二年十一月出。）

《幻士仁贤经》一卷（或云《仁贤幻士经》。）《魔逆经》一卷（太康十年十二月二日出。）《济诸方等经》一卷（或云《济诸方等学经》。）

《德光太子经》一卷（或云《赖咤和罗所同光德太子经》。泰始六年九月三十日出。）

《文殊师利净律经》一卷（一本云《净律经》。太康十年四月八日出。）《决定持经》一卷

《宝女经》四卷（《旧录》云，《宝女三昧经》。或云《宝女问慧经》。太康八年四月二十七日出。）

《如来与显经》四卷（一本云《兴显如幻经》。元康元年十二月二十五日出。）《般舟三昧经》二卷（《安公录》云，更出《般舟三昧经》。）《首意女经》一卷（或云《梵女首意经》。）

《十二因缘经》一卷《月明童子经》一卷（一名《月光童子经》。）

《五十缘身行经》一卷（《旧录》云，《菩萨缘身五十事经》，或云《菩萨行五十缘身经》。）《六十二见经》一卷（或云《梵网六十二见经》。）

《四自侵经》一卷（安公云，出《阿毗昙》。）

《须摩经》一卷（《旧录》云《须摩提经》，或云《须摩提菩萨经》。）《随权女经》二卷（出《别录》，《安录》无。）

《方等泥洹经》二卷（或云《大般泥洹经》。泰始五年七月二十三日出。）

《大善权经》二卷（或云《慧上菩萨问大善权经》，或云《慧上菩萨经》，或云《善权方便经》，或云《善权方便所度无极经》。太康六年六月十七日出。）

《无言童子经》一卷（或云《无言菩萨经》。）《温室经》一卷（《旧录》云，《温室洗浴众僧经》。）

《顶王经》一卷（一名《维摩诘子问经》。安公云，出方等部，或云《大方等顶王经》。）

《圣法印经》一卷（天竺名《阿遮昙摩叉图》。安公云，出《杂阿含》。）《移山经》一卷（《旧录》云，《力士移山经》。）

《文殊师利五体悔过经》一卷（《旧录》云，《文殊师利悔过经》。泰始七年正月二十七日出。）《持人菩萨经》三卷（泰始七年九月十五日出。）

《灭十方冥经》一卷（元熙元年八月十四日出。）

《无思议孩童经》一卷（《旧录》云，《孩童经》，或云《无思议光孩童菩萨经》，或云《无思议光经》。）《迦叶集结经》一卷（《旧录》云，《迦叶结经》。）

《弥勒成佛经》一卷（与罗什所出异本。）

《舍利弗目连游诸国经》一卷（或云《舍利弗摩目犍连游诸四衢经》。）《琉璃王经》一卷《柰女耆域经》一卷（或云《柰女经》。）《宝施女经》一卷

《宝网童子经》一卷《旧录》云，《宝网经》。）

《顺权方便经》二卷（一本云《惟权方便经》。《旧录》云，顺权女经，一云《转女身菩萨经》。太安二年四月九日出。）

《五百弟子本起经》一卷（《旧录》云，《五百弟子自说本末经》。太巡二年五月一日出。或云《佛五百弟子自说本起经》。）

《佛为菩萨五梦经》一卷（《旧录》云，《佛五梦》。太安二年五月六日出。或云《太子五梦》。）

《普门经》一卷（一本云《普门品》。太康八年正月十一日出。）

《如幻三昧经》二卷（《旧录》云，三卷。太安二年五月十一日出。）

《弥勒本愿经》一卷（或云《弥勒菩萨所问本愿经》。太安二年五月十七日出。）《舍利弗悔过经》一卷（太安二年五月二十日出。）

《胞胎经》一卷（《旧录》云，《胞胎受身经》。太安二年八月一日出。）

《十地经》一卷（或云《菩萨十地经》。太安二年十二月四日出。）《摩目犍连本经》一卷《太子慕魄经》一卷《四不可得经》一卷

《菩萨悔过经》一卷（或云《菩萨悔过法》，下注云，出龙树《十住论》。）《当来变经》一卷《乳光经》一卷

《心明女梵志妇饭汁施经》一卷（或云《心明经》。）

《大六向拜经》一卷（《旧录》云，《六向拜经》，或云《威花长者六向拜经》。）《鸯掘摩经》一卷（或云《指髻经》，或云《指鬘经》。）《菩萨十住经》一卷（太安元年十月三日出。）

《摩调王经》一卷（出《六度集》。太安三年正月十八日出。）《象步经》一卷（一云《无所希望经》。）《照明三昧经》一卷（太安三年二月一日出。）

《所欲致患经》一卷（太安三年二月七日出。）

《法没尽经》一卷（或云《空寂菩萨所问经》。太熙元年二月七日出。）《菩萨斋法》一卷（一名《菩萨正斋经》，一名《持斋经》。）《独证自誓三昧经》一卷（或云《如来独证自誓三昧经》。）

《过去佛分卫经》一卷（《旧录》云，《过世佛分卫经》。）

《五盖疑结失行经》一卷（安公云，不似护公出。《后记》云，永宁二年四月十二日出。）

《阿差末经》四卷（或云《阿差末菩萨经》，《别录》所载。《安录》先阙。永嘉元年十二月一日出。）

《无极宝经》一卷（《别录》所载，《安录》先阙。或云《无极宝三昧经》。永嘉元年三月五日出。）

《阿述达经》一卷《别录》所载，《安录》先阙。《旧录》云，《阿述达女经》，或云《阿闍贯王可述达菩萨经》。）右九十五部，凡二百六卷。今并有其经。

《等目菩萨经》二卷（《别录》所载，《安录》先阙。）《闲居经》十卷更出《小品经》七卷《总持经》一卷（佑案，出《生经》，或云《佛心总持》。）

《超日明经》二卷

《删维摩诘经》一卷（佑意谓先出《维摩》烦重，护删出逸偈。）《虎耳意经》一卷（一名《二十八宿经》。）《无忧施经》一卷（一本云，阿闍贯女名无忧施。）

《五福施经》一卷

《楼炭经》五卷（安公云，出方等部。太安元年正月二十三日出。）

《勇伏定经》二卷（安公云，更出《首楞严》。元康元年四月九日出。）

《严净定经》一卷（一名《序世经》。元熙元年二月十八日出。）《慧明经》一卷
《迦叶本经》一卷或云《大迦叶本》。）《光世音大势至受决经》一卷

《诸方佛名经》一卷《目连上净居天经》一卷《普首童经》一卷《十方佛名》一卷

《三品修行经》一卷（安公云，近人合《大修行经》。）《金益长者子经》一卷《
众佑经》一卷《观行不移四事经》一卷（元康中出。）

《小法没尽经》一卷《四妇喻经》一卷（元康中出。）《庐夷亘经》一卷《诸祝咒
经》三卷

《廬罗王经》一卷《龙施经》一卷《檀若经》一卷《马王经》一卷（永平元年中出
。）

《普义经》一卷（永平中出。）《鹿母经》一卷（元康初出。）

《给孤独明德经》一卷（《旧录》云，《给孤独氏经》。大熙元年未出。）《龙王
兄弟陀达减王经》一卷（达是达字。）《劝化王经》一卷

《百佛名》一卷《更出阿闍世王经》二卷（建武元年四月十六日出。）《植众德本
经》一卷《沙门果证经》一卷

《龙施本起经》一卷

《龙施本起经》一卷（《旧录》云，《龙施本经》，或云《龙施女经》。）《佛悔
过经》一卷《三转月明经》一卷

《解无常经》一卷《胎藏经》一卷《离垢盖经》一卷《小郁迦经》一卷

《阿闍贯女经》一卷《贾客经》二卷（建武元年三月二日出。）《人所从来经》一
卷（永兴二年正月二十五日出。）《诫罗云经》一卷

《雁王经》一卷（太始九年二月一日出。）《十等藏经》一卷（永兴二年正月二十
八日出。）《雁王五百雁俱经》一卷（永兴二年二月二日出。）《诫具经》一卷（
永兴二年二月七日出。）

《决道俗经》一卷（永兴二年二月十一日出。）

《猛施经》一卷（《旧录》云，《猛施道地经》。永兴二年二月二十日出。）《城喻经》一卷（永兴二年三月一日出。）《耆闍崛山解经》一卷

《譬喻三百首经》二十五卷（永兴三年三月七日出。）《比丘尼戒经》一卷（太始三年九月十日出。）《诫王经》一卷《三品悔过经》一卷（太始三年九月二十一日出。）

《菩萨斋法经》一卷（《旧录》云，《菩萨斋》经，或云《贤首菩萨斋经》。）

左六十四部，凡一百一十六卷。经今阙。合二件，凡一百五十四部，合三百九卷。晋武帝时，沙门竺法护到西域，得胡本还。自太始中至怀帝永嘉二年已前所译出。佑摭摭群录，遇护公所出更得四部，《安录》先阙，今条入录中。安公云，遭乱录散，小小错涉。故知今之所获，审是护出也。

《超日明经》二卷（《旧录》云，《超日明三昧经》。）

右一部，凡二卷。晋武帝时，沙门竺法护先译梵文，而辞义烦重。优婆塞聂承远整理文偈，删为二卷。

《须真天子经》二卷（或云《须真天子问四事经》。太始二年十一月初八日出。）

右一部，凡二卷。晋武帝世，天竺菩萨沙门昙摩罗察口授出，安文慧、白元信笔受。异《维摩诘经》三卷

《首楞严经》二卷（《别录》所载，《安录》先阙。《旧录》有叔兰《首楞严》二卷。）右二部，凡五卷。晋惠帝时，竺叔兰以元康元年译出。《惟逮菩萨经》一卷（今阙。）

右一部，凡一卷。晋惠帝时，沙门制法祖译出。《楼炭经》六卷（《别录》所载，《安录》先阙。）《大方等如来藏经》一卷（《旧录》云，《佛藏方等经》。）

《法句本末经》四卷（一名《法句喻经》。或云六卷。或云《法句譬经》。）《福田经》一卷（或云《诸德福田经》。）

右四部，凡十二卷。晋惠、怀帝时沙门法炬译出。其《法句喻》、《福田》二经，炬与沙门法立共译出。

总前出经，自安世高已下，至法立已上，凡十七家，并《安公录》所载。其张騫、秦景、竺朔佛、维祇难、竺将炎、白延、帛法祖凡七人，是佑校众录新获所附入。自卫士度已后，皆佑所新撰。

《摩诃般若婆罗蜜道行经》二卷（众录并云《道行经》二卷，卫士度略出。今阙。）右一部，凡二卷。晋惠帝时，卫士度略出。

《合维摩诘经》五卷（合支谦、竺法护、竺叔兰所出《维摩》三本，合为一部。）

《合首楞严经》八卷（合支谶、支谦、竺法护、竺叔兰所出《首楞严》四本，合为一部，或为五卷。）

右二部，凡十三卷。晋惠帝时，沙门支敏度所集。其《合首楞严》，传云亦愍度所集，既阙注目，未详信否。《大孔雀王神咒》一卷《孔雀王杂神咒》一卷

右二部，凡二卷。晋元皇帝时，西域高座沙门尸梨蜜所出。《譬喻经》十卷（《旧录》云，《正譬喻经》十卷。）右一部，凡十卷。晋成帝时，沙门康法邃抄集众经，撰此一部。

《十诵比丘戒本》一卷（或云《十诵大比丘戒》。）

右一部，凡一卷。晋简文帝时，西域沙门昙摩持诵胡本，竺佛念译出。《比丘尼大戒》一卷

右一部，凡一卷。晋简文帝时，沙门释僧纯于西域夷国得胡本，到关中，令竺佛念、昙摩持、慧常共译出。

《摩诃钵罗若婆罗蜜经抄》五卷（一名《长安品经》，或云《摩诃般若婆罗密经》。伪秦苻坚建元十八年出。）

右一部，凡五卷。晋简文帝时，天竺沙门昙摩蜚执胡《大品》本，竺佛念译出。

《杂阿毗昙毗婆沙》十四卷（伪秦建元十九年四月出，至八月二十九日出讫。或云《杂阿毗昙心》。）

《婆须蜜集》十卷（建元二十年三月十五日出，至七月十三日出讫。）《僧伽罗刹集经》三卷（秦建元二十年十一月三十日出。）

右三部，凡二十七卷。晋孝武帝时，罽宾沙门僧伽跋澄，以苻坚时入长安。跋澄口诵《毗婆沙》，佛图罗刹译出。又赍《婆须蜜》胡本，竺佛念译出。

《四阿含暮抄经》二卷

右一部，凡二卷。晋孝武帝时，西域沙门鸠摩罗佛提于邺寺出。佛提执胡本，竺佛念、佛护为译，僧导、僧睿笔受。《三十七品经》一卷（晋太元二十年，岁在丙申，六月出。）

《贤劫千佛名经》一卷

右二部，凡二卷。晋孝武帝时，天竺沙门竺昙无兰在扬州谢镇西寺撰出。

《增一阿含经》三十三卷（秦建元二十年夏出，至二十一年春讫。定三十三卷，或分为二十四卷。）《中阿含经》五十九卷（同建元二十年出。）

右二部，凡九十二卷。晋孝武时，兜佉勒国沙门昙摩难提，以苻坚时入长安。难提口诵胡本，竺佛念译出。《出曜经》十九卷《菩萨瓔珞经》十二卷

《十住断结经》十一卷《菩萨处胎经》五卷（一名《胎经》。或为四卷。）《中阴经》二卷（阙。）

《王子法益坏目因缘经》一卷（或云《阿育王息坏目因缘经》。）

右六部，凡五十卷。晋孝武帝时，凉州沙门竺佛念，以苻坚时于关中译出。

《中阿含经》六十卷（晋隆安元年十一月十日于东亭寺译出，至二年六月二十五日讫。与昙摩难提所出本不同。）

《阿毗昙八揅度》二十卷（一名《迦旃延阿毗昙》。建元十九年出。）《阿毗昙心》十六卷（或十三卷。苻坚建元末于洛阳出。）《鞞婆沙阿毗昙》十四卷（一名《广说》，同在洛阳译出。）

《阿毗昙心》四卷（晋太元十六年在庐山为远公译出。）《三法度》二卷（同以太元十六年于庐山出。）

右六部，凡一百一十六卷。晋孝武帝及安帝时，罽宾沙门僧伽提婆所译出。

《新大品经》二十四卷（伪秦姚兴弘始五年四月二十三日于逍遥园译出，至六年四

月二十三日讫。)

《新小品经》七卷(弘始十年二月六日译出,至四月二十日讫。)
《新法华经》七卷(弘始八年夏于长安大寺译出。)
《新贤劫经》七卷(今阙。)

《华首经》十卷(一名《摄诸善根经》。)
《新维摩诘经》三卷(弘始八年于长安大寺出。)
《新首楞严经》二卷
《十住经》五卷(或四卷,定五卷。什与佛驮耶舍共译出。)

《思益义经》四卷(或云《思益梵天问经》。)
《持世经》四卷(或三卷。)
《自在王经》二卷(弘始九年出。)
《佛藏经》三卷(一名《选译诸法》。或为二卷。)

《菩萨藏经》三卷(一名《富楼那问》,亦名《大悲心》。或为二卷。)
《称扬诸佛功德经》三卷(一名《集华》。)
《无量寿经》一卷(或云《阿弥陀经》。)

《弥勒下生经》一卷
《弥勒成佛经》一卷
《金刚般若经》一卷(或云《金刚般若婆罗蜜经》。)
《诸法无行经》一卷

《菩提经》一卷(或云《文殊师利问菩提经》。)
《遗教经》一卷(或云《佛垂般泥洹略说教戒经》。)
《十二因缘观经》一卷(阙本。)
《菩萨呵色欲经》一卷

《禅法要解》二卷(或云《禅要经》。)
《禅经》三卷(一名《菩萨禅法经》,与《坐禅三昧经》同。)
《杂譬喻经》一卷(比丘道略所集。)
《大智论》百卷(于《逍遥园》译出。或分为七十卷。)

《成实论》十六卷
《十住论》十卷
《中论》四卷
《十二门论》一卷

《百论》二卷(弘始六年译出。)
《十诵律》六十一卷(已入律录。)
《十诵比丘戒本》一卷
《禅法要》三卷(弘始九年闰月悬殊日重校正。)

右三十五部,凡二百九十四卷。晋安帝时,天竺沙门鸠摩罗什以伪秦姚兴弘始三年至长安,于大寺及逍遥园译出。《长阿含经》二十二卷(秦弘始十五年出,竺佛念传译。)

《昙无德律》四十五卷(已入律录。)

《虚空藏经》一卷(或云《虚空藏菩萨经》。三藏后还外国,于罽宾得此经,附商人送至凉州。)
《昙无德戒本》一卷

右四部，凡六十九卷。晋安帝时，罽宾三藏法师伏驮耶舍，以姚兴弘始中于长安译出。《舍利弗阿毗昙》二十二卷（或二十卷。）

右一部，凡二十二卷。晋安帝时，外国沙门毗婆沙，为姚兴于长安石羊寺译出。

《大般涅槃经》三十六卷（伪河西王沮渠蒙逊玄始十年十月二十三日译出。）

《方等大集经》二十九卷（或云《大集经》。玄始九年译出。或三十卷，或二十四卷。）

《方等王虚空藏经》五卷（或云《大虚空藏经》。检经文与《大集经》第八《虚空藏品》同，未详是别出者不？《别录》云，何南国乞佛时沙门释圣坚译出。）

《方等大云经》四卷（或云《方等无想大云经》。或为六卷。玄始六年九月出。）
《悲华经》十卷（《别录》或云龚上出。玄始八年十二月出。）《金光明经》四卷（玄始六年五月出。）

《海龙王经》四卷（玄始七年正月出。）

《菩萨地持经》八卷（或云《菩萨戒经》，或云《菩萨地经》。玄始七年十月初一日出。）《菩萨戒本》一卷（《别录》云，敦煌出。）《优婆塞戒》七卷（玄始六年四月十日出。）

《菩萨戒经》八卷《菩萨戒优婆塞戒坛文》一卷（玄始十年十二月出。）

右十一部，凡一百一十七卷。晋安帝时，天竺沙门昙摩讖至西凉州，为伪河西王大沮渠蒙逊译出。（或作昙无讖。）《阿毗昙毗婆沙》六十卷（丁丑岁四月出，至己卯岁七月讫。）

右一部，凡六十卷。晋安帝时，凉州沙门释道泰，共西域沙门浮陀跋摩，于凉州城内苑闲豫宫寺译出。初出一百卷，寻值凉王大沮渠国乱亡，散失经文四十卷，所馀六十卷，传至京师。

《宝梁经》二卷

右一部，凡二卷。晋安帝时，沙门释道龚出。（传云，于凉州出。）

《大方广佛华严经》五十卷（沙门支法领于于阗国得此经胡本，到晋义熙十四年三月十日，于道场寺译出，至宋永初二年十二月二十八日都讫。）《观佛三昧经》八

卷

《新无量寿经》二卷（永初二年于道场寺出。）

《禅经修行方便》二卷（一名《庾伽遮罗浮迷》，译言《修行道地》，一名《不净观经》。凡有十七品。）《大方等如来藏经》一卷（或云《如来藏》。今阙。）

《菩萨十住经》一卷《出生无量门持经》一卷《新微蜜持经》一卷（阙。）《本业经》一卷（阙。）

《净六婆罗蜜经》一卷（阙。）

《文殊师利发愿经》一卷（晋元熙二年，岁在庚申，于道场寺出。）

右十部，凡六十七卷。晋安帝时，天竺禅师佛驮跋陀至江东，及宋初于庐山及京都译出。《大般泥洹经》六卷（晋义熙十三年十一月一日，道场寺译。）

《方等泥洹经》二卷（今阙。）《摩诃僧祇律》四十卷（已入律录。）《僧祇比丘戒本》一卷（今阙。）《杂阿毗昙心》十三卷今阙。）

《杂藏经》一卷《楞经》（梵文，未译出。）《长阿含经》（梵文，未译。）《杂阿含经》（梵文，未译。）

《弥沙塞律》（梵文，未译。）《萨婆多律抄》（梵文，未译。）《佛游天竺记》一卷

右十一部，定出六部，凡六十三卷。晋安帝时，沙门释法显以隆安三年游西域，于中天竺、师子国得胡本，归京都，住道场寺。就天竺禅师佛驮跋陀共译出。其《长杂二阿含》、《楞经》、《弥沙塞律》、《萨婆多律抄》，犹是梵文，未得译出。

《方等檀持陀罗尼经》四卷（或云《大方等陀罗尼》，或云《檀持陀罗尼》。）右一部，凡四卷。晋安帝时，高昌郡沙门释法众所译出。《普门品经》一卷（阙。）

右一部，凡一卷。西域沙门祇多蜜所出。传云晋世出，未详何帝时。《决定毗尼经》一卷（一名《破坏一切心识》。）

右一部，凡一卷。众录并云于凉州敦煌出，未审译经人名。传云晋世出，未详何帝

时。

《新无量寿经》二卷（宋永初二年于道场寺出。一录云，于六合山寺出。）

《佛所行赞》五卷（一名《马鸣菩萨赞》，或云《佛本行赞》。六合山寺出。）右二部，凡七卷。宋孝武皇帝时，沙门释宝云于六合山寺译出。《观世音受记经》一卷

右一部，凡一卷。宋武帝时，黄龙国沙门昙无竭游西域译出。

《弥沙塞律》三十四卷（即释法显所得胡本，以宋景平元年七月译出。已入律录。）《弥沙塞比丘戒本》一卷（与律同时出。）《弥沙塞羯磨》一卷（与律同时出。）

右三部，凡三十六卷。宋荥阳王时，沙门竺道生、释慧严，请罽宾律师佛驮什于京都龙光寺译出。《杂阿毗昙心》十三卷（今阙。）

右一部，凡十三卷。宋文帝时，西域沙门伊叶波罗，以元嘉三年为北徐州刺史王仲德于彭城译出，至《择品》未竟。至八年，更请三藏法师于京都校定。

《菩萨善戒》十卷（或云《菩萨地》。十卷。）《优婆塞五戒略论》一卷（一名《优婆塞五戒相》。）《三归及优婆塞二十二戒》一卷（或云《优婆塞戒》。）

《昙无德羯磨》一卷（或云《杂羯磨》。）

右四部，凡十三卷。宋文帝时，罽宾三藏法师求那跋摩于京都译出。

《杂阿毗昙心》十四卷（宋元嘉十年于长干寺出，宝云传译，其年九月讫。）

《摩得勒伽经》十卷（宋元嘉十二年乙亥岁正月于秣陵平乐寺译出，至九月二十二日讫。）《分别业报略》一卷（大勇菩萨撰。）《劝发诸王要偈》一卷（龙树菩萨撰。）

《请圣僧浴文》一卷（阙。）

右五部，凡二十七卷。宋文帝时，天竺三藏法师僧伽跋摩于京都译出。

《观普贤菩萨行法经》一卷（或云《普贤观经》，下注云，出《深功德经》中。）《虚空藏观经》一卷（或云《观虚空藏菩萨经》。）

《禅秘要》三卷（元嘉十八年译出。或云《禅法要》。或五卷。）《五门禅经要用法》一卷

右四部，凡六卷。宋文帝时，罽宾禅师昙摩蜜多，以元嘉中于祇洹寺译出。《普耀经》六卷《四天王经》一卷

《广博严净经》四卷（或云《广博严净不退转轮经》。）

右三部，十一卷。宋文帝时，沙门释智严，以元嘉四年共沙门宾云译出。《般泥洹经》二十卷（阙。）《摩诃僧祇律》一部（梵本，未译出。）

右二部，定出一部，凡二十卷。宋文帝时，沙门释智猛游西域还，以元嘉中于西凉州译出《泥洹经》一部，至十四年赍还京都。《贤愚经》十三卷（宋元嘉二十二年出。）

右一部，凡十三卷。宋文帝时，凉州沙门释昙学、威德于阗国得此经胡本，于高昌郡译出。（天安寺释弘宗传。）《杂阿含经》五十卷（宋元嘉中于瓦官寺译出。）

《大法鼓经》二卷（东安寺译出。）《胜鬘经》一卷（丹阳郡译出。）《八吉祥经》一卷（元嘉二十九年正月十三日于荆州译出。）《楞伽阿跋多罗宝经》四卷（道场寺译出。）

《央掘魔罗经》四卷（道场寺译出。）《过去现在因果经》四卷（宋元嘉中译。）《相续解脱经》二卷（东安寺译出。）《第一义五相略》一卷（东安寺译出。）

《释六十二见经》一卷（阙。）《泥洹经》一卷（似即一卷《泥日经》。阙。）《无量寿经》一卷（阙。）《现在佛名经》三卷

《无忧王经》一卷（阙。）

右十四部，凡七十六卷。宋文帝时，天竺摩诃乘法师求那跋陀罗，以元嘉中及孝武时宣出诸经，沙门释宾云及弟子菩提法勇传译。

《观弥勒菩萨上生兜率天经》一卷（或云《观弥勒菩萨经》，或云《观弥勒经》。）《观世音经》一卷《禅要秘密治病经》二卷（宋孝建二年于竹园寺译出。）

《佛母般泥洹经》一卷（孝建二年于钟山定林上寺译出。一名《大爱道般泥洹经》。）

右四部，凡五卷。宋孝武帝时，伪河西王从弟沮渠安阳侯于京都译出。前二观先在高昌郡久已译出，于彼赍来京都。

《念佛三昧经》六卷（宋大明六年译出。或云《菩萨念佛三昧经》。）

《破魔陀罗尼经》一卷（或云《无量门破魔陀罗尼经》。大明六年译出。）

右二部，凡七卷。宋孝武帝时，西域沙门功德直至荆州，沙门释玄畅请于禅房译出。《十诵羯磨》一卷（或云《略要羯磨法》，《十诵律》出。）右一部，凡一卷。宋景和中，律师释僧璩于京都撰出。

《十诵比丘尼戒本》一卷（或云《十诵比丘尼大戒》。）《十诵律羯磨杂事》一卷右二部，凡二卷。宋明帝时，律师释法颖于京都撰出。《海意经》七卷（阙。）

《如来恩智不思議经》五卷（阙。）《宝顶经》五卷（阙。）《无尽意经》十卷（阙。）《三密底耶经》一卷（汉言《贤人用律》。阙。）

右五部，凡二十八卷。宋明帝时，天竺沙门竺法眷于广州译出，并未至京都。《杂宝藏经》十三卷（阙。）《付法藏因缘经》六卷（阙。）

《方便心论》二卷（阙。）

右三部，凡二十一卷。宋明帝时，西域三藏吉迦夜于北国，以伪延兴二年，共僧正释昙曜译出，刘孝标笔受。此三经并未至京都。《无量义经》一卷

右一部，凡一卷。齐高帝时，天竺沙门昙摩伽陀耶舍译出。《五百本生经》（未详卷数。阙。）《他略利》（齐言《宿德律》。未详卷数。阙。）右二部，齐琥皇帝时，外国沙门大乘于广州译出，未至京都。

《善见毗婆沙律》十八卷（或云《毗婆沙律》。齐永明七年出。）

右一部，凡十八卷。齐武帝时，沙门释僧猗于广州竹林寺，请外国法师僧伽跋陀罗译出。《观世音忏悔除罪咒经》一卷（永明八年十二月十五日译出。）

《妙法莲华经提婆达多品》第十二一卷

右二部，凡二卷。齐武皇帝时，先师献正游西域，于于阗国得《观世音忏悔咒》胡本。还京都，请瓦官禅房三藏法师法意共译出。自流沙以西，《妙法莲华经》并有《提婆达多品》，而中夏所传阙此一品。先师至高昌郡，于彼获本，仍写还京都。

今别为一卷。

《百句譬喻经》十卷（齐永明十年九月十日译出。或五卷。）右一部，凡十卷。齐武帝时，天竺沙门求那毗地于京都译出。《毗跋律》一卷

右一部，凡一卷。齐武帝时，沙门释法度出。《教戒比丘尼法》一卷

右一部，凡一卷。梁天监三年，钟山灵耀寺沙门释僧盛依《四分律》撰。《大智论抄》二十卷（一名《要论》。）

右一部，凡二十卷。晋安帝世，庐山沙门释慧远，以论文繁积，学者难省，故略要抄出。《虚空藏经》八卷右一部，凡八卷。宋武帝世，河南国乞伏时沙门圣坚出。

《十二因缘经》一卷（建武二年出。）《须达长者经》一卷（建武二年出。）都合四百五十部，凡一千八百六十七卷。新集条解异出经录第二

异出经者，谓胡本同而汉文异也。梵书复隐，宣译多变，出经之士，才趣各殊。辞有质文，意或详略，故令本一末二，新旧参差。若国言讹转，则音字楚夏；译辞格碍，则事义胡越。岂西传之踳驳，乃东写之乖谬耳。是以《泥洹》、《楞严》重出至七，《般若》之经，别本迺八。傍及众典，往往如兹。今并条目列入，以表同异。其异出杂经失译名者，皆附失源之录。《般若经》

支谶出《般若道行品经》十卷〔又〕出《古品遗日说般若》一卷竺朔佛出《道行经》一卷（《道行》者，《般若》抄也。）朱士行出《放光经》二十卷（一名《旧小品》。）

竺法护更出《小品经》七卷卫士度抄《摩诃般若波罗蜜道行经》二卷昙摩蜚出《摩诃钵罗若婆罗蜜经》五卷（一名《长安品经》。）鸠摩罗什出《新小品》二十四卷

〔又〕《小品》七卷右一经七人异出。《般泥洹经》支谶出《胡般泥洹经》一卷

支谦出《大般泥洹经》二卷竺法护出《方等泥洹经》二卷昙摩讖出《大般涅槃经》三十六卷释法显出《大般泥洹经》六卷

〔又〕《方等泥洹经》二卷释智猛出《泥洹经》二十卷求那跋陀罗出《泥洹经》一卷

右一经七人异出。其支谦《大般泥洹》与《方等泥洹》大同，昙摩讖《涅槃》与法显《泥洹》大同。其余三部并阙，未详同异。《法华经》

《旧录》有《萨昙分陀利经》，云是异出《法华》，未详谁出，今阙此经。竺法护出《正法华经》十卷鸠摩罗什出《新妙法莲华经》七卷

右一经三人出，其一经失译人名，已入失源录《首楞严经》支讖《首楞严》二卷支谦《首楞严》二卷

白延《首楞严》二卷竺法护更出《勇伏定》二卷（即更出《首楞严》。）竺叔兰《首楞严经》二卷鸠摩罗什新出《首楞严》二卷

《旧录》有《蜀首楞严》二卷（未详谁出。）

右一经七人出。其一经失译人名，已入失源录。◎维摩诘经支谦出《维摩诘》二卷竺法护出《维摩诘经》二卷

又出《删维摩诘》一卷竺叔兰出《维摩诘》二卷鸠摩罗什出《新维摩诘经》三卷右一经四人异出。

《无量寿经》支谦出《阿弥陀经》二卷竺法护出《无量寿》二卷（或云无量寿清净平等觉。）鸠摩罗什出《无量寿》一卷

释宝云出《新无量寿》二卷求那跋陀罗出《无量寿》一卷右一经五人异出。《道地经》

安世高出《大道地》二卷竺法护出《修行道地》七卷右一经二人异出。《普曜经》

竺法护出《普曜》八卷释智严出《普曜》六卷右一经二人异出。《贤劫经》

竺法护出《贤劫》十卷鸠摩罗什出《贤劫》七卷右一经二人异出。《海龙王经》

竺法护出《海龙王》四卷昙摩讖出《海龙王》四卷右一经二人异出。《中阿含经》

昙摩难提出《中阿含》五十九卷僧伽提婆出《中阿含》六十卷右一经二人异出。《楼炭经》

竺法护出《楼炭》五卷释法炬出《楼炭》六卷右一经二人异出。《微密持经》

支谦出《微密持》一卷佛驮跋陀出《微密持》一卷右一经二人异出。《大方等如来藏经》

释法炬出《大方等如来藏》一卷佛驮跋陀出《大方等如来藏》一卷右一经二人异出。《本业经》

支谦出《本业》一卷佛驮跋陀出《本业》一卷右一经二人异出。《十住经》

《鸠摩罗什》出《十追四卷《佛驮跋陀》出《菩萨十追一卷右一经二人异出。《超日明经》

竺法护出《超日明》二卷聂承远出《超日明》二卷（即删整护公所出者。）右一经二人异出。《般舟三昧经》

支谶出《般舟三昧》二卷竺法护出《般舟三昧》二卷右一经二人异出。《弥勒成佛经》

竺法护出《弥勒成佛》一卷鸠摩罗什出《弥勒成佛》一卷右一经二人异出。《观世音受决经》

竺法护出《光世音大势至受决经》一卷昙无竭出《观世音受记经》一卷右一经二人异出。《月明童子经》

支谦出《月明童子经》一卷竺法护出《月明童子经》一卷右一经二人异同。《普门经》

竺法护出《普门品》一卷祇多蜜出《普门品》一卷右一经二人异出。《鸯掘魔经》

竺法护出《鸯掘魔经》一卷求那跋陀罗出《鸯掘魔罗经》四卷右一经二人异出。《阿闍世王经》

支谶出《阿闍世王经》二卷竺法护更出《阿闍世王经》一卷右一经二人异出。《十二因缘经》

安世高出《十二因缘经》一卷竺法护出《十二因缘经》一卷右一经二人异出。《阿差末经》

支谦出《阿差末》二卷竺法护出《阿差末》四卷右一经二人异出。《禅经》

鸠摩罗什出《禅经》四卷〔又〕《禅法要解》二卷佛驮跋陀出《禅经》二卷昙摩蜜多出《禅法要》二卷

〔又〕《五门禅经要用法》一卷沮渠安阳侯出《禅要秘密治病经》二卷右一经四人异出。《虚空藏经》

昙摩讖出《方等王虚空藏》五卷昙摩蜜多出《虚空藏观》一卷圣坚出《虚空藏》五卷佛陀耶舍出《虚空藏经》一卷

右一经四人出。《譬喻经》安世高出《五阴譬喻》一卷竺法护出《譬喻三百首经》二十五卷（无别题，未详其名。）

释法炬出《法句譬喻》六卷求那毗地出《百句譬喻》十卷康法邃出《譬喻经》十卷右一经五人出。

《无尽意经》竺法护出《无尽意》四卷竺法眷出《无尽意》十卷昙摩讖《大集》后《无尽意》四卷

右一经三人出。《菩萨地持经》昙摩讖出《菩萨地持》八卷三藏求那跋摩出《菩萨善戒》十卷

右一经二人出。《比丘戒本》昙摩持诵出《十诵比丘戒本》一卷罗什出《十诵比丘戒本》一卷

佛驮耶舍出《昙无德戒本》一卷释法显出《僧祇比丘戒本》一卷佛驮什出《弥沙塞比丘戒本》一卷

右一经五人出。校众录，并云二百五十戒凡有六种异出。其一本无译名，入失源录中。《比丘尼戒》竺法护出《比丘尼戒》一卷（今阙。）

释僧纯出《比丘尼大戒》一卷释法颖撰《十诵比丘尼戒本》一卷觅历所传《大比丘尼戒》一卷（是疑经。今阙。）右一经四人出。

《阿毗昙》安民高出《阿毗昙五法》、《七法》二卷（今阙《七法》。）〔又〕《阿毗昙九十八法》一卷（阙。）僧伽跋摩出《阿毗昙毗婆沙》十四卷

〔又〕《阿毗昙心》四卷僧伽提婆出《阿毗昙毗婆沙》十四卷〔又〕《阿毗昙心》

十六卷天竺毗婆沙师出《舍利弗阿毗昙》二十二卷

浮陀跋摩出《阿毗昙毗婆沙》六十卷释法显出《杂阿毗昙心》十三卷伊叶波罗出《杂阿毗昙心》十三卷僧伽跋摩出《杂阿毗昙心》十四卷

《迦旃延阿毗昙心》二十卷（未详谁出，已入失源录。）右一经凡九人出。《成具光明经》支谶

支曜右一经二人异出。《法镜经》安玄

支谦右一经二人异出。《法句经》祇难

支谦右一经二人异出。一卷《无量寿经》鸠摩罗什

求那跋陀右一经二人异出。《长阿含经》佛驮耶舍

释法显右一经二人异出。《摩诃僧祇律》释法显

释智猛右一经二人异出。《小品》竺法护

鸠摩罗什右一经二人异出。《方等泥洹经》竺法护

释法显右一经二人异出。《长者须达经》安公《杂录》又有此经

求那毗地出

右一经二人异出。

卷三

新集安公古异经录第一新集安公失译经录第二新集安公凉土异经录第三新集安公关中异经录第四

新集律公分为五部记录第五新集律公为十八部记录第六

新集律来汉地四部记录第七

○新集安公古异经录第一

古异经者，盖先出之遗文也。寻《安录》自《道地要语》迄《四姓长者》，合九十有二经，标为古异。虽经文散逸，多有阙亡，观其存篇，古今可辨。或无别名题，取经语以为目，或撮略《四含》摘一事而立卷，名号质实，信古典矣。安公覩其古异，编之于末，佑推其岁远，列之于首。虽则失源，而旧译见矣。

《道地经中要语章》一卷（或云《小道地经》，今有此经。自此已下，不称有者，并阙本。）

《数练意章》一卷（《旧录》云，《数练经》。安公云，上二经出《生经》。佑案，今《生经》无此章名。）

《梵志頽波罗延问尊种经》一卷（《旧录》云，《頽波延问种尊经》。今有此经。）《菩萨道地经》一卷（安公云，出方等部中。）《颺披陀菩萨经》一卷（安公云，出方等部中。）

《五十五法诫经》一卷（或云《五十五法行》。）《一切义要》一卷《说善恶道经》一卷《爱欲声经》一卷（一本云《爱欲一声经》。）

《摩诃遮曷[A10E]经》一卷《天王下作猪经》一卷

《魔王入目犍兰腹经》一卷（一名《弊魔试摩诃目连经》《旧录》云，《魔王入目连腹中经》。今有此经。）《始造浴佛时经》一卷《十二贤者经》一卷（《旧录》云，《十二贤经》。）

《佛并父弟调达经》一卷（安公云，上十经出《阿毗昙》。）《忧堕罗迦叶经》一卷

《四部本文》一卷（安公云，上二经出《长阿含》。一本云，出《阿毗昙》。）《

中阿含本文》一卷（一本云，出《中阿含经》六十卷。）《七漏经》一卷（或云《七漏钞经》。）

《让德经》一卷《有贤者法经》一卷《摩诃厥弥难问经》一卷（或云《大厥弥经》。）《大本藏经》一卷

《说阿难持戒经》一卷《阿难问何因缘持戒见世间贫亦现道贫经》一卷《给孤独四姓家问应受施经》一卷《晓所诤不解结者经》一卷

《奇异道家难问住处经》一卷《奇异道家难问法本经》一卷《贤者手力经》一卷《八法行经》一卷

《杂阿含三十章》一卷《自见自知为能尽结经》一卷《有四求经》一卷《佛本行经》一卷

《河中大聚沫经》一卷（或云《水沫所漂经》，或云《聚沫譬经》。今有此经。）

《闻城譬经》一卷（《旧录》云，《闻城十二因缘经》，或云《贝多树下思惟十二因缘经》。今有此经。）《便贤者坑经》一卷（坑字或作旃。）

《自守亦不自守经》一卷（《旧录》云，《不自守》，或云《不自守意经》。今有此经。）《所非汝所经》一卷《两比丘得割经》一卷

《听施比丘经》一卷（或云《比丘听施经》。今有此经。）

《善马有三相经》一卷（《旧录》云，《马三相经》。今有此经。）

《马有八弊恶态经》一卷（或云《马有八态喻人经》。今有此经。）《道德舍利日经》一卷《舍利日在王舍国经》一卷《独居思惟自念止经》一卷

《问所明种经》一卷《欲从本相有经》一卷（或云《欲从本经》。）《独坐思惟意中生念经》一卷《佛说如是有诸比丘经》一卷

《比丘所求色经》一卷《佛说道有比丘经》一卷

《色为非常念经》一卷（安公云，自此上二十二经是《阿含》一卷。）《色比丘念本起经》一卷《佛说善恶意经》一卷《比丘一法相经》一卷

《有二力本经》一卷《有三力经》一卷《有四力经》一卷《人有五力经》一卷

《不闻者类相聚经》一卷（《旧录》云，《类相聚经》。）《天上释为故世在人中经》一卷《瓜头土经》一卷《身为无有反复经》一卷

《师子畜生王经》一卷《阿须伦子披罗门经》一卷《披罗门子名不侵经》一卷《生闻披罗门经》一卷（《旧录》云，《生闻梵志经》。）

《有?桑竭经》一卷《署杜乘披罗门经》一卷《佛在拘萨国经》一卷《佛在优堕国经》一卷

《是时自梵守经》一卷《有三方便经》一卷（《旧录》云，《三方便经》。）《披罗门不信重经》一卷《佛告舍日经》一卷

《四意止经》一卷（《旧录》云，《四意止本行经》。）

《说人自说人骨不知腐经》一卷（安公云，上四十五经出《杂阿含》。佑校此《杂阿含》，唯有二十五经，而注作四十五，斯岂传写笔散，故重画致谬欤。夫晋记之变三豕，鲁史之温五门，古贤其犹病诸，况佣写之人哉。）

《佛有五百比丘经》一卷《凡人有三事愚痴不足经》一卷

《佛诫诸比丘言我以天眼视天下人生死好丑尊者卑者经》一卷（安公云，此上三经出《中阿含》。）

《弥连经》一卷（《旧录》云，《弥兰经》。或作《弥莲》，出《六度集》。今有此经。）《阿鳩留经》一卷《忧多罗经》一卷

《梅檀调佛经》一卷《恶人经》一卷

《罗贫寿经》一卷（《旧录》云，《罗弥寿》。或云《那弥寿经》。）《梅檀树经》一卷（今有此经。）《难提和难经》一卷（或云《难提和罗经》。）

《四姓长者难经》一卷（《旧录》云，《四姓长者经》。）《誓佛经》一卷

右九十二部，凡九十二卷，是古典经。

○新集安公失译经录第二

佑校巡公《旧录》，其经有译名则继录上卷，无译名者则条目于下。寻《安录》自《修行本起》讫于《和达》，凡一百有三十四经，莫详其人。又《关》、《凉》二录，并阙译名，今总而次，列入失源之部。《安录》诚佳，颇恨太简，注目经名，撮题两字；且不列卷数，行间相接，后人传写，名部混糅。且朱点为标，朱灭则乱，循空追求，困于难了。斯亦珣璠之一玷也。且众录杂经，苞集逸异，名多复重，迭相散紊。今悉更删整，标定卷部，使名实有分，寻览无惑焉。

《修行本起经》二卷（安公言，南方近出，直益《小本起》耳。《旧录》有《宿行本起》，疑即此经。）

《菩萨道树经》一卷（或云《道树三昧经》，或云《私呵三昧经》，三名异，并同一本。）《八念经》一卷（《旧录》云，《阿那律八念经》。）《禅行三十七品经》一卷

《诸法本经》一卷《申日经》一卷（安公云，出《中阿含》。）《月光童子经》一卷《梵志孙陀耶致经》一卷（安公云，出《中阿含》。）

《枯树经》一卷（安公云，出《中阿含》。）《三十七品经》一卷（安公云，出律经。）《六净经》一卷（安公云，出律经。）《法律三昧经》一卷

《应行律》一卷《欢豫经》一卷《三十二相经》一卷（或云《菩萨三十二相经》。）《八十种好经》一卷

《演道俗经》一卷（《旧录》云，《演道俗业经》。）《黑氏梵志经》一卷《大道般泥洹经》一卷《颇多和多耆经》一卷

《罗云母经》一卷（或云《阿难多桓罗云母经》。）《五母子经》一卷《无垢贤经》一卷（或云《无垢贤女经》。）《八关斋经》一卷

《逝经》一卷（或云《菩萨逝经》。）

《生死变化经》一卷（或云《生死变识经》，一名《见正比丘经》。或云《见正经》。）《普明王经》一卷《文陀竭王经》一卷

《耶祇经》一卷《五福德经》一卷《末罗王经》一卷《分栴檀王经》一卷

《长者音悦经》一卷（或云《音悦经》，或云《长者悦音不兰迦叶经》。）《首达经》一卷（《旧录》云，《维先首达经》。）《梵皇经》一卷（或云《梵摩皇经》。）

《五百梵志经》一卷《僧大经》一卷（或云《佛大僧大经》。）《法常住经》一卷《大小谏王经》二卷（今有《谏王经》一卷，未详大校）

《波斯匿王经》一卷（或云《波耶匿王经》，或云《波斯匿王丧母经》。）《摩夷比丘经》一卷（或云《摩夷经》。）《栴陀越国王经》一卷

《迦叶戒经》一卷（或云《迦叶禁戒经》。）《摩达王经》一卷《五恐怖世经》一卷（《旧录》云，《五恐怖经》。）《进学经》一卷（或云《劝进学道经》。）

《四饭法经》一卷（或云《四饭法章》。）《梵摩难王经》一卷《师比丘经》一卷（或云《比丘师经》。）《十二死经》一卷

《五无反复经》一卷《等入法严经》一卷（或云《菩萨等入法严经》。）《治身经》一卷（《旧录》云，《佛治身经》。余录并同。）《治意经》一卷（《旧录》云，《佛治意经》。余录并同。）

《十善十恶经》一卷（安公云，出阿毗昙。）《阿难念弥经》一卷（安公云，出《中阿含》。）《兜调经》一卷（安公云，出《中阿含》。）

《四虺喻经》一卷（安公云，出《中阿含》。《旧录》云，《四虺经》，或作《四蛇经》。）《马有八态经》一卷（与《古异录马八弊恶态经》异本。）

《金色女经》一卷（安公云，出《阿毗昙》。）《太子须大经》一卷

《十梦经》一卷（安公云，出《阿毗昙》。《旧录》云，《舍卫国王十梦经》，或云《波斯匿王十梦经》，或云《舍卫国王梦见十事经》，或云《国王不黎先泥十梦经》，悉同一本。）

《长者辩意经》一卷（《旧录》云，《辩意长者经》。）《长者须达经》一卷（或云《须达经》。）《孝子报恩经》一卷（一名《孝子经》。）《孝子睽经》一卷（或《菩萨睽经》，或云《睽经》。）

《自爱不自爱经》一卷（《旧录》云，《自爱经》。）《长寿王经》一卷《萨和檀王经》一卷（出《六度集》。）《未生怨经》一卷

《须摩提女经》一卷《贤首夫人经》一卷（或云《贤首经》。）《七妇经》一卷《玉耶女经》一卷（或云《玉耶经》。）

《新岁经》一卷

《阿难八梦经》一卷（《旧录》云，《阿难七梦经》。众录并云《七梦》，是误作八字也。）《车匿本末经》一卷（或云《车匿经》。）《九色鹿经》一卷

《五苦章句经》一卷（一名《净除罪盖娱乐佛法经》，或云《五道章句经》。）《佛灭度后棺殓葬送经》一卷

《妇遇对经》一卷（《旧录》云，《妇人遇辜经》，或云《妇遇辜经》。）《罗芸忍辱经》一卷

《阿难邠坻四时施经》一卷（《旧录》云，《阿难邠祁四时布施经》。）《蜜蜂王经》一卷（出《六度集》。）

《呵调阿那含经》一卷（《旧录》云，《诃雕阿那含经》，或作《苛雕阿那含经》。）《戒德香经》一卷《鬼子母经》一卷

《内外六波罗蜜经》一卷（安公云，出方等部。一本云《内六波罗蜜经》。）

《小五浊经》一卷（《旧录》云，《小五浊世经》。或云《五浊世经》，或云《五浊世本》。）

《弗迦沙王经》一卷（一名《萍沙王五愿经》。安公云，出《中阿含》。）

《侏真陀罗所问宝如来经》二卷（或云《侏真陀罗所问宝如来三昧经》，或云《侏真陀罗经》。）

《迦旃偈经》一卷（《旧录》云，《比丘迦旃说法没偈经》，或云《迦旃延说法没尽偈百二十章》。）右九十二部，今并有其经。《七车经》一卷

《弥勒经》一卷（安公云，出《长阿含》。）

《阿拔经》一卷（安公云，出《长阿含》。或云《阿拔摩纳经》。）《七事经》一卷（安公云，出《长阿含》。）《堕蓝经》一卷（安公云，出《长阿含》。）

《海有八事经》一卷《坚心经》一卷《太子和休经》一卷（或云《私休经》。）

《分陀利经》一卷（《旧录》云，《萨芸芬陀利经》。或云是异出《法华经》。）

《无希望经》一卷（或云《无所希望经》，即是《象步经》之别名。）《内藏大方

等经》一卷

《难等各第一经》一卷（《旧录》云，《阿难迦叶舍利弗说各第一经》。）

《胎中女经》一卷（一名《腹中女听经》，或云《阿罗呵公女腹中听经》。）《小阿闍世经》一卷《普达王经》一卷

《小须赖经》一卷《贫女人经》一卷《惟留王经》一卷（《旧录》云，《惟流王经》。）《目佉经》一卷（安公云，出方等部。）

《理家难经》一卷《迦留多王经》一卷《梵志闍孙经》一卷（《古录》云，《梵志闍逊经》。）《波达王经》一卷

《抄宝积经》一卷《悲心悒悒经》一卷《趣度世道经》一卷《异了本生死经》一卷

《长者威势经》一卷

《咸水喻经》一卷（安公云，出《长阿含》。《旧录》云，《咸水譬喻经》。）《萨和达王经》一卷《痴注经》一卷

《弥勒当来生经》一卷《慧上菩萨经》二卷（慧上菩萨经即是《大善权经》。）《调达经》一卷《睽本经》一卷

《放钵经》一卷（安公云，出方等部。）《赖咤訶罗经》一卷（安公云，出《中阿含经》。）《马王经》一卷（出《六度集》。）《和达经》一卷（安公本录讫于此。）

《钵呿沙经》一卷《法海经》一卷《失利越经》一卷《分身舍利经》一卷

《以身施饿虎经》一卷《悉曇慕》二卷《吉法验》一卷《口传劫起瘞一卷

《仕行送大品本末》一卷《律解》一卷

《打犍椎法》一卷（从《钵呿沙经》至《打犍椎法》，凡十一部，先在《安公注经录》末，寻其间出，或是晚集所得，今移附此录焉。从《七车经》至《打犍椎法》凡五十部，今并阙此经。）

右一百四十二部，凡一百四十七卷，是失译经。新集安公凉土异经录第三《大忍辱

经》十《净行经》二卷

《金刚三昧经》一卷《蒺沙王经》一卷《有无经》一卷《五百偈》一卷

《须耶越国贫人经》一卷（《旧录》云，《须耶越国贫人赁剃头经》。）《浮木经》一卷《坏喻经》一卷《妖怪经》一卷

《首至问十四章经》一卷（《旧录》云，《首至问佛十四意经》。或云《首至问十四事》。今有此经。）《阿般计泥洹经》一卷（一本作《陶射计泥洹经》。）

《四非常经》一卷《五失盖经》一卷

《大爱道受戒经》二卷（《旧录》云，《大爱道》。或云大爱道比丘尼。今有此经。）《要真经》一卷《本无经》一卷

《劝德经》一卷《十五德经》一卷《父母因缘经》一卷《不退转经》四卷（或云《不退转法轮经》。）

《长者法志妻经》一卷（今有此经。）《金轮王经》一卷《慧行经》一卷《七智经》一卷（或作《七知》。今有此经。）

《未生王经》一卷《内外无为经》一卷《道净经》一卷《七事本末经》一卷（《旧录云》，《七事本行经》。）

《难龙王经》一卷（或云《难龙经》。今有此经。）《阿陀三昧经》一卷《百宝三昧经》一卷《三乘经》一卷

《耆域术经》一卷（《旧录》云，《耆域四术经》。）《五盖离疑经》一卷《太子智止经》一卷《大五浊经》一卷（《旧录》云，《大五浊世经》。）

《道德章经》一卷《苦相经》一卷《须佛得度经》一卷《由经》一卷

《须菩提品经》七卷（一本云法护出《道行经》，同本异出。）《三慧经》一卷《菩萨等行经》一卷《分然洹国迦罗越经》一卷

《四无畏经》一卷《五阴事经》一卷（今有此经。）《义决法事经》一卷

《权变经》一卷（《旧录》云，《文殊师利权变三昧经》，或云《权变三昧经》。）《十沕瑟经》一卷《贤劫五百佛名经》一卷

《七言禅利经》一卷（《旧录》云，《沕沕七言禅利经》。）《菩萨十沕沕经》一卷《十思惟经》一卷《分别六情经》一卷

《三失盖经》一卷《佛宝三昧经》一卷《法志女经》一卷《文殊师利示现宝藏经》二卷

右五十九部，凡七十九卷，是凉土异经。新集安公关中异经录第四

《阿难为蛊道咒经》一卷（《旧录》云，《阿难为蛊道所咒经》。）《堕落优婆塞经》一卷（今有此经。）《萨怛萨王经》一卷《菩萨本行经》一卷

《蓝达王经》一卷（一名《目连因缘功德经》，或云《目连功德经》。今有此经。）

《王舍城灵鹫山经》一卷（《旧录》云，《王舍城灵鹫山要直经》。）《阿多三昧经》一卷《思道经》一卷《人民求愿经》一卷（今有此经。）

《大珍宝积惟日经》一卷《陀贤王经》一卷《佛在竹园经》一卷《法为人经》一卷

《道意经》一卷《堕迦罗问菩萨经》一卷（今有此经。）《阿夷比丘经》一卷《毗陀悔过经》一卷

《太子辟罗经》一卷（《旧录》云，《天王太子辟罗经》。）《沙弥罗经》一卷《八德经》一卷《善德经》一卷

《方等决经》一卷

《摩诃提陀惟卫罗尽信比丘等度经》一卷（《旧录》云，《尽信比丘经》。）《比丘三事经》一卷

右二十四部，凡二十四卷，是关中异经。

○新集律分为五部记录第五△出《毗婆沙》

佛泥洹后，大迦叶集诸罗汉于王舍城安居，命优波离出律，八万法藏，有八十诵。初大迦叶任持，第二阿难，第三末田地，第四舍那波提，第五优波掘，至百一十馀年，传授不异。一百一十馀年后，阿育王出世，初大邪见，毁坏佛法，焚烧经书，僧众星散，故八十诵灰灭。后值罗汉，更生信心，忏悔除罪，甚有神图片，为铁轮

王，王阎浮提。能役鬼神，一日一夜坏舍利八塔，造八万四千塔，还兴显佛法，请诸罗汉诵出经律。时有五大罗汉，各领徒众弘通佛法，见解不同，或执开随制，共相传习，遂有五部出焉。十六大国随用并行，竞各进业，皆获道证。自非圣道玄通，孰能使之然乎。

后时五部异执，纷然竞起。阿育王言：“皆诵佛语，我今何以测其是非？”问僧：“佛法断事云何？”诸僧皆言：“法应从多。”阿育王即集五部僧共行筹。当尔时众取婆粗富罗部筹多，遂改此一部为摩诃僧祇。摩诃僧祇者，大众名也。若就今时此土行筹，便此《十诵律》名《摩诃僧祇》也。

《大集经》，佛记未来世当有此等律出世，与今事相应，立名不异也。又有《因缘经》说佛在世时，有一长者梦见一张白氎，忽然自为五段。惊诣佛所，请问其故。佛言：“此乃我灭度后，律藏当分为五部耳。”

○新集律分为十八部记录第六

佛灭度二百年后，萨婆多部分出婆蹉部。婆蹉部分又出三部：一者法盛，二者名贤，三者六成。弥沙塞部分出中间见。迦叶维部分出二部：一者僧伽提，二者式摩。（一本三摩提。）摩诃僧祇部，四百年时分出六部：一者维迹，二者多闻，三者施設，四者毗陀，五者施罗，六者上施罗。又一本昙无德部。（此十八部见有同异，文烦，不复备写。）

○新集律来汉地四部记录第七

昔甘露初开，经法是先，因事结戒，律教方盛。及氎梦表其五分，而毌多当其异部。故知道运推移，化缘不台矣。至于中夏闻法，亦先经而后律。律藏稍广，始自晋末。而迦叶维部犹未东被。既总集五家，故存其名录。若乃梵文至止之岁，胡汉宣译之人，大众讲集之处，名德书翰之文，并具举遗事，交相为证。使览者昭然，究其始末云尔。

萨婆多部《十诵律》六十一卷

萨婆多部者，梁言一切有也。所说诸法，一切有相，学内外典，好破异道，所集经书，说无有我所，受难能答，以此为号。昔大迦叶具持法藏，次传阿难，至于第五师优波掘。本有八十诵，优波掘以后世钝根，不能具受，故删为十诵。以诵为名，谓法应诵持也。自兹已下，师资相传五十余人。至秦弘始之中，有罽宾沙门弗若多罗，诵此《十诵》胡本，来游关右。罗什法师于长安逍遥国，三千僧中共译出之。始得二分，余未及竟而多罗亡。俄而有外国沙门昙摩流支，续至长安。于是庐山远法师慨律藏未备，思在究竟。闻其至止，乃与流支书曰：

佛教之兴，先行上国，自分流已来，近四百年，至于沙门德式，所阙犹多。顷西域道士弗若多罗者，是罽宾持律，其人诵《十诵》胡本。有鸠摩耆婆者，通才博见，为这传译。《十诵》之中，始备其二，多罗早丧，中涂而废。不得究竟大业，慨恨良深。传闻仁者斋此经自随，甚欣所遇，冥运之来，岂人事而已耶！想弘道为物，感时而动，叩之有人，必情无所恪。若能为律学之众留此经本，开示梵行，洗其耳目，使始涉之流，不失无上之津；参怀胜业者，日月弥朗。此则惠深德厚，人神同感矣！幸望垂怀，不孤往心。一二悉诸道人所具，不复多白。

昙摩流支得书，方于关中共什出所余律，遂具一部，凡五十八卷。后有罽宾律师卑摩罗叉来游长安，罗什先在西域，从其受律。罗叉后自秦适晋，住寿春石涧寺，重校《十诵律》本，名品遂正，分为六十一卷，至今相传焉。

昙无德《四分律》四十卷，或分为四十五卷。

昙无德者，梁言法镜，一音昙摩毬多。如来涅槃后，有诸弟子颠倒解义，覆隐法藏。以覆法故，名昙摩毬多，是为《四分律》，盖罽宾三藏法师佛陀耶舍所出也。初耶舍于罽宾诵《四分律》，不赍胡本，而来游长安。秦司隶校尉姚爽欲请耶舍于中寺安居。仍令出之。姚主以无胡本，难以证信，众僧多有不同，故未之许也。罗什法师劝曰：“耶舍甚有记功，数闻诵习，未曾脱误。”于是姚主即以药方一卷，民籍一卷，并可四十许纸，令其诵之三日，便集僧执文请试之。乃至铢两、人数、年纪，不谬一字。于是咸信伏，遂令出焉。故肇法师作《长阿含序》云：

秦弘始十二年，岁上章掩茂，右将军司隶校尉姚爽于长安中寺集名德沙门五百人，请罽宾三藏佛陀耶舍出律藏《四分》四十卷，十四年讫。十五年，岁昭阳奋若，出《长阿含》，凉州沙门佛念为译，秦国道士道含笔受。余以嘉运，猥参听次，虽无翼善之功，而预亲承之末。略记时事，以示来贤。

又答江东隐士刘遗民书，末云：

法师于大寺出新至诸经，法藏渊旷，日有异闻。禅师于瓦官寺教习禅道，门徒数百，夙夜匪懈，邕邕肃肃，致可欣乐。三藏法师于中寺出律，本末精悉，若睹初制。毗婆沙于石羊寺出《舍利弗阿毗昙》胡本，虽未及译，时问中事，发言奇新。贫道一生，预参嘉会，遇兹盛化，自不睹释迦祇洹之集，余复何恨！而恨不得与道胜君子同斯法集耳。故撮举肇公书序，以显其证焉。

《婆粗富罗律》四十卷

婆粗富罗者，受持经典，皆说有我，不说空相，犹如小儿，故名为婆粗富罗，比一名《僧祇律》。律后记云：

中天竺昔时暂有恶王御世，三藏比丘及诸沙门皆远避四奔。恶王既死，善王更立，还请沙门归国供养。时巴连弗邑有五百僧欲断事，既无律师，又阙律文，莫知承案，即遣使到祇洹精舍，写此律文，众共奉行。其后五部传集，诸律师扫义不同，各以相承为是，争论纷然。于是阿育王言：“我今何以测其是非？”于是问僧：“佛法断事云何？”皆言：“法应从多。”王言：“若尔，当行筹知何众多。”既而行筹，婆粗富罗众筹甚多。以众多故，改名摩诃僧祇。摩诃僧祇者，言大众也。沙门释法显游西域，于摩竭提巴连弗邑阿育王塔天王精舍写得梵本，赍还京都。以晋义熙十二年，岁次寿星，十一月，共天竺禅师佛驮跋陀于道场寺译出，至十四年二月未乃讫。

《弥沙塞律》三十四卷

弥沙塞者，佛诸弟子受持十二部经，不作地相，水、火、风相，虚空识相，是故名为弥沙塞部。此名为《五分律》，比丘释法显于师子国所得者也。《法显记》云：

显本求戒律，而北天竺诸国皆师师口传，无本可写。是以远涉，乃至中天竺，于摩诃乘僧伽蓝得一部律，是《摩诃僧祇》，复得一部抄律，可七千偈，是《萨婆多众律》，即此秦地众僧所行者也。又得《杂阿毗昙心》，可六千偈。又得一部《毘婆沙》，二千五百偈。又得一部《方等泥洹经》，可五千偈。又得《摩诃僧祇阿毗昙》。法显住三年，学梵书梵语，悉写之，于是还。又至师子国二年，更求得《弥沙塞律》梵本。

法显以晋义熙二年还都，岁在寿星，众经多译，唯《弥沙塞》一部未及译出而亡。到宋景平元年七月，有罽宾律师佛大什来至京都。其年冬十一月，郎耶王练、比丘释慧严、竺道生于龙光寺请外国沙门佛大什出之。时佛大什手执胡文，于阆沙门智胜为译，至明年十二月都讫。

《迦叶维律》未知卷数

迦叶维者，一音迦叶毗，佛诸弟子受持十二部经，说无有我及以受者，轻诸烦恼，犹如死尸，是故名为迦叶毗。此一部律不来梁地。昔先师献正远适西域，誓寻斯文，胜心所感，多值灵瑞。而葱岭险绝，弗果兹典。故知此律于梁土众僧，未有其缘也。

右五部，基仙部至中夏，凡一百有八十卷。部卷已入经录最限。

卷四

○新集续撰失译杂经录第一

佑总集众经，遍阅群录，新撰失译，犹多卷部，声实纷糅，尤难铨品。或一本数名；或一名数本；或妄加游字，以辞繁致殊；或撮半立题，以文省成异。至于书误益惑，乱甚棼丝，故知必也正名，于斯为急矣。是以讎校历年，因而后定。其两卷以上，凡二十六部，虽阙译人，悉是全典。其一卷已还，五百馀部，率抄众经，全典盖寡。观其所抄，多出《四含》、《六度》、《道地》、《大集》、《出曜》、《贤愚》及《譬喻》、《生经》，并割品截偈，撮略取义，强制名号，仍成卷轴。至有题目浅拙，名与实乖，虽欲启学，实芜正典，其为愆谬，良足深诫。今悉标出本经，注之目下，抄略既分，全部自显，使沿波讨源，还得本译矣。寻此录失源，多有大经，详其来也，岂天坠而地涌哉？将是汉、魏时来，岁久录亡；抑亦秦、凉宣梵，成文届止；或晋、宋近出，忽而未详。译人之阙，殆由斯欤。寻大法运流，世移六代，撰注群录，独见安公，以此无源，未足怪也。夫十二部经，应病成药，而传法沦昧，实可怅叹！佑所以杼轴于寻，崎岖于纂录也。但陋学謏闻，多所未周，明哲大士，惠缝其阙，言贵拱璧，况法施哉！

《大方便报恩经》七卷《杂譬喻经》六卷（或云《诸杂譬喻经》。）《佛本行经》五卷《分别功德经》五卷（一名《增一阿含经疏》迦叶阿难造。）

《胡本经》四卷（似是长安中出。）《大智度无极经》四卷《道刘足无极变化经》四卷（一名《合道神足经》。）《罗摩伽经》三卷

《大方广如来性起微密藏经》二卷（或云《如来性起经》。）

《儒首菩萨无上清净分卫经》二卷（一名《决了·诸法如幻化三昧经》。）《菩萨璎珞本业经》二卷（或云《菩萨璎珞经》。）《诸经菩萨名》二卷

《诸经佛名》二卷《兴起行经》二卷《遗教三昧经》二卷（或云《遗教三昧法律经》。）《净度三昧经》二卷（或云《净度经》。）

《未曾有因缘经》二卷（或云《未曾有经》。）《大乘方便经》二卷《摩诃摩耶经》二卷（或云《摩耶经》。）《阿那含经》二卷

《益意经》二卷《那先经》二卷《旧譬喻经》二卷《杂譬喻经》二卷

《大比丘威仪经》二卷

《大比丘威仪经》二卷（异出本。此录先作异出，字误作吴出，今改正。）《观无量寿佛经》一卷《龙种尊国变化经》一卷

《过去香连华佛世界经》一卷《过去无边光净佛土经》一卷《东方善华世界佛座震动经》一卷《无量乐佛土经》一卷

《佛说往古性和佛国愿行法典经》一卷（抄。）《见水世界经》一卷（抄《大集经》。）《采华违王上佛授记妙华经》一卷（或云《采花违王经》。）

《佛说陀罗尼法门六种动经》一卷（抄。）《佛入三昧一毛放大光明经》一卷（抄。）《佛警欬彻十方经》一卷（抄《方等大集经》。）《佛见梵天顶经》一卷（抄。）

《佛迹见千辐轮相经》一卷（抄。）《佛脐化出菩萨经》一卷（抄。）《佛变时会身经》一卷（抄。）

《佛心总持经》一卷（与《生经》所出《心总持经》大同小异。）《佛以三事笑经》一卷（抄《六度集》。）《佛见牧牛者示道经》一卷《世尊系念经》一卷（抄《阿含经》。）

《如来神力经》一卷（抄《杂阿含经》。）

《作佛形像经》一卷（或云《优填王作佛形像经》，或云《作像因缘经》。）《有称十方佛名得多福经》一卷（抄。）《三千佛名经》一卷

《千佛因缘经》一卷《称扬诸佛功德经》一卷（抄三卷《称扬佛功德经》。）

《过去五十三佛名经》一卷（出《药王药上观》，亦出《如来藏经》。）《五十三佛名经》一卷《三十五佛名经》一卷（出《决定毗尼经》。）《八部佛名经》一卷

《十方佛名经》一卷

《贤劫千佛名经》一卷（唯有佛名，与昙无兰所出《四谛经》千佛名异。）《称扬百七十佛名经》一卷（或云《百七十佛名经》。）《德内丰严王佛名经》一卷（抄。）

《南方佛名经》一卷（冶地硅经。）《灭罪得福佛名经》一卷《观世音求十方佛各为授记经》一卷（抄。）《观世音所说行法经》一卷（是咒经。）

《光世音经》一卷（出《正法华经》，或云《光世音普门品》。）《观世音经》一卷（出《新法华》。）

《观药王药上二菩萨经》一卷（或云《药王药上二菩萨观经》，或云《药王药上观经》。）

《请观世音经》一卷（一名《请观世音菩萨消伏毒害陀罗尼咒经》。）《文殊师利授记经》一卷（抄。）《文殊师利般涅槃经》一卷《濡首童真经》一卷

《弥勒菩萨本愿待时成佛经》一卷（抄。）《弥勒下生经》一卷（异出本。）《弥勒为女身经》一卷《大光明菩萨百四十八愿经》一卷（抄。）

《无言菩萨流通法经》一卷（抄《大集经》。）《虚空藏菩萨问持经几福经》一卷（抄。）《寂调音所问经》一卷（一名《如来所说清净调伏》。）

《大云蜜藏菩萨问大海三昧经》一卷（抄《方等大云经》。）《宝日光明菩萨问连华国相貌经》一卷（抄。）《功德宝光菩萨问护持经》一卷（抄。）

《师子步雷音菩萨问文殊成佛时经》一卷（抄。）《师子步雷音菩萨问文殊师利发心经》一卷（抄。）《自在王菩萨问如来警戒经》一卷（抄。）《萨陀波沦菩萨求深般若图像经》一卷

《无垢施菩萨分别应辩经》一卷（即是异出《离垢经》。）《光昧菩萨造七宝梯经》一卷（抄《方等大集经》。）《三曼陀颺字母罗菩萨经》一卷

《寂意菩萨问五浊经》一卷（抄。）《无言菩萨经》一卷（抄《方等大集经》。）《儒童菩萨经》一卷（抄《六度集》。或云《儒童经》。）异出《菩萨本起经》一卷

《菩萨十住行道品经》一卷（抄。）《菩萨十法住经》一卷《菩萨十道地经》一卷《大方广菩萨十地经》一卷（与护公所出《十地》大同小异。）

《菩萨缘身五十事经》一卷（与《五十缘身行》大同小异。）《菩萨三法经》一卷（抄。）《菩萨五法行经》一卷（抄。）《菩萨六法行经》一卷（抄。）

《菩萨生地经》一卷《菩萨所生地经》一卷《菩萨戒自在经》一卷（抄。）《菩萨戒要义经》一卷（抄《菩萨戒》。）

《菩萨戒经》一卷（异出本，似抄。）《菩萨受戒法》一卷（异出。）《受菩萨戒

次第十法》一卷《菩萨戒独受坛文》一卷

《菩萨初发心经》一卷（抄。）《菩萨求佛本业经》一卷《菩萨庄严瓔珞经》一卷（抄。）《菩萨本愿经》一卷（抄。）

《菩萨本愿行品经》一卷（抄。）《菩萨出要行无碍法门经》一卷（抄。）《菩萨导行经》一卷（抄。）《菩萨诸若行经》一卷（抄。）

《菩萨宿命经》一卷《菩萨奉施诣塔作愿念经》一卷（抄。）《菩萨如意神通经》一卷（抄。）《菩萨忏悔法》一卷

《菩萨忏悔法》一卷（异本。）《菩萨受斋经》一卷《菩萨布施忏悔法》一卷（抄《决定毗尼经》。）《菩萨以明离鬼妻经》一卷（出《六度集》。）

《菩萨求五眼法》一卷（或云《五眼文》。）《菩萨呵家过经》一卷（抄。）《菩萨呵睡眠经》一卷（抄。）《初发意菩萨行易行法》一卷（出《十住论易行品》。）

《初发意菩萨常昼夜六时行五事经》一卷《六菩萨名经》一卷《迦叶赴佛泥洹经》一卷（或云《佛般泥洹时迦叶赴佛经》。）《迦叶责阿难双度罗汉喻经》一卷（一名《迦叶诘阿难经》。）

《佛在慰迦叶病经》一卷《摩诃迦叶度贫母经》一卷《大迦叶遇尼乾子经》一卷（抄《长阿含》。）《舍利弗问宝女经》一卷（抄。）

《舍利弗叹宝女说不可思议经》一卷《舍利弗等比丘得身作证经》一卷《舍利弗般泥洹经》一卷（出《生经》。）《目连降龙经》一卷（或云《降龙王经》，或云《降龙经》。）

《目连弟布施望即报经》一卷（抄。）《阿难同学经》一卷（抄《阿含》。）《阿难见水光瑞经》一卷（抄。）《阿难见妓乐啼哭无常经》一卷（抄《阿含》。）

《阿难同事佛吉凶经》一卷（或云《阿难问事经》。）《阿难惑经》一卷（抄《人本欲生经》。）《佛命阿难诣最胜长者经》一卷（抄。）《迦旃延无常经》一卷（出《生经》。）

《阿那律思目连神力经》一卷（抄。）《阿那律七念章经》一卷《请般特比丘经》一卷《请宾头卢法》一卷

《尊者薄拘罗经》一卷（抄《中阿含》。）《婆拘卢答异学问经》一卷（抄。）《尊者瞿低迦独一思惟经》一卷（抄《阿含》。）《优陀夷坐树下寂静调伏经》一卷（抄《阿含》。）

《罗汉迦留陀夷经》一卷《罗汉遇瓶沙王经》一卷（抄《阿含》。）《央掘魔罗归化经》一卷（抄。）《佛降央掘魔人民欢喜经》一卷（抄。）

《央掘魔悔过法经》一卷（抄。）《帝释施央掘魔法服经》一卷（抄。）《鸯掘髻经》一卷（抄。）《鸯掘魔母因缘经》一卷（抄。）

《罗旬逾经》一卷《浮弥经》一卷（抄《增一阿含》。）《和难释经》一卷（出《生经》。）《和难经》一卷（出《生经》。）

《难提释经》一卷《金师精舍尊者病经》一卷（抄。）《调达问佛颜色经》一卷（抄《六度集》。）《波利比丘谤梵行经》一卷（抄。）

《阿梵和利比丘无常经》一卷（抄。）《阿梵和利比丘无常经》一卷（抄。）《摩诃比丘经》一卷（抄。）《瞻婆比丘经》一卷（抄。）

《拘提比丘经》一卷（抄。）《聪明比丘经》一卷（抄。）《善呗比丘经》一卷《深浅学比丘经》一卷（抄。）

《大悲比丘本愿经》一卷（抄。）《沙曷比丘功德经》一卷（《旧录》云，《沙曷比丘经》。）《差摩比丘喻重病经》一卷（抄《杂阿含》。）《坐禅比丘命过生天经》一卷（抄《出曜经》。）

《分卫比丘经》一卷（出《生经》。）《比丘各言志经》一卷（出《生经》。）《比丘疾病经》一卷（出《生经》。）《比丘求证人经》一卷（抄。）

《比丘于色厌离经》一卷（抄《阿含》。）《比丘问佛何故舍世学道经》一卷（抄《出曜经》。）《比丘避女恶名欲自杀经》一卷（抄。）《比丘问佛多优婆塞命终经》一卷（抄《中阿含》。）

《佛为比丘说三法经》一卷（抄。）《佛为比丘说大力经》一卷（抄。）《佛为比丘说极深险处经》一卷（抄。）《佛为比丘说烧头喻经》一卷（抄《杂阿含》。）

《佛为诸比丘说莫思惟世间思惟经》一卷《佛为年少比丘说正事经》一卷（抄。）《佛看比丘病不受长者请经》一卷（抄《出曜经》。）《佛度旃陀罗儿经》一卷

《大力士出家得道经》一卷（一名《力士跋陀经》。抄《杂阿含》。）《猎师舍爱学道经》一卷（抄《出曜经》。）《长者子六过出家经》一卷（抄《出曜经》。）

《二老男女见佛出家得道经》一卷（抄。）

《泥洹后诸比丘经》一卷（或云《小般泥洹经》，或云《泥洹后变记经》，或云《泥洹后比丘世变经》，或云《佛般泥洹后比丘世变经》。）《外道出家经》一卷（抄。）

《出家缘经》一卷《泥洹后千岁中变记》一卷（或云《千岁变经》。）《真伪沙门经》一卷（或云《真伪经》。）《窃为沙门经》一卷（抄。）

《僧名数事行经》一卷《淳陀沙弥经》一卷《瞿昙弥经》一卷（抄。）《瞿昙弥记果经》一卷（抄。）

《佛母般泥洹经》一卷《比丘尼现变经》一卷（抄。）

《母子作比丘僧比丘尼意乱经》一卷（一名《学人意乱经》，出《增一阿含》。）《旃闍摩暴志谤佛经》一卷（出《生经》。）《优波离问佛经》一卷

《比丘诸禁律》一卷《沙弥十戒经》一卷（《旧录》云，《沙弥戒》。）《沙弥威仪》一卷《沙弥尼戒》一卷

《比丘尼止戒经》一卷《受十善戒经》一卷

《摩诃僧祇部比丘随用要集法》一卷（或云《摩诃僧祇律比丘要集》。）《清信士阿夷扇持经》一卷（出《生经》。）《释种问优婆塞经》一卷（抄《阿含》。）

《优婆塞五法经》一卷（抄。）《贤者五福经》一卷《贤者五戒经》一卷（抄。）《贤者威仪》一卷（或云《贤者威仪法》。）

《优婆塞五戒经》一卷《优婆塞威仪经》一卷《弟子学有三辈经》一卷（或云《三品弟子经》。）《弟子死复生经》一卷（或云《死已更生经》。）

《弟子为耆域术慢戒经》一卷《弟子过命经》一卷（出《生经》。）《弟子问事佛吉凶经》一卷《梵王变身经》一卷（抄。）

《梵天诣婆罗门讲堂经》一卷（抄。）《帝释礼三宝供养经》一卷（抄。）《天帝

《释受戒经》一卷（抄。）《释提醒因诣目连放光经》一卷（抄。）

《帝释慈心战胜经》一卷《天于阿脩罗欲斗战经》一卷（抄《长阿含》。）《诸天阿须伦斗经》一卷（抄《长阿含》。）《诸天阿须伦斗经》一卷（抄。）

《比丘问佛释提醒因因缘经》一卷（出《杂阿含》。）《比丘浴遇天子放光经》一卷（抄。）《明星天子问兹经》一卷（抄《方等大集》。）《悉鞞梨天子诣佛说偈经》一卷（抄《杂阿含》。）

《欢乐过差天经》一卷（抄《出曜经》。）《三十三天园观经》一卷（抄《增一阿含》。）《四天王经》一卷（后有咒，似后人所附。）《四天王案行世间经》一卷

《诸天经》一卷（《旧录》云，《诸天事经》。）《天神禁宝经》一卷（抄《义足》。）《诸天问如来警戒不可思议经》一卷（抄《方等大集经》。）

《梵天策经》一卷（异出本。）《魔王变身经》一卷（抄。）《魔烧乱经》一卷（与《魔王试目连》大同小异。）《魔王入苦宅经》一卷（抄《方等大集》。）

《魔作不净色欲烧乱经》一卷（抄《阿含》。）《魔化比丘经》一卷（《旧录》云，《魔比丘经》。）《魔化年少诣佛产偈经》一卷（抄《杂阿含》。）

《魔女闻佛说法得男身经》一卷（抄《方等大集》。）《魔业经》一卷（抄。）《太白魔王坚集经》一卷（抄《方等大集》。）《佛弟子化魔子颂偈经》一卷（抄《方等大集》。）

《偈经》一卷（抄《大集》。）《开化魔经》一卷（抄《方等大集》。）《过魔法界经》一卷（抄《方等大集》。）《佛问阿须伦大海有减经》一卷（抄《阿含》。）

《转轮圣王七宝现世间经》一卷（抄。）《转轮圣王七宝具足经》一卷（抄。）《转轮圣王发心求净土经》一卷（抄。）《净饭王般泥洹经》一卷

《顶生王因缘经》一卷（《旧录》云，《顶生王经》。）《顶生王故事经》一卷《频毗婆王诣佛供养经》一卷（抄。）《阿闍世王问五逆经》一卷（抄。）

《阿闍世王问瞋恨从何生经》一卷（抄。）《阿闍世王受决经》一卷《韦提希子月夜问天人经》一卷（抄。）《波斯匿王乘佛神力到宝坊经》一卷（抄《方等大集》。）

《波斯匿王问何俗最乐经》一卷（抄《阿含》。）《波斯匿王诣佛有五威仪经》一卷（抄《阿含》。）《波斯匿王太后崩尘土全身经》一卷（抄《阿含》。）

《波斯匿王女命过诣佛经》一卷（抄《阿含》。）《琉璃王攻释子经》一卷《优填王经》一卷《阿育王获果报经》一卷（抄《杂阿含》。）

《阿育王于佛所生大敬信经》一卷（抄《杂阿含》。）《阿育王供养道场树经》一卷（抄《杂阿含》。）《阿育王施半阿摩勒果经》一卷（抄《杂阿含》。）

《一切施王所行檀波罗蜜经》一卷（或云《行檀波罗蜜经》。）《功德庄严王八万四千岁请佛经》一卷《镜面王经》一卷（出《六度集》。）《察微王经》一卷（出《六度集》。）

《摩天国王经》一卷（出《六度集》。）《桀贪王经》一卷（出《六度集》。）《捷陀王经》一卷《萨罗王经》一卷（抄。或云《萨罗国王》。）

《长寿王经》一卷（抄《出曜经》，非安公所载者。）《阿质王经》一卷《摩调王经》一卷（异出。）《惟楼王师子湏经》一卷（或云《惟楼师子湏譬喻经》。）

《国王五人经》一卷（出《生经》。）《国王成就五法久存于世经》一卷（抄《阿含》。）《国王厌世典经》一卷（抄《出曜经》。）

《舍头谏太子二十八宿经》一卷（《旧录》云，《舍头谏经》，一名《虎耳》。）《太子刷护经》一卷（抄。）《五百王子作净土愿经》一卷（抄。）

《调伏王子心经》一卷（抄《方等大集》。）《阿那邠祁化七子经》一卷（抄《阿含》。）《诲子经》一卷

《教子经》一卷（一名《须达教子经》。《旧录》云，《须达训子经》。）《福子经》一卷《二童子见佛说偈供养经》一卷

《三幼童经》一卷（抄。）《佛问四童子经》一卷（抄。）《五百幼童经》一卷（出《生经》。）《童子问佛乞食事经》一卷（抄《出曜经》。）

《童子善射术经》一卷（抄《出曜经》。）《逝童子经》一卷（与《菩萨逝经》大同小异。）《长寿童子病见世尊经》一卷（抄。）《小儿闻法即解经》一卷

《长者威施所问菩萨修行经》一卷（或云《菩萨修行经》，或云《长者修行经》。）《长者梨师达多兄弟二人诣世尊经》一卷（抄《中阿含》。）《长者贤首经》一

卷

《长者夜轮得非常观经》一卷（抄《出曜经》。）《长者命终生无热天经》一卷（抄《杂阿含》。）《长者命终生兜率天经》一卷（抄《阿含》。）

《长者诣佛说子妇不恭经》一卷（抄《阿含》。）《长者子制经》一卷《长者子懊恼三处经》一卷（或云《三处恼经》。）《长者命终无子付嘱经》一卷

《独富长者财物无付经》一卷（抄。）《悭贪长者经》一卷（抄。与《日杂经》大同。）《最胜长者受咒愿经》一卷《申越长者悔过供佛经》一卷（抄。）

《弃恶长者问菩萨法经》一卷（抄。）《质多罗长者请比丘经》一卷《佛为拘罗长者说根熟经》一卷（抄。）《佛神力求长者子经》一卷（抄。）

《树提摩纳发菩提心誓愿经》一卷（抄。）《郁伽居士见佛说法醒悟经》一卷（抄《阿含》。）《毗罗斯那居士五欲娱乐经》一卷（抄《阿含》。）

《十支居士八城人经》一卷（抄《中阿含》。）《篱车不放逸经》一卷（抄。）《无畏离车白阿难经》一卷（抄《中阿含》。）《七老婆罗门请为弟子经》一卷

《四咤婆罗门出家得道经》一卷（抄《阿含》。）《婆罗门虚伪经》一卷（抄《阿含》。）《婆罗门服白经》一卷（抄《阿含》。）《婆罗门通达论经》一卷（抄。）

《婆罗门解知众术经》一卷（抄《阿含》。）《婆罗门行经》一卷（抄《阿含》。）《婆罗门问佛布施得福经》一卷（抄。）《婆罗门子命终爱念不离经》一卷（抄《中阿含》。）

《婆罗门问世尊将来世有几佛经》一卷（抄。）《婆罗门避死经》一卷（抄《阿含》。）《豆遮婆罗门论议出家经》一卷（抄《杂阿含》。）《善德婆罗门求舍利经》一卷

《善德婆罗门问提婆达经》一卷《佛化火与婆罗门出家经》一卷（抄《杂阿含》。）《不与婆罗门等争讼经》一卷（抄。）《佛为婆罗门说四法经》一卷（抄。）

《佛为婆罗门说耕经》一卷（抄《杂阿含》。）《佛为老婆罗门说偈经》一卷（抄《杂阿含》。）《佛为黄竹园老婆罗门说学经》一卷（抄《中阿含》。）

《佛为频头婆罗门说像类经》一卷（抄。）《佛为年少婆罗门说知善不善经》一卷

（抄。）《佛为憍慢婆罗门说偈经》一卷（抄。）《佛为事火婆罗门说悟道经》一卷（抄《阿含》。）

《佛为阿支罗迦叶说自他作苦经》一卷（抄。）《佛为调马聚落主说法经》一卷（抄《阿含》。）《六师结誓经》一卷（抄。）《审裸形子经》一卷（出《生经》。）

《外道问佛斗战生天因缘经》一卷（抄《阿含》。）《外道问佛生欢喜天因缘经》一卷（抄《杂阿含》。）《佛将比丘优婆乞人游行遇外道说法经》一卷（抄。）

《佛为外道须深说离欲经》一卷（抄。）《外道诱质多长者经》一卷《外道仙尼说度经》一卷（抄。）《仙人说阿脩罗归化经》一卷（抄《阿含》。）

《仙人拔劫经》一卷（出《生经》。或云《仙人拔劫喻》。）《五仙人经》一卷（出《生经》。）《宝海梵志成就大悲经》一卷（抄。）《宝海梵志请如来经》一卷（抄。）

《无害梵志执志经》一卷《光华梵志经》一卷（出《生经》。）《梵志劝转轮王发菩提经》一卷（抄。）《梵志问佛师经》一卷

《梵志问世间减损经》一卷《梵志向佛说梦经》一卷（抄。）《志子死稻败经》一卷（抄。）《梵志避死经》一卷

《梵志观无常得解脱经》一卷《梵志丧女经》一卷

《佛闻解梵志阿颺经》一卷（抄《阿含》。或云《梵志阿颺》。）《降千梵志经》一卷（抄《阿含》。）《度梵志经》一卷（抄。）《梵志试火恩经》一卷（抄。）

《梵志计水净经》一卷（抄《阿含》。）《梵志经》一卷《宝女问慧经》一卷（抄四卷《宝女所出》。）《宝女问三十二相经》一卷（抄。）

《宝施女经》一卷（抄。）《?奈女经》一卷（抄《中阿含》。）《莲华女经》一卷《金色女经》一卷（异出本。）

《不庄校女经》一卷《七女本经》一卷《前世诤女经》一卷（出《生经》。）《三摩竭经》一卷（与《分猗檀王经》大同小异。）

《摩邹女经》一卷《摩邓女经》一卷（抄。与《摩邹女》同。）《女人欲炽荒迷经

》一卷（抄《出曜》。）《贫女为国王夫人经》一卷

《罗阅城人民请佛经》一卷（抄。）《释家毕罪经》一卷（出《生经》。）《过去鸣鼓人经》一卷（抄《杂阿含》。）《过去弹琴人经》一卷（抄。）

《杀身济贾人经》一卷（出《六度集》。）《杀龙济一国经》一卷（出《六度集》。）《堕珠海水中经》一卷（出《生经》。）《懈怠耕者经》一卷（《旧录》云，《懈怠耕儿经》。）

《商人脱贼难经》一卷（抄。）《商人子作佛事经》一卷（抄《长阿含》。）《昔有二人相爱敬经》一卷（抄《出曜》。）

《善生子经》一卷（《旧录》云，《善生子》一名异出《六向拜经》。）《尸迦罗越六向拜经》一卷（与护公《大六拜》事同辞异。）《世间强盗布施经》一卷（抄《增一阿含》。）

《舍卫人丧子发狂经》一卷（抄《阿含》。）《贫子得献身发狂经》一卷《乞儿发恶心经》一卷（抄。）《瓦师逃走经》一卷（抄《出曜》。）

《贫穷老公经》一卷（或云《贫老经》。）《老母经》一卷《孤母丧一子经》一卷《负为牛者经》一卷（出《生经》。）

《子命过经》一卷（出《生经》。）《二侨士经》一卷（抄《出曜》。）《阿邈达经》一卷《树提伽经》一卷

《鞞摩肃经》一卷（抄《中阿含》。）《夫那罗经》一卷《阿兰那经》一卷《那赖经》一卷（出《生经》。）

《那先经》一卷（异出本。）《大意经》一卷《释摩男本经》一卷《申日兜本经》一卷

《幢蓝本经》一卷（或云《幢蓝本文》。《别录》云，是异出《维蓝》。）《君臣经》一卷（出《生经》。）《夫妇经》一卷（抄《生经》。）

《舅甥经》一卷（出《生经》。）《越难经》一卷《日难经》一卷（即是《越难经》，后说事小异。）《鹦鹉经》一卷（抄《中阿含》。）

《菩萨身为鸽王经》一卷（出《六度集》。）《水牛王经》一卷（出《生经》。）《鹿王经》一卷（或云《佛说昔为鹿王经》。）《兔王经》一卷（出《生经》。）

《拘萨罗国乌王经》一卷（出《生经》。）《雀王经》一卷（出《六度集》。）《孔雀经》一卷（出《生经》。）《野鸡经》一卷（出《生经》。）

《鹰鹞猎经》一卷（抄。出《增一阿含经》。）《罗婆鸟鹰所捉经》一卷（抄。）《鷄鸟事经》一卷（抄《阿含》。）《河中草龟经》一卷（抄。）

《大鱼事经》一卷（抄。）《三鱼失水经》一卷《雪山无猴猿经》一卷（抄。）《暴象经》一卷（抄。）

《赤?隼乌经》一卷（或云《赤乌喻经》。）《蛊狐乌经》一卷（出《生经》。）《三种良马经》一卷（抄。）《四种良马经》一卷（抄《阿含》。）

《群牛千头经》一卷（抄。）《牧牛经》一卷《犊子经》一卷《驴驼经》一卷（抄。）

《?乐狗齿王经》一卷（《旧录》云，《?乐狗经》。）《獠狗经》一卷（与《獠狗》同。）《度脱狗子经》一卷（或云《度狗子经》。）《猴猕与婢戏致变经》一卷

《憨猕猴经》一卷（出《生经》。）《瞎憨经》一卷（抄。）《王后为蜣螂经》一卷《居士物故为妇鼻虫经》一卷

《蛇行法经》一卷（抄《阿含》。）《鬼问目连经》一卷《目连见众生身毛如箭经》一卷（抄《杂阿含》。）《见一众生举体糞秽涂身经》一卷（抄《杂阿含》。）

《众生顶有铁磨盛火炽然经》一卷（抄《杂阿含》。）《佛为诃到旷野鬼说法经》一卷（抄《阿含》。）《铁城泥犁经》一卷《泥犁经》一卷（或云《中阿含泥犁经》。）

《勤苦泥犁经》一卷《十八泥犁经》一卷（抄。）《四泥犁经》一卷《地狱经》一卷

《地狱众生相害经》一卷（抄。）《地狱罪人众苦事经》一卷（抄。）《佛为比丘说大热地狱经》一卷（抄。）《罪业报应教化地狱经》一卷

《摩诃乘精进度中罪报品》一卷《十法成就恶业入地狱经》一卷（抄。）《比丘成

就五法入地狱经》一卷（抄《阿含》。）

《调达入地狱经》一卷（抄《中阿含》。或云《调达入地狱事》。）《调达生身入地狱经》一卷（抄《出曜》。）《夺那祇全身入地狱经》一卷（抄。）

《琉璃王生身入地狱经》一卷（抄。）《阎王五天使者经》一卷（《旧录》云，《阎王五使者经》。）《福经》一卷（抄《阿含》。）《数经》一卷（抄《杂阿含》。）

《时经》一卷（或云《时非时经》。）《灌经》一卷（或云《四月八日灌经》。）《意经》一卷《寤意经》一卷（抄。）

《正意经》一卷《恶意经》一卷（抄《阿含》。）《骂意经》一卷《举钵经》一卷（抄。）

《息恚经》一卷（抄《中阿含》。）《忍辱经》一卷《福行经》一卷（抄《阿含》。）《福报经》一卷（抄。）

《法观经》一卷《身观经》一卷《多闻经》一卷（抄。）《受持经》一卷（抄《阿含》。）

《伏淫经》一卷（抄《阿含》。）《离睡经》一卷（抄。）《应法经》一卷（抄。）《乐想经》一卷（抄。）

《尊上经》一卷《医王经》一卷（抄《阿含》。）《危脆经》一卷《柔栗经》一卷（抄。）

《梵纲经》一卷（与《护公录》所出《梵纲六十二见》大同小异。）《名称经》一卷（抄。）《处处经》一卷《闲居经》一卷（出《生经》。）

《何苦经》一卷（抄。）《无惧经》一卷（抄。）《贫穷经》一卷（抄《阿含》。）《求欲经》一卷（抄《阿含》。）

《分别经》一卷（抄。）《衰利经》一卷《犯罪经》一卷《慢法经》一卷（抄。）

《邪见经》一卷《放逸经》一卷（抄。）《无常经》一卷（抄。）《恶道经》一卷（抄《阿含》。）

《积骨经》一卷《苦阴经》一卷《法社经》一卷《灌腊经》一卷（或云《般泥洹后四辈灌腊经》。）

《受岁经》一卷（抄《阿含》。）《蜜具经》一卷（出《生经》。）《腹使经》一卷（出《生经》。）《晓食经》一卷（抄《修行道地晓了食品》。）

《普施经》一卷（抄《阿含》。）《持斋经》一卷《盂兰经》一卷《杂赞经》一卷（出《生经》。）

《甘露道经》一卷（抄。似《出曜》。）《海八德经》一卷《恒水戒经》一卷（《旧录》云，《恒水经》。）《寂志果经》一卷

《不坏净经》一卷（抄《杂阿含》。）《具善根经》一卷（抄。）《法施胜经》一卷《人弘法经》一卷（抄《大云经》。）

《寿命促经》一卷（抄《杂阿含》。）《色无常经》一卷（抄《阿含》。）《戒消灭经》一卷（《旧录》云，《戒消灭》。）《戒相应经》一卷（抄。或云《戒相应法》。）

《护口意经》一卷《修行慈经》一卷（抄。）《法灭尽经》一卷《未曾有经》一卷（异出本。）

《不净观经》一卷（抄《长阿含》。）《心本净经》一卷（抄《文殊普超三昧经》。）《无母子经》一卷（抄。）《无吾我经》一卷（抄。）

《大枯树经》一卷（与《安公录枯树经》大同小异。）《水上泡经》一卷《诸漏尽经》一卷（或云《诸尽经》。抄《杂阿含》。）《是我所经》一卷（出《生经》。）

《阿耨风经》一卷（抄《阿含》。）《出曜华经》一卷（抄《出曜》。）《华严净经》一卷《华严璎珞经》一卷

《观世楼炭经》一卷（有三品。）《波若得经》一卷《惟日杂难经》一卷《处中行道经》一卷（抄《杂阿含》。）

《劝行有证经》一卷（抄《杂阿含》。）《修行劝意经》一卷（抄《中阿含》。）

《多增道章经》一卷（《旧录》云，《多增道经》。一名《异出十报法》。）《内

身观章经》一卷

《忠心政行经》一卷（出《六度集》。或云《忠心经》。《旧录》有《大忠心经》、《小忠心经》。）《坚心正意经》一卷（或云《坚意经》。）《罪业报应经》一卷

《分明罪福经》一卷《舍诸世务经》一卷（抄。）《摩诃刹头经》一卷（与《灌经》同，后事小异。）《天地成败经》一卷（是抄众经。）

《救护身命经》一卷《清净法行经》一卷

《金刚清净经》一卷（或云《金刚三昧本性清净不坏不灭经》。）《眼色相系经》一卷（抄。）《禅思满足经》一卷（抄《阿含》。）《修集士行经》一卷（抄。）

《承事胜己经》一卷《往古造行经》一卷《无始本际经》一卷《大慈无减经》一卷（抄。）

《慈仁不杀经》一卷《净除业障经》一卷（抄《净业障》大本。）《梅檀涂塔经》一卷《求欲说法经》一卷

《少多制戒经》一卷《异信异欲经》一卷（抄。）《相应相可经》一卷《商人求财经》一卷（抄。）

《比丘世利经》一卷（抄。）《恒水流澍经》一卷（抄。）《信能渡河经》一卷（抄。）《积木烧然经》一卷（与《枯树经》大同小异。）

《业喻多少经》一卷（抄。）《前世三转经》一卷《除恐怖品经》一卷（抄《修行道地》。）《良进难遇经》一卷（抄。）

《说法难值经》一卷《向邪违法经》一卷（抄。）《邪业自活经》一卷（出《生经》。）《众生身秽经》一卷

《苦阴因事经》一卷（抄《中阿含》。）《求离牢狱经》一卷（抄。）《阿含正行经》一卷《增一阿含经》一卷（抄《增一阿含》。）

《摩诃乘宝严经》一卷《十住毗婆沙经》一卷（抄《十住论》。）《不退转法轮经》一卷（抄。）《一音辩正法经》一卷（抄。）

《精勤四念处经》一卷（抄。）《调伏众生业经》一卷（抄。）《无病第一利经》一卷（抄《出曜》。）《父母恩难报经》一卷（抄《中阿含》。）

《多倒见众生经》一卷（抄。）《世间言美色经》一卷（抄。）《形疾三品风经》一卷（抄《思惟略要法》。）《人受身入阴经》一卷（抄《修行道地》。）

《斫毒树复生经》一卷（抄《出曜》。）《一切行不恒安经》一卷（抄《阿含》。）《人身四百四病经》一卷（抄。）《人身八十种虫经》一卷（抄《修行道地》。）

《人病医不能治经》一卷（抄《修行道地》。）《祭亡人不得食经》一卷（抄。）《分别善恶所起经》一卷《犯戒罪报轻重经》一卷

《大乘方等要慧经》一卷（或云《方等慧经》，或云《要慧经》。）《佛遗日摩尼宝经》一卷《无崖际持法门经》一卷（或云《无崖际经》。）《仁王护国般若波罗蜜经》一卷

《阿难陀目佉尼呵离陀经》一卷

《乐瓔珞庄严方便经》一卷（一名《转女身菩萨经》，沙门法海译。或云《乐瓔珞庄严女经》。）《过去行檀波罗蜜经》一卷（抄。）《本行六波罗蜜经》一卷

《当来选择诸恶世界经》一卷（抄。）《四大色身生厌离经》一卷《有众生三世作恶经》一卷（抄。）《信人者生五种患经》一卷（抄。）

《以金贡太山赎罪经》一卷《人民疾疫受三归经》一卷（抄《阿含》。）《受持佛名不堕恶道经》一卷《第一四门经》一卷（出《大十二门经》。）

《第二四门经》一卷

《第三四门经》一卷（《第三四门》即名《甘露道律经》，捡杂目录，或有不称《第三四门》而直云《甘露道律经》者。）

《佛入甘露调意经》一卷（从《第一四门》至《甘露调意》凡四品，并是《大十二门经》一部，后人逐品写出，遂分成四经。《生经》一部亦如此。）

《楞伽阿跋多罗宝一切佛语断食肉章经》一卷（抄《大楞伽经》所出。或云《楞伽抄经》。）《三劫经》一卷（抄《长阿含》。）《三小劫经》一卷

《三毒经》一卷（抄。）《三慧经》一卷（抄。）《三行经》一卷（抄《阿含》。）《三因缘经》一卷（抄。）

《三时过经》一卷（抄《杂阿含》。）《四自在神通经》一卷（抄。）《四品学法经》一卷（抄。）《四食经》一卷（抄。）

《四未曾有法经》一卷（抄《阿含》。）《四种人经》一卷（抄。）《四人出现世间经》一卷（抄《阿含》。）《五战斗人经》一卷（抄《阿含》。）

《五阴成败经》一卷（抄《修行道地》。）《五道轮转罪福报应经》一卷《六斋八戒经》一卷《七宝经》一卷

《七处三观经》一卷（异出，抄《杂阿含》。）《八光经》一卷（抄。）《八阳经》一卷《八关斋经》一卷（异出。）

《九伤经》一卷《十报三统略经》一卷（异出。）《十二因缘章经》一卷（《旧录》云，《十二因缘经》。）

《十一思惟念如来经》一卷（抄《阿含》。或云《十一想思念如来经》。）《十二游经》一卷（《旧录》云，《十二由经》。）《十二游经》一卷（异本，文大同小异。）

《十二头陀经》一卷《沙门为十二头陀经》一卷《十二品生死经》一卷《十八不共法经》一卷（出《宝女经》。）

《三十二相因缘经》一卷（与《安公失源》所出《三十二相》大同小异。）

《慈仁问八十种好经》一卷（与《安公失源》所出《八十种好》大同小异。）《三十七品经》一卷（异本。）《三十七品经》一卷（异本。）

《宝积三昧文殊师利菩萨问法身经》一卷（或云《遗日宝积三昧文殊师利问法身经》。）《空净天感应三昧经》一卷（《旧录》云，《空净三昧经》。）

《自誓三昧经》一卷（内题云《独证品》第四，出《比丘净行》中，与护公所出《独证自誓三昧》大同小异。）《佛印三昧经》一卷

《法华三昧经》一卷《月灯三昧经》一卷《定意三昧经》一卷《般舟三昧念佛章经》一卷

《四百三昧名经》一卷（抄。）

《庾伽三磨斯经》一卷（译言《修行略》。一名《达磨多罗禅法》，或云《达磨多罗菩萨撰禅经要集》。）《禅定方便次第法经》一卷《禅定呵欲经》一卷

《禅秘要经》一卷（抄。《禅要秘密治病经》所出。）《治禅鬼魅不安经》一卷（抄。《禅要秘密治病经》所出。）《阿练若习禅法经》一卷（即是抄《菩萨禅法》第一卷。）

《禅法》一卷《说数息事经》一卷《恒河譬喻经》一卷（抄。）《须河譬喻经》一卷

《须河譬经》一卷（与前《须河譬》大同小异。）《灰河经》一卷《尘土灰河譬喻经》一卷（与前《灰河》小异。）《水喻经》一卷（抄《阿含》。）

《铸金喻经》一卷（抄。）《浮木譬喻经》一卷《田夫喻经》一卷（抄《阿含》。）《婴儿譬喻经》一卷（抄《阿含》。）

《群牛譬经》一卷（抄《阿含》。）《羊群喻经》一卷（抄。）《大蛇譬喻经》一卷（《旧录》云，《大蛇经》。）《飞鸟喻经》一卷（抄《阿含》。）

《憋喻经》一卷（抄《六度集》。）《马喻经》一卷（抄。）《箭喻经》一卷（抄《阿含》。）《木杵喻经》一卷（抄《阿含》。）

《毒喻经》一卷（出《生经》。）《毒草喻经》一卷（出《生经》。或云《毒草经》。）《毒悔喻经》一卷（出《生经》。）《调达喻经》一卷

《爪甲擎土譬经》一卷（《旧录》云，《爪甲取土经》。）《譬喻六人经》一卷（抄《骂意经》。）《譬喻经》一卷《譬喻经》一卷（异出。）

《法句譬喻经》一卷（凡十七事。或云《法句譬经》。）《杂譬喻经》一卷（凡十一事。）

安法师载《竺法护经目》有《譬喻经三百首》二十五卷，混无名目，难可分别。今新撰所得，并列名定卷，以晓览者。寻此众本，多出大经，虽时失译名，然护公所出或在其中矣。）

《梵音偈本》一卷《陀罗尼偈》一卷（抄。）《阿弥陀佛偈》一卷《后出阿引人注目陀佛偈》一卷

《七佛各说偈》一卷《赞七佛偈》一卷《深自知身偈》一卷（《旧录》云，《自知偈》。）《禅经偈》一卷（抄《禅经》中偈。）

《怛惛尼百句》一卷《五言咏颂本起》一卷（百四十二首。）《道行品诸经胡音解》一卷《灌顶七万二千神王护比丘咒经》一卷

《灌顶十二万神王护比丘尼咒经》一卷《灌顶三归五戒带佩护身咒经》一卷《灌顶百结神王护身咒经》一卷《灌顶宫宅神王守镇左右咒经》一卷

《灌顶冢墓因缘四方神咒经》一卷《灌顶伏魔对印大神咒经》一卷《灌顶摩尼罗亶大神咒经》一卷《灌顶召五方龙王摄疫毒神咒经》一卷

《灌顶梵天神策经》一卷

《灌顶普广经》一卷（本名《普广菩萨经》，或名《灌顶随愿往生十方净土经》，凡十一经。）

从《七万二千神王咒至召五方龙王咒》凡九经，是旧集《灌顶》，总名《大灌顶经》。从《梵天神策》及《普广经》、《拔除过罪经》，凡三卷，是后人所集，足《大灌顶》为十二卷。其《拔除过罪经》一卷已摘入《疑经录》中，故不两载。

《摩诃般若波罗蜜神咒》一卷《般若波罗蜜神咒》一卷（异本。）《七佛所结麻油述咒》一卷《七佛所结麻油述咒》一卷（异本。）

《七佛神咒》一卷《七佛神咒》一卷（结缕者。异本。）《大神母结誓咒》一卷《大神将军咒》一卷

《八吉祥神咒》一卷（《古录》云，《八吉祥经》。）《陀邻钵经》一卷《陀罗尼句经》一卷《华积陀罗尼神咒》一卷

《持句神咒》一卷《六神名神咒》一卷《幻师名神咒》一卷《伊洹法愿神咒》一卷

《幻师陂陀神咒》一卷

《医王惟楼延神咒》一卷（或云《阿难所问医王惟楼延神咒》。）《幻师邹陀神咒》一卷（《古录》，《幻士毖陀经》。）《解日厄神咒》一卷

《摩尼罗亶神咒》一卷《檀特罗麻油述神咒》一卷《麻油述神咒》一卷《罗亶神咒

案摩经》一卷

《咒水经》一卷《嚩水经》一卷《龙王咒水浴经》一卷《龙王结愿五龙神咒》一卷

《五龙咒毒经》一卷《十八龙王神咒经》一卷《咒请雨咒止雨经》一卷《取血气神咒》一卷（《旧录》云，《血咒》。）

《药咒》一卷《咒毒》一卷《咒时气》一卷《咒小儿》一卷

《咒齩齿》一卷（或云《咒虫齿》，或云《咒齿》。）《咒齩齿》（异本。）《咒牙痛》《咒牙痛》（异本。）

《咒眼痛》《咒眼痛》（异本。）《咒贼》一卷（或云《辟除贼害咒》。）《咒贼》（异本。）

《卒逢贼结带咒》《七佛安宅神咒》一卷《安宅咒》一卷《三归五戒神王名》一卷

（安法师所载《竺法护经目》有《神咒》三卷，既无名题，莫测同异。今新集所得，并列名条卷，虽未详译人，而护所出咒必在其中矣。）

右八百四十六部，凡八百九十五卷。新集所得，今并有其本，悉在经藏。条新撰目录阙经，未见经文者如左：《杂譬喻经》八十卷（《旧录》所载。）

《杂数经》二十卷（《旧录》所载。）《出要经》二十卷《阿惟越致转经》十八卷（《旧录》所载。）《摩诃乘经》十四卷（改字训日乘。）

《蜀普耀经》八卷（《旧录》所载。以蜀土所出。）《行道经》七卷《正法华三昧经》六卷（疑即是《正法华经》之别名。）《摩诃乘优波提经》五卷

《三昧王经》五卷《梵王请问经》五卷《不退转轮经》四卷《佛从兜率降中阴经》四卷（出《王宗经目》。）

《四天王经》四卷（疑一部四本。）《魔王请问经》四卷《那先譬喻经》四卷（《旧录》所载。）《度无极譬经》三卷

《长阿含经》三卷（疑是残缺《长阿含经》。）《大梵天王请转法轮经》三卷《释提醒因所问经》三卷《法华光瑞菩萨现寿经》三卷

《普贤菩萨答难二千经》二卷《濡首菩萨经》二卷（疑即是《濡首菩萨分卫经》。）
《太子试艺本起经》二卷《小本起经》二卷（《旧录》所载。）

《不思議功德经》二卷（或云《功德经》。）《蜀首楞严经》二卷（出《旧录》所载，似蜀土所出。）《后出首楞严经》二卷（《旧录》所载，云有十偈。）

《梵天王请佛千首经》二卷（又《大梵天王经》二卷似此。）《深断连经》二卷《甘露味阿毗昙》二卷（或云《甘露味经》二卷。）《弘道经》二卷

《乳王如来经》一卷（或云《乳王经》。）《瞻波国佛说戒经》一卷《佛在誓枝山说法经》一卷《佛三毒事经》一卷

《佛七事经》一卷《佛开和伏经》一卷《佛意行经》一卷《佛医王经》一卷

《因佛生三心经》一卷《佛聚经》一卷《如来智印经》一卷（先阙。）《七佛本缘经》一卷

《七佛父母姓字经》一卷（《旧录》云，《七佛姓字经》。）《释迦文枝钵经》一卷《佛袈裟经》一卷《佛钵经》一卷

《佛大衣经》一卷《佛本记》一卷（《旧录》所载。）《贤劫五百佛名经》一卷《现在十方佛名经》一卷

《过去诸佛名经》一卷《千五百佛名经》一卷《三千佛名经》一卷《五千七百佛名经》一卷

《观世音成佛经》一卷《文殊因缘经》一卷《文殊本愿经》一卷《文殊观经》一卷

《弥勒受决经》一卷《弥勒作佛时经》一卷《弥勒难经》一卷《弥勒须河经》一卷

《道导问佛经》一卷《毘陀菩萨百二十难经》一卷《贤首菩萨二百问经》一卷《持身菩萨经》一卷（或云《持身经》。）

《金刚女菩萨经》一卷《善意菩萨经》一卷

《阿惟越致菩萨戒经》一卷（《旧录》云，《阿惟越致戒经》。）《菩萨从兜率天降中阴经》一卷《菩萨行喜经》一卷《菩萨净本业经》一卷

《菩萨初业经》一卷《菩萨四事经》一卷《菩萨十六愿经》一卷《菩萨五十德行经》一卷

《菩萨教法经》一卷《菩萨正行经》一卷《菩萨出入诸则经》一卷《菩萨内诫经》一卷

《菩萨常行经》一卷（《旧录》所载。）《菩萨母姓字经》一卷《菩萨家姓经》一卷《菩萨比丘经》一卷

《菩萨经》一卷《迦叶解经》一卷《迦叶因缘经》一卷《舍利弗问署经》一卷

《迦叶独证自誓经》一卷（《旧录》所载。）《舍利弗叹度女人经》一卷《舍利弗生西方发》一卷《舍利弗目连泥洹经》一卷

《摩诃目犍连与佛拈能经》一卷（《旧录》所载。）《目连所问经》一卷《目连因缘经》一卷《阿难得道经》一卷（《旧录》所载。）

《阿难般泥洹经》一卷（《旧录》所载。）《阿难现变经》一卷《难陀经》一卷《阿那律念复生经》一卷（《旧录》所载。）

《满愿子经》一卷《阿那含七念经》一卷《罗汉菩子经》一卷《宾头卢取钵经》一卷

《鸠摩迦叶经》一卷《童迦叶经》一卷（出《长阿含》。或云《童迦叶解难》。）
《爱行比丘经》一卷《爱身比丘经》一卷

《加丁比丘经》一卷《梅比丘经》一卷《善星比丘经》一卷《六群比丘经》一卷

《自在王比丘经》一卷《罗耶达比丘经》一卷《比丘和须蜜经》一卷《比丘法相经》一卷

《佛为比丘说二事经》一卷《玄戒未来比丘经》一卷《沙门分卫见怪异经》一卷（《旧录》所载。）《释种子经》一卷

《莲华色比丘尼经》一卷《人诈名为道经》一卷（《旧录》所载。）《尊者婆蹉律经》一卷《恒水不说勤劳经》一卷

《波罗提木叉》一卷《大沙门羯磨》一卷《大戒经》一卷（《旧录》所载。）《五部威仪所服经》一卷（或云《五部僧服经》。）

《衣服制》一卷（《旧录》所载。）《结界文经》一卷

《八岁沙弥降外道经》一卷（抄《出曜》。《旧录》云，《八岁沙弥折外异学经》。）《八岁沙弥开解国王经》一卷《鬬宾二沙弥经》一卷

《沙弥离戒》一卷《沙弥离威仪》一卷（《旧录》所载。）《沙弥持戒经》一卷《海洲优婆塞会经》一卷

《优婆夷堕舍经》一卷《在家菩萨戒经》一卷《在家律仪经》一卷《贤者杂事经》一卷

《弟子本行经》一卷（《旧录》所载。）《弟子修学经》一卷《弟子行泽中遇贼劫经》一卷《弟子精进经》一卷

《道本五戒经》一卷（《旧录》所载。）《迦提罗越问五戒经》一卷《威仪经》一卷（《旧录》所载。）《那罗延天王经》一卷

《毗沙门王经》一卷《大四天王经》一卷《二十八天经》一卷《为寿尽天子说法经》一卷（《旧录》云，《命尽天子经》。）

《诸天寿经》一卷《魔现成佛经》一卷（《旧录》所载。）《魔试佛经》一卷（《旧录》所载。）《魔试目连经》一卷（或云《弊魔试摩目连经》。）

《魔王试经》一卷

《阿须伦问八事经》一卷（《旧录》云，《阿须伦所问八事》。）《净饭王经》一卷《佛葬闍头檀王经》一卷《阿育王作小儿时经》一卷

《小阿育王经》一卷《优填王照逝心女经》一卷《迦夷王头布施经》一卷《果尊王经》一卷

《佛居王经》一卷《降恐王经》一卷《摩罗王经》一卷《遮罗王经》一卷（出《六度集》。）

《摩竭王经》一卷（《旧录》云，《摩竭国王经》。）《和墨王经》一卷（出《六度集》。）《萨波达王经》一卷（《旧录》所载。）《摩登王经》一卷

《尸呵遍王经》一卷（《旧录》云，《尼呵遍王经》。）《舍夷国经》一卷《乾夷王经》一卷（出《六度集》。）《罗提坻王经》一卷（或作《国王罗提埤经》。）

《摩诃惟越王经》一卷《萨和达王经》一卷《难国王经》一卷《年少王经》一卷（《旧录》所载。）

《流沙王经》一卷《十四王经》一卷《王以竹施经》一卷《劝王持五戒经》一卷

《太子法慧经》一卷（《旧录》云，《太子法慧》。）《太子法施经》一卷（出《六度集》。）《太子旃舍罗差经》一卷《是光太子经》一卷（《旧录》所载。）

《长者盛德经》一卷《长者法心经》一卷《长者难提经》一卷（《旧录》所载。）
《长者仁贤经》一卷

《长者洹罗越经》一卷《长者子誓经》一卷（《旧录》所载。）《佛问淳陀长者受乐净行经》一卷《五百婆罗门问有无经》一卷（《旧录》所载。）

《婆罗门问事经》一卷《婆罗门等争说经》一卷《六师诣波斯匿王经》一卷《尼犍斋经》一卷

《仙叹经》一卷（出《六度集》。）《光味仙人睹佛身经》一卷（抄《方等大集》。）《明星梵志经》一卷《摩竭梵志经》一卷（出《义足》。）

《鬻辞梵志经》一卷（出《义足》。）《猛观梵志经》一卷（出《义足》。）《法观梵志经》一卷（出《义足》。）《兜率梵志经》一卷

《兜勒梵志经》一卷《梵志拔陀经》一卷《梵志计火净经》一卷《梵志问疑经》一卷

《梵志意经》一卷《梵志好母经》一卷《梵志淫女经》一卷《梵志六师经》一卷

《天后贤女经》一卷《德女问经》一卷《女利行经》一卷（《旧录》所载。）《贫女少施获弘报经》一卷

《贫女听经蛇啗命终经》一卷（《古录》，《贫女听经蛇啗命终生天经》。）《国王痴夫人经》一卷（《旧录》所载。）《弥家女经》一卷

《四妇因缘经》一卷（《旧录》所载。）《钟磬贫乏经》一卷（抄《出曜》。）《淫人曳踵行经》一卷（《旧录》所载。）《二人作沙门弟断兄舌经》一卷

《气嘘杀旃陀罗经》一卷《眼能视杀人经》一卷《孤独三兄弟经》一卷《老少俱死经》一卷

《阿敛他经》一卷《须多罗经》一卷（《旧录》云，《须多罗入胎经》。）《羼提和经》一卷（抄《六度集》。）《须陀利经》一卷

《不兰伽经》一卷《小申日经》一卷《婆罗柰军四姓经》一卷《大姓家主叩书不经》一卷

《提谓经》一卷《强罗经》一卷《堕迦经》一卷（《旧录》所载，云晋言“坚强”。）《金转龙王经》一卷

《盘达龙王经》一卷（《旧录》所载。）《苏曷龙王经》一卷《三龙王经》一卷《菩萨作六牙象本事经》一卷

《菩萨作龟本事经》一卷（出《六度集》。）《菩萨师子王经》一卷《菩萨为鱼王经》一卷（出《六度集》。）《象王经》一卷（出《生经》。）

《虎王经》一卷《鳖王经》一卷（或云《菩萨曾为鳖王经》。）《蝎王经》一卷《毒龙蛇施经》一卷

《养牛经》一卷《放牛法经》一卷《牛米自供养经》一卷（《旧录》云，《牛米自供经》。）《行放食牛经》一卷（《旧录》所载。）

《堕释迦牧牛经》一卷（《旧录》所载。）《饿鬼经》一卷《铁杵泥犁经》一卷《阎罗王经》一卷

《缘经》一卷《药经》一卷《苦慧经》一卷《慧达经》一卷

《法足经》一卷《身数经》一卷《选福经》一卷《布施经》一卷

《助善经》一卷《孝顺经》一卷《孝顺经》一卷《古来经》一卷

《度世经》一卷《缘本经》一卷《法藏经》一卷《明住经》一卷

《善憩经》一卷《植质经》一卷《名相经》一卷《怪异经》一卷

《灭怪经》一卷《本钵经》一卷《案钵经》一卷《诸法经》一卷

《杂赞经》一卷《法严经》一卷（《旧录》所载，疑即是《等入法严》。）《渐备经》一卷（疑是《渐备》之一卷。）《壁四经》一卷（《旧录》所载。）

《与脱经》一卷《伏愿经》一卷《宝见经》一卷《真提经》一卷

《明义经》一卷《见在经》一卷《杂事经》一卷《释学经》一卷

《释论》一卷（疑是《大智论抄》之一卷。）《旨解经》一卷（疑即《义旨杂解》。）《卖智慧经》一卷（《旧录》所载。）《初受道经》一卷（《旧录》所载。）

《度道俗经》一卷《学经福经》一卷（《旧录》所载。）《诸福德经》一卷《说人身经》一卷

《施色力经》一卷《色入施经》一卷《戒法律经》一卷《止寺中经》一卷（《旧录》所载。）

《未生火经》一卷《未生灾经》一卷

《成败品》一卷（经目或云《成败品》第四，似是《楼炭经》之一品。）《念佛品经》一卷《须弥山经》一卷《阎浮利经》一卷

《世间珍宝经》一卷（《旧录》云，《世间所望珍宝经》。）《无端底持经》一卷（《旧录》云，《无端底总持经》。）《安般行道经》一卷（《旧录》所载。）

《现道神足经》一卷《成行无想经》一卷《解慧微妙经》一卷（《旧录》所载。）《失道得道经》一卷（《旧录》所载。）

《心情心识经》一卷（《旧录》所载，云有注。）《检意向正经》一卷（《旧录》所载。）《悔过除罪经》一卷《道德果证经》一卷（《旧录》所载。）

《深自侥幸经》一卷《布施持戒经》一卷《礼敬诸塔经》一卷《浴像功德经》一卷

《浴僧功德经》一卷《生西方斋经》一卷《造浴室法经》一卷《父子因缘经》一卷（《旧录》所载。）

《萤火六度经》一卷（《旧录》有《明度经》一卷，云一名《萤火明度经》。）《有疑往解经》一卷《杂阿含经》一卷（《旧录》所载。）

《长阿含方法经》一卷《六足阿毗昙经》一卷《小观世楼炭经》一卷（《旧录》所载。）《陀邻尼目佉经》一卷

《布施度无极经》一卷（疑是《六度集》之一卷。）《内禅波罗蜜经》一卷（《旧录》所载。）《令人孝有德经》一卷《甚深大回向经》一卷

《人于出家者经》一卷《心应深贪慕经》一卷《地水火风空经》一卷《求欲者除意经》一卷

《持戒教人杀生经》一卷《七月十五日腊法经》一卷《功高憍慢有二辈经》一卷《欢喜布施有五事经》一卷

《木枪刺脚因缘经》一卷（出《兴起行经》。）《三梦经》一卷《三悔处经》一卷《三乘无当经》一卷

《四署经》一卷

《四辈经》一卷（《旧录》云，《四辈弟子经》，或云《四辈学经》。）《四等意经》一卷《四意止本经》一卷《四正断经》一卷

《大四谛经》一卷（《旧录》所载。）《四厚经》一卷《五署经》一卷《五谷世经》一卷

《五方便经》一卷（《旧录》所载。）《五戒报应经》一卷《五惟越罗名解说经》一卷（《旧录》所载。）《五乱经》一卷

《五耶经》一卷《五阴经》一卷（《旧录》所载。）《中五浊世经》一卷（《旧录》所载。）《六波罗蜜经》一卷（《旧录》所载。）

《六衰事经》一卷《六禅经》一卷《六度六十行经》一卷《六辈阿惟越致经》一卷

《七众经》一卷《七流经》一卷《七使经》一卷《七辈人横死经》一卷

《大七车经》一卷（《旧录》所载。）《七岁作善经》一卷《八正八邪经》一卷（《旧录》所载。）《八方万物无常经》一卷

《八总持经》一卷（《旧录》所载。）《八辈经》一卷（《旧录》所载。）《八双经》一卷《八部僧行名经》一卷（《旧录》所载。）

《九结经》一卷《九恼经》一卷《九道观身经》一卷《十部僧经》一卷

《十二意经》一卷《十二阿练若高等地经》一卷《十二部经经》一卷《大十二因缘经》一卷（《旧录》所载。）

《十八难经》一卷（《旧录》所载。）《三十二僧那经》一卷《三十四意经》一卷《五十德相经》一卷

《五十二章经》一卷（《旧录》所载。别有《孝明四十二章》。）《六十品经》一卷《六十二疑经》一卷《七十二观身经》一卷

《百法经》一卷《百八爱经》一卷（《旧录》所载。似抄《五盖疑结经》。）《二百五十戒经》一卷（诸录并云有六种异出。）《惟日三昧经》一卷

《逮慧三昧经经》一卷（《旧录》所载。一名《文殊师利问菩萨十事行经》。）《月电三昧经》一卷《无言三昧经》一卷

《小安般舟三昧经》一卷（《旧录》所载。）《阿和三昧经》一卷《禅行敛意经》一卷（《旧录》云，《禅行极意经》。）《禅数经》一卷（《旧录》所载。）

《禅行法经》一卷《须弥山譬经》一卷《日月譬经》一卷《海水譬经》一卷

《药草喻经》一卷《功德天譬经》一卷《贤劫譬经》一卷《金刚譬经》一卷

《宝藏譬经》一卷《明珠譬经》一卷《聚木譬经》一卷《四大譬经》一卷

《化譬经》一卷（《旧录》云，《化喻经》。）《般若波罗蜜偈》一卷《佛清净偈》一卷《太子出国二十偈》一卷

《佛十力偈》一卷《群生偈》一卷（《旧录》所载。）《十方佛神咒》一卷《大总持咒》一卷（《旧录》云，《总持咒》。）

《四天王神咒》一卷《护诸比丘咒》一卷（出《生经》。）《十二因缘结缕神咒》一卷《摩诃神咒》一卷

《移山神咒》一卷《降魔神咒》一卷《和摩结神咒》一卷《威德陀罗神咒》一卷

《异出般舟三昧经》一卷《异出宝藏经》一卷《异出普门经》一卷（目录云向一万言。）《异出义足》二卷

《异出四谛经》一卷 《异出菩萨本经》一卷 《异出逝童子经》一卷 《异出孙陀耶致经》一卷

《异出十善十恶经》一卷 《异出九伤经》一卷 《异出了本经》一卷

右合四百六十部，凡六百七十五卷。详校群录，名数已定，并未见其本。今阙此经。

右二都件凡一千三百六部，合一千五百七十卷。（其已写前件八百四十六部，八百九十五卷在藏；未写四百六十部，六百七十五卷今阙。）

卷五

新集抄经录第一新集安公疑经录第二新集疑经伪撰杂录第三新集安公注经及杂经志录第四

小乘迷学竺法度造异仪记第五

长安睿法师喻疑第六

○新集抄经录第一

抄经者，盖撮举义要也。昔安世高抄出《修行》为《大道地经》，良以广译为难，故省文略说。及支谦出经，亦有《苾刍抄》。此并约写胡本，非割断成经也。而后人弗思，肆意抄撮，或棋散众品，或觫剖正文。既使圣言离本，复令学者逐末。竟陵文宣王慧见明深，亦不能免。若相竞不已，则岁代弥芜黷法宝，不其惜欤。名部一成，难用刊削。其安公时抄，悉附本录，新集所获，撰目如左。庶诚来叶，无效尤焉。

《抄华严经》十四卷《抄方等大集经》十二卷《抄菩萨地经》十二卷《抄法句譬经》三十八卷

《抄阿差末经》四卷《抄净度三昧经》四卷《抄摩诃摩耶经》四卷《抄摩诃摩耶经》三卷

《抄胎经》三卷《抄央掘魔罗经》二卷《抄报恩经》二卷（少上卷。）《抄头陀》二卷（抄律中事。）

《抄义足经》二卷《抄法华药王品》一卷《抄维摩诘所说佛国品》一卷《抄维摩诘方便品》一卷

《抄维摩诘问疾品》一卷《抄安般守意经》一卷《抄菩萨本业经》一卷《抄菩萨本业愿行品》一卷

《抄四谛经要数》一卷《抄法律三昧经》一卷《抄照明三昧不思議事经》一卷《抄诸佛要集经》一卷

《抄大乘方等要慧经》一卷《抄普贤观忏悔法》一卷《抄乐瓔珞庄严方便经》一卷《抄未曾有因缘经》一卷

《抄阿毗昙五法行经》一卷《抄诸法无行经》一卷《抄无为道经》一卷《抄分别经》一卷

《抄德光太子经》一卷《抄魔化比丘经》一卷《抄优婆塞受戒品》一卷《抄优婆塞受戒法》一卷

《抄贫女为国王夫人经》一卷

（从《华严经》至《贫女为国王夫人》凡三十六部，并齐竟陵文宣王所抄。凡抄字在经题上者，皆文宣所抄也。）

《般若经问论集》二十卷（即《大智论抄》。或云《要论》，或云《略论》，或云《释论》。）

右一部，凡二十卷。庐山沙门释慧远以论文繁积，学者难究，故略要抄出。

《抄成实论》九卷（齐武帝永明七年十二月，竟陵文宣王请定林上寺释僧柔、小庄严寺释慧次等于普弘寺共抄出。）《净度三昧抄》一卷

《律经杂抄》一卷《本起抄经》一卷《睽抄经》一卷（《旧录》所载。）《五百梵律经抄》一卷（《旧录》所载。）

《大海深嶮抄经》一卷（上六抄经是旧抄，今并阙本。）《抄为法舍身经》六卷（抄字在上，似是文宣王所抄。今阙此经。）

《法苑经》一百八十九卷

（此一经近世抄集，并撮撰群经，以类相从。虽立号《法苑经》，终入抄数。今阙此经。）

右抄经四十六部，凡三百五十二卷。其三十八部一百五十一卷并有经，其八部一百一卷今阙。

○新集安公疑经录第二

外国僧法，学皆跪而口受。同师所受，若十、二十转，以授后学。若有一字异者，共相推校，得便摈之，僧法无纵也。经至晋土，其年未远，而喜事者以沙糅金，斌斌如也，而无括正，何以具伪乎！农者禾草俱存，后稷为之叹息；金匱玉石同緘，卞和为之怀耻。安敢预学次，见泾渭杂流，龙蛇并进，岂不耻之！今列意谓非佛经

者如左，以示将来学士，共知鄙倍焉。

《宝如来经》二卷（南海胡作。或云《宝如来三昧经》。）《定行三昧经》一卷（或云《佛遗定行摩目捷所问经》。）

《真谛比丘慧明经》一卷（或云《慧明比丘经》，或云《清净真谛经》。）

《尼咤国王经》一卷（或云《尼咤黄罗国王经》，或云《黄罗王经》。）《胸有万字经》一卷（或云《胸现万字经》。）

《萨和菩萨经》一卷（《旧录》云，《国王萨怛菩萨经》。）《善信女经》二卷（或云《善信经》。）《护身十二妙经》一卷（一名《度世护世经》。）

《度护经》一卷（或云《度护法经》。）《毗罗三昧经》二卷

《善王皇帝经》二卷（或云《善王皇帝功德尊经》。或为一卷。）《唯务三昧经》一卷（或作《唯无三昧》。）《阿罗呵公经》一卷（或云《相国阿罗呵公经》。）

《慧定普遍神通菩萨经》一卷（《旧录》云，《慧定普遍国土神通菩萨经》。）《阴马藏经》一卷（或云《阴马藏光明经》。）《大阿育王经》一卷（云佛在波罗柰者。）

《四事解脱经》一卷（或云《四事解脱度人经》。）《大阿那律经》一卷（非八念者。阙。）

《贫女人经》一卷（名难陀者。《旧录》云，《贫女难陀经》。阙。）《铸金像经》一卷（阙。）《四身经》一卷（阙。）《普慧三昧经》一卷（阙。）

《阿秋那经》一卷（《旧录》云，《阿秋那三昧经》。阙。）《两部独证经》一卷（阙。）《法本斋经》一卷（西凉州来。阙。）《觅历所传大比丘尼戒经》一卷（阙。）

右二十六部，三十卷。

○新集疑经伪撰杂录第三

《长阿含经》云：“佛将涅槃，为比丘说四大教法。若闻法律，当于诸经推其虚实，与法相违则非佛说。”又《大涅槃经》云：“我灭度后，诸比丘辈抄造经典，令

法淡保”种智所照，验于今矣。自像运浇季，浮竞者多，或凭真以构伪，或饰虚以乱实，昔安法师摘出伪经二十六部，又指慧达道人以为深戒。古既有之，今亦宜然矣。佑校阅群经，广麻同异，约以经律，颇见所疑。夫真经体趣融然深远，假托之文辞意浅杂，玉石朱紫，无所逃形也。今区别所疑，注之于录，并近世妄撰，亦标于末。并依倚杂经而自制名题，时不闻远适外域，退不见承译西宾，“我闻”兴于户牖，印可出于胸怀，诳误后学，良足寒心。既躬所见闻，宁敢默已。呜呼来叶，慎而察焉！

《比丘应供法行经》一卷（此经前题云罗什出。佑案，经卷旧无译名，兼罗什所出又无此经，故入疑录。）

《居士请僧福田经》一卷（此经前题云昙无讖出，案讖所出无此经，故入疑录。）
《灌顶度星招魂断绝复连经》一卷《决定罪福经》一卷

《无为道经》二卷《情离有罪经》一卷《烧香咒愿经》一卷（或云《咒愿经》。）
《安墓咒经》一卷

《观月光菩萨记》一卷

《佛钵经》一卷（或云《佛钵记》，甲申年大水及月光菩萨出事。）《弥勒下教》一卷（在《钵记》后。）《九十六种道》一卷

右十二部经记，或义理乖背，或文偈浅鄙，故入疑录。庶耘芜穢，以显法宝。

《灌顶经》一卷（一名《药师琉璃光经》，或名《灌顶拔除过罪生死得度经》。）

右一部，宋孝武帝大明元年，秣陵鹿野寺比丘慧简依经抄撰。（此经后有《续命法》，所以遍行于世。）《提谓波利经》二卷（旧别有《提谓经》一卷。）

右一部，宋孝武时，北国比丘昙靖撰。《宝车经》一卷（或云《妙好宝车菩萨经》。）右一部，北国淮州比丘昙辩撰，青州比丘道侍改治。《菩提福藏法经三昧经》一卷

右一部，齐武帝时，比丘道备所撰。（备易名道欢。）《佛法有六义第一应知》一卷（未得本。）《六通无碍六根净业义门》一卷（未得本。）

右二部，齐武帝时，比丘释法愿抄集经义所出。虽弘经义，异于伪造，然既立名号，则别成一部，惧后代疑乱，故明注于录。《佛所制名数经》五卷

右一部，齐武帝时，比丘释王宗所撰。抄集众经，有似数林；但题称佛制，惧乱名实，故注于录。《众经要揽法偈》二十一首一卷右一部梁天监二年，比丘释道欢撰。

右合二十部，二十六卷。

《疑经》两录合四十六部，五十六卷。其三十八部失源，八部有人名。新集安公注经及杂经志录第四

夫日月丽天，众星助耀，雨从龙降，滂池佐润，由是丰泽洪沾，大明焕赫也。而犹有燋火于云夜，抱瓮于汉阴者，时有所不足也。佛之着数，真人发起，大行于外国，有自来矣。延及此土，当汉之末世，晋之盛德也。然方言殊音，文质从异，译胡为晋，出非一人。或善胡而质晋，或善晋而未备胡，众经浩然，难以折中。窃不自量，敢预僧数，既荷佐化之名，何得素餐终日乎？辄以洒扫之余暇，注众经如左。非敢自必，必值圣心，庶望考文，时有合义。愿将来善知识，不咎其默守，冀抱瓮燋火，说有微益。

《光赞折中解》一卷《光赞抄解》一卷

《般若放光品》者，分别尽漏而不证八地也。源流浩汗，厥义幽邃，非彼草次可见宗庙之义也。安为《折疑准》一卷，《折疑略》二卷，《起尽解》一卷。

《道行品》者，《般若》抄也。佛去世后，外国高明者撰也。辞句质复，首尾互隐，为《集异注》一卷。

《大、小十二门》者，禅思之奥府也。为各作《注》。《大十二门》二卷，《小十二门》一卷。（今有。）

《了本生死》者，四谛四信之玄藪也。为《注》一卷。（今有。）

《密迹金刚经》，《持心梵天经》。右二经者，护公所出也。多有隐义，为作《甄解》一卷。《贤劫八万四千度无极》者，大乘之妙目也。为《解》一卷。

《人本欲生经》者，九止八脱之妙要也。为《注撮解》一卷。（今有。）《安般守意》，多念之要药也。为《解》一卷。（今有。）

《阴持入》者，世高所出残经也。渊流美妙，至道直迳也。为《注》二卷。（今有。）《大道地》者，修行抄也，外国所抄，为《注》一卷。

众经众行或有未曾共知者，安集之为《十法句义》一卷，《连杂解》共卷。

《义指》者，外国沙门于此土所传义也。云“诸部训异，欲广来学视听”也。增之为《注》一卷。

《九十八结》者，《阿毗昙》之要义，为《解》一卷，《连约通解》共卷。又为《三十二相解》一卷。《三界诸天混然淆杂》，安为《录》一卷。（今有。）

此土人经，出不一时，自孝灵光和已来，迄今晋康宁二年，近二百载。值残出残，遇全出全，非是一人，难卒综理，为之《录》一卷。（今有。）《答法汰难》二卷

《答法将难》一卷《西域志》一卷

凡二十七卷。其《诸天录》、《经录》及《答法汰难》至《西域志》，虽非注经，今依安旧录，附之于末。僧法尼所诵出经入疑录。《宝顶经》一卷永元元年出，时年九岁。

《净土经》七卷永元元年出，时年九岁。《正顶经》一卷永元元年出，时年九岁。《法华经》一卷永元元年出，时年九岁。《药草经》一卷永元二年出，时年十岁。

《太子经》一卷永元二年出，时年十岁。《伽耶波经》一卷永元二年出，时年十岁。《波罗柰经》二卷中兴元年出，时年十二。《优婆塞经》一卷中兴元年出，时年十二。

《益意经》二卷天监元年出，时年十三。（智远承旨。）《般若得经》一卷天监元年出，时年十三。（智远承旨。）《华严璎珞经》一卷天监元年出，时年十三。（智远承旨。）

《喻陀卫经》一卷天监四年台内华光殿出，时年十六。《阿那含经》二卷天监四年出，时年十六。《妙音师子吼经》三卷天监四年出，时年十六。（借张家。）

《出乘师子吼经》一卷天监三年出，时年十五。《胜鬘经》一卷永元元年出，时年九岁。《优昙经》一卷永元元年出，时年九岁。《妙庄严经》四卷永元元年出，时年九岁。

《维摩经》一卷（江家出。）《序七世经》一卷右二十一种经，凡三十五卷。

经如前件。齐末太学博士江泌处女尼子所出。初尼子年在韶龀，有时闭目静坐，诵出此经。或说上天，或称神授，发言通利，有如宿习。令人写出，俄而还止，经历旬朔，续复如前。京都道俗咸传其异。今上敕见，面问所以，其依事奉答，不异常人。然笃信正法，少修梵行，父母欲嫁之，誓而弗许。后遂出家，名僧法，住青园寺。佑既收集正典，检括异闻，事接耳目，就求省视。其家秘隐，不以见示，唯得《妙音师子吼经》三卷，以备疑经之录。此尼以天监四年三月亡。有好事者得其文疏，前后所出经二十馀卷。厥舅孙质以为真经，行疏劝化，收拾传写。既染毫牋，必存于世。昔汉建安末，济阴丁氏之妻忽如中疾，便能胡语，又求纸笔，自为胡书。复有西域胡人见其此书，云是经前，推寻往古，不无此事。但义非金口，又无师译，取舍兼怀，故附之疑例。

《萨婆若陀眷属庄严经》一卷（二十馀纸。）

右一部。梁天监九年，郢州头陀道人妙光，戒岁七腊，矫以胜相，诸尼姬人，僉称圣道。彼州僧正议欲驱摈，遂下都，住普弘寺，造作此经。又写在屏风，红纱映覆，香花供养，云集四部，嚬供烟塞。事源显发，敕付建康辩核疑状。云抄略诸经，多有私意妄造，借书人路琰属辞润色。狱牒：“妙光巧诈，事应斩刑，路琰同谋，十岁謫戍。”即以其年四月二十一日，敕僧正慧超，令唤京师能讲大法师、宿德如僧佑、昙准等二十人，共至建康前辩妙光事。超即奉旨，与昙准、僧佑、法宠、慧令、慧集、智藏、僧旻、法云等二十人于县辩问。妙光伏罪，事事如牒。众僧详议，依律摈治。天恩免死，恐于偏地复为惑乱，长系东冶。即收拾此经，得二十馀要及屏风于县烧除。然犹有零散，恐乱后生，故复略记。（萨婆若陀长者，是妙光父名。妙光弟名金刚德体，弟子名师子。）

《法苑经》一百八十九卷《抄为法舍身经》六卷

右二部。盖近世所集，未详年代人名。悉总集群经，以类相从。既立号《法苑》，则疑于别经，故注记其名，以示后学。卷数虽多，犹是前录众经，故不入部最之限。

小乘迷学竺法度造异仪记第五

夫至人应世，观众生根，根力不同，设教亦异。是以三乘立轨，随机而发；五时说法，应契而化。沿粗以至妙，因小以及大，阶渐殊时，教之体也。自正法稍远，受学乖互，外域诸国，或偏执小乘，最后涅槃，显明佛性，而犹执初教，可谓胶柱鼓瑟者也。

元嘉中，外国商人竺婆勒久停广州，每往来求利。于南康郡生儿，仍名南康，长易字金伽。后得入道，为昙摩耶舍弟子，改名法度。其人貌虽外国，实生汉土，天竺

科轨，非其所谙。但性存矫异，欲以摄物，故执学小乘，云无十方佛，唯礼释迦而已，大乘经典不听读诵。反抄着衣，以此为法，常用铜钵，无别应器。乃令诸尼作镇肩衣，似尼师坛，缝之为囊，恒着肩上，而不用坐，以表众异。每至出路，相捉而行；布萨悔过，但伏地相向，而不胡跪。法度善闲汉言，至授戒先作胡语，不令汉知。案律之明文，授法资解，言不相领，不得法事。而竺度昧罔，面行诡术，明识之众，咸共骇弃。唯宋故丹阳尹颜竣女宣业寺尼法弘，交州刺史张牧女弘光寺尼普明等信受其教，以为真实。虽出贵族，而识谢慧心，毁眚方等。既绝法雨，妄学诡科，乖背律仪，来苦方深，良可愍伤。

自正化东流，大乘日曜，英哲顶受，遍服膺。而使迷伪之人，专行偏教，莫或振止，何其甚哉！昔慧导拘滞，疑惑《大品》；昙乐偏执，非拨《法华》。罔天下之明，信己情之谬，关中大人，固已指为无间矣！至如彭城僧渊，诽谤《涅槃》，舌根销烂，现表厥殃，大乘难诬，亦可验也。寻三人之惑，并恶止其躬，而竺度之悖，以毒饮人。凡女人之性，智弱信强，一受伪教，则同惑相挺。故京师数寺遂尘异法，东境尼众亦时染此风，将恐邪路易开，淄污不已。嗟乎！斯岂魔断大乘，故先侮女人欤？此实开士之所痛悼，而法主所宜匡制也。《大方便经》云：“释迦如来昔为比丘，专以《四阿含》教化，谤毁方等，于无数劫，受大苦报，从阿鼻出，发大乘心致成正觉。”后进之贤，宜思防断。古今明诫，可不慎乎！

昔慧睿法师久难愚迷，制此《喻疑》，防于今日。故存之录末，虽于录非类，显证同矣。

○喻疑第六△长安睿法师

夫应而不寂，感之者至，感有精粗，应亦不一。影响理也，若以方期之，非徒乖其圆，乃亦丧其方。故以备闻之悟，喻其所疑，疑非膏盲，庶必为治。若治所不至，喻复其如之何，并可详览往喻。

昔汉室中兴，孝明之世，无尽之照，始得辉光此壤，于二五之照，当是像法之初。自尔已来，西域名人安侯之徒，相继而至，大化文言，渐得渊照边俗，陶其鄙倍。汉末魏初，广陵彭城二相出家，并能任持大照，寻味之贤，始有讲次。而恢之以格义，迁之以配说。下至法祖、孟详、法行、康会之徒，撰集诸经，宣畅幽旨，粗得充允，视听暨今。附文求旨，义不远宗，言不乖实，起之于亡师。及至苻并龟兹，三王来朝，持法之宗，亦并与经俱集。究摩罗法师至自龟兹，持律三藏集自罽宾，祥师徒众寻亦并集关中。洋洋十数年中，当是大法后兴之盛也。睿才常人鄙，而得厕对宗匠，陶译玄典，法言无日不闻，闻之无要不记，故敢依准所闻，寄之纸墨，以宣所怀。

什公云：“大教兴世五十余年，言无不实，实无不益。益而为言，无非教也；实而

为称，无非宝也。宝以如意为喻，教以正失为体。若能体其随宜之旨，则言无不深；若守其一照，则惑无不至。今此世界以杂为名，则知本自离薄，本自离薄，则易为风波。风波易以动，不淳易为离，易动易离，故大圣随宜而进，进之不以一途，三乘杂化由之而起。三藏祛其染滞，《般若》除其虚亡，《法华》开一究竟，《泥洹》阐其实化，此三津开照，照无遗矣。”但优劣存乎人，深浅在其悟，任分而行，无所臧否，前五百年也。此五百年中，得道者多，不得者少，以多言之，故曰正法。后五百年，唯相是非，执竞盈路，得道者少，不得者多，亦以多目之，名为像法。像而非真，失之由人。由人之失，乃有非跋真言，斧戟实化，无择起于胸中，不救出自唇吻。三十六国，小乘人也。此衅流于秦地，慧导之徒，遂复不信《大品》。既蒙什公入关，开托真照，《般若》之明，复得辉光末俗，朗兹实化。寻出《法华》，开方便门，令一实究竟，广其津途，欣乐之家，景仰沐浴，真复不知老之将至。而昙乐道人以偏执之见，而复非之，自毕幽途，永不可悔。今《大般泥洹经》，法显道人远寻真本，于天竺得之，持至扬都，大集京师义学之僧百有余人，禅师执本，参而译之，详而出之。此经云：“泥洹不灭，佛有真我。一切众生，皆有佛性。皆有佛性，学得成佛。”佛有真我，故圣镜特宗，而为众圣中王。泥洹永存，为应照之本。大化不泯，真本存焉。而复致疑，安于渐照，而排跋真海，任其偏执，而自幽不救，其可如乎？此正是《法华》开佛知见。开佛知见，今始可悟，金以莹明，显发可知。而复非之，大化之由，而有此心，经言阐提，真不虚也。

此大法三门，皆有成证。昔朱士行既袭真式，以大法为己任，于雒中讲《小品》，亦往往不通。乃出流沙，寻求《大品》。既至于填，果得真本，既遣疵子十人，送至雒阳，出为晋音。未发之间，彼土小乘学者乃以闻王，云：“汉地沙门，乃以婆罗门书惑乱真言。王为地主，若不折之，断绝大法，聋盲汉地，王之咎也。”王即不听。时朱士行乃求烧经为证。王亦从其所求，积薪十车于殿阶下，以火焚之。士行临阶而发诚誓：“若汉地大化应流布者，经当不烧；若其不应，命也如何。”言已投之，火即为灭，不损一字。遂得有此《法华》正本于于填大田，辉光重坏，踊出空中，而得流此。

此《大般泥洹经》既出之后，而有嫌其文不便者，而更改之，人情小惑。有慧佑道人，私以正本雇人写之。容书之家忽然火起，三十馀家，一时荡然。写经人于灰火之中求铜铁器物，忽见所写经本在火不烧，及其所写一纸陌外亦烧，字亦无损。馀诸巾纸，写经竹筒，皆为灰烬。此三经者，如什公所言，是大化三门，无极真体，皆有神验，无所疑也。

什公时虽未有《大般泥洹文》，已有《法身经》，明佛法身即是泥洹，与今所出，若合符契。此公若得闻此，佛有真我，一切众生，皆有佛性，便当应如白日朗其胸襟，甘露润其四体，无所疑也。何以知之？每至若问：“佛之真主亦复虚妄，积功累德，谁为不惑之本？”或时有言：“佛若虚妄，谁为真者？若是虚妄，积功累德，谁为其主？”如其所探，今言佛有真业，众生有真性，虽未见其经证，明评量意，

便为不乖而亦曾问：“此土先有经言，一切众生皆当作佛，此当云何？”答言：“《法华》开佛知见，亦可皆有佛性。若有佛性，复何为不得皆作佛耶？但此《法华》所明，明其唯有佛乘，无二无三，不明一切众生皆当作佛。皆当作佛，我未见之，亦不抑言无也。”若得闻此正言，真是会其心府，故知闻之心深信受。

同或之肆学正法者，小可虚其衿带，更听往喻。如三十六国着小乘者，亦复自以为日月之明，无以进于己也。而大心寥朗，乃能鄙其狂而偏执，自贻重罪。慧导之非《大品》，而尊重三藏，亦不自以为照不周也。昙乐之非《法华》，凭陵其气，自以为是，天下悠悠，唯己一人言，其意亦无所与让。今疑《大般泥洹者》，远而求之，正当以一切众生皆有佛性，为不通真照。真照自可照其虚妄，真复何须其照？一切众生既有伪矣，别有真性为不变之本。所以陶练既粗，真性乃发，恒以大慧之明，除其虚妄。虚妄既尽，法身独存，为应化之本。应其所化能成之缘，一人不度，吾终不舍。此义始验，复何为疑耶！若于真性法身而复致疑者，恐此邪心无处不惑。佛之真我尚复生疑，亦可不信佛有正觉之照，而为一一切种智也。般若之明，自是照虚妄之神器，复何与佛之真我？法身常存，一切皆有佛之真性。真性存焉，学不越涯，成不乖本乎？而俗以真照无虚言，言而亦无，佛我亦无，泥洹是邪见也。但知执此照惑之明，不知无惑之性，非其照也。为欲以此诬网天下，天下之人何可诬也！所以遂不关默而骤明此照者，是惜一肆之上，而有铄金之说；一市之中，而言有虎者三。易惑之徒，则将为之所染。皆为不救之物，亦不得已而言之，岂其好明人罪耶？实是蝮蛇螫手，不得不斩。幸有深识者，体其不默之旨；未深入者，寻而悟之，以求自清之路。如其已不可喻，吾复其如之何！

卷六

四十二章经序第一未详作者安般守意经序第二僧会法师安般注序第三道安法师安般守意经序第四谢敷作

阴持入经序第五道安法师人本欲生经序第六道安法师了本生死经序第七道安法师十二门经序第八道安法师

大十二门经序第九道安法师

法镜经序第十僧会法师

○四十二章经序第一

昔汉孝明皇帝夜梦见神人，身体有金色，顶有日光，飞在殿前。意中欣然甚悦之。明日问群臣，此为何神也？有通人传毅曰：“臣闻天竺有得道者，号曰佛，轻举能飞，殆将其神也。”于是上悟，即遣使者张骞、羽林中郎将秦景、博士弟子王遵等十二人，至大月支国写取佛经《四十二章》，在第十四石函中，登起立塔寺。于是道法流布，处处修立佛寺、远人伏化，愿为臣妾者不可称数。国内清宁，含识之类，蒙恩受赖，于今不绝也。

○安般守意经序第二△康僧会

夫安般者，诸佛之大乘，以济众生之漂流也。其事有六，以治六情。情有内外，眼、耳、鼻、口、身、心，谓之内矣；色、声、香、味、细滑、邪念，谓之外也。经曰诸海十二事，谓内外六情之受邪行，犹海受流，饿夫梦饭，盖无满足也。心之溢荡，无微不浹，恍惚仿佛，出入无间，视之无形，听之无声，逆之无前，寻之无后，深微细妙，形无丝发，梵释仙圣所不能照明。默种于此，化生乎彼，非凡所睹，谓之阴也。犹以晦暝种夫粢芥，阖手覆种，孳有万亿，旁人不睹其形，种家不知其数也。一朽乎下，万生乎上，弹指之间，心九百六十转，一日一夕，十三亿意。意有一身，心不自知，犹彼种夫也。

是以行寂，系意着息，数一至十，十数不误，意定在之。小定三日，大定七日，寂无他念，泊然若死，谓之一禅。禅，弃也，弃十三亿秽念之意。已获数定，转念着随，蠲除其八，正有二意，意定在随，由在数矣。垢浊消灭，心稍清静，谓之二禅也。又除其一，注意鼻头，谓之止也。得止之行，三毒、四趣、五阴、六冥诸秽灭矣。斐然心明，逾明月珠，淫邪污心，犹镜处泥，秽垢污焉。偃以照天，覆以临土，聪睿圣达，万土临照，虽有天地之在，靡一夫而能睹。所以然者，由其垢浊，众垢污心，有逾彼镜矣。若得良师划刮莹磨，薄尘微暝，荡使无馀。举之以照，毛发面

理，无微不察，垢退明存，使其然矣。情溢意散，念万不识一矣。犹若于市，驰心放听，广采众音，退宴存思，不识一夫之言。心逸意散，浊翳其聪也。若自闲处，心思寂寞，志无邪欲，侧耳靖听，万句不失，片言斯着，心靖意清之所由也。行寂止意，悬之鼻头，谓之三禅也。还观其身，自头至足，反覆微察，内体污露，木楚毛竖，犹睹脓涕。于斯具照天地人物，其盛若衰，无存不亡，信佛三宝，众冥皆明，谓之四禅也。摄心还念，诸阴皆灭，谓之还也。秽欲寂尽，其心无想，谓之净也。得安般行者，厥心即明，举眼所观，无幽不睹。往无数劫，方来之事，人物所更，现在诸刹。其中所有世尊法化，弟子诵习，无遐不见，无声不闻。恍惚仿佛，存亡自由，大弥八极，细贯毛耗，制天地，住寿命，猛神德，坏天兵，动三千，移诸刹，入不思议，非梵所测，神德无限，六行之由也。

世尊初欲说斯经时，大千震动，人天易色，三日安般，无能质者。于是世尊化为两身，一曰何等，一曰尊主，演于斯义出矣。大士、上人、六双、十二辈，靡不执行。

有菩萨名安清字世高，安息王嫡后之子，让国与叔，驰避本土，翔而后进，遂处京师。其为人也，博学多识，贯综神模，七正盈缩；风气吉凶，山崩地动；鍼脉诸术，睹色知病；鸟兽鸣啼，无音不照。怀二仪之弘仁，愍黎庶之顽闇，先挑其耳，却启其目，欲之视明扣聪也。徐乃陈演正真之六度，译安般之秘奥，学者尘兴，靡不去秽浊之操，就清白之德者也。

余生末踪，始能负薪，考妣徂落，三师凋丧，仰瞻云日，悲无质受，卷言顾之，潸然出涕。宿祚未没，会见南阳韩林、颍川皮业，会稽陈慧，此三贤者，信道笃密，执德弘正，蒸蒸进进，志道不倦余从之请问，规同矩，义无乖异。陈慧注义，余助斟酌。非师不传，不敢自由也。言多鄙拙，不究佛意，明哲众贤，愿共临察。义有舛闕，加圣删定，共显神融矣。

○安般注序第三△释道安

安般者，出入也。道之所寄，无往不因；德之所寓，无往不托。是故安般寄息以成守，四禅寓骸以成定也。寄息故有六阶之差，寓骸故有四级之别。阶差者，损之又损之，以至于无为；级别者，忘之又忘之，以至于无欲也。无为故无形而不因，无欲故无事而不适。无形而不因，故能开物；无事而不适，故能成务。成务者，即万有而自彼；开物者，使天下兼忘我也。彼我双废者，守于唯守也。故《修行经》以斯二法而成寂。得斯寂者，举足而大千震，挥手而日月扞，疾吹而铁围飞，微嘘而须弥舞。斯皆乘四禅之妙止，御六息之大辩者也。

夫执寂以御有，崇本以动末，有何难也！安般居十念之一，于五根则念根也。故撰《法句》者，属《唯念品》也。昔汉氏之末，有安世高者，博闻稽古，特专阿毗昙

学。其所出经，禅数最悉，此经其所译也。兹乃趣道之要径，何莫由斯道也！魏初康会为之注义。义或隐而未显者，安窃不自量。敢因前人，为解其下，庶欲蚊翮以助随蓝，雾润以增巨壑也。

○安般守意经序第四△谢敷作

夫意也者，众苦之萌基，背正之元本。荒迷放荡，浪逸无涯，若狂夫之无所丽；爱恶充心，耽昏无节，若夷狄之无君。微矣哉，即之无像，寻之无朕，则毫末不足以喻其细；迅矣哉，倏蹶惚恍，旬匝宇宙，则奔电不足以比其速。是以弹指之间九百六十转，一日一夕十三亿想。念必向报，成生死载。一身所种，滋蔓弥劫。凡在三界倒见之徒，溺丧渊流，莫能自反。正觉慈愍，开示慧路，防其终凶之源渐，塞其忿欲之微兆，为启安般之要径，泯生灭以冥寂。申道品以养恬，建十慧以入微，絜九神之逸足，防七识之洪流，故曰守意也。

若乃制伏粗垢，拂划漏结者，亦有望见贸乐之士，闭色声于视听，遏尘想以禅寂，乘静泊之祯祥，纳色天之嘉祚。然正志荒于华乐，昔习没于交逸，福田矜执而日零，毒根迭兴而罪袭。是以轮回五趣，亿劫难拔，婴罗欲网，有剧深牢。由于无慧乐定，不惟道门，使其然也。

至于乘慧入禅，亦有三辈：或畏苦灭色，乐宿泥洹，志存自济，不务兼利者，为无着乘。或仰希妙相，仍有遣无，不建大悲，练尽缘缚者，则号缘觉。菩萨者，深达有本，畅因缘无。达本者有有自空，畅无者因缘常寂。自空故不出有以入无，常寂故不尽缘以归空。住理而有非所缚，非缚故无无所脱。苟厝心领要，触有悟理者，则不假外以静内，不因禅而成慧。故曰阿惟越致，不随四禅也。若欲尘翳心，慧不常立者，乃假以安般，息其驰想，犹农夫之净地，明镜之莹划矣。然则耘耨不以为地，地净而种滋；莹划非以为镜，镜净而照明。故开士行禅，非为守寂，在游心于玄冥矣。肇自发心，悲盟弘普，秉权积德，忘期安众。众虽济而莫脱，将废知而去筌矣。是谓菩萨不灭想取证也。此三乘虽同假禅静，至于建志厥初，各有攸归。故学者宜恢心宏模，植载于始也。

汉之季世，有舍家开士安清字世高，安息国王之太子也。审荣辱之浮寄，齐死生乎一贯。遂脱屣于万乘，抱玄德而游化，演道教以发蒙，表神变以谅之。于时俊乂归宗，释华崇实者，若禽兽之从麟凤，鳞介之赴虬蔡矣。又博综殊俗，善众国音，传授斯经，变为晋文。其所译出百馀万言，探畅幽赜，渊玄难测。此《安般》典，其文虽约，义关众经，自浅至精，众行具举，学之先要，孰逾者乎！行者欲凝神反朴，道济无外，而不循斯法者，何异荆夫之陟太山，无翅而图升虚乎！释迦如来妙慧足于曩劫，历无数以潜化。至于众生运会，圆满千成，而犹现行六年，以为教端者，诚以镇一纷邪，莫尚兹也。由是而观，可不务欤！

敷染习沉冥，积罪历劫，生与佛乖，弗睹神化。虽以微祚，得禀遗典，而情想系芜，道根未固。仰欣圣轨，未一暂履，夕惕战惧，怒焉如瞿。是以诚心讽诵，以钟识习，每遭明睿，辄咨凝滞。然冥宗已远，义训小殊，乃采集英彦，戢而载焉。虽粗闻大要，未悟者众。于是复率愚思，推检诸数，寻求明证，遂相继续，撰为注义。并抄撮《大安般》、《修行》诸经事相应者，引而合之，或以隐显相从，差简搜寻之烦。经道弘深，既非愚浅所能裁衷，又辞意鄙拙，万不畅一，祇增理秽，敢云足以阐融妙旨乎？实欲私记所识，以备遗忘而已耳。倘有览者，愿亮不逮，正其愚谬焉。

○阴持入经序第五

阴持入者，世之深病也。驰骋人心，变德成狂，耳聋口爽，耽醉荣宠，抱痴投冥，酸号三趣。其为病也。犹癡疾焉，入骨彻髓，良医拱手；犹癡蹶焉，来则冥然，莫有所识。大圣悼兹，痛心内发，忘身安，赴涂炭，含厚德，忍舞击。观罗密于重云，止纲网于八极，洪痴不得振其翼，巨爱不得逞其足。采善心于毫芒，拔凶顽于虎口。以大寂为至乐，五音不能聋其耳矣；以无为为滋味，五味不能爽其口矣。曜形浊世，拯擢难计，陟降教终，潜沦无名。诸无着等，寻各腾逝。大弟子众深惧妙法混然废没，于是令迦叶集结，阿难所传，凡三藏焉。该罗幽廓，难度难测也。世雄授药，必因本病，病不能均，是故众经相待乃备。非彦非圣，罔能综练。自兹以后，神通高士各为训释，或揽撰诸经以为行式。譬璫玕欬，择彼珠珍，以色相发，佩之冠之，为光为饰。喻绘事欬，调别众彩，以图晖烈。诸明睿者，所撰亦然。此经则是其数也。

有舍家开士，出自安息，字世高。大慈流洽，播化斯土，译梵为晋，微显阐幽。其所敷宣，专务禅观，醇玄道数，深矣远矣，是经其所出也。阴入之弊，人莫知苦，是故先圣照以止观，阴结日损，成泥洹品。自非知机，其孰能与于此乎！从首至于九绝，都是四十五药也。以慧断知，入三部者，成四谛也。十二因缘讫净法部者，成四信也。其为行也，唯神矣，故不言而成；唯妙矣，故不行而至。统斯行者，则明白四达，立根得眼，成十力子，绍胄法王，奋泽大千。若取证则拔三结，住寿成道，径至应真。此乃大乘之舟楫，泥洹之关路。于斯晋土，祥观废，学徒虽兴，蔑有尽漏。何者？禅思守玄，练微入寂，在取何道，犹覘于掌。堕替斯要，而希见证，不亦难乎！

安来近积罪，生逢百罹，戎狄孔棘，世乏圣导。潜遯晋山，孤居离众，幽处穷壑。窃览篇目，浅识独见，滞而不达，夙宵抱疑，谄取靡质。会太阳比丘竺法济，并州道人支昙讲，陟岵冒寂，重尔远集。此二学士高朗博通，诲而不倦者也。遂与析槃畅碍，造兹注解。世不值佛，又处边国，音殊俗异，规矩不同，又以愚量圣，难以逮也。冀未践绪者，少有微补，非敢自必，析究经旨。

○人本欲生经序第六△释道安

《人本欲生经》者，照乎十二因缘而成四谛也。本者，痴也；欲者，爱也；生者，生死也。略举十二之三以为目也。人在生死，莫不浪滞于三世，飘萦于九止，绸缪于八缚者也。十二因缘于九止，则第一人亦天也。四谛所鉴，鉴乎九止；八解所正，正乎八邪。邪正则无往而不恬，止鉴则无往而不愉。无往而不愉，故能洞照傍通；无往而不恬，故能神变应会。神变应会，则不疾而速；洞照傍通，则不言而化。不言而化，故无弃人；不疾而速，故无遗物。物之不遗，人之不弃，斯禅智这由也。故经曰：“道从禅智，得近泥洹”岂虚也哉！诚近归之要也。

斯经似安世高译为晋言也。言古文悉，义妙理婉。睹其幽堂之美，阙庭之富者或寡矣。安每览其文，欲疲不能，所乐而玩者，三观之妙也；所思而存者，想灭之辞也。敢以馀暇，为之撮注。其义同而文别者，无所加训焉。

○了本生死经序第七△释道安

夫四信妙舆者，众佑之宝轩也，以运连缚倒见众生。凡在三界，罔弗冠痴佩行婴，舞生死而趋阴堂，捐让色味，骖惑载疑，驱驰九止者也。既则狎贤侮圣，纵其奸慝，贪剑悲，泉截玄路，群排上要，殃祸备尝矣。世雄顾愍，深图变谋，法旂曜于重霓，道鼓震于雷吼，寂干障乎八纮，慧戈陷乎三有。于是碎痴冠，决婴佩，升信车，入谛轨，则因缘息成四喜矣。故曰了本生死也。了，犹解也；本，则痴也，元也。如来指举一隅，身子伸敷高旨，引兴幽赞，美矣盛矣。

夫计身有命，则随缘缚，谤佛毁信，若弥纶于幽室矣。夫解空无命，则成四谛，昭然立信，若日殿之丽乾矣。斯乃五十六药之崇基，渊乎盖众行之宗也。开微成务，孰先者乎！佛始得道，隆建大哀，此经则十六之一也。其在天竺，三藏圣师莫不以为教首而研几也。

汉之季世，此经始降兹土，雅邃奥邈，少达旨归者也。魏代之初，有高士河南支恭明为作注解，探玄畅滞，真可谓入室者矣。俊哲先人，足以折中也。然童蒙之伦，犹有未悟，故仍前迹，附释未训，非苟穿凿，以紫乱朱也。傥孤居始进者，可以辩惑焉。

○十二门经序第八△释道安

十二门者，要定之目号，六双之关径也。定有三义焉：禅也，等也，空也。用疗三毒，绸缪重玻婴斯幽厄，其日深矣，贪囿恚囿，痴城至固，世人游此，犹春登台，甘处欣欣，如居华展，嬉乐自娱，莫知为苦，尝酸速祸，困惫五道。夫唯正觉，乃识其谬耳。哀倒见之苦，伤蓬流之痛，为设方便，防萌塞渐，辟兹慧定，令自澣涤

，挫锐解纷，返神玄路。苟非至德，其道不凝也。

夫邪僻之心，必有微着，是故禅法以四为差焉。贪淫囿者，荒色悖蒸，不别尊卑，浑心耽恣，习以成狂，亡国倾身，莫不由之。虚迷空醉，不知为幻，故以死尸散落自悟，渐断微想，以至于寂，味乎无味，故曰四禅也。瞋恚囿者，争纤芥之虚声，结沥血之重咎，恩亲绝于快心，交友腐于纵忿，含怒彻髓，不悛灭族。圣人见强梁者不得其死，故训之以等。丹心讎亲，至柔其志，受垢含苦，治之未乱，醇德遂厚，兕不措角，况人害乎？故曰四等也。愚痴城者，诽古圣，谤真谛，慢二亲，轻师传，斯病尤重矣。以慧探本，知从痴爱，分别末流，了之为惑，练心攘慝，狂病瘳矣，故曰四空也。行者禅海之深醴，溉昏迷之盛火，激空净之渊流，荡痴尘之秽垢，则皎然成大素矣。行斯三者，则知所以宰身也。所以宰身者，则知所以安神也。所以安神者，则知所以度人也。

然则经无臣细，出自佛口，神心所制，言为世宝。慧日既没，三界丧目，经藏虽存，渊玄难测，自非至精，孰达其微？于是诸开士应真，各为训解。释其幽赜，辩其差贯，则烂然易见矣。穷神知化，何复加乎？从十二门已后，则是训传也。凡学者行十二门，却尽神足，灭外止粗，谓之成五道也。三向诸根，进消内结，谓尽诸漏也。始入尽漏，名不退转。诸佛嘉叹，记其成号。深不可测，独见晓焉；神不可量，独能精焉。陵云轻举，净光烛幽，移海飞岳，风出电入。浅者如昌，况成佛乎！是乃三乘之大路，何莫由斯定也。自始发迹，逮于无漏，靡不周而复始，习兹定也。行者欲崇德广业，而不进斯法者，其犹无柯而求伐，不饭而求饱，难以获矣。醒寤之士，得闻要定，不亦妙乎。

安宿不敏，生值佛后，又处异国，楷范多阙。仰希古列，滞而未究，寤寐忧悸，有若疾首。每惜兹邦禅业替废，敢作注于句末。虽未足光融圣典，且发蒙者，悦易览焉。安世高善开禅数，斯经似其所出，故录之于末。

○大十二门经序第九△释道安

夫淫息存乎解色，不系防闲也。有绝存乎解形，不系念空也。色解则冶容不能转，形解则无色不能滞。不转者，虽天魔玉颜，窈窕艳姿，莫足倾之，之谓固也。不滞者，虽游空无识，泊然永寿，莫足碍之，之谓真也。何者？执古以御有，心妙以了色，虽群居犹刍灵，泥洹犹如幻，岂多制形而重无色哉！是故圣人以四禅防淫，淫无遗焉；以四空灭有，有无现焉。淫有之息，要在明乎万形之未始有，百化犹逆旅也。怨憾之兴，兴于此彼，此彼既兴，遂成仇敌。仇敌适成，勃然赫怒，赫怒已发，无所不至。至不可至，神幽想狱，乃毒乃辛，欣之甘之。是以如来训之以等。等所难等，何往不等？等心既富，怨本息矣。岂非为之乎未有，图难于其易者乎！夫然，则三事凶耽，废然息矣，十二重关，廓然辟矣。根立而道生，觉立而道成，莫不由十二门。立乎定根，以逆道休也。大人挥变，荣光四塞，弹撤安明，吹沫千刃

，默动异刹，必先正受。明夫匪禅无以统乎无方而不留，匪定无以周乎万形而不碍。禅定不愆，于神变乎何有也！至矣尽矣，蔑以加矣。

此经世高所出也。辞旨雅密，正而不艳，比诸禅经，最为精悉。案《经后记》云：“嘉禾七年，在建邺周司隶舍写。”緘在篋匱，向二百年矣。冥然不行，无闻名者。比丘竺道护于东垣界贤者经中得之，送诣泽，乃得流布。得经之后，俄而其家遇火，护若不睹，为灰炭矣。自然将丧斯禅也，后死者不得与闻此经也。此经也，八音所诲，四道作训，约无乏，文重无简矣。精义入神，何以上乎？前世又为《悬解》，一家之传，故筌而次之。然世高出经，贵本不饰，天竺古文，文通尚质，仓卒寻之，时有不达。今为略注，继前人之末，非敢乱朱，冀有以寤焉。

○法镜经序第十△康僧会

夫心者众法之源，臧否之根，同出异名，祸福分流。以身为车，以家为国，周游十方，稟无倦怠。家欲难足，犹海吞流，火之获薪。六邪之残，已甚于蒺藜网之贼鱼矣。女人佞等三<鬼勿>，其善伪而信寡，斯家之为祸也。尊邪秽，贱清真，连业琐，谤圣贤，兴狱讼，丧九亲，斯家之所由矣。是以上士耻其秽，惧其厉，为之懾懾如也。默思遁迈，犹明哲之避无道矣。剔发毁容，法服为珍，靖处庙堂，练情攘秽，怀道宣德，闾导聋瞽。或有隐处山泽，枕石漱流，专心涤垢，神与道俱。志寂齐乎无名，明化周乎群生，贤圣竞乎清靖，称斯道曰大明，故曰《法镜》。

骑都尉安玄、临淮严浮调，斯二贤者，年在韶龀，弘志圣业，针句深致远，穷神达幽。愍世蒙惑，不睹大雅，竭思译传斯经景模。都尉口陈，严调笔受，言既稽古，义又微妙。然时干戈未戢，志士莫敢或遑，大道陵迟，内学者寡。会睹其景化，可以拯涂炭之尤嶮，然义壅而不达，因闲竭愚，为之注义。丧师历载，莫由重质，心愤口悱，停笔怆如，追远慕圣，涕泗并流。今记识阙疑，俟后明哲，庶有畅成，以显三宝矣。

卷七

道行经序第一释道安道行经后记第二未详作者放光经记第三未详作者合放光光赞略解序第四道安法师

须真天子经记第五未详作者普曜经记第六未详作者贤劫经记第七未详作者般舟三昧经记第八未详作者

首楞严三昧经注序第九未详作者合首楞严经记第十支敏度首楞严经后记第十一未详作者新出首楞严经序第十二弘充法师

法句经序第十三未详作者阿维越致遮经记第十四出经后记魔逆经记第十五出经后记慧印三昧及济方等学二经序赞第十六王僧孺撰

圣法印经记第十七出经后记文殊师利净律经记第十八出经后记王子法益坏目因缘经序第十九佛念法师

合微密持经记第二十支恭明

○道行经序第一

大哉智度，万圣资通，咸宗以成也。地含日照，无法不周，不恃不处，累彼有名。既外有名，亦病无形，两忘玄漠，块然无主，此智之纪也。夫永寿莫美乎上乾，而齐之殇子；神伟莫美于凌虚，而同之涓滞；至德莫大乎真人，而比之朽种；高妙莫大乎世雄，而喻之幻梦。由此论之，亮为众圣宗矣。何者？执道御有，卑高有差，此有为之域耳。非据真如，游法性，冥然无名也。据真如，游法性，冥然无名者，智度之奥室也。名教远想者，智度之遽庐也。然存乎证者，莫不契其无生而惶眩；存乎迹者，莫不忿其荡冥而诞诽。道动必反，优劣致殊，眩诽不其宜乎，不其宜乎！要斯法也，与进度齐轡，逍遥俱游，千行万定，莫不以成。众行得字而智进，全名诸法参相成者，求之此列也。且其经也，进咨第一义以为语端，退述权便以为谈首。行无细而不历，数无微而不极，言似烦而各有宗，义似重而各有主。巢见者庆其迹教而悦寤，宏喆者望其远标而绝目。陟者弥高而不能阶，涉者弥深而不能测，谋者虑不能规，寻者度不能荆既杳冥矣，真可谓大业渊藪，妙矣者哉！然凡谕之者，考文以徵其理者，昏其趣者也；察句以验其义者，迷其旨者也。何则？考文则异同每为辞，寻句则触类每为旨。为辞则丧其卒成之致，为旨则忽其始拟这义矣。若率初以要其终，或忘文以全其质者，则大智玄通，居可知也。从始发意，逮一切智，曲成决着，八地无染，谓之智也，故曰远离也。三脱照空，四非明有，统鉴诸法，因后成用，药病双亡，谓之观也。明此二行，于三十万言，其如视诸掌乎。颠沛造次，无起无此也。

佛泥曰后，外国高士抄九十章为《道行品》。醒灵之世，朔佛赍诣京师，译为汉文。因本顺旨，转音如已，敬顺圣言，了不加饰也。然经既抄撮，合成章指，音殊俗异，译人口传，自非三达，胡能一一得本缘故乎？由是《道行》颇有首尾隐者。古贤论之，往往有滞。仕行耻此，寻求其本，到于阗乃得。送诣仓垣，出为《放光品》。斥重省删，务今婉便，若其悉文，将过三倍。善出无生，论空特巧，传译如是，难为继矣。二家所出，足令大智焕尔阐幽。支谶全本，其亦应然。何者？抄经删削，所害必多，委本从圣，乃佛之至诚也。安不量末学，庶几斯心，载咏载玩，未坠于地。检其所出，事产始，犹令折伤玷缺，戢然无际。假无《放光》，何由解斯经乎？永谢先喆，所蒙多矣。今集所见，为解句下。始况现首，终隐现尾，出经见异，铨其得否，举本证抄，敢增损也。幸我同好，饰其瑕譌也。

○道行经后记第二△未详作者

光和二年十月八日，河南洛阳孟元士。口授天竺菩萨竺朔佛，时传言译者月支菩萨支谶，时侍者南阳张少安、南海子碧，劝助者孙和、周提立。正光二年九月十五日，洛阳城西菩萨寺中沙门佛大写之。

○放光经记第三（二十卷者。）△未详作者

惟昔大魏颍川朱士行，以甘露五年出家学道为沙门，出塞西至于阗国，写得正品梵书胡本九十章，六十万馀言。以太康三年遣弟子弗如檀，晋字法饶，送经胡本至洛阳。住三年，复至许昌。二年后至陈留界仓垣水南寺，以元康元年五月十五日，众贤者共集议，晋书正写。时执胡本者，于阗沙门无罗叉，优婆塞竺叔兰口传，祝太玄、周玄明共笔受。正书九十章，凡二十万七千六百二十一言。时仓垣诸贤者等，大小皆劝助供养，至其年十二月二十四日写都讫。经义深奥，又前后写者参校不能善悉。至太安二年十一月十五日，沙门竺法寂来至仓垣水北寺求经本。写时捡取现品五部并胡本，与竺叔兰更共考校书写，永安元年四月二日讫，于前后所写校最为差定，其前所写可更取校。晋胡音训畅义难通，诸开士大学文生书写供养讽诵读者，愿留三思，恕其不逮也。

○合放光光赞略解序第四△释道安

《放光》、《光赞》同本异译耳。其本俱出于阗国持来，其年相去无几。《光赞》，于阗沙门只多罗以泰康七年赍来，护公以其年十一月二十日出之。《放光分》，如檀以泰康三年于阗为师送至洛阳，到元康元年五月乃得出耳。先《光赞》来四年，后《光赞》出九年也。

《放光》，于阗沙门无罗叉执胡，竺叔兰为译，言少事约，删削复重，事事显炳，焕然易观也。而从约必有所遣于天竺辞及腾每大简焉。

《光赞》，护公执胡本，聂承远笔受，言准天竺，事不加饰。悉则悉矣，而辞质胜文也。每至事首，辄多不便，诸反覆相明，又不显灼也。考其所出，事事周密耳。互相补益，所悟实多。恨其寝逸凉土九十一年，几至泯灭，乃达此邦也。斯经既残不具，并《放光》寻出，大行华京，息心居士翕然传焉。中山支和上遣人于仓垣断绢写之，持还中山。中山王乃众僧城南四十里幢幡迎经。其行世如是，是故《光赞》人无知者。昔在赵魏，进得其第一品，知有兹经，而求之不得。至此，会慧常、进行、慧辩等将如天竺，路经凉州，写而因焉。展转秦雍，以晋泰元元年五月二十四日乃达襄阳。寻之玩之，欣有所益，辄记其所长，为《略解》如左。

般若波罗蜜者，成无上正。真道之根也。正者，等也，不二入也。等道有三义焉：法身也，如也，真际也。故其为经也，以如为首，以法身为宗也。如者，尔也，本末等尔，无能令不尔也。佛之兴灭，绵绵常存，悠然无寄，故曰如也。法身者，一也，常净也。有无均净，未始有名，故于戒则无戒无犯，在定则无定无乱，处智则无智无愚，泯尔都忘，二三尽息，皎然不缁，故曰净也，常道也。真际者，无所着也，泊然不动，湛尔玄齐，无为也，无不为也。万法有为，而此法渊默，故曰无所有者，是法之真也。由是其经万行两废，触章辄无也。何者？痴则无往而非徼，终日言尽物也，故为八万四千尘垢门也。慧则无往而非妙，终日言尽道也，故为八万四千度无极也。所谓执大净而万行正，正而不害，妙乎大也。

凡论般若，推诸病之疆服者，理彻者也。寻众药之封域者，断迹者也。高谈其辙迹者，失其所以指南也。其所以指南者，若《假号章》之不住，《五通品》之贡高，是其涉百辟而不失午者也。宜精理其辙迹，又思存其所指，则始可与言智已矣。何者？诸五阴至萨云若，则是菩萨来往所现法慧，可道之道也。诸一相无相，则是菩萨来往所现真慧，明乎常道也。可道，故后章或曰世俗，或曰说已也。常道，则或曰无为，或曰复说也。此两者同谓之智，而不可相无也。斯乃转法轮之目要，般若波罗蜜之常例也。

○须真天子经记第五△未详作者

《须真天子经》，太始二年十一月八日于长安青门内白马寺中，天竺菩萨昙摩罗察口授出之。时传言者安文惠、帛元信，手受者聂承远、张玄伯、孙休达。十二月三十日未时讫。

○普曜经记第六△未详作者

《普曜经》，永嘉二年，太岁在戊辰，五月，本齐菩萨沙门法护在水寺手执胡本，口宣晋言。时笔受者沙门康殊、帛法炬。

○贤劫经记第七△未详作者

《贤劫经》，永康元年七月二十一日，月支菩萨竺法护从罽宾沙门得是《贤劫三昧》，手执口宣。时竺法友从洛寄来。笔受者赵文龙。使其功德福流十方，普遂蒙恩，离于罪盖。其是经者，次见千佛，稽首道化，受菩萨决，致无生忍，至一切法。十方亦尔。

○般舟三昧经记第八△未详作者

《般舟三昧经》，光和二年十月八日，天竺菩萨竺朔佛于洛阳出。菩萨法护。时传言者月支菩萨支谶，授与河南洛阳孟福字元士，随侍菩萨张莲字少安笔受。令后普着。在建安十三年于佛寺中校定，悉具足。后有写者，皆得南无佛。又言，建安三年，岁在戊子，八月八日于许昌寺校定。

○首楞严三昧经注序第九△未详作者

首楞严三昧者，晋曰“勇猛伏定意”也。谓十住之人，志当而功显，不为而务成。盖勇猛伏之名，生于希尚者耳。虽功高天下，岂系其名哉。直以忘宗而称立，遗称故名贵，训三千，敷典诰，群生瞻之而弗及，钻之而莫喻，自非奇致超玄，胡可以应乎？圣录所谓勇猛者，诚哉难阶也。定意者，谓迹绝仁智，有无兼忘，虽复寂以应感，惠泽仓生，何尝不通以仁智，照以玄宗。所以寂者，未可得而分也，故其篇云，悉遍诸国亦无所分，而于法身不坏也。谓虽从感若流，身充宇宙，岂有为之者哉！谓化者以不化为宗，作者以不作为主，为主其自忘焉。像可分哉，若至理之可分，斯非至极也。可分则有亏，斯成则有散。所谓为法身者，绝成亏，遗合散，灵鉴与玄风齐踪，员神与太阳俱畅。其明不分，万类殊观，法身全济，非亦宜乎？故曰不分无所坏也。

首楞严者，冲风冠乎知丧，洪绪在于忘言，微旨尽于七住，外迹显乎三权。洞重玄之极奥，耀八特之化筌。插高木之玄标，建十准以伺能，玩妙旨以调习，既习释而知玄。遗慈故慈洽，弃照而照弘也。故有陶化育物，绍以经纶，自非领略玄宗，深达奇趣，岂云究之哉！沙门支道林者，道心冥乎上世，神悟发于天然。俊朗明彻，玄映色空，启于往数，位叙三乘。余时复畴谘，豫闻其一，敢以不敏，系于句末。想望来贤，助删定焉。（安公《经录》云，中平二年十二月八日支谶所出。其经首略“如是我闻”，唯称佛在王舍城灵鸟顶山中。）

合首楞严经记第十（胡文同，晋音“勇伏定意”。支敏度三经谢敷合注，共四卷。）

此经本有记云，支谶所译出。谶，月支人也。汉桓灵之世来在中国。其博学渊妙，才思测微，凡所出经，类多深玄，贵尚实中，不存文饰。今之《小品》、《阿闍贯》、《屯真》、《般舟》，悉谶所出也。

又有支越字恭明，亦月支人也。其父亦汉灵帝之世来献中国。越在汉生，似不及见讖也。又支亮字纪明，资学于讖，故越得受业于亮焉。越才学深彻，内外备通，以季世尚文，时好简略，故其出经，颇从文。然其属辞析理，文而不越，约而义显，真可谓深入者也。以汉末沸乱，南度奔吴，从黄武至建兴中，所出诸经凡数十卷，自有别传记录。亦云出此经，今不见复有异本也。然此《首楞严》自有小不同，辞有丰约，文有晋胡，较而寻之要不足以为异人别出也。恐是越嫌讖所译者辞质多胡音，所异者，删而定之；其所同者，述而不改。二家各有记录耳。此一本于诸本中辞最省便，又少胡音，遍行于世，即越所定者也。

至大晋之初，有沙门支法护，白衣竺叔兰，并更译此经，求之于义，互相发明。

披寻三部，劳而难兼，欲令学者即得其对，令以越所定者为母，护所出为子，兰所译者系之，其所无者辄于其位记而别之。或有文义皆同，或有义同而文有小小增减，不足重书者，亦混以为同。虽无益于大趣，分部章句，差见可耳。

《勇伏定记》曰：“元康元年四月九日，敦煌菩萨支法护手执胡经，口出《首楞严三昧》，聂承远笔受。愿令四辈揽综奉宣，观异同意。”

○首楞严经后记第十一△未详作者

咸安三年，岁在癸酉，凉州刺史张天锡在州出此《首楞严经》。于时有月支优婆塞支施仑手执胡本。支博综众经，于方等三昧特善，其志业大乘学也。出《首楞严》、《须赖》、《上金光首》、《如幻三昧》，时在凉州，州内正听堂湛露轩下集。时译者龟兹王世子制延善晋胡音。延博解群籍，内外兼综。受者常侍西海赵滂、会水令马亦、内侍来恭政，此三人皆是俊德，有心道德。时在坐沙门释慧常、释进行。凉州自属辞。辞旨如本，不加文饰，饰近俗，质近道，文质兼唯圣有之耳。

○新出首楞严经序第十二△释弘充

首楞严三昧者，盖神通之龙津，圣德之渊府也。妙物希微，非器像所表；幽玄冥湛，岂情言所议。冠九位以虚升，果万行而圆就，量种智以穷贤，绝殆庶而静统。用能灵台十地，扁鵲法云；罔象环中，神图自外。然心虽澄一，应无不周，定必凝泊，在感斯至。故明宗本则三达同寂，论善救则六度弥纶，辩威效则强魔习沦，语众变则百亿星繁。至乃徵号龙上，晦迹尘光，像告诸乘，有尽无灭。斯皆参定之冥功，成能之显事，权济之枢纲，勇伏之宏要矣。

罗什法师弱龄言道，思通法门。昔纡步关右，译出此经。自云布已来，竞辰而衍。中兴启运，世道载昌，宣传之盛，日月弥懋。太宰江夏王该综群籍，讨论渊敏，每鉴兹卷，特深远情。充以管昧，尝厕玄肆，预遭先匠，启训音轨，参听儒纬，仿佛

文意。以皇宋大明二年，岁次奄茂，于法言精舍略为注解，庶勉不习之传，敢慕我闻之义。如必纰谬，以俟君子。

○法句经序第十三△未详作者

昙钵偈者，众经之要义。昙之言法，钵者句也。而《法句经》别有数部，有九百偈，或七百偈及五百偈。偈者结语，犹诗颂也。是佛见事而作，非一时言，各有本末，布在众经。佛一切智，厥性大仁，愍伤天下，出兴于世，开现道义，所以解人，凡十二部经，总括其要，别有四部《阿含》。至去世后，阿难所传，卷无大小，皆称“闻如是”处佛所，究畅其说。是后五部沙门，各自钞采经中四句六句之偈，比次其义，条别为品。于十二部经靡不斟酌，无所适名，故曰《法句》。

夫诸经为法言，《法句》者，犹法言也。近世葛氏传七百偈，偈义致深，译人出之，颇使其浑漫。唯佛难值，其文难闻。又诸佛兴，皆在天竺，天竺言语与汉异音，云其书为天书，语为天语，名物不同，传实不易。唯昔蓝调、安侯世高、都尉、弗调，译胡为汉，审得其体，斯以难继。后之传者，虽不能密，犹尚贵其实，粗得大趣。始者维祇难出自天竺，以黄武三年来适武昌。仆从受此五百偈本，请其同道竺将炎为译。将炎虽善天竺语，未备晓汉，其所传言，或得胡语，或以义出音，近于质直。仆初嫌其辞不雅，维祇难曰：“佛言‘依其义不用饰，取其法不以严’。其传经者，当令易晓，勿失厥义，是则为善。”座中咸曰：“老氏称‘美言不信，信言不美’；仲尼亦云‘书不尽言，言不尽意’。明圣人意深邃无极。今传胡义，实宜径达。”是以自竭，受译人口，因循本旨，不加文饰，译所不解，则阙不传。故有脱失，多不出者。然此虽辞朴而旨深，文约而义博，事均众经，章有本故，句有义说。其在天竺，始进业者，不学《法句》，谓之越叙。此乃始进者之鸿渐，深入者之奥藏也。可以启蒙辩惑，诱人自立，学之功微，而所苞者广，实可谓妙要者哉！昔传此时有所不出，会将炎来，更从谘问，受此偈等，重得十三品，并校往故，朋所增定，第其品目，合为一部三十九篇，大凡偈七百五十二章。庶有补益，共广闻焉。

○阿维越致遮经记第十四（晋言《不退转法轮经》，四卷。出经后记）

太康五年十月十四日，菩萨沙门法护于敦煌从龟兹副使羌子侯得此梵书《不退转法轮经》，口敷晋言，授沙门法乘使流布，一切咸悉闻知。

○魔逆经记第十五△出经后记

太康十年十二月二日，月支菩萨法护手执梵书，口宣晋言，聂道真笔受，于洛阳城西白马寺中始出。折显元写，使功德流布，一切蒙福度脱。

○慧印三昧及济方等学二经序赞第十六△王僧孺撰

夫六画相因，悬日月而无改；二字一吐，更天地而靡渝。虽书不尽言，言非书不禅；言不尽意，意非言不称。是以谛听善思，承兹利喜，俯首屈足，恭此受持。若读若诵，已说今说，一音一偈，莫匪舟梁，一赞一称，动成轮轨。况夫五力方圆，四摄无怠，开方便门，示真实相，流方等之妙说，得菩提之至因，沐此宝池，照兹法炬，香支靡靡，慧露傍流，出伽耶之妙城，发娑罗之宝树。建安殿下含章基性，育德成体，懔声溢于秋水，美义光于冬日。事高祖丘兔圃，名出前意后苍。损己利人，忘我济物，傍通兼善，无碍无私。若空谷之必应，如洪钟之虚受，匡法弘道，以善为乐，重以植显因于永劫，袭妙果于兹生。托意绍隆，用心依止，妙达空有，深辩权实。而玉体不安，有亏凉暑，行仁莫显，楚君日见其瘳；施德靡言，汉相方飡其乐。桂叶龟脑，固风寒之易销，荔葩鸾骨，更腾飞之可辱。况复慧身方渐，善根宿树，无劳湔肠澣胃，不待望色察声。

有广州南海郡民何规，以岁次协洽，月旅黄钟，天监之十四年十月二十三日，采药于豫章胡翼山，幸非放子逐臣，乃类寻仙招隐。登峰十所里，屑若有来。将循曲陌，先限清涧，或如止水，乍有洁流，方从揭厉，且就褰揽。未济之间，忽不自觉，见涧之西隅有一长者，语规忽渡，规于时即留。其人面色正青，徒跣舍屣，年可八九十。面已皱敛，须长五六寸，髭半于须。耳过于眉，眉皆下被，眉之长毛长二三寸，随风相靡。唇色甚赤，语响而清。手眶黄，指毛亦长二三寸。着赭布帔，下有赭布泥洹僧。手捉书一卷，遥投与规。规即捧持，望礼三拜。语规：“可以此经与建安王。”兼言王之姓字。“此经若至，宜作三七日宿斋。若不晓斋法，可问下林寺副公。”副法师者，戒行精苦，恬憺无为，遗嗜欲，等豪贱，蔬藿自充，禅寂无担此长者言毕便去。行十馀步间，忽不复睹。

规开卷敬视名为《慧印三昧经》。经旨以至极法身无相为体，理出百非，义逾名相，寂同法相，妙等真如。言其慧冥此理，有若恒印，心照凝寂，故以三昧为名。后又有《济诸方等学经》，此下又题云：“天等萨和鞞曰僧迦与海虎王。”经旨以流通至教，轨法有体，所以诫示大士化物方法，言若济诸苍氓，宜弘方等之教。方等者，大乘之通名，究竟之弘旨。其轴题云：“敦煌菩萨沙门支法护所出，竺法首笔受，共为一卷，写以流。”轴用淳漆，书甚紧洁，点制可观。究寻义趣，或微或显，称在罗阅山着陀邻尼行，无来无去，非住非止。斯盖鹫岳鹤林之别记，宝殿孤园之后述，不殊玉检，靡异宝函，理出希微，辞深钩致，是唯正说，曾匪异端。虽王遵之得《四十二章》，安清之出《百六十品》，无以或异。

大王沐浴持奉，擎跪钻习，多写广述，阐扬玄旨。孰匪医王，即斯药树，不待眼瞬，无劳苦口，舍兹六术，屏此十巫。昔或授编书于圯上，受揣术于谷里，乍有寓言，且或假梦，未有因应炳发，若此其至焉。受命下才，式旃上道，敢因滓贱，率此颛蒙。其辞曰：

雷音震响，录简青编。匪言曷教，非迹靡传。是资妙象，实寄幽筌。照之慧烛，济以宝船。悬哉至矣，在应斯圆。覆其瓊礎，浸此熙涟。救焚援溺，去盖销缠。灼灼应韩，英英河楚。松孤桂郁，鸾栖鹏举。照野光朝，润山枯渚。滥源兹永，覆篲已多。郁为蕃干，擢此天柯。寄诚梵表，托好禅阿。接足能仁，心直妙觉。用遗滞染，是祛尘浊。靡向非真，何背非俗。一忘受想，将捐味触。无德不训，有感必召。吐彼神诀，示我玄要。既蠲既已，留华及少。等以北恒，均之东耀。

佑少寻经律，窃闚诸部之奥，但一切变易，万事迁讹，所以古今同异，触类皆有，故鱼谬为鲁，陶误成阴。案晋末已来，关中诸贤经录云，《慧印三昧经》，支谦所出。《济方等大乘学经》，法护所出。《圣法印经后记》云：“晋元康四年，菩萨沙门支法护于酒泉出此经，弟子竺法首笔受。”而何规所得经本，二经同卷，题方等于法护，乱三昧于支谦，实由编写成然，非为诬滥。而一往观览，容生疑惑，聊记所忆，存之末尘，故出别记。

○圣尘印经记第十七（天竺名《阿遮昙摩文图》。）△出经后记

元康四年十二月二十五日，月支菩萨沙门法护，于酒泉演出此经，弟子竺法首笔受。令此深法普流十方，大乘常祝

○文殊师利净律经记第十八△出经后记

经后记云：沙门竺法护于京师，遇西国寂志诵出此经。经后尚有数品，其人忘失，辄宣现者，转之为晋。更得其本，补令具足。太康十年四月八日，白马寺中，聂道真对笔受，劝助刘元谋、传公信、侯彦长等。

○王子法益坏目因缘经序第十九△竺佛念造

原夫善恶之运契，犹形影之相顾，受对明验，凡三差焉，现世、中世、后世。播九色之深恩，以悦天妃之耳目；孤禽投王而全命，形受五刑之切酷。斯现报也。群徒潜沦于幽壑，神陟沦漂而不改；身酸历世之殃，不晓王子之丧目。斯中报也。阿兰从祸于无想，婴佩永惑于始终；终为着翅之暴狸，飞沉受困而难计。斯后报也。故圣人降灵，必有所由，非务不豫，清白明矣。

玄鉴三世弱丧之流，深记来世坏形之累，趣使引入百练之室。自如来逝后，阿育登位，纲维阎浮，光被六合，图形神寺，八万四千，罗汉御世，泛济亿数，国主师宗，玄化滂沛，万民仰戴而不已，神祇钦赖而愈深。然王子法益，宿植洪业，生在王宫，容貌殊特，复受对此，靡知缘起。

会秦尚书令、辅国将军、宗正卿、领城门校尉使者、司隶校尉姚旻者，南安郡人也

。亲姚韶之次兄，字景嶷，文为儒表，则烈勋于千载；武为邈群，则皎然而独标。亢音通冥，则辩机而旷远，执素纵情，则翱翔而无伦。德也纯懿，范也难模，赫逸翰于群才，震龙威于昆锋。然愍永惑之叵救，伤愚党之不寤，欲绍先胜之遗迹，竖玄宗于末俗。故请天竺沙门昙摩难提出斯缘本。秦建初六年，岁在辛卯，于安定城，二月十八日出，至二十五日乃讫。胡本三百四十三首户也，传为汉文一万八百八十言。佛念译音，情义实难。或离文而就义，或正滞而傍通，或取解于诵人，或事略而曲备。冀将来之学士，令鉴罪福之不朽。设有毫耗润色者，尽铭之于萌兆。故序之焉。

○合微密持经记第二十△支恭明作

合《微密持陀邻尼总持》三本：（上本是《陀邻尼》，下子是《总持》、《微密持》也。）《佛说无量门微密持经》。《佛说阿难陀目佉尼阿离陀邻尼经》。《佛说总持经》，一名《成道降魔得一切智》。（二本后皆有此名，并不别出耳。）

又别剡西台昙斐记云：

此经凡有四本，三本并各二名，一本三名，备如后列。其中文句参差，或胡或汉音殊，或随义制语，各有左右，依义顺文，皆可符同。所为异处，后列得法利、三乘阶级人数，及动地、雨华、诸天妓乐供养，多不悉备，意所未详。

一本一名《无量门微密之持》，二名《成道降魔得一切智》。此一本名行于世，为常旧本。

一本一名《阿难陀目佉尼呵离陀罗尼》，二名《疾使人民得一切智》。

一本一名《无端底门总持之行》，二名《菩萨降却诸魔坚固于一切智》。

一本一名《出生无量门持》，二名《一生补处道行》，三名《成道降魔得一切智》。此本备明法利及动地妓乐事。

四本皆各标前一名于经首，第二第三名不以题经也。后舍利弗请名，佛说名，皆备如前列。

卷八

摩诃钵罗若波罗蜜经抄序第一道安法师大品经序第二长安睿法师注解大品序第三大梁皇帝小品经序第四长安睿法师

大小品对比要抄序第五支道林作正法华经记第六出经后记正法华经后记第七未详作者法华宗要序第八慧观法师

法华经后序第九长安睿法师持心经后记第十出经后记思益经序第十一长安睿法师维摩诘经序第十二僧肇法师

合维摩诘经序第十三敏度法师毗摩罗诘提经义疏序第十四长安睿法师自在王经后序第十五长安睿法师大涅槃经序第十六凉州朗法师

大涅槃经记序第十七未详作者六卷泥洹经记第十八出经后记

二十卷泥洹经记第十九出智猛传

○摩诃钵罗若波罗蜜经抄序第一△道安法师

昔在汉阴十有五载，讲《放光经》岁常再遍。及至京师，渐四年矣，亦恒岁二，未敢堕息。然每至滞句，首尾隐没，释卷深思，恨不见护公、叉罗等。会建元十八年，正车师前部王名弥第来朝，其国师字鸠摩罗跋提，献胡《大品》一部，四百二牒，言二十千首户。首户三十二字，胡人数经法也。即审数之，凡十七千二百六十首户，残二十七字，都并五十五万二千四百七十五字。天竺沙门昙摩蜚执本，佛护为译，对而检之，慧进笔爱。与《放光》、《光赞》同者，无所更出也。其二经译人所漏者，随其失处，称而正焉。其义异不知孰是者，辄并而两存之，往往为训其下，凡四卷。其一纸二纸异者，出别为一卷，合五卷也。

译胡为秦，有五失本也：一者胡语尽倒，而使从秦，一失本也。二者胡经尚质，秦人好文，传可众心，非文不合，斯二失本也。三者胡经委悉，至于叹咏，叮咛反覆，或三或四，不嫌其烦。而今裁斥，三失本也。四者胡有义说，正似乱辞，寻说向语，文无以异。或千五百，刈而不存，四失本也。五者事已全成，将更傍及，反腾前辞，已乃后说。而悉除此，五失本也。然《般若经》三达之心，覆面所演，圣必因时，时俗有易，而删雅古以适今时，一不易也。愚智天隔，圣人叵阶，乃欲以千岁之上微言，传使合百王之下末俗，二不易也。阿难出经，去佛未久，尊者大迦叶令五百六通迭察迭书。今离千年，而以近意量裁。彼阿罗汉乃兢兢若此，此生死人而平平若此，岂将不知法者勇乎？斯三不易也。涉兹五失，经三不易，译胡为秦，讵可不慎乎！正当以不闻异言，传令知会通耳，何复嫌大匠之得失乎？是乃未所敢

知也。

前人出经，支谦、世高，审得胡本难系者也。又罗、支越，斗凿之巧者也。巧则巧矣，惧穷成而混沌终矣。若夫以《诗》为烦重，以《尚书》为质朴，而删令合今，则马、郑所深恨者也。近出此撮，欲使不杂，推经言旨，唯惧失实也。其有方言古辞，自为解其下也。于常首尾相违句不通者，则冥如合符，厌如复折，乃见前人之深谬，欣通外域之嘉会也。于九十章荡然无措疑处，毫芒之间，泯然无微疹。已矣乎！

南摸一切佛，过去、未来、现在佛，如诸法明。（天竺礼般若辞也。明，智也。外国礼有四种：一闍耶，二波罗南，三婆南，四南摸。南摸，屈体也，跪也。此四拜，拜佛、外道、国主、父母通拜耳。礼父母云南无萨迦，萨迦，供养也。）

《摩诃（大也。）钵罗若（智也。）波罗（度也。）密（无极。）经抄》（天竺经无前题，前题皆云吉法。吉法竟是也。道安为此首目题也。）

○大品经序第二△长安释僧睿

摩诃般若波罗蜜者，出八地之由路，平十阶之龙津也。夫渊府不足以尽其深美，故寄大以目之。水镜未可以喻其澄朗，故假慧以称之。造尽不足以得其涯极，故借度以明之。然则功托有无，度名所以立；照本静末，慧日以之生；旷兼无外，大称由以起。斯三名者，虽义涉有流，而诣得非心；迹寄有用，而功实非待。非心故以不住为宗，非待故以无照为本。本以无照，则凝知于化始；宗以非心，则忘功于行地。故启章玄门，以不住为始；妙归三慧，以无得为终。假号照其真，应行显其明，无生冲其用，功德于其深。大明要终以验始，沕和即始以悟终。荡荡焉，真可谓大业者之通涂，毕佛乘者之要轨也。

夫实重故防深，功高故校广。嘱累之所以殷勤，功德之所以屡增，良有以也。而经来兹土，乃以秦言译之，典谟乖于殊制，名实丧于不谨。致使求之弥至，而失之弥远；顿轡重关，而穷路转广。不遇渊匠，殆将坠矣。亡师安和尚凿荒涂以开辙，标玄指于性空，落乖踪而直达，殆不以廖文为閤也。亹之功，思过其半，迈之远矣。

鸠摩罗什法师慧心夙悟，超拔特诣，天魔干而不能回，渊识难而不能屈。扇龙树之遗风，震慧响于此世。秦王感其来仪，时运开其凝滞。以弘始三年，岁次星纪，冬十二月二十日至长安。秦王扣其虚关，匠伯陶其渊致。虚关既开，乃正此文言；渊致既宣，而出其《释论》。渭滨流祗洵之化，西明启如来之心，逍遥集德义之僧，京城溢道咏之音。末法中兴，将始于此乎。

予既知命，遇此真化，敢竭微诚，属当译任。执笔之际。三惟亡师“五失”及“三不易”之诲，则忧惧交怀，惕焉若厉。虽复履薄临深，未足喻也。幸冀宗匠通鉴，文虽左右，而旨不违中，遂谨受案译，敢当此任。以弘始五年，岁在癸卯，四月二十三日，于京城之北逍遥园中出此经。法师手执胡本，口宣秦言，两释异音，交辩文旨。秦王躬览旧经，验其得失，谕其通途，坦其宗致。与诸宿旧义业沙门释慧恭、僧?僧迁、宝度、慧精、法钦、道流、僧睿、道恢、道标、道恒、道惊等五百余人，详其义旨，审其文中，然后书之。以其年十二月十五日出荆校正检括，明年四月二十三日乃讫。文虽粗定，以《释论》检之，犹多不荆是以随出其论，随而正之。

《释论》既讫，尔乃文定。定之未已，已有写而传者；又有以意增损，私以《般若波罗蜜》为题者。致使文言舛错，前后不同。良由后生虚己怀薄，信我情笃故也。胡本唯《序品》、《阿鞞跋致品》、《魔事品》有名，馀者直第其品数而已。法师以名非佛制，唯存《序品》，略其二目。其事数之名与书不同者，皆是法师以义正之者也。如“阴入持”等，名与义乖，故随义改之。“阴”为“众”，“入”为“处”，“持”为“性”，“解脱”为“背舍”，“除人”为“胜处”，“意止”为“念处”，“意断”为“正勤”，“觉意”为“菩提”，“直行”为“圣道”。诸如此比，改之甚众。胡音失者，正之以天竺；秦言谬者，定之以字义。不可变者，即而书之。是以异名斌然，胡音殆半。斯实匠者之公谨，笔受之重慎也。幸冀遵实崇本之贤，推而体之，不以文朴见咎，烦异见情也。

○注解大品序第三△大梁皇帝

机事未形，六画得其悔吝；玄象既运，九章测其盈虚。斯则鬼神不能隐其情状，阴阳不能遁其变通。至如摩诃般若波罗蜜者，洞达无底，虚豁无边，心行处灭，言语道断。不可以数术求，不可以意识知。非三明所能照，非四辩所能论。此乃菩萨之正行，道场之直路，还源之真法，出要之上首。本来不然，毕竟空寂。寄大不能显其博，名慧不难庶其用，假度不能机其通，借岸不能穷其实。若谈一相，事绝百非，补处默然，等觉息行。始迺可谓无德而称，以无名相作名相说。导涉求之意，开新发之眼，故有般若之字，彼岸之号。

顷者学徒罕有尊重，或时闻听不得经味。帝释诚言，信而有徵。此实贤众之百虑，菩萨之魔事。故唱喻高和喻寡，知愈希道愈贵，致使正经沉匿于世。实由虚己情少，怀疑者多。虚己少则是我之见深，怀疑多则横构之虑繁。然则虽繁虑纷纭，不出四种：一谓此经非是究竟，多引《涅槃》以为硕诀；二谓此经未是会三，咸通《法华》以为盛难；三谓此经三乘通教，所说《般若》即声闻法；四谓此经是阶级行，于渐教中第二时说。旧义如斯，迺无是非。较略四意，粗言所怀。《涅槃》是显其果德，《般若》是明其因行。显果则以常住佛性为本，明因则以无生中道为宗。以世谛言说，是《涅槃》是《般若》；以第一义谛言说，岂可复得谈其优劣。《法华》会三以归一，则三遣而一存，一存未免乎相，故以万善为乘体。《般若》即三而不三，则三遣而一亡，然无法之可得，故以无生为乘体。无生绝于戏论，竟何三之

可会？所谓百花异色，共成一阴；万法殊相，同入般若。言三乘通教，多执二文，今复开五意，以增所疑：一、声闻若智若断，皆是菩萨无生法忍；二、三乘学道，宜闻《般若》；三、三乘同学《般若》，俱成菩提；四、三乘欲住欲证，不离是忍；五、罗汉、辟支，从般若生。于此五义，不善分别，坚着三乘，教同一门。遂令朱紫共色，珉玉等价。若明察此说，深求经旨，连环既解，弄丸自息。谓第二时，是亦不然。人心不同，皆如其面，根性差别，复过于此，非可局以一教，限以五时。般若无生，非去来相，岂可以数量拘，宁可以次第求？始于道树，终于双林，初中后时，常说智慧，复何可得名为渐教？《释论》言：“须菩提闻《法华经》中说，于佛所作少功德，乃至戏笑，渐渐必当作佛。又闻《阿鞞跋致品》中有退不退，又复闻声闻人皆当作佛，是故今问为毕定为不毕定？”以此而言，去之弥远。

夫学出离，非求语言，应定观道，以正宗致。三乘不分，依何义说？相与无相，有如火水，二性相违，岂得共贯？虽一切圣人以无为法，三乘入空，其行各异。声闻以坏缘观生灭空，缘觉以因缘观法性空，菩萨以无生观毕竟空。此则淄渇殊味，泾渭分流，非可以口胜，非可以力争。欲及弱丧，去斯何适？值大宝而不取，遇深经而不求，亦何异穷子反走于宅中，独姥掩目于道上。此迺惑行之常性，迷途之恒心。但好龙而观画，爱象而玩迹，荆出可为流恟，法水所以大悲。经譬兔马，论喻鹿犀，俱以一象配成三兽，用渡河以测境，因围箭以验智，格得空之浅深，量相心之厚薄。悬镜在前，无待耳识，离娄既睇，岂劳相者？若无不思议之理，岂有不可思议之事。放瑞光于三千，集奇莲于十方，变金色于大地，严华台于虚空。表舌相之不虚，证般若之真实。所以龙树、道安、童寿、慧远，或以大权应世，或以殆庶救时，莫不服膺上法，如说修行。况于细人，可离斯哉！

此经东渐，二百五十有八岁，始于魏甘露五年，至自于阗。叔兰开源，弥天导江，鸠摩罗什澍以甘泉。三译五校，可谓详矣。龙树菩萨着《大智论》训解斯经，义旨周备。此实如意之宝藏，智慧之沧海，但其文远旷，每怯近情。朕以听览馀日，集名僧二十人，与天保寺去宠等详其去取；灵根寺慧令等兼以笔功，探采《释论》，以注经本，略其多解，取其要释。此外或摭关河旧义，或依先达故语，时复间出，以相显发。若章门未开，义势深重，则参怀同事，广其所见，使质而不简，文而不繁，庶令学者有过半之思。

讲《般若经》者多说五时，一往听受，似有条理，重更研求，多不相符。唯《仁王般若》具书名部，世既以为疑经，今则置而不论。僧睿《小品序》云：“斯经正文凡有四种，是佛异时适化之说，多者十万偈，少者六百偈。”略出四种而不列名。《释论》言《般若》部党有多有少；《光赞》、《放光》、《道行》止举三名，复不满四。此土别有一卷，谓为《金刚·般若》，欲以配数，可得为五。既不具得经名，复不悉时之前后，若以臆断，易致讥嫌。此非义要，请俟多闻。

今注大品，自有五段，非彼所言五时般若。劝说以不住标其始，命说以无教通其道

，愿说以无得显其行，信说以甚深叹其法，广说以不尽要其终。中品所以累教，末章所以三属，义备后释，不复详言。设遇时旷正教，处无法名，犹且苦辛草泽，经历嶮远，翘心渴听，澍意希夷，冀迟玄应，想像空声。轻生以重半偈，卖身以尊一言，甘喋血而不疑，欣出髓而无恪。况复龙宫神珠，宝台金鏤，难得之货，难闻之法，遍布塔寺，充刃目前。岂可不伏心受持，虚怀钻仰？使佛种相续，菩提不断，知恩反复，更无他道。方以雪山，匹以香城，宁得同日语其优劣？率书所得，惧增来过，明达后进，幸依法行！

○小品经序第四△释僧睿作

《般若波罗蜜经》者，穷理尽性之格言，菩萨成佛之弘轨也。轨不弘则不足以冥群异，一指归；性不尽则物何以登道场，成正觉。正觉之所以成，群异之所以一，何莫由斯道也！是以累教殷勤，三抚以之频发；功德叠校，九增以之屡至。如《问相》标玄而玄其玄，《幻品》忘寄而忘其忘，《道行》坦其津，《难问》穷其源，《随喜》忘趣以要终，《照明》不化以即玄。章虽三十，贯之者道；言虽十万，佩之者行。行凝然后无生，道足然后补处，及此而变一切智也。《法华》镜本以凝照，《般若》冥末以解悬。解悬理趣，菩萨道也；凝照镜本，告其终也。终而不泯，则归途扶疏，有三实之迹；权应不夷，则乱绪纷纶，有惑趣之异。是以《法华》、《般若》，相待以期终；方便实化，冥一以俟荆论其穷理尽性，夷明万行，则实不如照；取其大明真化，解本无三，则照不如实。是故叹深则《般若》之功重，美实则《法华》之用微。此经之尊，三抚三嘱，未足惑也。

有秦太子者，寓迹储宫，拟韵区外。玩味斯经，梦想增至。准悟《大品》，深知译者之失。会闻鸠摩罗法师神授其文，真本犹存，以弘始十年二月六日请令出之，至四月三十日校正都讫。考之旧译，真若荒田之稼，芸过其半，未讎多也。斯经正文凡有四种，是佛异时适化广略之说也。其多者云有十万偈，少者六百偈。此之《大品》也，乃是天竺之中品也。随宜之言，复何必计其多少，议其烦简耶？胡文雅质，案本译之，于丽巧不足，朴正有馀矣。幸冀文悟之贤，略其华而几其实也。

○大小品对比要抄序第五△支道林作

夫《般若波罗蜜》者，众妙之渊府，群智之玄宗，神王之所由，如来之照功。其为经也，至无空豁，廓然无物者也。无物于物，故能齐于物；无智于智，故能运于智。是故夷三脱于重玄，齐万物于空同，明诸佛之始有，尽群灵之本无，登十住之妙阶，趣无生之径路。何者？赖其至无，故能为用。夫无也者，岂能无哉？无不能自无，理亦不能为理。理不能为理，则理非理矣；无不能自无，则无非无矣。是故妙阶则非阶，无生则非生。妙由乎不妙，无生由乎生。是以十住之称，兴乎未足定号；般若之，生乎教迹之名。是故言之则名生，设教则智存。智存于物，实无迹也；名生于彼，理无言也。何则？至理冥壑，归乎无名。无名无始，道之体也。无可不

可者，圣之慎也。苟慎理以应动，则不得不寄言。宜明所以寄，宜畅所以言。理冥则言废，忘觉则智全。若存无以求寂，希智以忘心，智不足以尽无，寂不足以冥神。何则？故有存于所存，有无于所无。存乎存者，非其存也；希乎无者，非其无也。何则？徒知无之为无，莫知所以无；知存之为存，莫知所以存。希无以忘无，故非无之所无，寄存以忘存，故非存之所存。莫若无其所以无，忘其所以存。忘其所以存，则无存于所存；遗其所以无，则忘无于所无。忘无故妙存，妙存故书无，书无则忘玄，忘玄故无心。然后二迹无寄，无有冥荆是以诸佛因般若之无始，明万物之自然；众生之丧道，溺精神乎欲渊。悟群俗以妙道，渐积损以至无，设玄德以广教，守谷神以存虚，齐众首于玄同，还群灵乎本无。

盖闻出《小品》者，道士也。尝游外域，岁数悠曩，未见典载，而不详其姓名矣。尝闻先学共传云，佛去世后，从《大品》之中抄出《小品》。世传其人，唯目之以淳德，验之以事应，明其至到而已，亦莫测其由也。夫至人也，览通群妙，凝神玄冥，灵虚响应，感通无方。建同德以接化，设玄教以悟神，述往迹以搜滞，演成规以启源，或因变以求通，事济而化息；适任以全分，分足则教废。故理非乎变，变非乎理；教非乎体，体非乎教。故千变万化，莫非理外。神何动哉，以之不动，故应变无穷；无穷之变，非圣在物。物变非圣，圣未始于变。故教遗兴乎变，理滞生乎权，接应存乎物，理致同乎归。而辞数异乎本，事备乎不同。不同之功，由之万品，神悟迟速，莫不缘分。分闇则功重，言积而后司，质明则神朗，触理则玄畅。轻之与重，未始非分。是以圣人之为教，不以功重而废分，分易而存轻。故群品所以悟，分功所以成，必须重以运通，因其宜以接分。此为悟者之功重，非圣教之有烦。令统所以约，教功所以全，必待统以适任，约文以领玄。领玄则易通，因任则易从。而物未悟二本之无异，统致同乎宗，便以言数为大小，源流为精粗。文约谓之小，文殷谓之大，顺常之为通，因变之为舞，守数之为得，领统之为失。而彼措文之徒，羁见束教，顶着《阿含》，神匱分浅，才不经宗，儒墨大道，域定圣人，志局文句，诘教难权。谓崇要为达谅，领统为伤宗，须徵验以明实，效应则疑伏。是以至人顺群情以徵理，取验乎沸油；明《小品》之体本，塞群疑幽滞。因物之徵验，故示验以应之。今不可以趣徵于一验，目之为淳德；效丧于事实，谓之为常人。而未达神化之权，统玄应于将来，畅济功于殊涂，运无方之一致。而察殊轨为异统，观奇化为逆理，位大宝为欣王，聚济货为欲始。徒知至圣之为教，而莫知所以教。是以圣人标域三才，玄定万品，教非一途，应物万方。或损教违无，寄通适会；或抱一御有，系文明宗。崇圣典为世轨，则夫体道尽神者，不可诘之以言教；游无蹈虚者，不可求之于形器。是以至人于物，遂通而已。

明乎大小之无异，畅玄标之有寄，因顺物宜，不拘小介。或以《大品》辞茂事广，喻引宏奥，虽穷理有外，终于玄同。然其明宗统一，会致无异，斯亦大圣之时教，百姓之分致。苟以分致之不同，亦何能求简于圣哉？若以简不由圣，岂不寄言于百姓。夫以万声钟响，响一以持之；万物感圣，圣亦寂以应之。是以声非乎响，言非乎圣明矣。且神以知来，夫知来者，莫非其神也。机动则神朗，神朗则逆鉴，明夫

来往，常在鉴内。是故至人鉴将来之希纂，明才致之不并，简教迹以崇顺，拟群智之分向。关之者易知，希之者易行。而《大品》言数丰具，辞领富溢，问对衍奥，而理统宏邃。虽玄宗易究，而详事难备。是以明夫为学之徒，须寻迹旨，关其所往，究揽宗致，标定兴尽，然后悟其所滞，统其玄领。或须练综群问，明其酬对，探幽研赜，尽其妙致。或以教众数溢，讽读难究，欲为写崇供养，力致无阶。诸如此例，群仰分狭，闕者绝希。是故出《小品》者，参引王统，简领群目，筌哉事数，标判由宗，以为《小品》，而辞喻清约，运旨亹亹。然其往往明宗而标其会致，使宏统有所，于理无损，自非至精，孰其明矣。又察其津涂，寻其妙会，览始原终，研极奥旨。领《大品》之王标，备《小品》之玄致，缥缥缈缈揽津乎玄味，精矣尽矣，无以加矣。斯人也，将神王于冥津，群形于万物，量不可测矣。宜求之于筌表，寄之于玄外。

惟昔闻之曰，夫《大》、《小品》者，出于本品，本品之文有六十万言。今游天竺，未适于晋。今此二抄亦兴于大本，出者不同也，而《小品》出之在先。然斯二经虽同出于本品，而时往往有不同者。或《小品》之所具，《大品》所不载；《大品》之所备，《小品》致略玄总，事要举宗，《大品》虽辞致婉巧，而不丧本归。至于说者，或以专句推事，而不寻况旨；或多以意裁，不依经本。故使文流相背，义致同乖，群义偏狭，丧其玄旨。或失其引统，错徵其事，巧辞辩伪，以为经体，虽文藻清逸，而理统乖宗。是以先哲出经，以胡为本，《小品》虽抄，以大为宗。推胡可以明理，徵大可以验校若苟任胸怀之所得，背圣教之本旨，徒常于新声，苟竞于异常。异常未足以徵本，新声不可以经宗，而遗异常之为谈，而莫知伤本之为至。伤本则失统，失统则理滞，理滞则或殆。叵以殆而不思其源，困而不寻其本，斯则外不关于师资，内不由于分得。岂非仰资于有知，自塞于所寻，困蒙于所滞，自穷于所通。进不闡常，退不研新，说不依本，理不经宗。而忽咏先旧，毁訾古人，非所以为学，辅其自然者哉！

夫物之资生，靡不有宗，事之所由，莫不有本。宗之与本，万理之源矣。本丧则理绝，根配则枝倾，此自然之数也，未绍不然矣。于斯也，徒有天然之才，渊识邈世，而未见《大品》，览其源流，明其理统，而欲寄怀《小品》，率意造义，欲寄其分得，标显自然，希邈常流，徒尚名宾。而竭其才思，玄格圣言，趣悦群情，而乖本违宗，岂相望乎《大品》也哉！如其不悟，将恐遂其所惑，以罔后生。是故推考异同，验其虚实，寻流穷源，各有归趣。而《小品》引宗，时有诸异。或辞倒事同，而不乖旨归；或取其初要，废其后致；或筌次事宗，倒其首尾；或散在群品，略撮玄要。时有此事，乖互不同。又《大品》事数甚众，而辞旷浩衍，本欲推求本宗，明验事旨，而用思其多劳，审功又寡。且稽验废事，不覆速急。是故余今所以例玄事以骈比，标二品以相对，明彼此之所在，辩大小之有先。虽理或非深奥，而事对之不同。故采其所究，精粗并兼，研尽事迹，使验之有由。故寻源以求实，趣定于理宗。是以考大品之宏致，验小品之总要，搜玄没之所存，求同异之所寄。□□有在，寻之有轨尔。乃也贯综首尾，推步玄领，究其槃结，辨其凝滞。使文不违旨

，理无负宗，栖验有寄，辨不失徵。且于希咏之徒，浪神游示，陶冶玄妙，推寻源流，关虚考实，不亦夷易乎！若其域乖体极，对非理标，或其所寄者，愿俟将来摩诃萨，幸为研尽，备其未详也。

○正法华经记第六△出经后记

太康七年八月十日，敦煌月支菩萨沙门法护手执胡经，口宣出《正法华经》二十七品，授优婆塞聂承远、张仕明、张仲政共笔受，竺德成、竺文盛、严威伯、续文承、赵叔初、张文龙、陈长玄等共劝助欢喜。九月二日讫。天竺沙门竺力、龟兹居士帛元信共参校，元年二月六日重覆。又元康元年，长安孙伯虎以四月十五日写素解。

○正法华经后记第七△未详作者

永熙元年八月二十八日，比丘康那律于洛阳写《正法华品》竟。时与清戒界节优婆塞张季博、董景玄、刘长武、长文等手经本，诣白马寺对，与法护口校古训，讲出深义。以九月大斋十四日，于东牛寺中施檀大会，讲诵此经，竟日尽夜。无不咸欢，重已校定。

○法华宗要序第八△释慧观

夫本际冥湛，则神根凝一；涉动离淳，则精粗异陈。于是心譬竞策，尘想争驰，翳有浅深，则昏明殊镜。是以从初得佛，暨于此经，始应物开津，故三乘别流。别流非真，则终期有会；会必同源，故其乘唯一，唯一无上，故谓之妙法。颂曰：

是乘微妙，清淨第一。于诸世间，最无有上。

夫妙不可明，必拟之有像。像之美者，莲华为上。莲华之秀，分陀利为最，妙万法而为言，故喻之分陀利。其为经也，明发蒙不可以语极，释权应之所由；御终不可以秘深，则开实以显宗致。权应既彰，则扁心自废；宗致既显，则真悟自生。故能令万流合注，三乘同往。同往之三，会而为一，乘之始也。觉慧成满，乘之盛也。灭景澄神，乘之终也。虽以万法为乘，然统之有主，举其宗要，则慧收其名。故经以真慧为体，妙一为称。是以释迦玄音始发，赞佛智甚深；多宝称善，叹平等大慧。颂曰：

为说佛慧故，诸佛出世间。唯此一事实，馀二则非真。

然则佛慧乃一之正实，乘之体成，妙之至足，华之开秀者也。虽寄华宣微，而道玄像表，称之曰妙，而体绝精粗。颂曰：是法不可示，言辞相寂灭。

二乘所以息虑，补处所以绝法，唯佛与佛乃能究荆故恒沙如来，感希声以云萃；已逝之圣，振馀灵而现证。信佛法之奥区，穷神之妙境，其此经之谓乎，此经之谓乎！

观少习归一之言，长味会通之要，然缅思愈勤，而幽旨弥潜。未尝不面灵鹫以遐想，临辞句而增怀。谅由枝说差其本，谬文乖其正也。

有外国法师鸠摩罗什，超爽俊迈，奇悟天拔，量与海深，辩流玉散。继释踪以嗣轨，秉神火以霜烛，纽颓纲于将绝，拯漂溺于已沦，耀此慧灯，来光斯境。秦弘始八年夏，于长安大寺集四方义学沙门二千余人，更出斯经，与众详究。什自手执胡经，口译秦语，曲从方言，而趣不乖本。即文之益，亦已过半。虽复霄云披翳，阳景俱晖，未足喻也。什犹谓语现而理沉，事近而旨远。又释言表之隐，以应探赜之求。虽冥扉未开，固已得其门矣。夫上善等润，灵液尚均，是以仰感嘱累，俯慨未闻，故采述旨要，流布未闻。庶法轮遐轸，往所未往，十方同悟，究畅一乘。故序之云尔。

○法华经后序第九△僧睿法师

《法华经》者，诸佛之秘藏，众经之实体也。以华为名者，照其本也。称分陀利者，美其盛也。所兴既玄，其旨其婉。自非达识传之，罕有得其门者。夫百卉药木之英，物实之本也。八万四千法藏者，道果之原也。故以喻焉。诸华之中，莲华最胜。华尚未敷名屈摩罗，敷而将落名迦摩罗，处中盛时名之分陀利。未敷喻二道，将落譬泥洹，荣曜独足以喻斯典。至如《般若》诸经，深无不极，故道者以之而归；大无不该，故乘者以之而济。然其大略，皆以适化为本。应务之门，不得不以善权为用。权之为化，悟物虽弘，于实体不足。皆属《法华》，固其宜矣。

寻其幽旨恢廓宏邃，所该甚远。岂徒说实归本，毕定殊途而已耶。乃实大明觉理，囊括古今。云佛寿无量，永劫未足以明其久也；分身无数，万形不足以异其体也。然则寿量定其非数，分身明其无实，普贤显其无成，多宝昭其不灭。夫迈玄古以期今，则万世同一日；即百化以悟玄，则千途无异辙。夫如是者，则生生未足以言其在，永寂亦未可言其灭矣。

寻幽宗以绝往，则丧功于本无；探心轡于三昧，则忘期于二地。经流兹土，虽复垂及百年，译者昧其虚津，灵关莫之或启；谈者乖其准格，幽踪得而履。徒复搜研皓首，并未有窥其门者。秦司隶校尉、左将军安城侯姚嵩，拟韵玄门，宅心世表，注诚斯典，信诣弥至。每思寻其文，深识译者之失。既遇鸠摩罗法师，为之传写，指其大归，真若披重霄而高蹈，登昆仑而俯眄矣。于时听受领悟之僧八百余人，皆是诸方英秀，一时之杰也。是岁弘始八年，岁次鹑火。

○持心经后记第十△出经后记

《持心经》，太康七年三月十日，敦煌开士竺法护在长安说出梵文，授承远。

○思益经序第十一△释僧睿法师

此经天竺正音名毗絺沙真谛，是他方梵天殊特妙意菩萨之号也。详听什公传译其名，翻覆展转，意似未荆良由未备秦言，名实之变故也。察其语意，会其名旨，当是“持意”，非“思益”也。直以未喻“持”义，遂用“益”耳。其言益者，超绝殊异，妙拔之称也。思者，进业高胜，自强不息之名也。旧名“持心”，最得其实。又其义旨，旧名“等御诸法”。梵天坦其津涂，世尊照其所明，普华奖其非心，文殊泯以无生。落落焉，真可谓法轮再转于阎浮，法鼓重声于宇内，甘露流津于季末，灵液沾润于遐裔者矣。

而恭明前译，颇丽其辞，仍迷其旨。是使宏标乖于谬文，至味淡于华艳。虽复研寻弥稔，而幽旨莫启。幸遇鸠摩罗什法师于关右，既得更译梵音，正文言于竹帛，又蒙披释玄旨，晓大归于句下。于是谘悟之僧二千余人，大斋法集之众，欣豫难遭之庆。近是讲肄之来，未有其比。于时予与道恒谬当传写之任，辄复疏其言，记其事，以贻后来之贤。岂期必胜其辞，必尽其意耶？庶以所录之言，粗可仿佛其心耳！不同时事之贤，傥欲令见其高座所说之旨，故具载之于文，不自加其意也。

○维摩诘经序第十二△释僧肇

《维摩诘不思議经》者，盖是穷微尽化，妙绝之称也。其旨渊玄，非言象所测；道越三空，非二乘所议。超群数之表，绝有心之境，眇莽无为而无不为，罔知所以然而能然者，不思議也。何则？夫圣智无知，而万品俱照；法身无像，而殊形并应；至韵无言，而玄籍弥布；冥权无谋，而动与事会。故能统济群方，开物成务，利见天下，于我无为。而惑者睹感照因谓之智，观应形则谓之身，覲玄籍便谓之言，见变动乃谓之权。夫道之极者，岂可以形言权智而语其神域哉！然群生长寝，非言莫晓，道不孤运，弘之由人。是以如来命文殊于异方，召维摩于他土，爰集毗耶，共弘斯道。此经所明，统万行则以权智为主，权德本则以六度为根，济蒙惑则以慈悲为首，语宗极则以不二为门。凡此众说，皆不思議之本也。至若借座灯王，请饭香土，手接大千，室包乾像，不思議之迹也。然幽关难启，圣应不同，非本无以垂迹，非迹无以显本，本迹虽殊，而不思議一也。故命侍者，标以为名焉。

大秦天王俊神超世，玄心独悟，弘至治于万机之上，扬道化于千载之下。每寻玩兹典，以为栖神之宅。而恨支竺所出，理滞于文，常惧玄宗，坠于译人。背天之运，运通有在也。以弘始八年，岁次鹑火，命大将军常山公、左将军安城侯，与义学沙门千二百人，于常安大寺请罗什法师重译正本。什以高世之量，冥心真境，既尽环

中，又善方言。时手执胡文，口自宣译。道俗虔虔，一言三复，陶冶精求，务存圣意。其文约而诣，其旨婉而彰，微远之言，于兹显然。余以闇短，时豫听次，虽思乏参玄，然粗得文意。辄顺所闻，而为注解，略记成言，述而无作。庶将来君子，异世同闻焉。

○合维摩诘经序第十三△支敏度作

盖《维摩诘经》者，先哲之格言，弘道之宏标也。其文微而婉，厥旨幽而远。可谓唱高和寡，故举世罕览。然斯经梵本，出自维耶离。在昔汉兴，始流兹土，于时有优婆塞支恭明。逮及于晋，有法护、叔兰。此三贤者，并博综稽古，研机极玄，殊方异音，兼通开解。先后译传，别为三经，同本、人殊、出异。或辞句出入，先后不同；或有无离合，多少各异；或方言训古，字乖趣同；或其文胡越，其趣亦乖；或文义混杂，在疑似之间。若此之比，其涂非一。若其偏执一经，则失兼通之功；广披其三，则文烦难究。余是以合两令相附，以明所出为本，以兰所出为子，分章断句，使事类相从。令寻之者瞻上视下，读彼案此，足以释乖迂之劳，易则易知矣。若能参考校异，极数通变，则万流同归，百虑一致。庶可以辟大通于未寤，阖同异于均致。若其配不相畴，傥失其类者，俟后明喆君子，刊之从正。

○毗摩罗诘提经义疏序第十四△僧睿法师

此经以毗摩罗诘所说为名者，尊其人，重其法也。五百应真之所称述，一切菩萨之所叹伏，文殊师利对扬之所明答，普现色身之要言，皆其说也。借座于灯王，致饭于香积，接大众于右掌，内妙乐于忍界，阿难之所绝尘，皆其不可思议也。高格迈于十地，故弥勒屈之而虚己；崇壙超于学境，故文殊已还，并未有闚其庭者。法言恢廓，指玄门以忘期；观品夷照，总化本以冥想。落落焉，声法鼓于维耶，而十方世界，无不悟其希音。恢恢焉，感诸佛于一室，而恒沙正觉，无不应其虚求。予始发心，启蒙于此，讽咏研求，以为喉襟。稟玄指于先匠，亦复未识其绝往之通塞也。既蒙鸠摩罗什法师正玄文，撚幽指，始悟前译之伤本，谬文之乖趣。至如以不来相为辱来，不见相为相见，无缘法为始神，缘合法为止心。诸如此比，无品不有，无章不尔。然后知边情諛诐，难可以参契真言，厕怀玄悟矣。

自慧风东扇，法言流咏已来，虽曰讲肄，格义迂而乖本，六家偏而不即。性空之宗，以今验之，最得其实。然炉冶之功，微恨不尽，当是无法可寻，非寻之不得也。何以知之？此土先出诸经，于识神性空，明言处少，存神之文，其处甚多。《中》《百》二论，文未及此，又无通鉴，谁与正之？先匠所以辍章于遐慨，思决言于弥勒者，良在此也。自提婆已前，天竺义学之僧并无来者，于今始闻宏宗高唱。敢预希味之流，无不竭其聪而注其心，然领受之用易存，忆识之功难掌。自非般若朗其闻慧，总持铭其思府，焉能使机过而不遗，神会而不昧者哉！故因纸墨以记其文外之言，借众听以集其成事之说。烦而不简者，贵其事也。质而不丽者，重其意也。

其指微而婉，其辞博而晦，自非笔受，胡可胜哉。是以即于讲次，疏以为记，冀通方之贤，不咎其烦而不要也。

○自在王经后序第十五△僧睿法师

此经以菩萨名号为题者，盖是《思益》、《无尽意》、《密迹》诸经之流也。以其圆用无方，故名《自在》，势无与等，故称为王。标准宏廓，固非思之所及；幽旨玄凝，寻者莫之仿佛。此土先出方等诸经，皆是《菩萨道行》之式也。《般若》指其虚标，《勇伏》明其必制，《法华》泯一众流，《大哀旌》其拯济。虽各有其美，而未备此之所载。

秦大将军、尚书令常山公姚显，真怀简到，彻悟转诣。闻其名而悦之，考其旨而虚襟。思弘斯化，广其流津。以为斯文既布，便若菩萨常住，不去此世。奔诚发自大心，欣跃不能自替。遂请鸠摩罗法师译而出之，得此二卷。于菩萨希踪卓犖之事，朗然昭列矣。是岁弘始九年，岁次鹑首。

○大涅槃经序第十六△凉州释道朗作

《大般涅槃》者，盖是法身之玄堂，正觉之实称，众经之渊镜，万流之宗极。其为体也，妙存有物之表，周流无穷之内，任运而动，见机而赴。任运而动，则乘虚照以御物，寄言蹄以通化；见机而赴，则应万形而为像，即群情而设教。至乃形充十方，而心不易虑；教弥天下，情不在己。厕流尘蚁而弗下，弥盖群圣而不高，功济万化而不恃，明逾万日而不居。浑然与太虚同量，泯然与法性为一。夫法性以至极为体，至极则归于无变，所以生灭不能迁其常。生灭不能迁其常，故其常不动；非乐不能亏其乐，故其乐无穷。或我生于谬想，非我起于因假。因假存于名数，故至我越名数而非无。越名数而非无，故能居自在之圣位，而非我不能变。非净生于虚净，故真净水镜于万法。水镜于万法，故非净不能渝。是以斯经解章，叙常乐我净为宗义之林，开究玄致为涅槃之源。用能阐秘藏于未闻、启灵管以通照，拯四重之瘵疽，拔无间之疣赘。阐秘藏则群识之情畅，审妙义之在己；启灵管则悟玄光之潜映，神珠之在体。然四重无间，诽谤方等，斯乃众患之<广于>痼，疮疣之甚者。故《大涅槃》以无疮疣为义名，斯经以《大涅槃》为宗目。宗目举则明统摄于众妙，言约而义备。义名立则照三乘之优劣，至极之有在。然冥化无朕，妙契无言，任之冲境，则理不虚运。是以此经开诚言为教本，广众喻以会义，建护法以涉初，睹秘藏以穷源，畅千载之固滞，散灵鹫之馀疑。至于理微幽蟠，微于微者，则诸菩萨弘郢匠之功，旷舟船之济，请难去构，翻覆周密，由使幽途融坦，宗归豁然。是故诵其文而不疲，语其义而不倦，甘其味而无足，餐其音而不厌。始可谓微言兴咏于真丹，高韵初唱于赤县，梵音震响于聋俗，真容巨曜于今日。而寡闻之士，偏执之流，不量愚见，敢评大圣无涯之典，遂使是非兴于诤论，讥谤生于快心。先觉不能返其迷，众圣莫能移其志，方将沉蔽八邪之网，长沦九流之渊。不亦哀哉！不亦哀哉！

！

天竺沙门昙摩讖者，中天竺人，婆罗门种。天怀秀拔，领鉴明邃，机辩清胜，内外兼综。将乘运流化，先至敦煌，停止数载。大沮渠河西王者，至德潜着，建隆王业，虽形处万机，每思弘大道，为法城堑。会开定西夏，斯经与讖自远而至，自非至感先期，孰有若兹之遇哉。讖既达此，以玄始十年，岁次大梁，十月二十三日，河西王劝请令译。讖手执梵文，口宣秦言。其人神情既锐，而为法殷重，临译敬慎，殆无遗隐，搜研本正，务存经旨。唯恨梵本分离，残缺未备耳。余以庸浅，预遭斯运，夙夜感戢，欣遇良深。聊试标位，叙其宗格，岂谓必然，闕其宏要者哉。

此经梵本正文三万五千偈，于此方言数减百万言。今数出者一万馀偈。如来去世，后不人量愚浅，抄略此经，分作数分，随意增损，杂以世语，缘使违失本正，如乳之投水。下章言，虽然，犹胜馀经，足满千倍。佛涅槃后，初四十年，此经于阎浮提宣通流布，大明于世。四十年后，隐没于地。至正法欲灭，馀八十年，乃得行世，雨大法雨。自是已后，寻复隐没。至于千载，像教之末，虽有此经，人情薄淡，无心敬信。遂使群邪竞辩，旷塞玄路，当知遗法将灭之相。

○大涅槃经记序第十七△未详作者

此《大涅槃经》，初十卷有五品。其梵本是东方道人智猛从天竺将来，暂憩高昌。有天竺沙门昙无讖，广学博见，道俗兼综，游方观化，先在敦煌。河西王宿植洪业，素心冥契，契应王公，躬统士众，西定敦煌。会遇其人，神解悟识，请迎诣州，安止内苑。遣使高昌，取此梵本，命讖译出。此经初分唯有五品，次六品已后，其本久在敦煌。讖因出经下际，知部党不足，访募馀残，有胡道人应期送到。此经梵本都二万五千偈，后来梵本，想亦近具足。但顷来国家殷猥，未暇更译，遂少停滞。诸可流布者，经中大意，宗涂悉举，无所少也。今现已有十三品，作四十卷，为经文句。执笔者一承经师口所译，不加华饰。其经初后所演，佛性广略之间耳，无相违也。每自惟省，虽复西垂，深幸此遇，遇此大典，开解常滞，非言所荆以诸家译经之致大不允，其旨归疑谬后生，是故窃不自辞，辄作徒劳之举，冀少有补益。谘参经师，采寻前后，略举初五品为私记。馀致准之，悉可领也。（佑寻此序与朗法师序及《讖法师传》小小不同，未详孰正，故复两存。）

○六卷泥洹经记第十八△出经后记

摩竭提国巴连弗邑阿育王塔天王精舍优婆塞伽罗先，见晋土道人释法显远游此土，为求法故，深感其人，既为写此《大般泥洹经》如来秘藏。愿令此经流布晋土，一切众生，悉成平等如来法身，义熙十三年十月一日于谢司空石所立道场寺出此《方等大般泥洹经》，至十四年正月一日校定尽讫。禅师佛大跋陀手执胡本，宝云传译。于时座有二百五十人。

○二十卷泥洹经记第十九△出智猛《游外国传》

《智猛传》云：“毗耶离国有大小乘学不同。帝利城次华氏邑有婆罗门，氏族甚多。其稟性敏悟，归心大乘，博览众典，无不通达。家有银塔，纵广八尺，高三丈，四龕，银像高三尺馀。多有大乘经，种种供养。婆罗门问猛言：‘从何来？’答言：‘秦地来。’又问：‘秦地有大乘学否？’即答：‘皆大乘学。’其乃惊愕雅叹云：‘希有！将非菩萨往化耶？’智即就其家得《泥洹胡本，还于凉州，出得二十卷。”

卷九

华严经记第一出经后记十住经含注序第二释僧卫作渐备经十住梵名并书叙第三未详作者菩萨善戒菩萨地持二经记第四释僧佑撰

大集虚空藏无尽意三经记第五释僧佑撰如来大哀经记第六未详作者长阿含经序第七僧肇法师中阿含经序第八道慈法师

增一阿含经序第九道安法师四阿含暮抄序第十未详作者优婆塞戒经记第十一出经后记菩提经注序第十二僧馥法师

关中出禅经序第十三长安睿法师庐山出修行方便禅经统序第十四慧远法师禅要秘密治病经记第十五出经后记修行地不净观经序第十六慧观法师

胜鬘经序第十七释慧观作胜鬘经序第十八慈法师文殊师利发愿经记第十九出经后记贤愚经记第二十释僧佑撰

八吉祥经后记第二十一出经后记无量义经序第二十二刘虬作譬喻经序第二十三康法邃作

百句譬喻经前记第二十四出经前记

○华严经记第一△出经后记

《华严经》胡本凡十万偈。昔道人支法领从于阗得此三万六千偈，以晋义熙十四年，岁次鹑火，三月十日，于扬州司空谢石所立道场寺，请天竺禅师佛度跋陀罗手执梵文，译胡为晋，沙门释法业亲从笔受。时吴郡内史孟顗、右卫将军褚叔度为檀越。至元熙二年六月十日出讫。

凡再校胡本，至大宋永初二年，辛丑之岁，十二月二十八日校毕。

○十住经含注序第二△释僧卫作

夫冥壑以冲虚静用，百川以之本；至极以无相标玄，品物以之宗。故法性住湛一以居妙，寂纷累以运通；灵根朗圆烛以遂能，乘涉动以开用。然能要有资，用必有本。用必有本，故御本则悟涉无方；能要有资，故悟虚则遂其通塞。通则苞镜六合，而有无圆照；塞则用随缘感，而应必虑偏。照圆则神功造极，虑偏则颠覆兴焉。故四渎开溢，则洪川灌壑；率象差辙，则三光晦曜。因此而推，固知运通有宗，化积有本。夫运通之宗，因缘开其会，无相极其终；化积之本，十道启其谋，心术兆其

始。故心术凭无则灵照通而大乘廓，滞有则神虑塞而九宅开矣。然推而极之，则唯心与法；引而张之，则绵彰八极。请辩而目焉。

夫万法浩然，宗一无相，灵魄弥纶，统极圆照。斯盖目体用为万法，言性虚为无相，称动王为心识，谓静御为智照。故滞有虑塞，则曰心曰识；凭虚照通，则曰智曰见。见者正见也，始晓之偏目也。智者正偏知也，体极之圆号也。正见创入辙之始，正偏标体极之终。四者盖精魄弥纶，水镜万法，虽数随缘感，然灵照常一而不变者也。夫体用无方，则用实异照。故乱识为尘，秽心为欲，开见谓宝，廓智谓种。秽心故五欲为亢醴之室，开见故三宝为荆石之门，乱识故六尘为幻惑之肆，廓智故一切种为骊龙之渊。四者实万法浩然，同实异照，虽感应交是非曲直，而宗一无相者也。故识御六尘以蒙性，心赴五欲以昏虑，见凭四谛以洗鉴，智抚无相以通照。然则境虽□□，理故心缘，精魄弥纶，体故灵照。灵照故统名一心，所缘故总号一法。若夫名随数变，则浩然无际，统以心法，则未始非二。故《十道为经，将穷蹊心术之原本，遂真悟之始辩。神功启于化彰，八万归于圆照，使灵机无隐伏之数，大造无虚窃之名。尔乃落滞识以反鉴，贞真慧以居宗，开十道运其用，恬无相远其通。合三义以廓能，则表宏称谓菩提。菩提者，统极十道之尊号，括囊通物之妙称，乃十住启灵照之圆极，远弘大通之逸轨。故十住者，静照息机，反鉴之容目者也。夫所以冠大业之始唱，统十地之通目，表称十住，谅义存于兹焉，义存于兹焉。然则十住之兴，盖廓明神觉之向牖，发莹真慧之砥砺，如来反流尽源之舟舆，世雄抚会诞化之天府。乃众经之宗本，法藏之渊源。实鉴始领终之水镜，光宣佛慧之日月者也。

夫致弘不可以言象穷，道玄不可以名数极。故文约而义丰，辞婉而旨弘，兆百行开于心辙，启八万举其一隅。非夫探针句玄，研机，孰能亢于贞鉴，敬于希微，开拔英悟，返于三隅者哉！悲夫守习之迷，虽服膺旧闻，不玩斯要，譬负日月而弥昏，面玄津而莫济矣。当请引而擢焉。夫举高必诣远，致深则兴玄。故廓六天以妙处，引法云以胜众。盖众非胜无以扣其玄，处非妙不足光其道，道光要有方，玄扣必得人。故位妙处以殊方，则境绝众秽；开玄肆以引众，则英彦盖时。处极六天，则宝映七珍；众举法云，则体镜九宅。廓六变以开运，朗耀世之宏观，叩三说以开奥，抚玄中之统韵。发五请以宣到，虑众诚以弥淳，递二七以运感，互交用于玄端。开神辙于三转之际，兆灵觉于九识之渊。匹夫众经以比兴，固不得同日而语，开八万以辩用，焉可共劫而言。非夫体苞三义，道总两端，孰有若斯之弘哉！孰有若斯之弘哉！以此而断，其道渊矣，其致玄矣。

夫以金刚之幽植，总神辩以居用，犹曰不可究其深，况自降兹者乎？然道不独运，弘必由人，故令千载之下，灵液有寄焉。夫外国法师鸠摩罗耆婆者，挺天悟于命世，迈英风于季俗，乘冥寄而孤游，因秦运以弘道，抚玄节于希声，畅微言于象外。可以祛故纳新，非拟三益；悟宗入辙，几于过半。运启其愿，弥遭其会，以铅砾之质，厕南金之肆，诚悟无返三之机，思无稽玄之谋，然存闻赏事，庶无惑焉。故抚

经静虑，感寻畴昔，每苦其文约而致弘，言婉而旨玄，使灵烛是非曲直于隐数，大宗昧于褊文。神标繇是以权范，玄风自兹用浇淳。至于闲诣靖惟，扣膺津门，则何常不遥然长慨，抚颓薄以兴怀哉！故遂撰记上闻，略为注释，岂曰渊壑之待晨露，盖以申其用己之心耳。庶后来明哲，有以引而补焉。

渐备经十住梵名并书叙第三未详作者波牟提陀晋曰一祝维摩罗晋曰二祝

波披迦罗晋曰三祝阿至摸晋曰四祝头闍耶晋曰五祝阿比目佉晋曰六祝

头罗迦摩晋曰七祝阿遮罗晋曰八祝抄头摩提晋曰九祝昙摩弥迦晋曰十祝

《渐备经》晋曰十住名：第一住名悦豫。第二住名离垢。第三住名兴光。

第四住名辉耀。第五住名难胜。第六住名目前。第七住名玄妙。

第八住名不动。第九住名善哉意。第十住名法雨。《渐备经》十住行：

第一住今亡。第二住说戒行。第三住说十二门五通事。第四住说三十七品事。

第五住说四谛事。第六住说十二因缘事。第七住说权智事。第八住说神足变化事。

第九住说神足教化事。第十住亦说神足教化事。

《渐备经》，护公以元康七年出之。其经有五卷，五万馀言。第一卷说一住事，今无此一卷。今现有二住以上至十住，为十品。

《渐备经》十住与《本业》大品异，说事委悉于《本业》大品，不知何以瞠于凉州。昔凉州诸道士释教道、竺法彦义，斯二道士，并皆博学，以经法为意，不知何以不集此经，又亦不闻其有所说，始知博闻之难。《为人兴显经》且亦是大经，说事广大，义理幽深，乃是众经之美望，辞叙茂赡，真有奇闻。而帛法巨亦是博学道士，昔邺中亦与周旋，不知何以复不集此经，又不闻其言，博闻强记信难。有护公出《须赖经》，虽不见，恒闻彦说之。张天锡更出《首楞严》，故当应委于先者。

元康七年十一月二十一日，沙门法护在长安西寺中出《渐备经》，手执梵本，译为晋言。护公，菩萨人也，寻其余音遗迹，使人仰之弥远。夫诸方等无生、诸三昧经，类多此公所出，真众生之冥梯。大品出来虽数十年，先出诸公略不综习，不解诸公何以尔？诸公才明过人，当能留心思研。心以为至业者，故当极有所得。先出诸公故恨太简，于文句殊多可恨。大品顷来东西诸讲习无不以为业，于文句犹不同

，觉其转深，但才分有限，思寻有极，幽旨作□非短思所荆然文句故可力为，方欲研之，穷此一生，冀有微补。

《渐备经》恨不得上一卷，冀因缘冥中之助，忽复得之。《渐备》所说十住位分众行，各有阶级，目下殊异于众经，方欲根悉研寻之。如今茫茫犹涉大海，不知第一住中何说。彼或有因缘，信使君不可不持作意，尽寻求之理。大品上两卷若有可寻之阶，亦勤以为意。

护公出《光赞》，计在《放光》前九年，不九年当八年，不知何以遂逸在凉州，不行于世。寻出经时，乃在长安出之，而都不流行，乃不知其故。吾往在河北，唯见一卷，经后记云十七章，年号日月亦与此记同，但不记处所，所以为异。然出经时人云聂承远笔受，帛元信、沙门法度，此人皆长安人也。以此推之，略当必在长安出。此经梵本亦言于闐沙门祇多罗所赍来也。此同如慧常等凉州来疏，正似凉州出，未详其故。或乃护公在长安时，经未流宣，唯持至凉州，未能乃详审。泰元元年，岁在丙子，五月二十四日，此经达襄阳。释慧常以西年，因此经寄互市人康儿，展转至长安。长安安法华遣人送至互市，互市人送达襄阳，付沙门释道安。襄阳时齐僧有三百人，使释僧显写送与扬州道人竺法汰。

《渐备经》以泰元元年十月三日达襄阳，亦是慧常等所送，与《光赞》俱来。顷南乡间人留写，故不与《光赞》俱至耳。《首楞严》、《须赖》并皆与《渐备》俱至凉州，道人释慧常，岁在壬申，于内苑寺中写此经，以本年因寄，至子年四月二十三日达襄阳。《首楞严经》事事多于先者，非但第一第二第九，此章最多，近三四百言许，于文句极有所益。《须赖经》亦复小多，能有佳处。云有《五百戒》，不知何以不至，此乃最急，四部不具，于大化有所阙。《般若经》乃以善男子善女人为教首，而戒立行之本，百行之始，犹树之有根，常以为深恨。若有缘便尽访求之理，先梵本有至信，因之勿零落。

○菩萨善戒菩萨地持二经记第四△僧佑撰

佑寻旧录，此经十卷，是宋文帝世三藏法师求那跋摩于京都译出。经文云，此经名《善戒》，名《菩萨地》，名《菩萨毗尼摩夷》，名《如来藏》，名《一切善法根本》，名《安乐国》，名《诸波罗蜜聚》，凡有七名。第一卷先出优波离问受戒法，第二卷始方有“如是我闻”，次第列品乃至三十。而复有别本，题为《菩萨地经》。检此两本，文句悉同，唯一两品分品、品名，小小有异，义亦不殊。既更不见有异人重出，推之应是一经。而诸品乱杂，前后参差，《菩萨地》本分为三段。第一段十八品，第二段有四品，第三段有八品。未详两本孰是三藏所出正本也。

又《菩萨地持经》八卷，有二十七品，亦分三段：第一段十八品，第二段四品，第三段五品。是晋安帝世，昙摩讖于西凉州译出。经首礼敬三宝，无“如是我闻”，

似撰集佛语。文中不出有异名。而今此本或题云《菩萨戒经》，或题云《菩萨地经》，与三藏所出《菩萨善戒经》，二文虽异，五名相涉，故同一记。又此二经明义相类，根本似是一经，异国人出，故成别部也。并次第明六度，品名多同，制辞各异。佑见《菩萨地经》一本，其第四卷第十《戒品》，乃是《地持经》中《戒品》，又少第九《施品》，当是曝晒误杂。后人不悉，便尔传写，其本脱多，恐方乱惑，若细寻内题，了然可见。若有《菩萨地经》阙无第九《施品》者，即误是本也。

○大集虚空藏无尽意三经记第五△僧佑撰

佑寻旧录，《大集经》是晋安帝世天竺沙门昙摩讖于西凉州译出，有二十九卷，首尾有十二段说，共成一经。第一《瓔珞品》，第二《陀罗尼自在王》，第三《宝女》，第四《不旬》，第五《海慧》，第六《无言》，第七《不可说》，第八《虚空藏》，第九《宝幢》，第十《虚空目》，第十一《宝髻》，第十二《无尽意》。更不见异人别译，而今别部唯有二十四卷。寻其经文馀悉同，唯《不可说菩萨品》后，《宝幢》分前，中间阙，无《虚空藏所问品》五卷。又经唯径宝髻菩萨品，复无最末《无尽意所说不可思议品》四卷，略无二品九卷，分所馀二十卷为二十四卷耳。

又寻两本并以《海慧菩萨品》为第五，越至《无言菩萨品》第七，无第六品，未详所以。

又检录，别有《大虚空藏经》五卷成者，即此经《虚空藏品》，当是时世有益，甄为异部。又别有《无尽意经》四卷成者，亦是此经末《无尽意品》也。但《护公录》复出《无尽意经》四卷，未详与此本同异。

○如来大哀经记第六△未详作者

元康元年七月七日，敦煌菩萨支法护手执胡经，经名《如来大哀》，口授聂承远，道真书晋言，以其年八月二十三日讫。护亲自覆校。当令大法光显流布，其有览者，疾得总持，畅泽妙法。

○长阿含经序第七△释僧肇作

夫宗极绝于称谓，贤圣以之冲默；玄旨非言不传，释迦所以致教。是以如来出世，大教有三：约身口则防之以禁律，明善恶则导之以契经，演幽微则辩之以法相。然则三藏之作也，本于殊应，会之有宗，则异途同趣矣。禁律，律藏也，四分十诵。法相，阿毗昙藏也，四分五诵。契经，《四阿含》藏也：《增一阿含》四分八诵，《中阿含》四分五诵，《杂阿含》四分十诵，此《长阿含》四分四诵，合三十经以

为一部。阿含，秦言法归。法归者，盖是万善之渊府，总持之林苑。其为典也，渊博弘富，韞而弥广，明宣祸福贤愚之迹，剖判真伪异齐之原，历记古今成败之数，墟哉二仪品物之伦。道无不由，法无不在。譬彼巨海，百川所归，故以法归为名。开析脩途，所记长远，故以长为目。玩兹典者，长迷顿晓，邪正难辨，显如昼夜；报应冥昧，照若影响；劫数虽辽，近犹朝夕；六合虽旷，现若目前。斯可谓朗大明于幽室，惠五目于众瞽，不闚户牖，而智无不周矣。

大秦天王涤除玄览，高韵独迈，恬智交养，道世俱济。每惧微言翳于殊俗。以右将军、使者、司隶校尉晋公姚爽，质直清柔，玄心超诣，尊尚大法，妙悟自然。上特留怀，每任以法事。以弘始十二年，岁在上章掩茂，请罽宾三藏沙门佛陀耶舍出律藏《四分》四十卷，十四年讫。十五年岁在昭阳奋若，出此《长阿含》讫。凉州沙门佛念为译，秦国道士道含笔受。时集京夏名胜沙门于第校定。恭承法言，敬受无差，蠲华崇朴，务存圣旨。余以嘉遇，猥参听次，虽无翼善之功，而预亲承之末，故略记时事，以示来贤焉。

○中阿含经序第八△释道慈

《中阿含经记》云：“昔释法师于长安出《中阿含》、《增一》、《阿毗昙》、《广说》、《僧伽罗叉》、《阿毗昙心》、《婆须蜜》、《三法度》、《二众从解脱缘》。”此诸经律凡百余万言，并违本失旨，名不当实，依悞属辞，句味亦差。良由译人造次，未善晋言，故使尔耳。会燕秦交战，关中大乱。于是良匠背世，故以弗获改正。乃经数年，至关东小清，冀州道人释法和、罽宾沙门僧伽提和，招集门徒，俱游洛邑。四五年中，研讲遂精。其人渐晓汉语，然后乃知先之失也，于是和乃追恨先失，即从提和更出《阿毗昙》及《广说》也。自是之后，此诸经律渐皆译正，唯《中阿含》、《僧伽罗叉》、《婆须蜜》、《从解脱缘》未更出耳。

会僧伽提和进游京师，应运流化，法施江左。于时晋国大长者尚书令、卫将军东亭侯优婆塞王元琳，常护持正法以为己任，即檀越也。为出经故，造立精舍，延请有道释慧持等义学沙门四十许人，施诸所安，四事无乏。又预请经师僧伽罗叉长供数年，然后乃以晋隆安元年丁酉之岁，十一月十日，于扬州丹阳郡建康县界，在其精舍更出此《中阿含》。请罽宾沙门僧伽罗叉令讲胡本，请僧伽提和转胡为晋，豫州沙门道兹笔受，吴国李宝、唐化共书。至来二年戊戌之岁，六月二十五日草本始讫。

此《中阿含》，凡有五诵，都十八品，有二百二十二经，合五十一万四千八百二十五字，分为六十卷。时遇国大难，未即正书，乃至五年辛丑之岁，方得正写，校定流传。其人传译，准之先出，大有不同。于此二百二十二经中，若委靡顺从，则惧失圣旨；若从本制名，类多异旧，则逆忤先习，不惬众情。是以前人不得自专，时有改本，从旧名耳。然五部异同，孰知其正？而道慈愚意，怏怏于违本。故诸改名

者，皆抄出注下，新旧两存，别为一卷，与目录相连，以示于后。将来诸贤，令知同异，得更采访。脱遇高明外国善晋胡方言者，访其得失，刊之从正。

○增一阿含经序第九△释道安作

《四阿含》义同，《中阿含》首以明其指，不复重序也。《增一阿含》者，比法条贯，以数相次也，数终十，今加其一，故曰增一也。且数数皆增，以增为义也。其为法也，多录禁律，绳墨切厉，乃度世检括也。外国岩岫之士，江海之人，于《四阿含》多咏味兹焉。

有外国沙门昙摩难提者，兜佉勒国人也。韶皀出家，孰与广闻，诵二《阿含》，温故日新。周行诸国，无土不涉。以秦建元二十年来诣长安，外国乡人咸皆善之，武威太守赵文业求令出焉。佛念译传，昙嵩笔受。岁在甲申夏出，至来年春乃讫。为四十一卷，分为上下部，上部二十六卷，全无遗忘，下部十五卷，失其录偈也。余与法和共考正之，僧?僧茂助校漏失，四十日乃了。此年有阿城之役，伐鼓近郊，而正专在斯业之中，全具二《阿含》一百卷，《鞞婆沙》、《婆和须蜜》、《僧伽罗刹传》，此五大经，自法东流，出经之优者也。

《四阿含》，四十应真之所集也。十人撰一部，题其起尽，为录偈焉。惧法留世久，遗逸散落也。斯土前出诸经，班班有其中者。今二《阿含》，各为新录一卷，全其故目，注其得失，使见经寻之差易也。合上下部四百七十二经，凡诸学士撰此二《阿含》，其中往往有律语，外国不通与沙弥、白衣共视也。而今已后，幸共护之，使与律同，此乃兹邦之急也。斯谆谆之诲，幸勿藐听也。广见而不知护禁，乃是学士通中创也。《中本起》，康孟祥出，出《大爱道品》，乃不知是禁经比丘尼法，堪慊切直割而去之，此乃是大鄙可痛恨者也。此二经有力道士乃能见，当以着心焉。如其轻忽不以为意者，幸我同志，鸣鼓攻之可也。

○四阿含暮抄序第十△未详作者

阿含暮者，秦言趣无也。阿难既出十二部经，又采撮其要迳至道法为《四阿含暮》，与《阿毗昙》及律并为三藏焉。身毒学士以为至德未坠于地也。有阿罗汉名婆素跋陀，抄其膏腴以为一部，九品四十六叶，斥重去复，文约义丰，真可谓经之璎鬘也。百行美妙，辨是与非，莫不悉载也。幽奥深富，行之能事毕矣。

有外国沙门，字因提丽，先赍诣前部国，秘之佩身，不以示人。其王弥第求得讽之，遂得布此。余以壬午之岁八月，东省先师寺庙于邺寺，令鸠摩罗佛提执胡本，佛念、佛护为译，僧导、昙究、僧睿笔受，至冬十一月乃讫。此岁夏出《阿毗昙》，冬出此经，一年之中具二藏也。深以自幸，但恨八九之年始遇斯经，恐韦编未绝，不终其业耳。若加数年，将无大过也。近敕译人，直令转胡为秦，解方言而已，经

之文质，所不敢易也。又有悬数悬事，皆访其人，为注其下。时复以意消息者为章。章注修妒路者，其人注解，别经本也。其有直言修妒路者，引经证，非注解也。

○优婆塞戒经记第十一△出经后记

太岁在丙寅，夏四月二十三日，河西王世子、抚军将军、录尚书事大沮渠兴国，与诸优婆塞等五百余人，共于都城之内，诸天竺法师昙摩讖译此在家菩萨戒，至秋七月二十三日都讫，秦沙门道养笔受。愿此功德，令国祚无穷，将来之世，值遇弥勒，初闻悟解，逮无生忍。十方有识，咸同斯誓。

○菩萨经注序第十二△释僧馥

夫万法无相而有二谛，圣人无知而有二名。二谛者，俗也、道也。二名者，权也、智也。二名以语默为称，二谛以缘性为言，缘性两陈而其实不乖，语默诚异而幽旨莫二。故《般若经》曰：“色即是空，空即是色。”见缘起为见法也。

《菩提经》者，诸佛之要藏，十住之营统。其文虽约，而义贯众典；其旨虽玄，而晓然易览。犹日月丽天，则群像自朗；示之一隅，则三方自释也。经之为体，论缘性则以二谛为宗，语玄会则以权智为主，言菩提则以无得为玄，明发意则以冥期为妙。婉约而弘深，莫不备矣。耆婆法师入室之秘说也。亲承者寡，故罕行于世。家师顺得之于始会，余虽不敏，谬闻于第五十。性疏多漏，故事语而书绅。岂曰注解，自贻来哂，庶同乎我者，领之文外耳。

○关中出禅经序第十三△僧睿法师

禅法者，向道之初门，泥洹之津径也。此土先出《修行》、《大小十二门》、《大小安般》，虽是其事，既不根悉，又无受法，学者之戒，盖阙如也。鸠摩罗法师以辛丑之年十二月二十日，自姑臧至长安。予即以其月二十六日从受禅法。既蒙启授，乃知学有成准，法有成修。《首楞严经》云：“人在山中学道，无师道终不成。”是其事也。寻蒙抄撰众家禅要，得此三卷，初四十三偈，是鸠摩罗罗陀法师所造，后二十偈，是马鸣菩萨之所造也。其中五门，是《婆须蜜》、《僧伽罗叉》、沤波崛、僧伽斯那、勒比丘、马鸣、罗陀禅要之中，抄集之所出也。六觉中偈，是马鸣菩萨修习之以释六觉也。初观淫、恚、痴相及其三门，皆僧伽罗叉之所撰也。息门六事，诸论师说也。菩萨习禅法中，后更依《持世经》，益《十二因缘》一卷，《要解》二卷，别时撰出。

夫驰心纵想，则情愈滞而惑愈深；系意念明，则澄鉴朗照而造极弥密。心如水火，拥之聚之，则其用弥全；决之散之，则其势弥保故论云：“质微则势重；质重则势

微。”如地质重故势不如水，水性重故力不如火，火不如风，风不如心。心无形故力无上，神通变化，八不思议，心之力也。心力既全，乃能转昏入明，明虽愈于不明，而明未全也。明全在于忘照，照忘然后无明非明，无明非明，尔乃几乎息矣。几乎息矣，慧之功也。故经云：“无禅不智，无智不禅。”然则禅非智不照，照非禅不成。大哉禅智之业，可不务乎！

出此经后，至弘始九年闰月五日，重求检校，惧初受之不审，差之一毫，将有千里之降。详而定之，辄复多有所正，既正既备，无间然矣。

○庐山出修行方便禅经统序第十四△释慧道

夫三业之兴，以禅智为宗，虽精粗异分，而阶藉有方。是故发轫分途，作涂无乱辙，革俗成务，功不待积。静复所由，则幽绪告微，渊博难究；然理不云昧，庶旨统可寻。试略而言，禅非智无以穷其寂，智非禅无以深其照。然则禅智之要，照寂之谓。其相济也，照不离寂，寂不离照，感则俱游，应必同趣，功玄于在用，交养于万法。其妙物也，运群动以至壹而不有，廓大象于未形而不无，无思无为，而无不为之。是故洗心静乱者以之研虑，悟彻入微者以之穷神也。若乃将入其门，机在撮会，理玄数广，道隐于文，则是阿难曲承音诏。遇非其人，必藏之灵府。何者？心无常规，其变多方；数无定像，待感而应。是故化行天竺，緘之有匠，幽关莫开，罕闚其庭。从此而观，理有行藏，道不虚授，良有以矣。

如来泥曰未久，阿难传其共行弟子末田地，末田地传舍那婆斯。此三应真，咸乘至愿，冥契于昔，功在言外，经所不辨。必闇轨元匠，孱焉无差。其后有优波崛，弱而超悟，智绝世表，才高应寡，触理从简。八万法藏，所存唯要，五部之分，始自于此。因斯而推，固知形运以废兴自兆，神用则幽步无迹，妙动难寻，涉粗生异，可不慎乎！可不察乎！

自兹已来，感于事变，怀其旧典者，五部之学，并有其人。咸惧大法将颓，理深共慨，遂各述赞禅经，以隆盛业。其为教也，无数方便，以求寂然，寂乎唯寂，其揆一耳。而寻条求根者众，统本运末者寡，或将暨而不至，或守方而未变。是故经称满愿之德，高普事之风。原夫圣旨非徒全其长，亦所以救其短。若然，五部殊业，存乎其人。人不继世，道或隆替，废兴有时，则互相升降，小大之目，其可定乎。又达节善变，出处无际，晦名寄迹，无闻无示。若斯人者，复不可以名部分，既非名部之所分，亦不出乎其外，别有宗明矣。

每慨大教东流，禅数尤寡，三业无统，斯道殆废。顷鸠摩耆婆宣马鸣所述，乃有此业。虽其道未融，盖是为山于一簣。欣时来之有遇，感寄趣于若人，舍夫制胜之论，而顺不言之辩。遂誓被僧那，以至寂为己任，怀德未忘，故遗训在兹。其为要也，图大成于未象，开微言而崇体。悟惑色之悖德，杜六门以寝患，达忿竞之伤性，

齐彼我以宅心。于是异族同气，幻形告疏，入深缘起，见生死际。尔乃辟九关于龙津，超三忍以登位。垢习凝于无生，形累毕于神化。故曰：“无所从生，靡所不生，于诸所生，而无不生。”

今之所译，出自达磨多罗与佛大先。其人西域之俊，禅训之宗，搜集经要，劝发大乘，弘教不同，故有详略之异。达磨多罗闡众篇于同道，开一色为恒沙。其为观也，明起不以生，灭不以尽，虽往复无际，而未始出于如。故曰：“色不离如，如不离色；色则是如，如则是色。”佛大先以为澄源引流，固宜有渐。是以始自二道，开甘露门，释四义以反迷，后归涂以领会。分别阴界，导以止观，畅散缘起，使优劣自辨。然后令原始反终，妙寻其极，其极非尽，亦非所尽，乃曰无尽，入于如来无尽法门。非夫道冠三乘，智通十地，孰能洞玄根于法身，归宗一于无相，静无遗照，动不离寂者哉！

○禅要秘密治病经记第十五△出经后记

河西王从弟大沮渠安阳侯于阗国衢摩帝大寺，从天竺比丘大乘沙门佛陀斯那。其人天才特拔，诸国独步。诵半亿偈，兼明禅法，内外综博，无籍不练，故世人咸曰人中师子。沮渠亲面禀受，忆诵地滞。以宋孝建二年九月八日，于竹园精舍书出此经，至其月二十五日讫。尼慧濬为檀越。

○修行地不净观经序第十六△慧观法师

夫禅典之妙，盖是三乘之所游，反迷悟惑者，托幽途以启真城。渐三业之固宅，广六度以澄神，散结贼于旷野，研四变以游心。焰三慧为炬明，浪冲源以殊分，金刚戟以练魔，定慧相和以测真如。是智依定则痴妄亏而宵落，定由智则七渊湛然而淳清。清融九服则玄庭有阶，阶级相乘则炉冶成妙。义之有本，本之有方，寻根传训，则冥一俱当。虽利钝有殊，济若一量，若契会同趣，则圣性同照。圣性同照，则累患永辽。故知禅智为出世之妙术，实际之义标也。

夫禅智之为道，言约理备，究析中道，对治万法，善恶相乘，迭转孰止，互有废兴。馆闚匠彻，略位其宗，以揆大方，异世同文。上圣为慈悲之主，留法藏于千载，示三乘之轨辙，知会通之至阶，汰粗蟬于曩劫，曲成众艳之灵螾。密典相传以至今，接有缘以八背，未始失其会，随机犹掌回。所谓澹智常寂而不失，照虽万机，寂化一用。故能穷诸法宝，拟想玄扉，游志妙极，蹑神光于无间者哉。禅典要密，宜对之有宗。若漏失根原，则枝寻不全；群盲失旨，则上慢幽昏，可不惧乎！若能审其本根，冥训道成，实观会古，则万境齐明，冲途豁尔而融，体玄象于无形。然后知凡圣异流，心行无边。然弃本寻条之士，各以升降小异，俱会其宗，遂迷穴见。偶变其津涂，昏游长夜，永兴理隔，不亦哀哉！

自顷来禅训实少，勘得其中。每以殊形难保，迁动不常，便启诚三宝，搜求玄要，依四百论扣其关旨。会遇西来宗匠，综习大法，寻本至终，冥隅一开，千载之下，优昙再隆，可不欣乎！遂乃推究高宗承嗣之范，云佛涅槃后，阿难曲奉圣旨，流行千载，先与同行弟子摩田地，摩田地传与舍那婆斯。此三应真，大愿弘覆，冥构于昔，神超事外，慈在宁济，潜行救物，偶会无差。佛在世时，有外学五通仙人，往至佛所，请求出家，乘俗高胜，志存远寄，便言：“若我入道，智慧辩才与身子等者，尔乃当于至尊法中修习梵行。”佛知其本根，于后百年当弘大事，便答仙人：“汝今出家，智慧浅薄，不及身子。”仙人即退。后百年中，其人出世，奇识博达，遇物开悟，遂出家学道，寻得应真。三明内照，六通远振，辩才无碍，摧诸异论，所度人众，其量无边。于诸法藏，开托教文，诸贤遂见，乃有五部之异。是化运有方，开彻有期。五部既举，则深浅殊风，遂有支派之别。既有其别，可不究本，详而后学耶？

此一部典，名为《具足清净法撒。传此法至于闍宾，转至富若蜜罗。富若蜜罗亦尽诸漏，具足六通。后至弟子富若罗，亦得应真。此二人于闍宾中为第一教首。富若蜜罗去世已来五十余年，弟子去世二十余年，昙摩多罗菩萨与佛陀斯那俱共谘得高胜，宣行法本。佛陀斯那化行闍宾，为第三训首。有于彼来者，亲从其受法教诲，见其涅槃。其涅槃时遗教言：“我所化人众数甚多，入道之徒具有七百，富若罗所训为教师者十五六人。”如今于西域中炽盛教化，受学者众。

昙摩罗从天竺来，以是法要传与婆陀罗，婆陀罗传与佛陀斯那。佛陀斯那愍此旃丹无真习可师，故传此法本流至东州。亦欲使其真伪，涂无乱辙，成无虚构，必加厚益。斯经所云：“开四色为分，界一色无量缘，宗归部津，则发趣果然。”其犹朝阳晖首，万类影旋；师子震吼，则众兽伏焉；圣王轮宝，诸雄悚然。揽斯法界，廓清虚津，入有不惑，处无不沉。自非道超群方，智鉴玄中，孰能立无言之辩于灵沼之渊，寄言述于七觉之林？可谓无名于所名，而物无不名；无形于所形，而物无不形；无事于所事，而物无不事者哉！

○胜鬘经序第十七△释慧观作

《胜鬘经》者，盖方广之要路，超升之洪轨。故其为教也，创基覆篲，而支峰已构；冲想一兴，而渊悟载豁。言逾常训，旨越旧篇。故发心希圣，而神仪曜灵；归无别章，而叹德斯备；诚感声发，而尊号响集。然后勒心切戒，旷志僧那，善摄靡遗，大乘斯御。驰轮幽辙，长驱永路，斯运剋终，诞登玄极，玄极无二，故万流归一。故曰三乘皆入一乘，所谓究竟第一义乘。一诚无辩，而义有区分，名由义生，故称谓屡转。三五之兴，盖由此也。尔其奥也，穷无始之前，以明解惑之本，究来际之末，挹泥洹之妙。文寡义丰，弥纶群籍，宇宙不足以拟其广，太虚不能以议其量。渊兮其不可测也，廓兮其不可极也。将求本际之源，追反流之极者，必至于此焉。

司徒鼓城王殖根遐劫，龙现兹生，依迹上台，协赞皇极。而神澄世表，志光玄猷，关斯幽典，诚期愈旷。凡厥道俗，莫不响悦。请外国沙门求那跋陀罗手执正本，口宣梵音，山居苦节，通悟息心。释宝云译为宋语。德行诸僧慧严等一百余人，考音详义，以定厥文。大宋元嘉十三年，岁次玄枵，八月十四日，初转梵轮，讫于月终。公乃广写云布，以泽未洽，将兴后世，同往高会道常故略叙法要，以染同慕之怀云尔。

胜鬘经序第十八兹法师

《胜鬘经》者，盖是方等之宗极者也，所以存于千载。功由人弘，故得以元嘉十二年，岁在乙亥，有天竺沙门名功德贤，业素敦尚，贯综大乘，远载梵本，来游上京，庇迹祇洹，招学钻访。才虽不精绝，义粗辉扬，遂播斯旨，乃上简帝王。于时有优婆塞何尚之，居丹阳尹，为佛法檀越。登集京輦敏德名望，便于郡内请出此经。既会贤本心，又谨传译，字句虽质，而理妙渊博，殆非常情所可厝虑。

时竺道生义学弟子竺道攸者，少习玄宗，偏蒙旨训。后侍从入庐山，温故传覆，可谓助凤耀德者也。法师至元嘉十一年，于讲座之上迁神异世，道攸慕深情恻，有若天坠。于是奉诀坟垄，遂遁临川三十许载。经出之后，披寻反覆，既悟深旨，仰而叹曰：“先师昔义，闇与经会；但岁不待人，经袭义后。若明匠在世，剖析幽赜者，岂不使异经同文，解无馀向者哉！辄敢解释，兼翼宣遗训，故作《注解》，凡有五卷。”时人以为文广义隐，所以省者息心玄门。至大明四年，孝武皇帝以其师习有承，敕出为都邑法师。慈因得谘覲，粗问此经首尾，又寻其注意，窃谓义然。今聊撮其要解，撰为二卷，庶使后贤，共见其旨焉。

○文殊师利发愿经记第十九△出经后记

晋元熙二年，岁在庚申，于扬州斗场寺禅师新出。云：“外国四部众礼佛时，多诵此经，以发愿求佛道。”

○贤愚经记第二十△释僧佑新撰

十二部典，盖区别法门。旷劫因缘，既事照于本生；智者得解，亦理资于譬喻。《贤愚经》者，可谓兼此二义矣。河西沙门释昙学、威德等凡有八僧，结志游方，远寻经典。于于阗大寺遇般遮于瑟之会。般遮于瑟者，汉言五年一切大众集也。三藏诸学，各弘法宝，说经讲律，依业而教。学等八僧随缘分听，于是竞习胡音，析以汉义，精思诵译，各书所闻，还至高昌，乃集为一部。既而逾越流沙，赍到凉州。于时沙门释慧朗，河西宗匠，道业渊博，总持方等。以为此经所记，源在譬喻；譬喻所明，兼载善恶；善恶相翻，则贤愚之分也。前代传经，已多譬喻，故因事改名，号曰《贤愚》焉。

元嘉二十二年，岁在乙酉，始集此经。京师天安寺沙门释弘宗者，戒力坚净，志业纯白。此经初至，随师河西，时为沙弥，年始十四，亲预斯集，躬睹其事。泊梁天监四年，春秋八十有四，凡六十四膺，京师之第一上座也。经至中国，则七十年矣。佑总集经藏，访讯遐迩，躬往谘问，面质其事。宗年耆德峻，心直据明，故标讲为录，以示后学焉。

○八吉祥经后记第二十一△出经后记

《八吉祥经》，宋元嘉二十九年，太岁壬辰，正月三日，天竺国大乘比丘释求那跋陀罗于荆州城内译出此经，至其月六日竟。使持节、侍中、都督荆湘雍益梁宁南北秦八州诸军事、司空、荆州刺史、领南蛮校尉南谯王优婆塞刘义宣为檀越。

○无量义经序第二十二△荆州隐士刘虬作

《无量义经》者，取其无相一法，广生众教，含义不赅，故曰无量。夫三界群生随业而转，一极正觉任机而通。流转起灭者，必在苦而希乐，此叩圣之感也。顺通示现者，亦施悲而用慈，即救世之应也。根异教殊，其阶成七：先为波利等说五戒，所谓人天善根，一也。次为拘邻等转四谛，所谓授声闻乘，二也。次为中根演十二因缘，所谓授缘觉乘，三也。次为上根举六波罗蜜，所谓授以大乘，四也。众教宜融，群疑须导，次说《无量义经》，既称得道差品，复云未显真实，使发求实之冥机，用开一极之由绪，五也。故《法华》接唱，显一除三，顺彼求实之心，去此施权之名，六也。虽权开而实现，犹掩常住之正义，在双树而临崖，乃畅我净之玄音，七也。过此以往，法门虽多，撮其大归，数尽于此。亦由众声不出五音之表，百氏并在六家之内。其《无量义经》，虽《法华》首戴其目，而中夏未睹其说。每临讲肆，未尝不废谈而叹，想见斯文。

忽有武当山比丘慧表，生自羌胄，伪帝姚略从子。国破之日，为晋军何澹之所得。数岁聪黠，澹之字曰螟蛉，养为假子。俄放出家，便勤苦求道，南北游寻，不择夷险。以齐建元三年，复访奇搜秘，远至岭南。于广州朝亭寺遇中天竺沙门昙摩伽陀耶舍，手能隶书，口解齐言，欲传此经，未知所授。表便殷勤致请，心形俱至，淹历旬朔，仅得一本，仍还峽北，赍入武当。以今永明三年九月十八日顶戴出山，见校弘通。奉覲真文，欣敬兼诚，咏歌不足，手舞莫宣。辄虔访宿解，抽刷庸思，谨立序注云。

自极教应世，与俗而差，神道教物，称感成异。玄圃以东，号曰太一，鬬宾以西，字为正觉。东国明殃庆于百年，西域辨休咎于三世，希无之与修空，其揆一也。有欲于无者，既无得无之分，施心于空者，岂有入空之照。而讲求释教者，或谓会理可渐，或谓入空必顿。请试言之，以筌幽寄。

立渐者，以万事之成，莫不有渐。坚冰基于履霜，九仞成于累土。学人之入空也，虽未圆符，譬如斩木，去寸无寸，去尺无尺，三空稍登，宁非渐耶？立顿者，以希善之功，莫过观于法性。法性从缘，非有非无，忘虑于非有非无，理照斯一者，乃曰解空。存心于非有非无，境智犹二者，未免于有。有中伏结，非无日损之验，空上论心，未有入理之效。而言纳罗汉于一听，判无生于终朝，是接诱之言，非称实之说，妙得非渐，理固必然。既二谈分路，两意争途，一去一取，莫之或正。

寻得旨之匠，起自支安。支公之论无生，以七住为道慧。阴足十住，则群方与能，在迹斯异，语照则一。安公之辩异观，三乘者始策之因称，定慧者终成之实录。此谓始求可随根而三，入解则其慧不二。譬喻亦云：“大难既夷，乃无有三；险路既息，其化即亡。”此则名一为三，非有三悟明矣。生公云：“道品可以泥洹，非罗汉之名。六度可以至佛，非树王之谓。”斩木之喻，木存故尺寸可渐；无生之证，生尽故其照必顿。案三乘名教，皆以生尽照息，去有入空。以此为道，不得取象于形器也。

今无量义，亦以无相为本。若所证实异，岂曰无相，若入照必同，宁曰有渐？非渐而云渐，密筌之虚教耳。如来亦云：“空拳诳小儿，以此度众生。”微文接粗，渐说或允；忘象得意，顿义为长。聊举大较，谈者择焉。

○譬喻经序第二十三△康法邃造

《譬喻经》者，皆是如来随时方便四说之辞，敷演弘教训诱之要。牵物引类，转相证据，互明善恶罪福报应，皆可寤心，免彼三涂。如今所闻，亿未载一，而前后所写，互多复重。今复撰集，事取一篇，以为十卷。比次首尾，皆令条别，趣使易了，于心无疑。愿玄土之贤，有所遵承，永升福堂，为将来基。

○百句譬喻经前记第二十四△出经前记

永明十年九月十日，中天竺法师求那毗地出。修多罗藏十二部经中抄出譬喻聚为一部，凡一百事，天竺僧伽斯法师集行大乘，为新学者撰说此经。

卷十

道地经序第一道安法师沙弥十慧章句序第二严佛调作十法句义经序第三道安法师三十七品经序第四昙无兰作

舍利弗阿毗昙序第五道标法师僧伽罗刹经序第六道安法师僧伽罗刹集经后记第七未详作者婆须蜜集序第八未详作者

阿毗昙序第九道安法师阿毗昙心序第十未详作者阿毗昙心序第十一慧远法师三法度经序第十二慧远法师

三法度经记第十二出经后记八犍度阿毗昙根犍度后别记第十四未详作者十四卷鞞婆沙序第十五道安法师六十卷毗婆沙经序第十六道樾法师

杂阿毗昙心序第十七未详作者后出杂心序第十八焦镜法师大智释论序第十九睿法师作大智论记第二十出论后记

大智论抄序第二十一慧远法师

○道地经序第一△释道安

夫道地者，应真之玄堂，升仙之奥室也。无本之城，杳然难陵矣；无为之墙，邈然难逾矣。微门妙闼，少闚其庭者也。盖为器也犹海与，行者日酌之而不竭，返精者无数而不满。其为像也，含弘静泊，绵绵若存，寂寥无言，辩之者几矣。恍惚无行，求矣漭乎其难测。圣人有以见因华可以成实，睹未可以达本，乃为布不言之教，陈无辙之轨，阐止启观，式成定谛。髦彦六双，率由斯路，归精谷神，于乎美矣。夫地也者，苞润施毓，稼穡以成；镳镳琮琛，罔弗以载。有喻止观，莫近于此，故曰道地也。

昔在众佑，三达遐鉴，八音四辩，赫奕敷化，识病而疗声典难算。至如来善逝而大训绝，五百无着迁而灵教乖。于是有三藏沙门，厥名众护，仰惟诸行，布在群籍；俯愍发进，不能悉洽。祖述众经，撰要约行，目其次序，以为一部二十七章。其于行也，要犹人首与，可终身载，不可须臾下；犹气息与，可终身通，不可须臾闭。息闭则命殒，首下则身殒。若行者暂去斯法，奸宄之慝入矣。

有开士世高者，安息王元子也。禅国高让，纳万乘位，克明俊德，改容修道。越境流化，爰适此邦，其所传训，渊微优邃。又析护所集者七章译为汉文，音近雅质，敦兮若朴，或变质从文，或因质不饰。皇矣世高，审得厥旨。

夫绝爱原、灭荣冀、息驰骋，莫先于止；了痴惑、达九道、见身幻，莫首于观。大圣以是达五根，登无漏，扬美化，易顽俗，莫先于止，靡不由兹也。真可谓盛德大业，至矣哉！行自五阴，尽于成坏，则是苦谛漏尽之迹也。《神足章》者，则是禅思五通之要也。《五十五观》者，则是四非常度三结之本也。人之处世，蒙昧昧去祛，熙熙甘色，如飧太牢。由处秽海，幽厄九月，既生遭，罹遭百凶，寻旋老死，婴苦万端，漂溺五流，莫能自返。圣人深见，以为苦证，游神八路，长陟永安。专粗稽古，则逸乐若此；开情纵欲，则酸毒若彼。二道显着，宜顺所从。石以淬壁，剥坚截刚；素质精染，五色炳灿。由是论之，可不勉哉！

予生不辰，值皇纲纽绝，獬狁猾夏，山左荡没。避难泽，师殒友折，周爰谄谋，顾靡所询。时雁门沙门支昙讲，邺都沙门竺僧辅，此二仁者，聪明有融，信而好古，冒险远至，得与酬酢寻章察句，造此训传，希权与进者，暂可微寤。蚊蚋奋翼以助随岚，蚁垤增封嵩岳之顶，岂其能益于高猛哉！探赜奥邈，唯八辈难之，况未学小子，庶几兹哉！然天竺圣邦，道阻辽远，幽见硕儒，少来周化。先哲既逝，来圣未至，进退狼跋，咨嗟涕洟。故作章句，申己丹赤。冀诸神通，照我颞颥，必枉灵趾，烛谬正阙也。

○沙弥十慧章句序第二△严佛调所造

昔在佛世，经法未记，言出尊口，弟子诵习，辞约而义博，说鲜而妙深。佛既泥洹，微言永绝，犹谷水消竭，日月陨坠。于是众贤共使阿难演其所闻，凡所着出十二部经。其后高明各为注说，章句解故，或以十数。

有菩萨者，出自安息，字世高。韬弘稽古，靡经不综，愍俗童蒙，示以桥梁。于是汉邦敷宣佛法，凡厥所出数百万言。或以口解，或以文传，唯《沙弥十慧》，未闻深说。夫十者数之终，慧者道之本也，物非数不定，行非道不度。其文郁郁，其用亹亹，广弥三界，近观诸身。调以不敏，得充贤次，学未浹闻，行未中四，夙罹凶咎，遭和上忧。长无过庭善诱之教，悲穷自潜，无所系心。于是发愤忘食，因闲历思，遂作《十慧章句》。不敢自专，事喻众经，上以达道德，下以慰己志。创奥博尚之贤，不足留意；未升堂室者，可以启蒙焉。

○十法句义经序第三△道安法师

夫有欲之激，百转千化，摇荡成教，亦何得一端乎？是故正觉因心所迁，即名为经。邪止名正，乱止名定。方圆随器，合散从俗。随器故因质而立名，从俗故缘对而授药。立名无常名，则神道矣；授药无常药，则感而通故矣。即已不器，又通其故，则诸行泛然，因法而结也。二三至十，存乎其人，病有众寡，以人为目耳。譬药分剂，有单有复，诊脉视色，投药缘疾，法参相成，不其然乎！

自佛即幽，阿难所传，分为三藏，纂乎前绪，部别诸经。小乘则为《阿含》。四行中，《阿含》者，数之藏府也。阿毗昙者，数之苑藪也。其在赤泽，硕儒通人，不学阿毗昙者，盖阙如也。夫造舟而济者，其体也安，粹数而立者，其业也美。是故般若后卷，必数了诸法，卒数以成经，斯乃众经之喉襟，为道之枢极也。可不务乎？可不务乎？

于戏！前徒不忘玄数者，鹜鹭子也，于兹继武，有自来矣。笃斯业者，或不成也。爰晋土者，世高其俊也，伟哉数学，渊源流清，气象德惠和，播馨此哉，安虽希高迹，末由也已。然旋焉周焉，藏焉修焉，未坠地也。并一不惑，以成积习，移志蹈远，移质缘以高尚，欲疲不能也。人亦有言曰：“圣人也者，人情之积也。”圣由积靡，炉锤之间，恶可已乎！

经之大例，皆异说同行。异说者，明夫一行之归致；同行者，其要不可相无，则行必俱行。全其归致，则同处而不新；不新故顿至而不惑，俱行故丛萃而不迷也。所谓知异知同，是乃大通；既同既异，是谓大备也。以此察之，义焉廋哉！义焉廋哉！

夫玄览莫美乎同异，而得其门者或寡矣。明白莫过乎辩数，而入其室者鲜矣。昔严调撰《十慧章句》康僧会集《六度》要目，每寻其迹，欣有寤焉。然犹有阙，文行未录者，今抄而第之，名曰《十法句义》。若其常行之注解，若昔未集之贻后，同我之伦，傥可察焉。

○三十七品经序第四△沙门竺昙无兰撰

三十七品者，三世诸佛之舟舆，声闻、支佛亦皆乘之而得度，三界众生靡不载之。故经曰：“大乘道之舆，一切度天人。”然则三十七品，或离或合，在一增，四法而有四意止、四神足、无四意断；五法则有五根、五力；七法无七觉意；八法而有八等。则为五经也。依如此比，当应为七经，如此则离也。而诸经多合，唯一增尔耳。《中阿含》身意止有安般出入息事，将是行四意止时，有乱意起者，执对行药也。

又诸经三十七品文辞不同，余因闲戏寻省诸经，撮采事备辞巧便者，差次条贯伏其位，使经体不毁，而事有异同者，得显于义。又以三三昧连之乎末，以具《泥洹四十品》。五根中云，四禅、四谛有目无文，故复属之于后。令始涉者览之易悟，不亦佳乎！又以诸经之异者注于句末也。

《小安般》三十七品后，则次止观；《律法义决》三十七品后，次四谛；《小十二门》后，次三向；尔为《泥洹四十品》。止观、四谛成道之行，不可以相无也。是故集止观、三三昧、四禅、四谛系之于三十七品后，欲令行者鉴之易见而具行也。

序二百六十五字，本二千六百八十五字，子二千九百七十字。凡五千九百二十字。除后六行八十字不在计中。晋泰元二十一年，岁在丙申，六月，沙门竺昙无兰在扬州谢镇西寺撰。

○舍利弗阿毗昙序第五△释道标

阿毗昙，秦言无比法，出自八音，亚圣所述。作之虽简，成命曲备，重微旷济，神要莫比，真祇洹之微风，反众流之宏趣。然佛后闇昧，竞执异津，或有我有法，或无我有法，乖忤淳风，亏蒙圣道。有舍利弗，玄哲高悟，神贯翼从，德备左面，智参照来。其人以为是非之起，大猷将隐，既曰像法，任之益滞。是以敢于佛前所闻经法，亲承既集，先巡堤防，遮抑邪流，助宣法化。故其为经也，先立章以崇本，后广演以明义。之体四焉：《问分》也，《非问分》也，《摄相应分》也，《绪分》也。《问分》者，寄言扣系，明夫应会。《非问分》者，假韵默通，唯宣法相。《摄相应分》者，总括自他，释非相无。《绪分》者，远述因缘，以彰性空。性空彰则反迷至矣，非相无则相与用矣，法相宣则邪观息矣，应会明则极无遗矣。四体圆足，二谛义备，故称无比法也。此经于先出阿毗昙，虽文言融通，而旨各异制。又载自空以明宗极，故能取贵于当时，而垂轨于千载，明典振于远维，四众率尔同仰。是使徇有者祛妄见之惑，向化者起即隆之勋。迢迢焉，故冥宗之遗绪也。亹焉，故归轮之所契也。此经标明曩代，灵液西畴，淳教弥于闾风，玄门扇于东岭。惟秦天王冲姿睿圣，冥根树于既往，实相结于皇极，王德应符，阐扬三宝。闻兹典诰，梦想思览，虽曰悠邈，感之愈勤。会天竺沙门昙摩崛多、昙摩耶舍等义学来游，秦王既契宿心，相与辩明经理。起清言于名教之域，散众微于自无之境，超超然诚韵外之致，悒悒然覆美称之实，于是诏令传译。然承华天哲，道嗣圣躬，玄味远流，妙度渊极，特体明旨，遂赞其事。经师本虽闇诵，诚宜谨备，以秦弘始九年，命书梵文。至十年，寻应令出。但以经趣微远，非从开言所契，苟彼此不相领悟，直委之译人者，恐津梁之要，未尽于善。停至十六年，经师渐闲秦语，令自宣译。皇储亲管理味，言意兼了，复所向尽，然后笔受。即复内呈上，讨其烦重，领其指归。故令文之者修饰，义之者缀润，并校至十七年讫。若乃文外之功，胜契之妙，诚非所阶，未之能详，并求之众经，考之诸论，新异之美，自宣之于文，惟法住之实，如有表裹。然原其大体，有无兼用，微文渊富，义旨显灼。斯诚有部之永涂，大乘之靡趣，先达之所宗，后进之可仰。标以近质，综不及远，情未能已，猥参斯典，希感之诚，脱复微序，庶望贤哲，以恕其鄙。

○僧伽罗刹经序第六（秦言众护。）△道安法师

僧伽罗刹者，须赖国人也。佛去世七百年生此国。出家学道，游教诸邦，至犍陀越土，甄陀闍貳王师焉。高明绝世，多所述作，此土《修行经》、《大道地经》，其所集也。又着此经，宪章世尊，自始成道，迄于沦虚，行无巨细，必因事而演，游化夏坐，莫不曲备。虽《普曜》、《本行》、《度世》诸经载佛起居，至谓为密；

今览斯经，所悟复多矣。

传其将终，言：“我若立根得力大士诚不虚者，立斯树下，手援其叶，而弃此身。使那罗延力大象之势，无能移余如毛发也。正使就耶维者，当不焦此叶。”言然之后，便即立终。闍貳王自临而不能动，遂以巨纆互象挽，未始能遥即就耶维，炎叶不伤。寻升兜术，与弥勒大士高谈彼宫，将补佛处贤劫第八。

以建元二十年，闍宾沙门僧伽跋澄赍此经本来诣长安，武威太守赵文业请令出焉。佛念为译，慧嵩笔受。正值慕容作难于近郊；然译出不衰。余与法和对检定之，十一月三十日乃了也。此年出《中阿含》六十卷，《增一阿含》四十六卷。伐鼓击柝之中，而出斯一百五卷，穷通不改其恬，诂非先师之故迹乎！

○僧伽罗刹集经后记第七△未详作者

大秦建元二十年十一月三十日，闍宾比丘僧伽跋澄于长安石羊寺口诵此经及《毗婆沙》。佛图罗刹翻译，秦言未精，沙门释道安，朝贤赵文业，研核理趣，每存妙尽，遂至留连，至二十一年二月九日方讫。且《婆须蜜经》及昙摩难提口诵《增一阿含》并《幻网经》，使佛念为译人。念迺学通内外，才辩多奇。常疑西域言繁质，谓此土好华，每存莹饰，文句减其繁长。安公赵郎之所深疾，穷校考定，务存典骨。既方俗不同，许其五失胡本，出此以外，毫不可差。五失如安公《小品序》所载。余既预众末，聊记卷后，使知释赵为法之至。

○婆须蜜集序第八△未详作者

婆须蜜菩萨大士，次继弥勒作佛，名师子如来也。从释迦文降生鞞提国，为大婆罗门梵摩渝子，厥名郁多罗。父命观佛，寻侍四月，具睹相表、威变、容止，还白所见。父得不还。已出家学道，改字婆须蜜。佛般涅槃后，游教周妒国、槃奈国，高才盖世，奔逸绝尘，撰集斯经焉。别七品为一键度，尽十三键度，其所集也。后四品一健度，训释佛偈也。凡十一品十四键度也。该罗深广，与《阿毗昙》并兴外国，傍通大乘，特明尽漏，博涉十法，百行之能事毕矣。寻之潸然，犹沧海之无涯，可不谓之广乎？陟之瞠尔，犹昆岳之无顶，可不谓之高乎？宝渚极目，厌夜光之珍；岩岫举睫，厌天智之玉。懿乎富也，何过此经？外国升高座者，未坠于地也。集斯经已，入三昧定，如弹指顷，神升兜术。弥妒路、弥妒路刀利及僧伽罗刹适彼天宫，斯二三君子，皆次补处人也。弥妒路刀利者，光炎如来也。僧伽罗刹者，柔仁佛也。兹四大士集乎一堂，对扬权智，贤圣默然，洋洋盈耳，不亦乐乎！

闍宾沙门僧伽跋澄，以秦建元二十年，持此经一部来诣长安。武威太守赵政文业者，学不厌士也，求令出之。佛念译传，跋澄、难陀、禰婆三人执胡本，慧嵩笔受。以三月五日出，至七月十三日乃讫，胡本十二千首卢也。余与法和对校修饰，武威

少多润色。此经说三乘为九品，特善修行，以止观迳十六最悉。每寻上人之高韵，未尝不忘臭味也，恨闕数仞之门晚，惧不悉其宗庙之美，百官之富也。

○阿毗曇序第九△释道安

《阿毗曇》者，秦言大法也。众佑有以见道果之至蹟，拟性形容，执乎真象，谓之大也。有以道慧之至齐，观如司南，察乎一相，谓之法，故曰大法也。《中阿含》世尊责优陀耶曰：“汝致诘《阿毗曇》乎？”夫然，佛以身子五法为大《阿毗曇》也。（戒定慧名无漏也。）

佛般涅槃后，迦旃延（义第一也。）以十二部经浩博难究，撰其大法为一部，八犍度四十四品也。其为经也，富莫上焉，邃莫加焉。要道无行而不由，可不谓之富乎？至德无妙而不出，可不谓之邃乎？富邃洽备故，故能微显阐幽也。其说智也周，其说根也密，其说禅也悉，其说道也具。周则二八用各适进，密则二十迭为宾主，悉则昧净遍游其门，具则利钝各别其所。以故为高座者所咨嗟，三藏者所鼓舞也。其身毒来诸沙门，莫不祖述此经，宪章《鞞婆》沙，咏歌有馀味者也。然乃在八荒之外，葱岭之表，虽欲从之，末由见也。

以建元十九年，罽宾沙门僧迦提婆，诵此经甚利，来诣长安，比丘释法和请令出之。佛念译传，慧力、僧茂笔受，和理其指归。自四月二十日出，至十月二十三日乃讫。其人检校译人，颇杂义辞，龙蛇同渊，金鍤共肆者，彬彬如也。和怵然恨之，余亦深谓不可，遂令更出。夙夜匪懈，四十六日而得尽损可损者四卷焉。至于事须悬解起尽之处，皆为细其下。胡本十五千七十二首卢，（四十八万二千三百四言。）秦语十九万五千二百五十言。其人忘《因缘》一品，云“言数可与《十门》等也”。

周览斯经，有硕人所尚者三焉：以高座者尚其博，以尽漏者尚其要，以研机者尚其密。密者，龙象翘鼻，鸣不造耳，非人中之至恬，其孰能与于此也！要者，八忍、九断，巨细毕载，非人中之至练，其孰能致于此也！博者，众微众妙，六八曲备，非人中之至懿，其孰能综于此也！其将来诸学者，游槃于其中，何求而不得乎！

○阿毗曇心序第十△未详作者

释和尚昔在关中，令鸠摩罗跋提出此经。其人不闲晋语，以偈本难译，遂隐而不传。至于断章，直云修妒路。及见提婆，乃知有此偈。以偈检前所出，又多首尾隐没，互相涉入，译人所不能传者彬彬然，是以劝令更出。以晋泰元十六年，岁在单阏，贞于重光。其年冬，于浔阳南山精舍，提婆自执胡经，先诵本文，然后乃译为晋语，比丘道慈笔受。至来年秋，复重与提婆校正，以为定本。时众僧上座竺僧根、支僧纯等八十人，地主江州刺史王凝之，优婆塞西阳太守任固之为檀越，并共劝佐

而兴立焉。

○阿毗昙心序第十一△释慧远法师

《阿毗昙心》者，三藏之要颂，咏歌之微言，管统众经，领其宗会，故作者以心为名焉。有出家开士，字曰法胜，渊识远鉴，探深研机，龙潜赫泽，独有其明。其人以为《阿毗昙经》源流广大，难卒寻究，非瞻智宏才，莫能毕综，是以探其幽致，别撰斯部。始自《界品》，讫于《问论》，凡二百五十偈，以为要解，号之曰心。其颂声也，拟象天乐，若云籥自发，仪形群品，触物有寄。若乃一吟一咏，状鸟步兽行也；一弄一引，类乎物情也。情与类迁，则声随九变而成歌；气与数合，则音协律吕而俱作。拊之金石，则百兽率舞；奏之管弦，则人神同感。斯乃穷音声之妙会，极自然之众趣，不可胜言者矣。

又其为经，标偈以立本，述本以广义。先弘内以明外，譬由根而寻条，可谓美发于中，畅于四肢者也。发中之道，要有三焉：一谓显法相以明本，二谓定己性于自然，三谓心法之生，必俱游而同感。俱游必同于感，则照数会之相因；己性定于自然，则达至当之有极；法相显于真境，则知迷情之可反。心本明于三观，则睹玄路之可游。然后练神达思，水镜六府，洗心净慧，拟迹圣门。寻相因之数，即有以悟无，推至当之极，每动而入微矣。

闾宾沙门僧伽提婆，少玩兹文，味之弥久，兼宗匠本，正关入神，要其人情悟所参，亦已涉其津矣。会遇来游，因请令译。提婆乃手执胡本，口宣晋言。临文诚惧，一章三复。远亦宝而重之，敬慎无违。然方言殊韵，难以曲尽，傥或失当，俟之来贤，幸诸明哲，正其大谬。

晋太元十六年出。

○三法度经序第十二△释慧远法师

《三法度经》者，盖出《四阿含》。《四阿含》则三藏之契经，十二部之渊府也。以三法为统，以觉法为道。开而当名，变而弥广。法虽三焉，而类无不尽，觉虽一焉，而智无不周。观诸法而会其要，辩众流而同其源。斯乃始涉之鸿渐，旧学之华苑也。

有应真大人，厥号山贤，恬思闲宇，智周变通。感达识之先觉，愍后蒙之未悟，故撰此三法，因而名云。自《德品》暨于《所依》，凡三章九真度，斯其所作也。其后有大乘居士，字僧伽先，以为山贤所集，虽辞旨高简，然其文犹隐，故仍前人章句，为之训传。演散本文，以广其义，显发事类，以弘其美，幽赞之功，于斯乃荆自兹而后，道光于世，其教行焉。于是振锡趣足者，仰玄风而高蹈；禅思入微者，

挹清流而洗心。高座谈对之士，拟之而后言；博识渊有之宾，由之而瞻闻也。

有游方沙门，出自罽宾，姓瞿昙氏，字僧伽提婆。昔在本国，预闻斯道，雅玩神趣，怀佩以游。其人虽不亲承二贤之音旨，而讽味三藏之遗言，志在分德，诲人不倦，每至讲论，嗟咏有馀。远与同集，劝令宣译。提婆于是自执胡经，转为晋言，虽音不曲尽，而文不害意，依实去华，务存其本。自昔汉兴，逮及有晋，道俗名贤，并参怀圣典，其中弘通佛教者，传译甚众。或文过其意，或理胜其辞，以此考彼，殆兼先典。后来贤哲。若能参通晋胡，善译方言，幸复详其大归，以裁厥中焉。

○三法度经记第十三△出经后记

比丘释僧伽先，志愿大乘，学三藏摩诃鞞耶伽兰，兼通一切书。记此《三法度》，三品九真度，撰说出此经。持此福佑一切众生，令从苦得安，见谛解脱。

八犍度阿毗昙根犍度后别记第十四未详作者

斯经序曰：“其人忘“因缘”一品，故阙文焉。”近自罽宾沙门昙摩卑闇之，来经蜜川，僧伽提婆译出此品，八犍度文具也。而卑云八犍度是体耳，别有六足，可自百万言。卑诵二足，今无译可出，慨恨良深。泰元十五年正月十九日，于扬州瓦官佛图记。

○鞞婆沙序第十五（十四卷者。）△释道安法师

阿难所出十二部经，于九十日中佛意三昧之所传也。其后别其经，至小乘法为《四阿含》，阿难之功于斯而已。迦旃延子撮其要行，引经训释，为《阿毗昙》四十四品，要约婉显，外国重之。优波离裁之所由为毗尼，与《阿毗昙》、《四阿含》并为三藏，身毒甚珍，未坠于地也。其后昙摩多罗刹集《修行》，亦大行于世也。又有三罗汉：一名尸陀槃尼，二名达悉，三名鞞罗尼，撰《鞞婆沙》，广引圣证，言辄据古，释《阿毗昙》焉。其所引据，皆是大士真人，佛印印者也。达悉迷而近烦，鞞罗要而近略，尸陀最折中焉。其在身毒，登无畏座，僧中唱言，何莫由斯道也。其经犹大海与，深广浩汗，千宝出焉；犹昆岳与，崑峨幽藹，百珍之藪，资生之徒，于焉斯在。兹经如是，何求而不有乎？

有秘书郎赵政文业者，好古索隐之士也。常闻外国尤重此经，思存想见，然乃在昆岳之右，芄野之西，眇尔绝域，末由也已。会建元十九年，罽宾沙门僧伽跋澄讽诵此经，四十二处，是尸陀槃尼所撰者也。来至长巡，赵郎饥虚在往，求令出焉。其国沙门昙无难提笔受为梵文，弗图罗刹译传，敏智笔受为此秦言，赵郎正义起荆自四月出，至八月二十九日乃讫。胡本一万一千七百五十二首户，长五字也，凡三十七万六千六十四言也。秦语为十六万五千九百七十五字。经本甚多，其人忘失。唯

四十事，是释《阿毗昙》十门之本，而分十五事为小品回着前，以二十五事为大品而着后。此大小二品，全无所损。其后二处是忘失之遗者，令第而次之。

赵郎谓译人曰：“《尔雅》有《释古》、《释言》者，明古今不同也。昔来出经者，多嫌胡言方质，而改适今俗，此政所不取也。何者？传胡为秦，以不闲方言，求知辞趣耳，何嫌文质？文质是时，幸勿易之，经之巧质，有自来矣。唯传事不尽，乃译人之咎耳。”众咸称善。斯真实言也。遂案本而传，不令有损言游字，时改倒句，余尽实录也。余欣秦土忽有此经，挈海移岳，奄在兹域，载玩载咏，欲疲不能，遂佐对校，一月四日，然后乃知大方之家富，昔见之至狭也。恨八九之年，方闕其牖耳。愿欲求如意珠者，必牢装强伴，勿令不周沧海之实者也。

○毗婆沙经序第十六（六十卷者。）△释道樾作

《毗婆沙》者，盖是三藏之指归，九部之司南。司南既准，则群迷革正；指归既定，则邪轮辍驾。自释迦迁晖，六百馀载，时北天竺有五百应真，以为灵烛久潜，神炬落耀，含生昏丧，重梦方始。虽法胜、迦旃延撰《阿毗昙》以拯颓运，而后进之贤寻其宗致，儒墨竞构，是非纷然。故乃澄神玄观，搜简法相，造《毗婆沙》，抑止众说。或即其殊辩，或标之铨评，理致渊旷，文蹄艳博。使西域胜达之士，莫不资之以镜心，鉴之以朗识。

而溟澜潜渍，将洽殊方，然理不虚运，弘之由人。大沮渠河西王者，天怀遐廓，标诚冲寄。虽迹缠纷务，而神栖玄境，用能丘壑廊庙，馆第林野。是使渊叟投竿，岩逸来廷，息心升堂，玄客入室。诚诣既着，理感不期。有沙门道泰，才敏自天，冲气疏朗，博关奇趣，远参异言。往以汉土方等既备，幽宗粗畅，其所未练，唯三藏九部。故杖策冒嶮，爰至葱西。综揽梵文，义承高旨。并获其梵本十万馀偈。既达凉境，王即欲令宣译。然惧囊中之固，将或未尽，所以侧席虚襟，企瞩明胜。

时有天竺沙门浮陀跋摩，周流敷化，会至凉境。其人开悟渊博，神怀深邃，研味钻研，逾不可测。遂以乙丑之岁四月中旬，于凉城内苑闲豫宫寺，请令传译。理味沙门智嵩、道朗等三百余人，考文祥义，务存本旨，除烦即实，质而不野。王亲屡回御驾，陶其幽趣，使辩证理诣，片言有寄。至丁卯岁七月上旬都讫，通一百卷。会凉城覆没，沦湮遐境，所出经本，零落殆荆今凉王信向发中，深探幽趣，故每至新异，恠仰奇闻。其年岁首，更写已出本六十卷，令送至宋台，宣布未闻。庶令日新之美，敝于当时；福祚之兴，垂于来叶。樾以微缘，得参听末。欣遇之诚，窃不自默，粗列时事，以贻来哲。

○杂阿毗昙心序第十七△未详作者

如来泥洹数百年后，有尊者法胜，于佛所说经藏之中，抄集事要为二百五十偈，号

《阿毗昙心》。其后复有尊者达摩多罗，览其所制，以为文体不足，理有所遗，乃更搜采众经，复为三百五十偈，补其所阙，号曰《杂心》。新旧偈本凡有六百，篇第之数，则有十一品。篇号仍旧为称，唯有《择品》一品全异于先。尊者多罗复即自广引诸论，敷演其义，事无不列，列无不辩，微言玄旨，于是昭着。自兹之后，道隆于世，涉学之士，莫不宝之，以为美谈。

于宋元嘉三年，徐州刺史太原王仲德请外国沙门伊叶波罗于彭城出之。《择品》之半及《论品》一品，有缘事起，不得出竟。至元嘉八年，复有天竺法师名求那跋摩，得斯陀含道，善练兹经，来游扬都，更从校定，谘详大义。余不以闇短，厕在二集之末，辄记所闻，以训章句，庶于览者，有过半之益耳。

○后出杂心序第十八△焦镜法师

昔如来泥洹之后，于秦汉之间，有尊者法胜造《阿毗昙心》本，凡有二百五十偈，以为十品。后至晋中兴之世，复有尊者达摩多罗，更增三百五十偈，以为十一品，号曰《杂心》。十品篇目仍旧为名，唯别立《择品》篇以为异耳。位序品次，依四谛为义：《界品》直说法相，以拟苦谛；《行》、《业》、《使》三品多论生死之本，以拟集谛；《贤圣》所说断结证灭之义，以拟灭谛；《智》、《定》二品多说无漏之道，以拟道谛。自后诸品，杂明上事，更无别体也。

于宋元嘉十一年甲戌之岁，有外国沙门名曰三藏，观化游此。其人先于大国综习斯经，于是众僧请令出之。即以其年九月，于宋都长干寺集诸学士，法师云公译语，法师观公笔受。考校治定，周年乃讫。镜以不才，谬预听末，虽思不及玄，而时有浅解。今谨率所闻，以示后生，至于折中，以俟明哲。于会稽始宁山徐支江精舍撰讫。

○大智释论序第十九△释僧睿

夫万有本于生生，而生生者无生；变化兆于物始，而始始者无始。然则无生无始，物之性也。生始不动于性，而万有陈于外，悔吝生于内者，其唯邪思乎？正觉有以见邪思之自起，故《阿含》为之作；知滞有之由惑，故般若为之照。然而照本希夷，津涯浩汗，理超文表，趣绝思境。以言求之，则乖其深；以智测之，则失其旨。二乘所以颠沛于三藏，新学所以曝鳞于龙门者，不其然乎！

是以马鸣起于正法之余，龙树生于像法之末。正余易弘，故直振其遗风，莹拂而已。像末多端，故乃寄迹凡夫，示悟物以渐，又假照龙宫，以朗搜玄之慧，托闻幽秘，以穷微言之妙。尔乃宪章智典，作兹《释论》。其开夷路也，则令大乘之驾，方轨而直入；其辨实相也，则使妄见之惑，不远而自复。其为论也，初辞拟之，必标众异以尽美；卒成之终，则举无执以尽善。释所不尽，则立论以明之；论其未辨，

则寄折中以定之。使灵篇无难喻之章，千载悟作者之旨。信若人之功矣。

有鸠摩罗耆婆法师者，少播聪慧之闻，长集奇拔之誉，才举则亢标万里，言发则英辩荣枯。常仗兹论为渊镜，凭高致以明宗。以秦弘始三年，岁次星纪，十二月二十日，自姑臧至长安。秦王虚襟，既已蕴在昔见之心，岂徒则悦而已。晤言相对，则淹留终日，研微造尽，则穷年忘倦。又以晤言之功虽深，而恨独得之心不旷；造尽之要虽玄，而惜津梁之势未普。遂以莫逆之怀，相与弘兼忘之惠。乃集京师义业沙门，命公卿赏契之士，五百余人集于渭滨逍遥园堂。鸾舆伫驾于洪渚，禁御息警于林间，躬览玄章，考正名于胡本，谕通津要，坦夷路于来践。经本既定，乃出此《释论》。论之回答本有十万偈，偈有三十二字，并三百二十万言。胡夏既乖，又有烦简之异，三分除二，得此百卷，于《大智》二十万言，玄章婉旨，朗然可见。归途直达，无复惑趣之疑，以文求之，无间然矣。故天竺传云：“像正之末，微马鸣、龙树，道学之门，其沦湮溺丧矣。”其故何耶？实由二未契微，邪法用盛，虚言与实教并兴，峻径与夷路争辙。始进者化之而流离，向道者惑之而播越，非二匠其孰与正之。是以天竺诸国为之立庙，宗之若佛。又称而咏之曰：“智慧日已颓，斯人令再曜。世昏寝已久，斯人悟令觉。”若然者，真可谓功格十地，道侔补处者矣，传而称之，不亦宜乎！

幸哉，此中鄙之外，忽得全有此论。胡文委曲，皆如《初品》。法师以秦人好简，故裁而略之。若备译其文，将近千有馀卷。法师于秦语大格，唯译一往，方言殊好，犹隔而未通。苟言不相喻，则情无由比。不比之情，则不可以托悟怀于文表；不喻之言，亦何得委殊涂于一致。理固然矣。进欲停笔争是，则校竞终日，卒无所成。退欲简而便之，则负伤手穿凿之讥。以二三唯案译而书，都不备饰，幸冀明悟之贤，略其文而挹其玄也。

○大智论记第二十△出论后记

究摩罗耆婆法师以秦弘始三年，岁在辛丑，十二月二十日至常安。四年夏，于逍遥园中西门阁上，为姚天王出《释论》，七年十二月二十七日乃讫。其中兼出经本、《禅经》、戒律、《百论》、《禅法要解》，向五十万言，并此《释论》一百五十万言。论《初品》三十四卷，解释一品，是全论具本。二品已下，法师徊之，取其要足以开释文意而已，不复备其广释，得此百卷。若尽出之，将十倍于此。

○大智论抄序第二十一△释慧远作

夫宗极无为以设位，而圣人成其能；昏明代谢以开运，而盛衰合其变。是故知峻易相推，理有行藏；屈伸相感，数有往复。由之以观，虽冥枢潜应，圆景无穷，不能均四象之推移，一其会通。况时命纷谬，世道交沦，而不深根固蒂，宁极以待哉！若达开塞之有运，时来非由遇，则正觉之道，不虛擬于物表；弘教之情，亦渐可识

矣。

有大乘高士，厥号龙树，生于天竺，出自梵种。积诚曩代，契心在兹，接九百之运，抚颓薄之会，悲蒙俗之茫昧，蹈险迹而弗悵。于是卷阴衡门，云翔赤泽，慨文明之未发，思或跃而勿用。乃喟然叹曰：“重夜方昏，非萤烛之能照，虽白日寝光，犹可继以朗月。”遂自誓落簪，表容玄服，隐居林泽，守闲行禅，靖虑研微，思通过半。因而悟曰：“闻之于前论，大方无垠，或有出乎其外者。”俄而回步雪山，启神明以诉志，将历古仙之所游，忽遇沙门于岩下，请质所疑，始知有方等之学。及至龙宫，要藏秘典，靡不管综。滞根既拔，则名冠道位，德备三忍。然后开九津于重渊，朋鳞族而俱游，学徒如林，英彦必集。由是外道高其风，名士服其致，大乘之业，于兹复隆矣。

其人以《般若经》为灵府妙门宗一之道，三乘十二部由之而出，故尤重焉。然斯经幽奥，厥趣难明，自非达学，渺得其归。故叙夫体统，辨其深致，若意在文外，而理蕴于辞，辄寄之宾主，假自疑以起对，名曰《问论》。其为要也，发轫中衢，启惑智门，以无当为实，无照为宗。无当则神凝于所趣，无照则智寂于所行。寂以行智，则群邪革虑，是非息焉；神以凝趣，则二谛同轨，玄辙一焉。非夫正觉之灵，抚法轮而再转，孰能振大业于将颓，纽遗纲之落绪，令微言绝而复嗣，玄音辍而复咏哉！

虽弗获与若人并世，叩津问道，至于研味之际，未尝不一章三复，欣于有遇。其中可以开蒙朗照，水镜万法，固非常智之所辨。请略而言：生涂兆于无始之境，变化构于倚伏之常，咸生于未有而有，灭于既有而无。推而尽之，则知有无回谢于一法，相待而非原；生灭两行于一化，映空而无生。于是乃即之以成观，反鉴以求宗。鉴明则尘累不止，而仪像可睹；观深则悟彻入微，而名实俱玄。将寻其要，必先于此。然后非有非无之谈，方可得而言。

尝试论之：有而在有者，有于有者也；无而在无者，无于无者也。有有则非有，无无则非无。何以知其然？无性之性，谓之法性，法性无性，因缘以之生。生缘无自相，虽有而常无。常无非绝有，犹火传而不息。夫然，则法无异趣，始末沦虚，毕竟同争，有无交归矣。故游其樊者，心不待虑，智无所缘，不灭相而寂，不修定而闲，非神遇以期通，焉识空空之为玄。斯其至也，斯其极也，过此以往，莫之或知。

又论之为体，位始无方而不可诘，触类多变而不可穷。或开远理以发兴，或导近习以入深，或阖殊涂于一法而弗杂，或辟百虑于同相而不分。此以绝夫垒瓦之谈，而无敌于天下者也。尔乃博引众经以赡其辞，畅发义音以弘其美，美尽则智无不周，辞博则广大悉备。是故登其涯而无津，挹其流而弗竭，汪汪焉莫测其量，洋洋焉莫比其盛。虽百川灌可，未足语其辩矣；虽涉海求源，未足穷其邃矣。若然者，非夫

渊识旷度，孰能与之潜跃？非夫越名反数，孰能与之澹漠？非夫洞幽入冥，孰能与之冲泊哉？

有高座沙门，字曰童寿，宏才博见，智周群籍，玩服斯论，佩之弥久。虽神悟发中，必待感而应。于时秦主姚王，敬乐大法，招集名学，以隆三宝，德洽殊俗，化流西域。是使其人闻风而至，既达关右，即劝令宣译。童寿以此论深广，难卒精究，因方言易省，故约本以为百卷。计所遗落，殆过参倍。而文藻之士犹以为繁，咸累于博，罕既其实。譬大羹不和，虽味非珍；神珠内映，虽宝非用。信言不美，固有自来矣。若遂令正典隐于荣华，玄朴亏于小成。则百家竞辩，九流争川，方将幽沦长夜，背日月而昏逝，不亦悲乎！于是静寻所由，以求其本，则知圣人依方设训，文质殊体。若以文应质，则疑者众；以质应文，则悦者寡。是以化行天竺，辞朴而义微，言近而旨远。义微则隐昧无象，旨远则幽绪莫寻，故令玩常训者牵于近习，束名教者惑于未闻。若开易进之路，则阶藉有由；晓渐悟之方，则始涉有津。远于是简繁理秽，以详其中，令质文有体，义无所越。辄依经立本，系以《问论》，正其位分，使类各有属。谨与同止诸僧，共别撰以为集要，凡二十卷。虽不足增晖圣典，庶无大谬。如其未允，请俟来哲！

卷十一

中论序第一长安僧睿中论序第二昙影法师百论序第三僧肇法师十二门论序第四长安僧睿

成实论记第五出论后记略成实论记第六新撰抄成实论序第七周颙诃梨跋摩传第八江陵玄畅作

菩萨波罗提木叉后记第九未详作者比丘尼戒本所出本末序第十出戒前记比丘大戒序第十一释道安作大比丘二百六十戒三部合异序第十二竺昙无兰

关中近出尼二种坛文夏坐杂十二事并杂事共卷前中后三记第十三摩得勒伽后记第十四出经后记善见律毗婆沙记第十五出律前记

千律名号序第十六出贤劫经竺昙无兰

○中论序第一△释僧睿

《中论》有五百偈，龙树菩萨之所造也。以中为名者，昭其实也，以论为称者，尽其言也。实非名不悟，故寄中以宣之；言非释不尽，故假论以明之。其实既宣，其言既明，于菩萨之行，道场之照，朗然悬解矣。夫滞惑生于倒见，三界以之而沦溺；偏悟起于厌智，耿介以之而致乖。故知大觉在乎旷照，小智缠乎隘心。照之不旷，则不足以夷有无，一道俗；知之不尽，则未可以涉中途，泯二际。道俗之不夷，二际之不泯，菩萨之忧也。是以龙树大士，折之以中道，使惑趣之徒，望玄指而一变；括之以即化，令玄悟之宾，丧谘询于朝彻。荡荡焉，真可谓坦夷路于冲阶，敞玄门于宇内，扇慧风于陈枚，流甘露于枯悴者矣。夫柏梁之构兴，则鄙茅茨之侧陋。睹斯论之宏旷，则知偏悟之鄙倍。幸哉！此区区赤县，忽得移灵鹫以作镇，諠诤之边情，乃蒙流光之余惠。而今而后，谈道之贤，故可与论实矣。

云天竺诸国，敢豫学者之流，无不玩味斯论，以为喉衿，其染翰申释者甚亦不少。今所出者是天竺梵志，名宾罗伽，秦言青目，之所释也。其人虽信解深法，而辞不雅中。其中乖阙烦重者，法师皆裁而裨之，于经通之理尽矣。文或左右，未尽善也。《百论》治外以闲雅，斯文祛内以流滞，《大智释论》之渊博，《十二门观》之精诣。寻斯四者，真若日月入怀，无不朗然鉴彻矣。予玩之味之，不能释手，遂复忘其鄙拙，托悟怀于一序，并目口义题之于首，岂期能释耶，盖是欣自同之怀耳！

○中论序第二△昙影法师

夫万化非无宗，而宗之者无相；虚宗非无契，而契之者无心。故至人以无心之妙慧，而契彼无相之虚宗。内外并冥，缘智俱寂，岂容名数于其间哉！但以惛玄之质，趣必有由，非名无以领数，非数无以拟宗，故遂设名而召之，立数而辨之。然则名数之生，生于累者，可以造极而非其极。苟曰非极，复何常之有耶！是故如来始逮真觉，应物接粗，启之以有，后为大乘，乃说空法，化适当时，所悟不二。流至末叶，像教之中，人根肤浅，道识不明，遂废鱼守筌，存指忘月，睹空教便谓罪福俱泯，闻说相则谓之为真。是使有无交兴，生灭迭争，断常诸边，纷然竞起。

时有大士，厥号龙树，爰托海宫，逮无生忍。意在傍宗，载隆遗教，故作论以折中。其立意也，则无言不穷，无法不荆然统其要归，则会通二谛，以真谛故无有，俗谛故无无。真故无有，则虽无而有；俗故无无，则虽有而无。虽有而无，则不累于有；虽无而有，则不滞于无。不滞于无，则断灭见息；不存于有，则常等冰消。寂此诸边，故名曰中；问答析微，所以为论。是作者之大意也。亦云中观，直以观辩于心，论宣于口耳。

罗什法师以秦弘始十一年于大寺出。

○百论序第三△释僧肇

《百论》者，盖是通圣心之津涂，开真谛之要论也。佛泥洹后八百余年，有出家大士，厥名提婆，玄心独悟，俊气高朗，道映当时，神超世表。故能辟三藏之重关，坦十二之幽路，擅步迦夷，为法城堑。于时外道纷然，异端竞起，邪辩逼真，殆乱正道。乃仰慨圣教之凌迟，俯悼群迷之纵惑，将远拯沉沦，故作斯论，所以防正闲邪，大明于宗极者矣。是以正化以之而隆，邪道以之而替。非夫领括众妙，孰能若斯？论有百偈，故以百为名。理致渊玄，统群籍之要；文义婉约，穷制作之美。然至趣幽简，斟得其门。有婆薮开士者，明慧内融，妙思奇拔，远契玄踪，为之训释。使沉隐之义，彰于徽翰，讽味宣流，被于来叶。文藻焕然，宗涂易晓。其为论也，言而无党，破而无执。恍然靡据，而事不失真；萧焉无寄，而理自玄会。返本之道，着乎兹矣。

有天竺沙门鸠摩罗什，器量渊弘，俊神超邈，钻仰累年，转不可测，常味咏斯论，以为心要。行急风暴雨亲译，而方言未融，致令思寻者踌躇于谬文，标位者乖迂于归致。大秦司隶校尉安城侯姚嵩，风韵清舒，冲心简胜，博涉内外，理思兼通。少好大道，长而弥笃，虽复形羁时务，而法言不辍，每抚兹文，所慨良多。以弘始六年，岁次寿星，集理味沙门，与什考校正本，陶练覆疏，务存论旨。使质而不野，简而必诣，宗致划尔，无间然矣。论凡二十口，品各有五偈，后十品其人以为无益此土，故阙而不传。冀明识君子，详而览焉。

○十二门论序第四△僧睿法师

《十二门论》者，盖是实相之折中，道场之要轨也。十二者，总众枝之大数也；门者，开通无滞之称也；论之者，欲以穷其源尽其理也。若一理之不尽，则众异纷然，有惑趣之乖；一源之不穷，则众涂扶疏，有殊致之迹。殊致之不夷，乖趣之不泯，大士之忧也。是以龙树菩萨开出者之由路，作十二门以正之。正之以十二，则有无兼畅，事无不荆事尽于有无，则忘功于造化；理极于虚位，则丧我于二际。然则丧我在乎落筌，筌忘存乎遗寄，筌我兼忘，始可以几乎实矣。几乎实矣，则虚实两冥，得失无际。冥而无际，则能忘造次于两玄，泯颠沛于一致，整归驾于道场，毕趣心于佛地。恢恢焉，真可谓运虚刃于无间，奏希声于宇内，济溺丧于玄津，出有无于域外者矣。遇哉，后之学者，夷路既坦，幽涂既开，真得振和鸾于北溟，驰白占以南迴，悟大觉于梦境，即百化以安归。夫如是者，焉复知曜灵之方盛，玄陆之未晞也哉！睿以鄙倍之浅识，犹敢明识虚关，希怀宗极，庶日用之有宜，冀岁计之能殖，况才之美者乎？不胜景仰之至。敢以钝辞短思，序而申之，并目品义，题之于首。岂其能益也，庶以此心，开疾进之路耳。

罗什法师以秦弘始十一年于大寺出之。

○成实论记第五△出论后记

大秦弘始十三年，岁次豕韦，九月八日，尚书令姚显请出此论，至来年九月十五日讫。外国法师拘摩罗耆婆手执胡本，口自传译，昙曜笔受。

○略成实论记第六△新撰

《成实论》十六卷，罗什法师于长安出之，昙曜笔受，昙影正写。影欲使文玄，后自转为五翻，余悉依旧本。

齐永明七年十月，文宣王集京师硕学名僧五百余人，请定林僧柔法师、谢寺慧次法师于普弘寺迭讲，欲使研核幽微，学通疑执。即座仍请佑及安乐智称法师，更集尼众二部名德七百余人，续讲《十诵律》，志令四众净业还白。公每以大乘经渊深，漏道之津涯，正法之枢纽。而近世陵废，莫或敦修，弃本逐末，丧功繁论。故即于律座，令柔次等诸论师抄比《成实》，简繁存要，略为九卷，使辞约理举，易以研寻。八年正月二十三日解座，设三业三品，别施奖有功劝不及，上者得三十余件，中者得二十许种，下者数物而已。即写《略论》百部流通，教使周顒作论序，今录之于后。

○抄成实论序第七△周顒作

寻夫数论之为作也，虽制兴于晚集，非出于一音，然其所以开家命部，莫不各有弘统。皆足以该领名数，隆赞方等，契阔显益，不可訾言。

至如《成实论》者，总三乘之秘数，穷心色之微阐。摽因位果，解惑相驰，凡圣心枢，罔不毕见乎其中矣。又其设书之本，位论为家，抑扬含吐，咸有宪章，则优柔闾探，动开奖利。自《发聚》之初首，至《道聚》之末章，其中二百二品，鳞彩相综，莫不言出于奥典，义溺于邪门。故必旷引条绳，碎陈规墨，料同洗异，峻植明涂，裨济之功，实此为着者也。既宣效于正经，无染乎异学，虽则近派小流，实乃有变方教。是以今之学众，皆云志存大典，而发迹之日，无不寄济此涂，乘津骛水，本期长路。其书言精理赡，思味易耽，顷遂赴蹈争流，重研相蹶。又卷广义繁，致功难尽，故复往不旋，终妨正务。顷《泥洹》、《法华》虽或时讲，《维摩》、《胜鬘》颇参馀席，至于《大品》精义，师匠盖疏，《十追渊弘》，世学将殄。皆由寝处于论家，求均于弱丧，是使大典榛芜，义种行辍，兴言怅悼，侧寐忘安。

《成实》既有功于正篆，事不可阙，学者又遂流于所赴，此患宜裁。今欲内全《成实》之功，外蠲学士之虑，故铨引论才，备详切缓。刊文在约，降为九卷。删赅采要，取效本根，则方等之助无亏，学者之烦半遗。得使功归至典，其道弥传，《波若》诸经，无坠于地矣。业在心源，庶无裁削之累，令典故全，岂有妨于好学。相得意于道心，可不谋而随喜也！

○诃梨跋摩传第八△江陵玄畅作

余寻诃梨跋摩述论明经，枢机义奥，后进所驰。荆州畅公制传，颇徵事迹。故复兼录，附之序末。虽于类为乖，而显证是同焉。

诃梨跋摩者，宋称师子铠，佛泥洹后九百年，出在中天竺，婆罗门子也。若人之生也，固亦命世而诞，幼则神期秀拔，长则思周变通。至若世典《围陀》，并是阴阳奇术，提舍高论，又亦外诘情辩，皆经耳而究其幽，遇心而尽其妙。直以世训承习，弗为心要也。遇见梵志，导以真轨，遂抽簪革服，为萨婆多部达摩沙门究摩罗陀弟子。其师既器而非凡，即训以名典，迦旃延所造《大阿毗昙》，乃有数千偈，而授之曰：“此论盖是众经之统例，三藏之要目也。若能专精寻究，则悟道不远。”于是跋摩敬承钻习，功不逾月，皆精其文义。乃慨焉而叹曰：“吾闻佛旨虚寂，非名相所议；神澄妙绝，罕常情攸测。故为先达之所导崇，我亦注心归仰。如今之所禀，唯见浮繁妨情，支离害志，纷纭名相，竟无妙异。若以为先圣应期适时之渐，斯则教之流，非化之源矣。”遂乃数载之中，穷三藏之旨，考九流之源，方知五部创流荡之基，迦旃延偏竞之始，纷纶遗踪，谋方百辙。由使归宗者昧其繁文，寻教者惑其殊轨。夫源同末异，乃将衰之徵，然颓纲不振，亦弘道者之忧也。遂抗言五异，辩正众师，务导洪范，当而不让。至乃敏捷锋起，苞笼群达，辩若悬河，清对无滞。

于时众师动，相视阙如。后以他日集而议曰：“此子恃明，凌轹旧德，据言有本，未易可顷。迈年值此，运也如何”或有论者曰：“岂唯此子才明过人，抑亦吾等经

论易穷耳。意谓学无足，闇则谄明。明昧之分，已自可知，何为苟守偏识，不师广见耶？”诸耆德曰：“相与诚复慕明情深，而忝世宗仰，于兹久矣。当不能忽废旧业，问道少年明矣。何者？夫根同叶散，像数自然，五部之兴，有自来矣。但当敦其素业，祇而行之，既生属千载之末，孰能远轨正法之初哉！且跋摩抽簪之始，受道吾党，中参异学，已自离群。夫师祖不同，所以五部不杂。黜异之制，盖先师旧典。幸可述其独见之明，以免雷同之众。”跋摩既宏才放达，广心远度，虽众诮交喧，傲然容豫，深体忘怀，明游常趣。神用闲邃，择木改步。

时有僧祇部僧，住巴连弗邑，并遵奉大乘，云是五部之本。久闻跋摩才超群彦，为众师所忌，相与慨然，要以同止。遂得研心方等，锐意九部，采访微言，搜简幽旨。于是博引百家众流之谈，以检经奥通塞之辩。澄汰五部，商略异端。考核迦旃延，斥其偏谬。除繁弃末，慕存归本，造术明论，厥号《成实》。崇附三藏，准列四真，大明筌极，为二百二品。志在会宗，光隆遗轨，庶废乖竞，共遵通济。斯论既宣，渊懿向萃，旬日之间，倾震摩竭。

于时天竺有外道论师，云是优楼佉弟子。明鉴纵达，每述讥正之辩，历国命酬，莫能制者。闻华氏王崇敬三宝，将阴其信情，又欲振名殊方，遂杖策恒南，直至摩竭。王闻不悦，即宣募境内，有能辩屈之者，当奉为国师。闔境豪彦，皆惮其高名，咸曰：“才非跋摩，孰堪斯举！”王闻甚悦，即敕奉迎。跋摩既至，王便请升论堂，令与外道决其两正。于时外道志气干云，乃傲然而咏曰：“吾大宗楼迦，伟藉世师，繁文则六谛同贯，简旨则知异于神。神为知主，唯断为宗。敢有抗者，斩首谢焉！”跋摩既宏才邈世，睹之杪然，神期凌霄，容无改颜。乃慨然对曰：“异哉子之谈也！子所以跨游殊方，将欲崇其神而长其知也。又以断为宗，而自诬其旨。子无知乎？神可亡乎？神既非知，为神知知，知神乎？若神知知，知神者谁？知若知神，知亦神乎？”外道乃退自疑曰：“理必若断，我无知矣。知若知神，神非宗矣。”于是沉惟谢屈，心形俱伏。王及臣民庆快非恒，即与率土奉为国师。王乃谴其旧众，昔忌名贤。本众相视，怀愧阙然，咸共追逊，固请旧居。王又曰：“夫制邪归正，其德弘矣。但弘教之贤，业尚殊背，乖迁遗筌，浊乱像轨，请以检一，令谬昧钦明。”王即宣告，号为像教大宗。由使八方论士，渊异之徒，感思旧决，明契而萃。

跋摩以绝伦之才，超群之辩，每欲师圣附经，藉同黜异。遂博举三藏开塞之涂，大杜五部乖竞之路，难其所执，释其所难。明辩恢廓，苞罗众说，理乱叩机，神王若无。于是群方名杰，莫能异见，咸废殊谋，受道真轨，淳化以之而隆，邪葛以之再蹇。非夫神契实津，道参冲旨，孰能荡定群异，令废我求通者哉！所以粗述始末，垂诸好事云尔。

造诸数论大师传，并集在萨婆多部。此师既不入彼传，故附于此。

○菩萨波罗提木叉后记第九△未详作者

夫穷像于玄原之无始，万行始于戒信之玄兆。是故天竺鸠摩罗什法师心首持诵。什言此戒出《梵网经》中。而什法师少玩大方，齐异学于迦夷。淳风东扇，故弘始三年，秦王道契百王之业，奉心大法。于逍遥观中，三千学士与什参定大小乘经五十馀部，唯菩萨十戒四十八轻最后诵出。时融影三百人等一时受行，修菩萨道。岂唯当时之益，乃有累劫之津也。故慧融书三千部，流通于后代，持诵相授。属诸后学好道之君子，愿末劫不绝，共见千佛，龙华同坐。

○比丘尼戒本所出本末序第十出戒本前晋孝武帝世出

拘夷国寺甚多，修饰至丽。王宫雕镂，立佛形像，与寺无异。有寺名达慕蓝，（百七十僧。）北山寺名致隶蓝，（六十僧。）剑慕王新蓝，（五十僧。）温宿王蓝。（七十僧。）右四寺佛图舌弥所统，寺僧皆三月一易屋、床坐，或易蓝者。未滿五腊，一宿不得无依止。王新僧伽蓝。（九十僧。有年少沙门字鸠摩罗，乃才大高，明大乘学，与舌弥是师徒，而舌弥《阿含学》学者也。）

阿丽蓝，（百八十比丘尼。）输若干蓝，（五十比丘尼。）阿丽跋蓝。（三十尼道。）右三寺比丘尼统，依舌弥受法戒。比丘尼，外国法不得独立也。此三寺尼，多是葱岭以东王侯妇女，为道远集斯寺，用法自整，大有检制。亦三月一易房，或易寺。出行非大尼三人不行。多持五百戒，亦无师一宿者辄弹之。

今所出《比丘尼大戒本》，此寺常所用者也。舌弥乃不肯令此戒来东。僧纯等求之至勤，每嗟此后出法整，唯之斯戒，末乃得之。其解色以息淫，不在上冶容也。不欲以止窃，不在谨封藏也。解色则无情于外形，何计饰容与不饰乎？不欲则无心于珠玉，何须慢藏与緘滕乎？所谓无关而不可开，无约而不可解也。内撻既尔，外又毁容粗服，进退中规，非法不视，非时不餐，形如朽柱，心若湿灰，斯戒之谓也。岂非圣人善救人，故无弃人也哉！然女人之心弱而多放，佛达其微，防之宜密，是故立戒每倍于男也。大法流此五百馀年，比丘尼大戒了于其文。以此推之，外国道士亦难斯人也。

法汰顷年鄙当世为人师，处一大域，而坐视令无一部僧法，推求出之，竟不能具。吾昔得《大露精比丘尼戒》，而错得其药方一匣，持之自随二十馀年，无人传译。近欲参出，殊非尼戒，方知不相关通至于此也。赖僧纯于拘夷国来，得此戒本，令佛念、昙摩持、慧常传，始得具斯一部法矣。然弘之由人，不知斯人等能遵行之不耳。

此戒文与今戒往往不同，尼众学犹作尸叉吉利。

○比丘大戒序第十一△释道安作

世尊立教，法有三焉：一者戒律也，二者禅定也，三者智慧也。斯三者，至道之由户，泥洹之关要也。戒者，断三恶之干将也；禅者，绝分散之利器也；慧者，齐药病之妙医也。具此三者，于取道乎何有也！夫然，用之有次，在家出家，莫不始戒以为基址也。何者？戒虽检形，形乃百行舟舆也，须臾不矜不庄，则伤戒之心入矣。伤戒之心入，而后欲求不入三恶道，未所前闻也，故如来举为三藏之首也。外国重律，每寺立持律，月月相率说戒。说戒之日，终夜达晓，讽乎切教，以相维摄。犯律必弹，如鹰隼之逐鸟雀也。

大法东流，其日未远，我之诸师，始秦受戒，又逐译人，考校者黜。先人所传，相承谓是，至澄和上多所正焉。余昔在邺，少习其事，未及检戒，遂遇世乱，每以怏怏不尽于此。至岁在鹑火，自襄阳至关右，见外国道人昙摩侍讽《阿毗昙》，于律特善。遂令凉州沙门竺佛念写其梵文，道贤为译，慧常笔受。经夏渐冬，其文乃讫。

考前常行世戒，其谬多矣。或殊失旨，或粗举意。昔从武遂法潜得一部戒，其言烦直，意常恨之。而今侍戒规矩与同，犹如合符，出门应辙也。然后乃知淡乎无味，乃真道味也。而嫌其丁宁，文多反复，称即命慧常，令斥重去复。常乃避席谓：“大不宜尔。戒犹礼也，礼执而不诵，重先制也，慎举止也。戒乃迳广长舌相三达心制，八辈圣士珍之宝之，师师相付，一言乖本，有逐无赦。外国持律，其事实尔。此土《尚书》及与《河洛》，其文朴质，无敢措手，明祇先王之法言而慎神命也。何至佛戒，圣贤所贵，而可改之以从方言乎？恐失四依不严之教也。与其巧便，宁守雅正。译胡为秦，东教之士犹或非之，愿不刊削以从饰也。”众咸称善。于是案胡文书，唯有言倒，时从顺耳。前出戒《十三事》中起室与檀越议，《三十事》中至大姓家及绮红锦绣衣及《七因缘法》，如斯之比，失旨多矣。将来学者，审欲求先圣雅言者，宜详览焉。诸出为秦言，便约不烦者，皆蒲萄酒之被水者也。

外国云，戒有七篇，而前出戒皆八篇。今戒七《悔过》后曰《尸叉闍赖尼》，《尸叉闍赖尼》有百七事明也，如斯则七篇矣。又侍《尸叉闍赖尼》有百一十事，余嫌其多。侍曰：“我持律许口受，十事一记，无长也。”寻僧纯在丘兹国佛陀舌弥许得《比丘尼大戒》来，出之正与侍同，百有一十，尔乃知其审不多也。然而比丘戒不止二百五十，阿夷戒不止五百也。

《比丘大戒本》

欲说戒，维那出堂前唱：“不净者出。”次曰：“庾跋门怒钵罗鞞处。”（可大沙门入。三唱。）然后入，唱：“行筹。”曰：“頰簸含陀，（寂静。）阿素，（生也。）舍罗遮丽吏，（行筹。）布萨陀，（说戒。）心蜜栗栴，（一心。）婆?翳鞞

度，（定也。）舍罗吉隶怒，（把筹。）”说戒者乃曰：“僧和集会，未受大戒者出。僧何等作为？”答：“说戒。”“不来者嘱授清净说。”（小住洁向说竟。）说已，那春夏冬若干日已过去。（随时计日。）

僧尽共思惟：一切生死过，求于度世道。若精进持戒，同亦当归死。一精进持戒，同亦当归死。宁持戒而死，不犯戒而生。譬如驶水流，日月不常祝人命疾于彼，去者不复还。

自此偈以后，有布萨羯磨及戒文，不复具写。

○大比丘二百六十戒三部合异序第十二△竺昙无兰

夫戒者，人天所由生，三乘所由成，泥洹之关要也。是以世尊授药，以戒为先焉。戒者，乃三藏之一也。若不以戒自禁，驰心于六境，而欲望免于三恶道者，其犹如无舟而求渡巨海乎。亦如鱼出于深渊，鸿毛入于盛火，希不死焦者，未之有也。行者以戒自严，猛意五十八法者，取道也何难哉！

兰自染化，务以戒律为意。昔在于庐山中竺僧舒许得戒一部，持之自随，近二十年，每一寻省，恨文质重。会昙摩侍所出戒，规矩与同，然侍戒《众多施》有百一十事，尔为戒有二百六十也。释法师问侍，侍言：“我从持律许口受，一一记之，莫知其故也。”尼戒《众多施》亦尔，百有一十。《三十事》中第二十一，二百五十者云：“长钵过十日舍堕。”续言：“是比丘当持此钵与比丘僧。”二十二，二百六十者云：“钵破缀齐，五更未得新钵，故者当归众僧。”推其理旨，宜如二百五十者，在长钵后事与破钵并者为重长也。余以长钵后事注于破钵下，以子从母故也。《九十事中》多参错，事不相对，复徙就二百六十者，令事类相对。亦时有不相似者，重饭食无馀因缘堕，应对重饭不属人言不足，此除因缘事与别请并，故以对别请。此一戒在重饭，一戒在别请，亦为有馀缘则得重饭，亦得越次受请也。不舒手受食，自恐怖教人恐怖，此二戒无对，将传写脱耶？胡本阙乎？《众多施》亦有不对、不相似者，莫知所以也。

余因闲暇，为之三部合异，粗断起尽，以二百六十戒为本，二百五十者为子，以前出常行戒全句系之偏差事末。而亦有永乖不相似者，有以一为二进，有以三为一者。余复分合，令事相从。然此三戒，或能分句失旨，贤才聪睿，若有览者，加思为定，恕余不逮。

比丘僧详定后，后从长安复持本来，更得重校，时有损益，最为定。《比丘大戒二百六十事》三部合异二卷

俗说戒，维那出堂前唱：“不净者出。”次曰：“庾跋门怒钵罗鞞处。”然后入，

唱：“行筹。”说戒者乃曰：“僧和集会，未受大戒者出。僧何等作为？”（众僧和聚会，悉受无戒，于僧有何事。）答：“说戒。”（僧答言，布萨。）“不来者嘱授清净说。”（诸人者当说当来之净，答言说净。）说已，那春夏冬若干日已过去。

僧尽共思惟：一切生死过，求于度世道。若精进持戒，同亦当归死。不精进持戒，同亦当归死。宁持戒而死，不犯戒而生。譬如驶水流，日月不常祝人命疾于彼，去者不复还。

自此偈以后，有布萨羯磨及戒文也。

此二百六十戒，《七佛偈》与常行戒偈同，子戒偈同，子戒本无偈想亦同，故不出也。而此戒来至扬州，汰法师嫌文质重，有所删削。此是其本，未措手向质重者也。

晋泰元六年，岁在辛巳，六月二十五日，比丘竺昙无兰在扬州丹阳郡建康县界谢镇西寺合此三戒，到七月十八日讫。故记之。关中近出尼二种坛文夏坐杂十二事并杂事共卷前中后三记第十三

卷初记云：“太岁己卯，鹑尾之岁，十一月十一日，在长安出此《比丘尼大戒》，其月二十六日讫。僧纯于龟兹佛陀舌弥许得戒本，昙摩侍传，佛念执胡，慧常笔受。”

卷中间《尼受大戒法后记》云：“此土无大比丘尼戒，乏斯一部僧法久矣。吴土虽有《五百戒比丘尼》，而戒是觅历所出，寻之殊不似圣人所制。法汰、道林声鼓而攻之，可谓匡法之栋梁也。法汰去年亦令外国人出少许，复不足。慧常凉州得《五百戒》一卷，直戒戒复之，似人之所作，其义浅近。末乃僧纯、昙充拘夷国来，从云慕蓝寺于高德沙门佛图舌弥许得此《比丘尼大戒》及《授戒法》，《受坐》已下至《剑慕法》。遂令佛图卑为译，昙摩侍传之，乃知真是如来所制也。而不止五百数，比丘戒有二百六十，问侍所以，言莫知其故也。然以理推之，二百五十及五百，是举全数耳。又授《比丘尼大戒》文少，将即用授大比丘法而出其异也。《八簍赖夷》无二，亦当依此足之耳。亦当略授十七《僧迦卫尸沙》一章也。又授《比丘尼大戒》，尼三师教授师，更与七尼坛外问内法。坛外问内法，于事为重，故外国师云：‘坛外问，当言正尔。上场众僧中当问汝，汝当尔答。坛上问，则言，今众僧中问汝也，正尔。’令昙充还拘夷访授《比丘尼大戒》，定法须报以为式也。授六法文无乏也，二师而已，无教授师也。（上坛僧尼各多益善。）”

郑后又记云：“秦建元十五年十一月五日，岁在鹑尾，比丘僧纯、昙充从丘慈高德沙门佛图舌弥许，得此《授大比丘尼勤劳仪》及《二岁戒仪》。从《受坐》至《嘱

授》诸杂事，令昙摩侍出，佛图卑为译，慧常笔受。凡此诸事，是所施行之急者。若为人师而不练此，此无异于土牛后人也。

凉州道人竺道曼，于丘慈因此异事，来与敦煌道人，此沙门各各所住祠，或二百或三百人为一部僧。比丘尼向三百人，凡有五祠。各各从所使僧祠依准为界内，无共说戒法也。常暮说戒。说戒之日，比丘尼差三人往白所依僧云：‘今日当说戒。’僧即差二人往诣比丘尼。僧知人数，还白大僧云：‘比丘尼凡有若干，于某祠清净说戒，普共闻知。’如是三白，比丘尼便自共行筹说戒，如法僧事。（昙充云：“大齐说律六十日竟，尼亦寄听。若遇说戒。亦寄听戒，唯不与舍罗筹耳。”）七月十五日，各于所止处受岁如法，遣三人诣所依僧，承受界分齐耳。其余如僧法。（此与尼戒违，将是不知也。）

比丘尼当三受戒五百戒。比丘尼满十二岁乃中为师。初受十戒时，索二女师。当使持律沙门授戒，乃付女师，令教道之。次受二百五十戒，年满二十，直使女三师授之耳。威仪俯仰，如男子受戒法无异也。（弥离尼受六法，无三师。沙弥亦无三师，二师而已耳。六法云二百五十，谬传之也。）

受戒后周一年无误失，乃得受戒五百戒。后受戒时，三师十僧如中受时，直使前持律师更授二百五十事，合前为五百耳。直授之，不如中受时问威仪委曲也。戒文如男子戒耳，事事如之，无他异也。（授戒立三尼师，一持律比丘僧，授戒场四住屋下。此言十僧后授不委曲，与授文反，未详所出也。）”

○摩得勒伽后记第十四△出经后记

宋元嘉十二年，岁在乙亥，扬州聚落丹阳郡秣陵县平乐寺三藏与弟子共出此律，从正月起到九月二十二日草成，二十五日写毕。白衣优婆塞张道、孙敬信执写。

○善见律毗婆沙记第十五△出律前记

齐永明十年，岁次实沉，三月十日，禅林比丘尼净秀，闻僧伽跋陀罗法师于广州共僧祇法师译出胡本《善见毗婆沙律》一部十八卷。京师未有，渴仰欲见。僧伽跋陀罗其年五月还南，凭上写来。以十一年，岁次大梁，四月十日得律不都，顶礼执读，敬写流布。仰惟世尊泥洹已来年戴，至七月十五日受岁竟，于众前谨下一点，年年如此。感慕心悲，不觉流泪。

千佛名号序第十六（出《贤劫经》。）沙门竺昙无兰抄

《贤劫经》说二千一百诸度无极竟，喜王菩萨仍问：“今此会中，宁有大士得此定竟，入斯八千四百诸度无极，及八万四千度无极法，入八万四千诸三昧门乎？”佛

答言：“有，不但此诸开士也，当来贤劫一千如来亦得入也。除四正觉。”喜王白佛：“唯愿世尊说诸佛名字姓号。”佛为喜王说诸佛号字，号字一千，数之有长，而《兴立》、《发意》二品重说，皆齐慧业而止。以此二品检之，有以二字为名者，三字名者，有以他字足成音句，非其名号。亦时有字支异者，想梵本一耳，将是出经人转其音辞，令有左右也。长而有者，或当以四五六字为名号也。《兴立》、《发意》不尽名，自慧业以下难可详也。余今别其可了，各为佛名；意所不了，则全举之，又以字异者注之于下。然或能分合失所，深见达士，其有觉省，可为改定，恕余不逮。

卷十二

杂录序宋明帝敕中书侍郎陆澄撰法论目录序第一齐太宰竟陵文宣王法集录序第二齐竟陵王世子抚军巴陵王法集序

释僧佑法集总目录序第三释迦谱目录序第四世界记目录序第五萨婆多部师资记目录序第六

法苑杂缘原始集目录序第七弘明集目录序第八十诵律义记目录序第九

法集杂记铭目录序第十

○杂录序

夫灵源启润，则万流脉散，玄根毓萌，则千条云积。何者？本大而未盛，基远而绪长也。自尊经神运，秀出俗典，由汉屈梁，世历明哲。虽复缙服素饰，并异迹同归。至于讲议赞析，代代弥精，注述陶练，人人竞密。所以记论之富，盈阁以刃房；书序之繁，充车而补轸矣。

宋明皇帝標心净境，载餐玄味，迺敕中书侍郎陆澄撰录法集。陆博识洽闻，苞举群籍，铨品名例，随义区分，凡十有六帙，一百有三卷。其所阅古今，亦已备矣。今即其本录以相缀附，虽非正经，而毗赞道化，可谓圣典之羽仪，法門之警卫。足以辉显前绪，昭进后学。是以寄于《三藏集》末，以广枝叶之览焉。

○宋明帝敕中书侍郎陆澄撰法论目录序第一

论或列篇立第，兼明众义者，今总其宗致，不复撻分。合之则体全，别之则文乱。

置难形神，援譬薪火。庾阐发其议，谢瞻广其意。然桓谭未及闻经，先着此言，有足奇者，宜其缀附也。牟子不入教門，而入缘序，以特载汉明之时，像法初传故也。

魏祖答孔，是知英人开尊道之情；习生贻安，则见令主弘信法之心。所以有取二书，指存两事。又支遁敷翰远国，述江南僧业，故兼录。《即色游玄论》（支道林。王敬和问，支答。）

《辩着论》（支道林。）《释即色本无义》（支道林。王幼恭问，支答。）《不真空论》（释僧肇。）《本无难问》（郗嘉宾。竺法汰难，并郗答，往反四首。）

《郗与法濬书》《郗与开法师书》《郗与支法师书》《心无义》（桓敬道。王稚远难，桓答。）

《释心地》（刘遗民。）《法性论》上下（释慧远。）《实相义》（释道安。）《问实相》（王稚远，外国法师答。）

《问如法性真际》（释慧远，什法师答。）《问实法有》（释慧远，鸠摩罗什答。）《问分破空》（释慧远，鸠摩罗什答。）《实相论》（释昙无成。）

《实相通塞论》（释道含。）《会通论》（支昙谛。）《支书与郗嘉宾》《会通论》上下（释慧义。）

《始元论》（释僧宗。）《略论诸经》《胜鬘经序》（释慧观。）《百论序》（释僧睿。）

《百论序》（释僧肇。）右《法论》第一帙（《法性集》十五卷）《涅槃无名论》（释僧肇。）《佛性论》上下（释僧宗。）

《问涅槃有神不》（王稚远，什答。）《问灭度权实》（王稚远，什法师答。）《问清净国》（王稚远，什法师答。）《涅槃三十六问》（竺道生。）

《释八住初心欲取泥洹义》（竺道生。）《与诸道人论大般泥洹义》（范伯伦。）《论经目》《大涅槃经序》

《辩佛性义》（竺道生。王问并竺答。）《佛性集》（释慧静。）《佛性论》右《法论》第二帙（《觉性集》七卷）

《道行指归》（支道林。何敬问，支答。）《道行指归》（云是安公述，相传云。）《般若无名论》（释僧肇。刘遗民难，肇答。）《问佛成道时何用》（王稚远，什答。）

《问般若法》（王稚远，什法师答。）《问般若称》（王稚远，什法师答。）《问般若知》（王稚远，什法师答。）《问般若是实相智非》（王稚远，什法师答。）

《问般若萨婆若同异》（王稚远，什法师答。）《问无生法忍般若同异》（王稚远，什法师答。）《问礼事般若》（王稚远，什法师答。）《问佛慧》（王稚远，什法师答。）

《问权智同异》（王稚远，什法师答。）《问菩萨发意成佛》（王稚远，什法师答。）《般若折疑略序》（释道字。）《大品经序》（释道安。）

《大品经序》（释僧睿。）《大智释论序》（释僧睿。）《般若经问论序》（释慧远。）《中论序》（释僧睿。）

《小品经序》（释僧睿。）《合维摩诘经序》（支敏度。）《道行品注序》（释道安。）《维摩诘经注序》（释僧肇。）

《毗摩罗诘经义疏序》（释僧睿。）《自在王经后序》（释僧睿。）《思益经义疏序》（释僧睿。）《与释慧远书论真人至极》（荀问，释慧远答。）

《与诸道人论般若义》（范伯伦。）右《法论》第三帙（《般若集》六卷）《问法身》（王稚远，什答。）《问法身》（释慧远，什答。）

《重问法身》（释慧远，什答。）《问真法身像类》（释慧远，什答。）《问真法身寿》（释慧远，什答。）《问法身应感》（释慧远，什答。）

《问法身非色》（释慧远，什答。）《问修三十二相》（释慧远，什答。）《问释慧严法身二义》（竺僧緋。）《丈六即真论》（释僧肇。）

《通佛影迹》（颜延年。）《通佛顶齿爪》（颜延年。）《通佛二鬘不燃》（颜延年。）右《法论》第四帙（《法身集》四卷）

《问法身佛尽本习》（释慧远，什答。）《问成佛时断保累》（王稚远，什答。）右《法论》第五帙（《解脱集》一卷）《法华经后序》（释僧睿。）

《妙法莲华经序》（释慧远。）《妙法莲华经宗要序》（释慧观。）《与竺道生书》（刘遗民。）《法华经论》

《辩三乘论》（支道林。）《无三乘统略》（释慧远。）《问释道安三乘并书》（竺法汰。）《问三乘一乘》（什答。）

《问得三乘》（王稚远，什师答。）《问三归》（王稚远，什师答。）《问辟支佛》（王稚远，什师答。）《四阿含暮抄序》

《长阿含经序》（释僧肇。）《三法度经序》（释慧远。）《正诬论》《了本生死经注序》

《法句经序》《明佛论》（宗少文。）《譬道论》（孙兴公。）《座右铭》（支道林。）

《道学诫》（支道林。）《切悟章》（支道林。）《支道林答谢长遐书》《离识观》（颜延年。）

《张景胤与从弟景玄书》（论西方，并答。）《奉法要》（郗嘉宾。）《七众法》《通神咒》（郗嘉宾。）

《明感论》（郗嘉宾。）《问菩萨生五道中》（王稚远，什师答。）《问七佛》（王稚远，什答。）《问不见弥勒不见千佛》（王稚远，什法师答。）

右《法论》第六帙（《教门集》十二卷）《优婆塞五学迹略论》上下（三藏法师。）《法社节度序》（释慧远。）《外寺僧节度序》（释慧远。）

《节度序》（释慧远。）《般若台众僧集议节度序》（支道林。）《比丘尼节度序》（释慧远。）《咸康六年门下议并诏及何次道议》二首

《晋成帝诏及何次道议》四首（诏是庾季坚作。）《桓敬道书兴八座论道人敬王者》（八座答。）《醒敬道与王稚远书》往反九首《醒敬道与释慧远书》往反三首

《桓敬道伪诏沙门不复敬天子并卞嗣之等答》往反十首《桓敬道沙汰沙门教》《释慧远答桓敬道书论料简沙门事》《宋武为相时沙汰道人教》

《沙门不敬王者论》（释慧远。）《问佛法不老》（王稚远，什答。）《与释慧远书论沙门袒服》（郑道子。）《沙门袒服论》（释慧远。何无忌难，远答。）

《与禅师书论踞食》（郑道子。）《与王司徒诸人书论据食》（范伯伦。释慧义答，范重答。）《与道生慧观二法师书》（范伯伦。）《论据食表并诏》四首（范伯伦。）

右《法论》第七帙（《戒藏集》八卷）《本起四禅序并注》（支道林。）《安般守意经注序》（康会。）《十二门经注序》（释道安。）

《十二门注序》《阴持入经注序》《人本欲生经注序》《禅经序》（释僧睿。）

《禅经序》（释慧远。）《释神足》（释慧远。）《问念佛三昧》（释慧远，什答。）《忘书禅慧宣诸弘信》（颜延年。）

《闻慧思修禅定义在家习定法》右《法论》第八帙（《定藏集》四卷）《阿毗昙心序》（释慧远。）《阿毗昙序》

《阿毗昙五法行义》（谢庆绪。）《阿毗昙心略解数》《阿毗昙心杂数林》《问竺道生诸道人佛义》（范伯伦。）

《众僧述范问》《范重问道生》往反三首《傅季友答范伯伦书》《辩宗论》（谢灵运。）

《法勘问》往反六首《僧维问》往反六首《慧麟述僧维问》往反六首《麟杂问》往反六首

《竺法纲释慧林问》往反十一首《王休元问》往反十四首《竺道生答王问》一首《渐悟论》（释慧观。）

《沙门竺道生执顿悟》《谢康乐灵运辩宗述顿悟》《沙门释慧观执渐悟》《明渐论》（释昙无成。）

右《法论》第九帙（《慧藏集》七卷）《问遍学》（外国法师答。）《问遍学》（释慧远，什答。）《重问遍学》（释慧远，什答。）

《问罗汉受》（释慧远，什答。）《论三行》上（郗嘉宾。）《叙通三行》（郗嘉宾。）《郗与谢庆绪书》往反五首

《论三行》下（郗嘉宾。）《法勘问》往反六首《僧杂问》往反六首《慧麟述僧杂》往反六首

《郗与傅叔玉书》往反三首《答英郎书》一首《王季琰书》往反四首《与仰法师书并答》二首

《道地经注序》《略解三十七品次第》（什法师。）《本业略例》（支道林。）《本业经注序》（支道林。）

《论十追上下》（傅叔玉。）《书与谢庆绪论十追往反四首》（二首分为下卷。）《傅叔玉重书并谢答》三十二字《十住义》（释昙遇。）

《实相标格论》《问住寿》（释慧远，什答。）《问释道安六通》（竺汰。）右《法论》第十帙（《杂行集》十卷）

《十报法统略》《释三报论》（释慧远。）《述竺道生善不受报义》（释僧璩。释镜难，璩答。）《全生论》（郗嘉宾。）

《希生问》（桓敬道。殷伯道答，桓难。）《明报应论》（释慧远。）《报应论》（卞湛。范伯伦难，卞答。）《业报论》

右《法论》第十一帙（《业报集》六卷）《神木论》（支昙谛。）《命源论》（释慧静。）《识三本论》（谢庆绪。）

《支道人书与谢论三识并答》《戴安道书与谢论三识并答》往反三首《四执论》《问精神心意识》（王稚远，什答。）

《问十数法》（王稚远，什法师答。）《辩心意识》（释慧远。）《释神名》（释慧远。）《验寄名》（释慧远。）

《问论神》（释慧远。）《问释道安神》（竺法汰。）《问神识》（王稚远，什答。）《五阴三达释》（郗嘉宾。）

《问后识追忆前识》（释慧远，什答。）《神不更受形论》（庾仲初。）《更生论》（罗君章。孙安国难，罗答。）《习凿齿难》。

《神不灭论》（郑道子。）《桓君山新论论形神》《书与何彦德论感果生灭》五往反（颜延年。）《山巨源问》

《摅元礼谕》《颜答山摅二难》右《法论》第十二帙（《色心集》九卷）《问四相》（释慧远。）

《物不迁论》（释僧肇。）《申无生论》（释昙无成。）右《法论》第十三帙（《物理集》三卷）《牟子》（一云苍梧太守牟子博传。）

《旧首楞严经后序》《支法护像赞》（支道林。）《答孔文举书》魏武帝。《与释道安书》（习凿齿。）

《与释道安书》（伏玄度。）《与高句骊国道人书》（支道林。）右《法论》第十四帙（《缘序集》二卷）《难沙门于法龙》（释道彦，法龙答。）

《答谢宣明难佛理》（范伯伦。）《论检》（颜延年。）《答或人间》（颜延年。）《关中法济道人与凉州同学书》

《达性论》（何承天。）《颜延年释何》五往反（道人问，颜答。）《均善论》（释慧琳。）《何承天与宗少文书》五往反（演《均善论》。）

《断家养论》（何彦德。）《释慧琳难》《广何》（颜延年。）《颜重与何书》

右《法论》第十五帙（《新论集》六卷）《辩教论》桓敬道。《婚农无伤论》（释慧琳。）《照极明化论》（顾长康。）

《问难》（释慧琳。）

右《法论》第十六帙（《邪论集》三卷）

○齐太宰竟陵文宣王法集录序第二

夫五时九部之契，三请四答之机，玄哉邈乎，奥不可议已。然法海无涯，航而知大；慧藏不极，采而得宝。是以弘誓之士，随时斟酌，马鸣抽其幽宗，龙树振其绝绪，提婆析其名数，诃梨总其条理。并翼赞妙典，俘翦外学，迷津见衢，长夜逢晓。故智慧之日，名飞于摧邪；功德之月，绩翔于阐化，亦已盛矣。但群萌殊业，根力异品，运季道浇，信淡识浅。至于披瞽发聋，事资恳励，药愚针惑，宜务切近。是以后代敷训，显晦不一，或颺言以泛解，或提耳而指授。所以卷舍教义，抑扬风轨，岂滞恒方，期于悟俗而已。

齐太宰竟陵文宣王净刹萌因，忍土现果，慧自天成，道为期出。孝忠淳和之深，仕智博爱之厚，率由而极，因心则至。若乃栖神二谛，宅业三宝，瞻前卓尔，望后不群。用能降帝子之尊，灼净土之操，屏朱观之贵，下白屋之礼。磨踵以拯俗，刻髓以徇道。望亿劫以长馼，凌千载而独上。若乃阐经律，弘福施，济苍黎，毓动，未尝不虑积昏明，慈洽巨细。感灵瑞于显微，通觉应于宵梦，固已葳蕤民誉，昭皙神听矣。至于苞括儒训，洞镜释典，空有双该，内外感照。常欲广彼洲渚，炽此法灯，驻四生之风波，烛九居之霾雾，指来际以为期，总大千以为任。故惻隐垂教，殷勤敷道。于是锐临云之思，壮谈天之文，网罗字轮，仪形法纓是以《净追命氏》，启入道之门；《华严瓔珞》，标出世之术；《决定要行》，进趣乎金刚；《戒果庄严》，克成乎甘露。尔其众经注义，法塔赞颂，《僧制药记》之流，导文愿疏之属。莫不诚在言前，理出辞表，大者钩深测幽，小者驰辩感俗，森成条章，郁为卷帙。可谓开士住心，道场初迹，冠一代之妙化，垂千祀之胜范者也。佑昔以道缘，预属嘉会，律任法使，谬荷其寄，斋堂梵席，时枉其请。哲人徂谢，而道心不亡，静寻遗篇，僂乎如在。遂序兹集录，以贻来世云尔。《净住了》十卷

右第一帙（上）《净住子》十卷右第二帙（下）《华严瓔珞》二卷

右第三帙《诸佛名》十卷右第四帙《诸菩萨名》二卷

右第五帙《菩萨决定要行》十卷右第六帙《注优婆塞戒》三卷

右第七帙《戒果庄严》一卷《注遗教经》一卷右第八帙

《维摩义略》五卷右第九帙《杂义记》十卷右第十帙（上）

《杂义记》十卷右第十一帙（下）《僧制》一卷《清信士女法制》三卷

右第十二帙《礼佛文》二卷右第十三帙《西州法云小庄严普弘寺讲并述羊常弘广斋》共卷

《抄成实论序并上定林讲》共卷《华严斋记》一卷《施药记》一卷《舍身记》一卷

《妃舍身记》一卷《发愿疏》一卷《会稽荆雍江郢讲记》一卷《内典序并赞》一卷

《述放生东宫斋述受戒》共卷《僧得施三业施食法》共卷右第十四帙《宣白僧尼疏与畅疏并与州郡书求内典》共卷

《法门赞》一卷《讲净住记》一卷《受维摩注名》一卷《与僚佐书并教诫左右》一卷

《拜扬州刺史发愿》一卷《与何祭酒书赞去滋味》一卷《赞梵呗偈文》一卷《开优婆塞经题》一卷

右第十五帙《大司马舍身并施天保二众》一卷《佛牙记》一卷《答疑惑书并稚珪书》一卷

《教宣约受戒人》一卷《八日禅灵寺斋并颂》一卷《龙华会并道林斋》一卷《布萨并天保讲》一卷

《净住子次门》一卷《梵呗序》一卷《转读法并释滞》一卷《示诸朝贵法制启》二卷

《示诸朝贵释滞启答》二卷《宝塔颂并石像记》一卷《受戒并弘法式》一卷右第十六帙（十六帙合一百十六卷）

自书经目录《大字维摩经》一部十四卷《细字维摩经》一部六卷《妙法莲华经》一部十四卷

《般舟三昧经》一部二卷《无量寿经》一部四卷《十地经》一部十卷《华严经》一部六卷

《大泥洹经》五卷《虚空藏经》二卷《泥洹受持品》一卷《护身经》一卷

《观世音经》一卷《普贤经》一卷《金刚般若经》一卷《八吉祥神咒经》一卷

《出生无量门持经》一卷

《呵色欲经》一卷

○齐竟陵王世子抚军巴陵王法集序

盖闻民谛善论，法海所总，严饰文辞，初位是摄。自大化东渐，沿世咏歌，魏来杂制，间出群集。至于才中含章，思入精理，固法门之羽毒，梵声之金石也。齐竟陵文宣王世子故抚军巴陵王，禀璿华于昆峰，敏明玃于珠海，慧发觴辰，识表绮岁，孝友淳至，机颖朗彻。故幼无弱弄，夙有老成，甫在志学，固已总括坟典矣。雅好辞赋，允登高之才；藉章隶书，均临池之敏。业盈竹素，虑满风月。是时齐方有德，文宣翼赞，《康衢》既熙，慧教傍远。世子以枝叶之庆，藩守浙河，下车风举，升席治立，含静台以御己，垂兰蕙以振俗。郡富名山，岩多灵寺，故胜业愈高，清心弥往。每游践心训，思若渊泉，信足以揄扬至道，炳发玄极。观其摛赋《经声》，述颂绣像，《千佛愿》文，《舍身》弘誓，《四城》、《九相》之诗，释迦十圣之赞，并英华自凝，新声间出。故仆射范云笃赏文会，雅相嗟重，以为后进之佳才也。

至隆昌之时，始兆无妄，永无之末，运属道消。葛藟失庇，磐石倾翦，虎兕出柙，宗室致猜。而乐天知命，夷忧味道，在艰不亏其贞，处约无改其节。镜因果而靡晦，洞真俗其如晓，专精于大觉之门，懔烈于经典之奥。于是下帷瑾户，注解《百论》，拔出幽旨，妙尽纤典。乃躬算缣素，手写方等。所书大经，凡有十部，锋刃劲削，风趣妍靡。论其思理所彻，业艺所贯，有逾箕裘之能，克副青蓝之敏矣。

夫深宫寡识，着自格言；梁肉多骄，闻之前记。而能拔类独立，超然高举，岂非内铸坚芳之性，外莹过庭之风哉！以法而说，譬金龙之嗣信相；由俗而议，迈允恭之绍陈思。可谓开士宿因，梅檀眷属，无忝堂构，克胜负荷者也。余昔缘法事，亟觐清徽，及律集稽川，屡延供礼。惜乎早世，文制未广。今撰录法咏，以继文宣内集。使千祀之外，知兰菊之无绝焉。

巴陵杂集目录《造千佛愿》《绣佛颂》《舍身序并愿》

右上卷《释迦赞》《十弟子赞》十首《为会稽西方寺作禅图九相咏》十首

《四城门诗》四首《法咏叹德》二首《佛牙赞》《经声赋》

《会稽宝林寺禅房闲居颂》右下卷自写经目录并注《法华经》一部七卷

《维摩经》一部三卷《无量寿》经二部四卷《金刚般若经》三部三卷《请观世音经》一部一卷

《八吉祥经》一部一卷《波若神咒》一部一卷右十部

《注百论》一部

○释僧佑法集总目录序第三

尝闻沥泣助河之谈，捧土埤岱之论，虽诃发于古，而愧集于今矣。僧佑漂随前因，报生阎浮，幼龄染服，早备僧数。而慧解弗融，禅味无纪，刹那之息徒积，锱毫之勤未基。是以惧结香朝，惭动钟夕，茫茫尘劫，空阅斩筹。然窃有坚誓，志是大乘，顶受方等，游心《四含》。加以山房寂远，泉松清密，以讲席间时，僧事餘日，广讯众典，披览为业。或专日遗餐，或通夜继烛，短力共尺波争驰，浅识与寸阴竞{日咎}。虽复管窥迷天，蠡测惑海，然游目积心，颇有微悟。遂缀其闻，诚言法宝，仰稟群经，傍采记传，事以类合，义以例分。显明觉应，故序释迦之谱；区辩六趣，故述《世界》之记；订正经译，故编《三藏》之录；尊崇律本，故铨《师资》之传；弥纶福源，故撰《法苑》之篇；护持正化，故集《弘明》之论。且少受律学，刻意毗尼，旦夕讽持，四十许载，春秋讲说，七十馀遍。既稟义先师，弗敢坠失，标括章条，为《律记》十卷，并杂碑记撰为一帙。总其所集，凡有八部。冀微启于今业，庶有藉于来津，岂曰善述，庶非妄作。但理远识近，多有未周。明哲悦览，取诸其心，使道场之果，异迹同臻焉。

《释迦谱》五卷右一部第一帙《世界记》五卷右一部第二帙

《出三藏记集》十卷右一部第三帙《萨婆多部相承传》五卷右一部第四帙

《法苑集》十卷右一部第五帙《弘明集》十卷右一部第六帙

《十诵义记》十卷右一部第七帙《法集杂记传铭》七卷

右一部第八帙

○释迦谱目录序第四△释僧佑撰

盖闻菩提之为极也，神妙寂通，圆智湛照，道绝于形识之封，理毕于生灭之境。形识久绝，岂实诞于王宫；生灭已毕，宁真谢于坚固哉。但群萌长寝，同归大觉，缘来斯化，感至必应。若应而不生，谁与悟俗？化而无名，何以导世？是以标号释迦，擅种刹利，体域中之尊，冠人天之秀。然后脱屣储宫，贞观道树，舍金轮而馭大千，明玉毫而制法界，此其所以垂迹也。爰自降胎，至于分塔，玮化千条，灵瑞万变。并义烦经典，事盈记传。而群言参差，首尾散出，事绪舛驳，同异莫齐。散出首尾，宜有贯一之区；莫齐同异，必资会通之契。故知博讯难该，而总集易览也。

佑以不敏，业谢多闻，时因疾隙，颇存寻玩。遂乃披经案记，原始要终，敬述《释迦》谱记，列为五卷。若夫胤裔托生之源，得道度人之要，泥洹塔像之徵，遗法将灭之相。总众经以正本，缀史记以附末。使圣言与俗说分条，古闻共今迹相证。万里虽邈，有若躬践，千载诚隐，无隔面对。今抄集众经，述而不作，庶脱寻访，力半功倍。敬率丹心，略敷誓愿。

《释迦始祖劫初刹利相承姓缘谱》第一（出《长阿含经》。）《释迦始祖贤劫初姓瞿昙缘谱》第二（出《十二游经》。）《释迦六世祖始姓释迦氏缘谱》第三（出《长阿含经》。）

《释迦降生释种成佛缘谱》第上（出《普曜经》。）《释迦在七佛末种姓众数同异谱》第五（出《长阿含经》。）《释迦同三千佛缘谱》第六（出《药王药上观经》。）

《释迦内外族姓名谱》第七（出《长阿含经》。）《释迦弟子姓释缘谱》第八（出《增一阿含经》。）《释迦四部名闻弟子谱》第九（出《增一阿含经》。）

右第一卷《释迦从弟调达出家缘记》第十（出《中本起经》。）《释迦从弟阿那律跋提出家记》第十一（出《昙无德律》。）《释迦从弟孙陀罗难陀出家缘记》第十二（出《出曜经》。）

《释迦子罗云出家缘记》第十三（出《未曾有经》。）《释迦姨母大爱道出家缘记》第十四（出《中本起经》。）《释迦父净饭王泥洹记》第十五（出《净饭王泥洹经》。）

《释迦母摩诃摩耶夫人记》第十六（出《佛升忉利天为母说法经》。）《释迦姨

母大爱道泥洹记》第十七（出《佛母泥洹经》。）《释迦灭宿业缘记》第十八（出《长阿含经》。）

右第二卷《释迦竹园精舍缘记》第十九（出《昙无德律》。）《释迦祇洹精舍缘记》第二十（出《贤愚经》。）《释迦发爪塔缘记》第二十一（出《十诵律》。）

《释迦天上四塔记》第二十二（出《集经抄》。）《优填王造释迦栴檀像记》第二十三出《增一阿含经》。）《波斯匿王造金像记》第二十四（出《增一阿含经》。）

《阿育王第出家造石像记》第二十五（出《求离牢狱经》。）《释迦留影在石室记》第二十六（出《观佛三昧经》。）右第三卷

《释迦双树般涅槃记》第二十七（出《大涅槃经》。）《释迦八国分舍利记》第二十八（出双卷《泥洹经》。）《释迦天上龙宫舍利宝塔记》第二十九（出《菩萨处胎经》。）

《释迦龙宫佛髭塔记》第三十（出《阿育王经》。）右第四卷《阿育王造八万四千塔记》第三十一（出《杂阿含经》。）《释迦获八万四千塔宿缘记》第三十二（出《贤愚经》。）

《释迦法灭尽缘记》第三十三（出《杂阿含经》。）《释迦法灭尽相记》第三十四（出《法灭尽经》。）右第五卷世界记目录序第五

释僧佑撰

夫三界定位，六道区分，粗妙异容，苦乐殊迹。观其源始，不离色心；检其会归，莫非生灭。生灭轮回，是曰无常；色心影幻，斯谓苦本。故《涅槃》喻之于大河，《法华》方之于火宅。圣人超悟，息驾反源，拔出三有，然后为道也。

寻世界立体，四大所成，业和缘合，与时而兴，数盈灾起，复归乎灭。所谓寿短者谓其长，寿长者见其短矣。夫虚空不有，故厥量无边，世界无穷，故其状不一。然则大千为法王所统，小千为梵主所领，须弥为帝释所居，铁围为藩墙之域，大海为八维之浸，日月为四方之烛。总总群生，于兹是宅，琐琐含识，莫思涂炭。沉俗而观，则迂诞之奢言，大道而察，乃掌握之近事耳。但世宗周雅伏经书。然辩括宇宙，臆度不了。《易》称天玄，盖取幽深之名，《庄》说苍苍，近在远望之色。于是野人信明，谓旻青如碧，儒士据典，谓乾黑如漆。青黑诚异，乖体是同，儒野虽殊，不知一也。是则俗尊天名，而莫识天实，岂知六欲之严丽，十梵之光明哉！至于准步地势，则虚信章亥；图度日月，则深委筭术。未值一隅，差以千里。虽复夏革

说地，不过户牖之间；邹子谈天，甫在奥突之内。炼石既诬，罄足亦诡。俗书徒繁，竟无显说，世士蒙昧，莫详厥体。是以凭惠独虑，六合之相持；桓谭拒问，率五藏以为喻。通人学，思郁理穷，况乃墙见，其能辩乎！嗟夫！区界现事，犹莫之知，不思妙义，固其已矣。

窃惟方等大典，多说深空，唯《长含》、《楼炭》，辩章世界，而文博偈广，难卒检究。且名师法匠，职竞玄义，事源委积，未必曲荆佑以庸固，志在拾遗，故抄集两经，以立根本，兼附杂典，互出同异，撰为五卷，名曰《世界集记》。将令三天阶序，焕若披图；六趣群分，照如临镜。庶溺俗者发蒙，服道者莹解，共建慧眼之因，俱成觉智之业焉。

《三千大千世界名数记第》（出《长阿含》。）《诸世界海形体记》第二（出《华严经》。）《大小劫名譬喻记》第三（出《楼炭经》。）《劫初世界始成记》第四（出《长阿含》。）

《大海须弥日月记》第五（出《长阿含》。）《四天下地形人物记》第六（出《长阿含》。）《劫初四姓种缘记》第七（出《长阿含》。）右第一卷

《转轮圣王记》第八（出《长阿含》。）《欲界六天记》第九（出《长阿含》。）《色界十八天记》第十（出《长阿含》。）《无色界四天记》第十一（出《长阿含》。）

《乾闥婆甄那罗记》第十二（出《长阿含》。）右第二卷《阿须轮斗战记》第十三（出《长阿含》。）《世界诸神及饿鬼记》第十四（出《长阿含》。）

《龙金翅象师子十二兽记》第十五（出《大集经》。）右第三卷《大小地狱阎罗官属记》第十六（出《长阿含》。）右第四卷

《世界云雨雷电记》第十七（出《长阿含》。）《世界树王华药记》第十八（出《长阿含》。）《小劫饥兵疫三灵记》第十九（出《长阿含》。）《大劫火水风三灾记》第二十（出《长阿含》。）

右第五卷

○萨婆多部师资记目录序第六△释僧佑撰

大圣迁辉，岁纪绵邈，法僧不坠，其唯律乎！初集律藏，一轨共学，中代异执，五部各分。既分五部，则随师传习，唯萨婆多部偏行齐土，盖源起天竺，流化闾宾，前圣后贤，重明叠耀。或德升住地，或道证四果，或显相标瑞，或晦迹同凡，皆秉

持律仪，阐扬法化。旧记所载，五十三人。自兹以后，睿哲继出，并嗣徽于在昔，垂轨于当今。季世五众，依斯立教，遗风馥烈，炳然可寻。

夫荫树者护其本，饮泉者敬其源。宁可服膺玄训，而不记列其人哉！佑幼龄凭法，年逾知命，仰前觉之弘慈，奉先师之遗德。猥以庸浅，承业《十诵》，讽味讲说，三纪于兹。每披圣文以凝感，望遐踪以翹心。遂搜访古今，撰《萨婆多记》。其先传同异，则并录以广闻；后贤未绝，则制传以补阙。总其新旧九十余人。使英声与至教永被，懋实共日月惟新，此撰述之大旨也。条序馥部，则委之明胜，疾恙馥漠，则辞之铨藻。倘有览者，略文取心。

《大迦叶罗汉传》第一《阿难罗汉》第二《末田地罗汉》第三（译曰中也。）《舍那婆斯罗汉》第四

《优波掘罗汉》第五《慈世子菩萨》第六《迦旃延罗汉》第七《婆须蜜菩萨》第八

《吉栗瑟那罗汉》第九《长老肋罗汉》第十《马鸣菩萨》第十一《鸠摩罗驮罗汉》第十二

《韦罗罗汉》第十三《瞿沙菩萨》第十四《富楼那罗汉》第十五《后马鸣菩萨》第十六

《达磨多罗菩萨》第十七《蜜遮伽罗汉》第十八《难提婆秀罗汉》第十九《瞿沙罗汉》第二十

《般遮尸弃罗汉》第二十一《罗睺罗罗汉》第二十二《弥帝丽尸利罗汉》第二十三《达磨达罗汉》第二十四

《师子罗汉》第二十五《因陀罗摩那罗汉》第二十六《瞿罗忌梨婆罗汉》第二十七《婆秀罗罗汉》第二十八

《僧伽罗叉菩萨》第二十九《优波亶驮罗汉》第三十《婆难提罗汉》第三十一《那伽难罗汉》第三十二

《达磨尸梨帝罗汉》第三十三（译曰法胜。）《龙树菩萨》第三十四《提婆菩萨》第三十五《婆罗提婆菩萨》第三十六

《破楼提婆》第三十七《婆修跋摩》第三十八《毗栗惠多罗》第三十九《毗楼》第四十

《毗闍延多罗菩萨》第四十一《摩帝丽菩萨》第四十二《诃梨跋暮菩萨》第四十三《婆秀槃头菩萨》第四十四（译曰青目。）

《达磨达帝菩萨》第四十五《旃陀罗罗汉》第四十六《勒那多罗菩萨》第四十七《槃头达多》第四十八

《弗若蜜多罗汉》第四十九《婆罗多罗》第五十《不若多罗》第五十一《佛驮先》第五十二

《达磨多罗菩萨》第五十三右五十三人第一卷《长安城内齐公寺萨婆多部佛大跋罗师宗相承略传》《阿难罗汉》第一

《末田地罗汉》第二《舍那婆斯罗汉》第三《优波掘罗汉》第四《迦旃延菩萨》第五

《婆须蜜菩萨》第六《吉栗瑟那罗汉》第七《勒比丘罗汉》第八《马鸣菩萨》第九

《瞿沙菩萨》第十《富楼那罗汉》第十一《达磨多罗菩萨》第十二《寐遮迦罗汉》第十三

《难提婆秀罗汉》第十四《巨沙》第十五《般遮尸弃》第十六《达摩浮帝罗汉》第十七

《罗睺罗》第十八《沙帝贝尸利》第十九《达磨巨沙》第二十《师子罗汉》第二十一

《达磨多罗》第二十二《因陀罗摩那罗汉》第二十三《瞿罗忌利罗汉》第二十四《鸠摩罗大菩萨》第二十五

《众护》第二十六《优波亶大》第二十七《婆婆难提》第二十八《那迦难提》第二十九

《法胜菩萨》第三十《婆难提菩萨》第三十一《破楼求提》第三十二《婆修跋慕》第三十三

《比栗瑟毘弥多罗》第三十四《比楼》第三十五《毗闍延多罗菩萨》第三十六《摩帝戾拔罗菩萨》第三十七

《阿梨跋慕菩萨》第三十八《波秀槃头菩萨》第三十九《达磨呵帝菩萨》第四十《旃陀罗罗汉》第四十一

《勒那多罗菩萨》第四十二《槃头达多》第四十三《不若多罗》第四十四《佛大尸致利罗汉》第四十五

《佛驮悉达罗汉》第四十六《又师以鬘为证不出名罗汉》第四十七《婆罗多罗菩萨》第四十八《佛大先》第四十九

《昙摩多罗》第五十《达摩悉大》第五十一《罗睺罗》第五十二《耶舍》第五十三

《僧伽佛澄》第五十四右五十四人第二卷《卑摩罗叉传》第一《鸠摩罗什传》第二

《弗若多罗传》第三《昙摩流支传》第四《求那跋摩传》第五《佛大跋陀罗传》第六

右第三卷《业律师传》第一《询律师传》第二《俨律师传》第三

《香律师传》第四《力律师传》第五《耀律师传》第六《璩律师传》第七

《猷律师传》第八《光律师传》第九《远律师传》第十《具律师传》第十一

《颖律师传》第十二《道律师传》第十三《嵩律师传》第十四《熙律师传》第十五

《度律师传》第十六《晖律师传》第十七《畅律师传》第十八《猷律师传》第十九

《称律师传》第二十《元嘉初三藏二法师重受戒记》第一《元嘉末赋住阮奇弟子受戒记》第二《永明中三吴始造戒坛受戒记》第三

《建武中江北尼众始往僧寺受戒记》第四《小乘迷学竺法度造异仪记》第五

右第五卷

○法苑杂缘原始集目录序第七△释僧佑撰

夫经藏浩汗，记传纷纭。所以导达群方，开示后学，设教缘迹，焕然备悉，训俗事源，郁尔咸在。然而讲匠英德，锐精于玄义；新进晚习，专志于转读。遂令法门常务，月修而莫识其源；僧众恒仪，日用而不知其始。不亦甚乎！

余以率情，业谢多闻，六时之隙，颇好寻览。于是检阅事缘，讨其根本，遂缀翰墨，以藉所好，庶辩始以验末，明古以证今。至于经呗道师之集，龙华圣僧之会，菩萨禀戒之法，止恶兴善之教。或制起帝皇，或功积黎庶，并八正基迹，十力遑路。虽事寄形迹，而勋遍空界，宋、齐之隆，实弘斯法。大梁受命，道冠百王，神教傍通，慧化冥被。自幼届老，备观三代，常愿一乘宝训，与天地而弥新；四部盛业，随日月而长照。是故记录旧事，以彰胜缘，条例丛杂，故谓之法苑，区以类别，凡为十卷。岂足简夫渊识，盖布之眷属而已。

《优填王栴檀像波斯匿王紫金像记》第一（出《增一阿含》。）《迦兰陀长者初造竹园精舍缘记》第二（出《过去因果经》。）《须达长者初造发爪塔记》第三（出《十诵律》。）

《佛初留影在石室记》第四（出《观佛三昧经》。）《刀利天上初造发衣钵牙四塔记》第五（出《集经抄》。）《天上龙宫初造舍利宝塔记》第六（出《菩萨处胎经》。）

《龙宫初造佛髻塔记》第七（出《阿育王经》。）《阎浮提初分舍利起十塔记》第八（出《十诵律》。）《刹上悬幡散华记》第九（出《迦叶诘阿难经》。）

《悬幡续明缘记》第十（出《普广经》。）《缘路列灯记》第十一（出《受决经》。）《伏敌宝幢缘记》第十二（出《长阿含》。）《旋塔围绕记》第十三（出《提谓经》。）

《七层灯五色幡放生记》第十四（出《灌顶经》。）《灯王供养缘记》第十五（出《悲华经》。）《烧身臂指缘记》第十六（出《法华经》。）《灌佛散华缘记》第十七（出《灌佛经》。）

《灌漉宿缘记》第十八（出《譬喻经》。）《将幡缘记》第十九（出《阿育王经》。）《佛剃刀净发缘记》第二十（出《如来独证自誓三昧经》。）

《佛初着袈裟缘记》第二十一（出《如来独证自誓三昧经》。）《佛师子座缘记》第二十二（出《譬喻经》。）右二十二首《佛宝集》卷第一

《初集大乘法藏缘记》第一（出《胎经》。）《初集小乘三藏缘记》第二（出《大智论》。）《打毬槌缘记》第三（出《十诵律》。）《登高座缘记》第四（出《十

诵律》。）

《法师促象牙装扇讲缘记》第五（出《善见毗婆沙》。）《行般舟三昧念佛缘记》第六（出《般舟经》。）《禅法禅杖禅镇缘记》第七（出《十诵律》。）

《斋主赞叹缘记》第八（出《十诵律》。）《八关斋缘记》第九（出《八关斋经》。）《月六斋缘记》第十（出《大智论》。）《八王日斋缘记》第十一（出《净度三昧经》。）

《岁三长斋缘记》第十二（出《正斋经》。）《菩萨六法行缘记》第十三（出《菩萨受斋经》。）《菩萨斋法缘记》第十四（出《菩萨受斋经》。）

《三七忌日缘记》第十五（出《普广经》。）《法社建功德邑记》第十六（出《法社经》。）《盂兰盆缘记》第十七（出《目连问经》。）《放生缘记》第十八（出《杂阿含》第四卷。）

《救生命缘记》第十九（出《金光明经》。）《施旷野鬼食缘记》第二十（出《大涅槃经》。）《鬼子母缘记》第二十一（出《鬼子母经》。）右二十一首《法宝集》上卷第二

《咒用杨枝净水缘记》第一（出《请观世音经》。）《百结缘记》第二（出《灌顶百结神王护身咒经》。）《读咒受持五事缘记》第三（出《大涅槃经》。）

《结咒坛缘记》第四（出《百结神王护身灌顶经》。）《神印缘记》第五（出《大灌顶经》。）《策卜缘记》第六（出《梵天神策经》。）《弥勒六时忏悔法缘记》第七（出《弥勒问本愿经》。）

《常行五法缘》第八（出《五戒论》。）《普贤六根悔法》第九（出《普贤观经》。）

《观世音菩萨所说救急消灾灭罪治病要行法》第十（出《观世音经》。）《虚空藏忏悔记》第十一（出《虚空藏经》。）《方广陀罗尼七众悔法缘记》第十二（出《彼经》。）

《金光明忏悔法》第十三（出《金光明经》。）《常行道赞叹咒愿》第十四（出《福田经》。）《受食咒愿缘记》第十五（出《普曜经》。）《受施粥咒愿缘记》第十六（出《僧祇律》。）

《七种施福胜记》第十七（出《福田经》。）《嚩施缘记》第十八（出《增一阿含

经》。)

《阿育王舍施还赎取缘记》第十九(出《杂阿含》、《阿育王经》。) 《布施咒愿缘》第二十(出《辩意经》。) 《为亡人设福咒愿文》第二十一(出《僧祇律》。)

《生子设福咒愿文》第二十二(出《僧祇律》。) 《作新舍咒愿文》第二十三(出《僧祇律》。) 《远行设福咒愿文》第二十四(出《僧祇律》。)

《取妇设福咒愿文》第二十五(出《僧祇律》。) 《菩萨发愿》第二十六(出《菩萨本业经》。) 《无常咒愿》第二十七(出《中本起经》。) 《梵书缘记》第二十八(出《经抄》。)

《六十四书缘记》第二十九(出《普耀经》。) 右二十九首《法宝集》下卷第三《初度五比丘缘记》第一(出《中本起经》。) 《初度五比丘记》第二(出《中本起经》。)

《初度优婆塞优婆夷记》第三(出《弥沙塞律》。) 《国王初见佛缘记》第四(出《因果经》。) 《比丘上下坐缘记》第五(出《十诵律》。) 《布萨缘记》第六(出《五分律》。)

《行舍罗缘记》第七(出《弥沙塞律》。) 《安居缘记》第八(出《十诵律》。) 《自恣法缘记》第九(出《五分律》。) 《新岁缘记》第十(出《新岁经》。)

《吉祥草缘记》第十一(出《普耀经》。) 《功德衣开戒利缘记》第十二(出《五分律》。) 《比丘着割截衣缘记》第十三(出《十诵律》。) 《比丘受三衣缘记》第十四(出《大善权经》。)

《比丘不离三衣缘记》第十五(出《十诵律》。) 《比丘着坏色衣缘记》第十六(出《十诵律》。) 《比丘点净衣缘记》第十七(出《十诵律》。)

《比丘着纳衣缘记》第十八(出《十诵律》。) 《佛受石钵缘记》第十九(出《瑞应本起经》。) 《锡杖缘记》第二十(出《十诵律》。) 《比丘断酒缘记》第二十一(出《五分律》。)

《断三种见闻疑缘记》第二十二(出《十诵律》。) 右二十二首《僧宝集》上卷第四《一切断食肉缘记》第一(出《大涅槃经》。) 《制断食蒜等五辛记》第二(出《十诵律》。)

《嚼杨枝缘记》第三（出《十诵律》。）《断掘地伤草木缘记》第四（出《僧祇律》。）《初造福德舍缘记》第五（出《杂阿含》。）《漉水囊缘记》第六（出《十诵律》。）

《比丘洗手缘记》第七（出《僧祇律》。）《比丘受食缘记》第八（出《十诵律》。）《食先普供养缘记》第九（出《维摩经》。）《唱等供僧跋缘记》第十（出《十诵律》。）

《毗舍佉母设粥缘记》第十一（出《十诵律》。）《浴僧缘记》第十二（出《温室经》。）《腊月八日浴缘记》第十三（出《譬喻经》。）《供养圣僧缘记》第十四（出《宾头卢经》。）

《僧次请僧缘记》第十五（出《十诵律》。）《经行法式缘记》第十六（出《十诵律》。）《施僧净人缘记》第十七（出《十诵律》。）《看病比丘缘记》第十八（出《十诵律》。）

《比丘泥洹翬缘记》第十九（出《佛泥洹经》。）《比丘遣人代斋会并作净法缘记》第二十（出《十诵律》。）《比丘欲食当先烧香呗赞缘记》第二十一（出《大遗教经》。）

《优婆塞造作衣服钵器及受饮食先应供养缘记》第二十二（出《优婆塞戒经》。）右二十二首《僧宝集》下卷第五《帝释乐人般遮瑟歌呗》第一（出《中本起经》。）

《佛赞比丘呗利益记》第二（出《十诵律》。）《亿耳比丘善呗易了解记》第三（出《十诵律》。）《婆提比丘响彻梵天记》第四（出《增一阿含》。）

《上金铃比丘妙声记》第五（出《贤愚经》。）《音声比丘尼记》第六（出《僧祇律》。）《法桥比丘现感妙声记》第七（出《志节传》。）《陈思王感渔山梵声制呗记》第八

《支谦制连句梵呗记》第九《康僧会传泥洹测试记》第十（《康僧会传》。）《觅历高声梵记》第十一（呗出《须赖经》。）《药练梦感梵音六言呗记》第十二（呗出《超日明经》。）

《齐文皇帝制法乐梵舞记》第十三《齐文皇帝制法乐赞》第十四《齐文皇帝令舍人王融制法乐歌辞》第十五《竟陵文宣撰梵礼赞》第十六

《竟陵文宣制唱萨愿赞》第十七《旧品序元嘉以来读经道人名并铭》第十八《竟陵

文宣王第集转经记》第十九（新安寺释道兴。）《导师缘记》第二十

《安法师法集旧制三科》第二十一右二十一首《经呗导师集》卷第六《宋明皇帝初造龙华誓愿文》第一（周顒作。）《京师诸邑造弥勒像三会记》第二

《齐竟陵文宣王龙华会记》第三右三首《龙华像会集》卷第七《长干寺阿育王金像记》第一《吴郡台寺释慧护造丈六金像记》第二

《瓦官寺释僧洪造丈六金像记》第三《荆州沙门释僧亮造无量寿丈六金像记》第四《宋孝武皇帝造无量寿金像记》第五《宋明皇帝造丈四金像记》第六

《定林献正于龟兹造金槌勺杵像记》第七《林邑国献无量寿鍍石像记》第八《谯国二戴造夹纈像记》第九《宋明帝齐文宣造行像八部鬼神记》第十

《晋孝武世师子国献白玉像记》第十一《宋明帝陈太妃造白玉像记》第十二《河西国造织珠结珠二像记》第十三《齐武皇帝造释迦瑞像记》第十四

右十四首《杂图像集》上卷第八《齐文皇帝造白山丈八石像并禅岗像记》第一《太尉临川王成就掇山龕大石像记》第二《齐文皇帝造梅檀木画像记》第三

《河西释慧豪造灵鹫寺山龕像记》第四《宋明帝陈太妃造法轮寺大泥像并宣福卧像记》第五《齐文皇帝造绣丈八像并仇池绣像记》第六《禅林寺净秀尼造织成千佛记》第七

《宋路昭太后造普贤菩萨记》第八光宅寺丈九无量寿金像记》第九《婆利国献真金像记》第十《皇帝造纯银像记》第十一

《佛牙并齐文宣王造七宝台金藏记》第十二右十二首《杂图像集》下卷第九《定林上寺建般若台大支邑造经藏记》第一《定林上寺太尉临川王造镇经藏记》第二

《建初寺立般若台经藏记》第三《天安大寺造千佛名经记》第四《齐武皇帝供圣僧灵瑞记》第五《宋明皇帝四城门请僧次记》第六

《京师诸寺无遮斋讲并胜集记》第七右七首《经藏正斋集》卷第十《菩萨戒安装至次第受法记》第一《宋明帝受菩萨戒自誓文》第二

《竟陵文宣王受菩萨戒记》第三《天保寺集优婆塞讲记》第四《文宣王集优婆塞布萨记》第五《宋齐胜士受菩萨戒名录》第六

右六受《受菩萨戒集》第十一《齐高武二皇帝敕六斋断杀记》第一《齐琬皇帝敕断钟山玄武湖渔猎记》第二《齐琬皇帝敕罢射雉断卖鸟雀记》第三

《齐文皇帝文宣王焚毁罟网记》第四《齐文皇帝给孤独园记》第五《竟陵文宣王福德舍记》第六《竟陵文宣王造铁磬布施记》第七

《中天竺国竺博叉于京邑造井布施记》第八《灵根寺颖律师始造药藏记》第九《竟陵文宣王第内施药记》第十《竟陵文宣王僧得施文》第十一

《竟陵文宣王三业施文》第十二《竟陵文宣王施食供养书》第十三右十三首《止恶兴善集》卷第一《皇帝后堂律讲记》第一

《皇帝后堂八关斋造十种灯记》第二《皇帝六条制护法记》第三《皇帝修慈法滋味记》第四《皇帝宫内建讲记》第五

《皇帝敕撰经义疏记》第六《皇帝敕净名志上出入记》第七《皇帝天监五年四月八日乐游大会记》第八《皇帝后堂志上启建讲记并序》第九

《皇帝与志上往复注并序》第十《皇帝后堂讲法华志上论难》第十一右十一首《大梁功德集》上卷第十三《皇帝造光宅寺竖刹大会记并临川王启事并敕答》第一

《皇帝敕诸僧抄经撰义翻胡音造录立藏等记》第二《皇帝注大品经记》第三《皇帝造十无尽藏记》第四《皇帝遣诸僧诣外国寻禅经记》第五

右五首《大梁功德集》下卷第十四（依序十卷，据历检本十四卷。）

○弘明目录序第八△释僧佑撰

夫觉海无涯，悬镜圆照。化妙域中，实陶铸于尧舜；理擅系表，乃埏埴乎周孔矣。然道大信难，声高和寡。须弥峻而蓝风起，宝藏积而怨贼生。昔如来在世，化震大千，犹有四魔稽忿，六师怀毒。况乎像季，其可胜哉！

自大法东渐，岁几五百，缘各信否，运亦崇替。正见者敷赞，邪惑者谤讪。至于守文曲儒，则拒为异教；巧言右道，则引为同法。拒有拔本之迷，引有朱紫之乱，遂令诡论稍繁，讹辞孔炽。夫鸛鳴鸣夜，不翻白日之光；精卫衔石，无损沧海之势。然以闇乱乱明，以小罔大，虽莫动毫发，而有尘示听。将令弱植之徒，随伪辩而长迷；倒置之伦，逐邪说而永溺。此幽涂所以易坠，净境所以难陟者也。

佑以末学，志深弘护，静言浮俗，愤慨于心。遂以药疾微间，山栖馀暇，撰古今之

明篇，总道俗之雅论。其有刻意剪邪，建言卫法，制无大小，莫不毕采。又前代胜士，书记文述，有益三宝，亦皆编录，类聚区分，列为十卷。夫道以人弘，教以文明，弘道明教，故谓之《弘明集》。兼率浅怀，附论于末，庶以涓埃，微裨瀛岱。但学孤识寡，愧在编局，博练君子，惠增广焉。

牟子《理惑》右第一卷孙绰《喻道论》宗炳《明佛论》

右第二卷宗居士炳《答何中丞承天书难白黑论》颜光禄延之《难何中丞承天达性论》右第三卷

明徵士僧绍《正二教论》周剡令颀《难张长史融门律》右第四卷道恒法师《释驳论》

慧通法师《折夷夏论》僧愍法师《戎华论》玄光法师《辩惑论》刘勰《灭惑论》

右第五卷罗君章《更生论》孙盛《难》罗《重答》郑道子《神不灭论》

远法师《沙门不敬王者论》五篇远法师《沙门袒服论》何镇南《难并答》远法师《答醒玄明报应论》

远法师《因俗疑善恶无现验三报论》右第六卷何司空尚之《答宋文皇帝赞扬佛法事》高明二法师《答李交州淼难佛不见形事》并《李书》

司徒文宣王《与孔中丞稚珪释疑惑书》并《笺答》右第七卷晋尚书令何充等《执沙门不应敬王者奏》三首并《诏》二首

庐山慧远法师《答醒玄论沙门不应敬王者书》一首并《桓玄书》二首庐山慧远法师《与桓玄论料简沙门书》一首并《桓玄教》一首支道林法师《与醒玄论州符求沙门名籍书》一首

道恒道标二法师《答伪秦主姚略劝罢道书》三首并《姚主书》三首

僧?僧迁鸠摩耆婆三法师《答姚主书停恒标奏》一首并《姚主书》三首庐山慧远法师《答醒玄劝罢道书》一首并《桓玄书》一首僧岩法师《辞青州刺史刘善明举其秀才书》三首并《刘书》三首

右第八卷《奉法要》（郗嘉宾。）《日烛》（王该作。）右第九卷

《弘明论后序》（释僧佑。）

右第十卷

○十诵律义记目录序第九△释僧佑撰

夫戒律者，盖四双之云梯，五众之熔范也。性以止制为本，体以无作为相，始祛十恶，终圆万善。在昔觉世，因事制戒，心迹俱防，轻重备设。持戒坚净，则罗睺惟最；晓律精明，则波离为首。至于泥曰，遗嘱殷勤，金色迦叶结集斯藏，洲渚所依，莫逾兹典。逮至中叶，学同说异，五部之路，森然竞分。仰惟《十诵》源流，圣贤继踵，师资相承，业盛东夏。但至道难凝，微言易爽，果向之人，犹迹有两说，况在凡识，孰能壹论？是以近代谈讲，多有同异。

大律师颖上，积道河西，振德江东，综学月朗，砥行冰洁。行以尸罗为基，学以《十诵》为本。且幼选明师，历事名胜，校理精密，无幽不贯。常以此律广授二部，教流于京?之中，声高于宋、齐之世，可谓七众之宗师，两代之元匠者矣。是以讲肆之座，环春接冬，稟业之徒，云聚波沓。僧佑藉法乘缘，少预钻仰，扈锡侍筵，二十馀载。虽深言远旨，未敢庶几，而章条科目，窃所早习。每服佩思寻，惧有坠失，遂集其旧闻，为《义记》十卷。夫心识难均，意见多绪。窃同刍蕘，时缀毫露。辄布其别解，录之言末。盖率其木讷，指序条贯而已。昔少述私记，辞句未整，而好事传写，数本兼行。今删繁补略，后撰为定。敬述先师之旨，匪由庸浅之说。明哲悦览，采其正意焉。

《初事第二事两戒》右第一卷《第三事讫二不定法》右第二卷

《三十尼萨耆事》右第三卷《九十事初尽第二诵》右第四卷

《三诵》右第五卷《七法》右第六卷

《八法》右第七卷《杂诵尼律》右第八卷

《增一诵》右第九卷《优波离善诵》

右第十卷

○法集杂记铭目录序第十△释僧佑撰

佑少长山居，游息净众，虽业勤罔立，而誓心无坠。常愿觉道流于忍土，正化隆于像运，是以三宝胜迹，必也详录，四众福缘，每事述记。所撰法集，已为七部，至于杂记碎文，条例无附，辄别为一帙，以存时事。其山寺碑铭，僧众行记，文自彼制，而造自鄙衷。窃依前古，总入于集，虽俗观为烦，而道缘成业矣。

《佛牙记》一卷《胡音汉解传译记》一卷《钟山定林上寺碑铭》一卷（刘勰）《钟山定林上寺绝迹京邑五僧传》一卷

《建初寺初创碑铭》一卷（刘勰）《献统上碑铭》一卷（沈约）《僧柔法师碑铭》一卷（刘勰）

右七卷共帙

卷十三

安世高传第一支谶传第二（竺朔佛支曜）安玄传第三康僧会传第四（严佛调康孟详维祇难竺将炎白延）

朱士行传第五支谦传第六竺法护传第七（聂承远法炬法立）竺叔兰传第八

尸梨蜜传第九僧伽跋澄传第十（佛图罗刹）昙摩难提传第十一（竺佛念）

僧伽提婆传第十二

○安世高传第一

安清，字世高，安息国王正后之太子也。幼怀淳孝，敬养竭诚，惻隐之仁，爰及蠢类，其动言立行，若践规矩焉。加以志业聪敏，刻意好学，外国典籍，莫不该贯。七曜五行之象，风角云物之占，推步盈缩，悉穷其变。兼洞晓医术，妙善针脉，睹色知病，投药必济。乃至鸟兽鸣闻声知心。于是俊异之名，被于西域，远近邻国，咸敬而伟之。世高虽在居家，而奉戒精峻，讲集法施，与时相续。后王薨，将嗣国位，乃深惟苦空，厌离名器。行服既毕，遂让国与叔，出家修道。博综经藏，尤精《阿毗昙》学，讽持禅经，略尽其妙。既而游方弘化，遍历诸国，以汉桓帝之初，始到中夏。世高才悟机敏，一闻能达，至止未久，即通习华语。于是宣译众经，改胡为汉，出《安般守意》、《阴持入经》、《大小十二门》及《百六十品》等。初外国三藏众护撰述经要为二十七章，世高乃剖析护所集七章，译为汉文，即《道地经》也。其先后所出经凡三十五部，义理明析，文字允正，辩而不华，质而不野，凡在读者，皆亹而不倦焉。

世高穷理尽性，自识宿缘，多有神迹，世莫能量。初，世高自称：“先身已经为安息王子，与其国中长者子俱共出家。分卫之时，施主不称，同学辄怒，世高屡加诃责，同学悔谢，而犹不悛改。如此二十上，乃与同学辞诀云：‘我当往广州毕宿世之对。卿明经精进，不在吾后，而性多恚怒，命过当受恶形。我若得道，必当相度。’既而遂适广州，值寇贼大乱，行路逢一少年，唾手拔刀曰：‘真得汝矣！’世高笑曰：‘我宿命负卿，故远来相偿，卿之忿怒，故是前世时意也。’遂伸颈受刃，容无惧色。贼遂杀之。观者填路，莫不骇其奇异。既而神识还为安息王太子，即今时世高身也。”

世高游化中国，宣经事毕，值灵帝之末，关洛扰乱，乃杖锡江南。云：“我当过庐山度昔同学。”行达亭湖庙。明日张胆庙旧有灵验，商旅祈祷，乃分风上下，各无留滞。耆有乞神竹者，未许辄取，舫即覆没，竹还本处。自是舟人敬禅，莫不慑影。世高同旅三十馀船，奉牲请福。神乃隆祝曰：“舫有沙门，可便呼上。”客咸共

惊愕，请民高入庙。神告世高曰：“吾昔在外国，与子俱出家学道，好行布施。而性多瞋怒，今为共_阝亭湖神，周回千里，并吾所统。以布施故，珍玩无数；以瞋恚故，堕此神中。今见同学，悲欣可言！寿尽旦夕，而丑形长大，若于此舍命，秽污江湖，当度山西空泽中也。此身灭恐堕地狱，吾有绢千疋，并杂宝物，可为我立塔营法，使生善处也。”世高曰：“故来相度，何不现形？”神曰：“形甚丑异，众人必惧。”世高曰：“但出，众不怪也。”神从床后出头，乃是大蟒蛇，至世高膝边，泪落如雨，不知尾之长短。世高向之胡语，傍人莫解，蟒便还隐。世高即取绢物，辞别而去。舟侣颺帆，神复出蟒身，登山顶而望。众人举手，然后乃灭。儻忽之顷，便达豫章，即以庙物造立东寺。世高去后，神即命过。暮有一少年上船，长跪世高前，受其咒愿，忽然不见。世高谓船人曰：“向之少年，即共_阝亭庙神，得离恶形矣。”于是庙神歇没，无复灵验。后人于西山泽中见一死蟒，头尾相去数里，今寻阳郡蛇村是其处也。

世高后复到广州，寻其前世害已少年。时少年尚在，年已六十馀。世高径投其家，共说昔日偿对时事，并叙宿缘，欢喜相向。云：“吾犹有馀报，今当往会稽毕对。”广州客深悟世高非凡，豁然意解，追悔前愆，厚相资供。乃随世高东行，遂达会稽。至便入市，正值市有斗者，乱相殴击，误中世高，应时命终。广州客频验二报，遂精勤佛法，具说事缘。远近闻知，莫不悲叹，明三世之有徵也。

世高本既王种，名高外国，所以西方宾旅犹呼安侯，至今为号焉。天竺国自称书为天书，语为天语，音训诡蹇，与汉殊异，先后传译，多致谬滥。唯世高出经，为群译之首。安公以为“若及面禀，不异见圣”。列代明德，咸赞而思焉。

○支讖传第二（竺朔佛支曜）

支讖本月支国人也。操行淳深，性度开敏，禀持法戒，以精勤着称。讽诵群经，志存宣法，汉醒帝末，游于洛阳。以灵帝光和、中平之间，传译胡文，出《般若道行品》、《首楞严》、《般舟三昧》等三经。又有《阿閼世王》、《宝积》等十部经，以岁久无录，安公校练古今，精寻文体，云“似讖所出”。凡此诸经，皆审得本旨，了不加饰，可谓善宣法要，弘道之士也。后不知所终。

沙门竺朔佛者，天竺人也。汉醒帝时，亦赍《道行经》来适洛阳，即转胡为汉。译人时滞，虽有失旨，然弃文存质，深得经意。朔又以灵帝光和二年于洛阳译出《般舟三昧经》，时讖为传言，河南洛阳孟福、张莲笔受。时又有支曜译出《成具光明经》云。

○安玄传第三（严佛调康孟详维祇难竺将炎白延）

安玄，安息国人也。志性贞白，深沉有理致。为优婆塞，秉持法戒，毫厘弗亏，博

诵群经，多所通习。汉灵帝末，游贾洛阳，有功，号骑都尉。性虚静温恭，常以法事为己务。渐练汉言，志宣经典，常与沙门讲论道义，世所谓都尉玄也。玄与沙门严佛调共出《法镜经》，玄口译梵文，佛调笔受。理得音正，尽经微旨，郢匠之美，见述后代。

佛调，临淮人也。绮年颖悟，敏而好学，信慧自然遂出家修道。通译经典，见重于时。世称安侯、都尉、佛调三人传译，号为难继。佛调又撰《十慧》，并传于世。安公称：“佛调出经，省而不烦，全本妙巧。”

次有康孟详者，其先康居人也。译出《中本起》。安公称：“孟详出经，奕奕流便，足腾玄趣。”

后有沙门维祇难者，天竺人也。以孙权黄武三年，赍《昙钵经》胡本来至武昌，《昙钵》即《法句经》也。时支谦请出经，乃令其同道竺将炎传译，谦写为汉文。将炎未善汉言，颇有不荆然志存义本，近于质实，今所传《法句》是也。

白延者，不知何许人。魏正始之末，重译出《首楞严》，又须赖及《除灾患经》，凡三部云。

○康僧会传第四

康僧会，其先康居人，世居天竺。其父因商贾，移于交阯。会年十馀岁。二亲并亡，以至性闻。既而出家，砺行甚峻。为人弘雅有识量，笃志好学，明练三藏，博览六典，天文图纬，多所贯涉，辩于枢机，颇属文翰。时孙权已称制江左，而未有佛教。会欲运流大法，乃振锡东游。以赤乌十年至建业，营立茅茨，设像行道。有司奏曰：“有胡人入境，自称沙门，容服非恒，事应验察。”权曰：“吾闻汉明梦神，号称为佛，彼之所事，岂其遗风耶？”即召会诘问，有何灵验。会曰：“如来迁迹，忽逾千载，遗骨舍利，神曜无方。昔阿育王起塔，乃八万四千。夫塔寺之兴，所以表遗化也。”权以为夸筵，乃谓会曰：“若能得舍利，当为造塔；如其虚忘，国有常刑。”会请期七日。乃谓其属曰：“法之兴废，在此一举，今不至诚，后将何及！乃共洁斋静室，以铜瓶加几，烧香礼请。七日期毕，寂然无应，求申二七，亦复如之。权曰：“此欺诳也！将欲加罪。会更请三七，权又特听。会曰：“法云应被，而吾等无感，何假王宪，当誓死为期耳！三七日暮，犹无所见，莫不震惧。既入五更，忽闻瓶中铿然有声。会自往视，果获舍利。明旦吴权，举朝集观，五色光焰，照耀瓶上。权手自执瓶，泻于铜盘，舍利所冲，盘即破碎。权肃然惊起曰：“希有之瑞也！会进而言曰：“舍利威神，岂直光相而已，乃劫烧之火不能燔，金刚之杵不能坏矣。”权命取铁槌砧，使力士击之。砧锤并陷，而舍利无损。权大嗟服，即为建塔。以始有佛寺，故曰建初寺，因名其地为佛陀里。由是江左大法遂兴。

至孙皓昏虐，欲燔塔庙。群臣金谏，以为佛之威力不同馀神。康会感瑞，大皇创寺，今若轻毁，恐贻后悔。皓悟，遣张昱诣寺诘会。昱雅有才辩，难问纵横，会应机骋辞，文理锋出。自旦至夕，昱不能屈。既退，会送于门。时寺侧有淫祀者。昱曰：“玄化既孚，此辈何故近而不革？”会曰：“雷霆破山，聋者不闻，非音之细。苟在理通，则万里悬应；如其阻塞，则肝胆楚越。”昱还，叹会才明，非臣所测，愿天鉴察之。皓大集朝贤，以马车迎会。会就坐，皓问曰：“佛教所明善恶报应，何者是耶？”会对曰：“夫明主以孝慈训世，则赤乌翔而老人星见；仁德育物，则醴泉涌而嘉禾出。善既有瑞，恶亦如之。故为恶于隐，鬼得而诛之；为恶于显，人得而诛之。《易》称积恶馀殃，《诗》咏‘求福不回’，虽儒典之格言，即佛教之明训也。”皓曰：“若然，则周孔已明之矣，何用佛教？”会曰：“周孔虽言，略示显近，至于释教，则备极幽远。故行恶则有地狱长苦，修善则有天宫永乐。举兹以明劝沮，不亦大哉！皓当时无以折其言。

皓虽闻正法，而昏暴之性不胜其虐。后使宿卫兵入后宫治园，于地中得一立金像，高数尺，以呈皓。皓使着厕前。至四月八日，皓至厕污秽像，云灌佛讫，还与诸卧共笑为乐。未暮，阴囊肿痛，叫呼不可堪忍。太史占言，犯大神所为。群臣祷祀诸庙，无所不至，而苦痛弥剧，求死不得。彩女先有奉法者，闻皓病，因问讯云：“陛下就佛图中求福不？”皓举头问：“佛神大耶？”彩女答：“佛为大圣，天神所尊。”皓心遂悟其语意。故彩女即迎像置殿上，香汤洗数十过，烧香忏悔。皓于枕上叩头，自陈罪逆，有顷所痛即问。遣使至寺，问讯诸道人，能说经者令来见。僧会即随使入。皓问罪福之由，会具为敷析，辞甚精辩。皓先有才解，欣然大悦，因求看沙门戒。会以戒文秘禁，不可轻宣，乃樵本业《百三十五愿》，分作二百五十事，行住坐卧，皆愿众生。皓见兹愿致深，世书所不及，益增善意，即就会受五戒。旬日疾瘳，乃修治会所住寺，号为天子寺。宣敕宫内，宗室群臣，莫不必奉。会在吴朝，亟说正法，以皓性凶粗，不及妙义，唯叙报应近验，以开讽其心焉。

会于建初寺译出经法，《阿难念弥经》、《镜面王》、《察微王》、《梵皇王经》、《道品》及《六度集》，并妙得经体，文义允正。又注《安般守意》、《法镜》、《道树》三经，并制经序，辞趣雅贍，义旨微密，并见重后世。会以晋武帝太康元年卒。

○朱士行传第五

朱士行，颍川人也。志业清粹，气韵明烈，坚正方直，劝沮不能移焉。少怀远悟，脱落尘俗，出家以后，便以大法为己任。常谓入道资慧，故专务经典。初天竺朔佛，以汉灵帝时出《道行经》，译人口传，或不领，辄抄撮而过，故意义首尾颇有格碍。士行尝于洛阳讲《小品》，往往不通。每叹此经大乘之要，而译理不尽，誓志捐身，远求《大品》。遂以魏甘露五年，发迹雍州，西渡流沙。既至于阐，果写得正品梵书，胡本九十章，六十万馀言。遣弟子不如檀，晋言法饶，凡十人，送经胡

本还洛阳。未发之间，于阗小乘学众遂以白王云“汉地沙门欲以婆罗门书惑乱正典，王为地主，若不禁之，将断大法，聋盲汉地，王之咎也”王即不听赍经。士行愤慨，乃求烧经为证。王欲试验，乃积薪殿庭，以火燔之。士行临阶而誓曰：“若大法应流汉地者，经当不烧；若其无应，命也如何”言已投经，火即为灭，不损一字，皮牒如故。大众骇服，称其神感，遂得送至陈留仓垣水南寺。河南居士竺叔兰，善解方言，译出为《放光经》二十卷。士行年八十而卒。依西方阇维法，薪尽火灭，而尸骸犹全。众咸惊异，乃咒曰：“若真得道，法当毁坏。”应声碎散，遂敛骨起塔焉。

○支谦传第六

支谦，字恭明，一名越，大月支人也。祖父法度，以汉灵帝世，率国人数百归化，拜率善中郎将。越年七岁，骑竹马戏于邻家，为犹所啮，胫骨伤碎。邻人欲杀狗取肝传疮，越曰：“天生此物，为人守吠，若不往君舍，狗终不见啮。此则失在于我，不关于狗。若杀之得差，尚不可为；况于我无益，而空招大罪。且畜生无知，岂可理责？”由是村人数十家感其言，悉不复杀生。

十岁学书，同时学者皆伏其聪敏。十三学胡书，备通六国语。初桓、灵世，支谶译出法典，有支亮纪明资学于谶，谦又受业于亮。博览经籍，莫不究练，世间艺术，多所综习。其为人细长黑瘦，眼多白而睛黄，时人为之语曰：“支朗眼中黄，形体虽细是智囊。”其本奉大法，精练经旨。献帝之末，汉室大乱，与乡人数十共奔于吴。初发日，唯有一被，有一客随之，大寒无被，越呼客共眠。夜将半，客夺其被而去。明旦，同侣问被所在，越曰：“昨夜为客所夺。”同侣咸曰：“何不相告？”答曰：“我若告发，卿等必以劫罪罪之。岂宜以一被而杀一人乎？”远近闻者莫不叹服。

后吴主孙权闻其博学有才慧，即召见之，因问经中深隐之义。越应机释难，无疑不析。权大悦，拜为博士，使转导东宫，甚加宠秩。越以大教虽行，而经多胡文，莫有解者，既善华戎之语，乃收集众本，译为汉言。从黄武元年至建兴中，所出《维摩诘》、《大般泥洹》、《法句》、《瑞应本起》等二十七经，由得圣义，辞旨文雅。又依《无量寿》、《中本起经》，制赞菩萨连句梵呗三契，注《了本生死经》，皆行于世。

后太子登位，遂隐于穹隆山，不交世务，从竺法兰道人更练五戒。凡所游从，皆沙门而已。后卒于山中，春秋六十。吴主孙亮与众僧书曰：“支恭明不救所疾，其业履冲素，始终可高，为之恻怆，不能已已”其为时所惜如此。

○竺法护传第七 聂承远 法炬 法立

竺法护，其先月支国人也，世居敦煌郡。年八岁出家，事外国沙门竺高座为师，诵经日万言，过目则能。天性纯懿，操行精苦，笃志好学，万里寻师。是以博览六经，涉猎百家之言，虽世务毁誉，未尝介于视听也。是时晋武帝之世，寺庙图像，虽崇京邑；而方等深经，蕴在西域。护乃慨然发愤，志弘大道。遂随师至西域，游历诸国。外国异言，三十有六种，书亦如之，护皆遍学，贯综诂训，音义字体，无不备晓。遂大赍胡本，还归中夏。自敦煌至长安，沿路传译，写为晋文。所获大小乘经《贤劫》、《大哀》、《正法华》、《普耀》等凡一百四十九部。孜孜所务，唯以弘通为业，终身译写，劳不告倦。经法所以广流中华者，护之力也。

护以晋武之末，隐居深山，山间地清泣，恒取澡漱。后有采薪者秽慢其侧，水俄顷而燥。护乃徘徊叹曰：“水若永竭，真无以自给，正当移去耳。”言讫而泉流满涧。其幽诚所感，皆此类也。后立寺于长安青门外，精勤行道。于是德化四布，声盖远近，僧徒千数，咸来宗奉。时有沙弥竺法乘者，八岁聪慧，依护为师。关中有甲族欲奉大法，试护道德，伪往告急，求钱二十万。护未有答。乘年十三，侍在师侧，即语客曰：“和上意已相许矣。”客退，乘曰：“观此人神色，非实求钱，将以观和上道德何如耳。”护曰：“吾亦以为然。”明日，此客率其一宗百馀口，诣护请受五戒，具谢求钱意。于是四方士庶，闻风向集，宣隆佛化，二十馀年。后值惠帝西幸长安，关中萧条，百姓流移。护与门徒避地东下，至浞池遭疾，卒，春秋七十有八。后孙兴公制《道贤论》，以天竺七僧方竹林七贤，以护比山巨源，其论云：“护公德居物宗，巨源位登论道，二公风德高远，足为流辈。”其见美后代如此。

初护于西域得《超日明经》胡本，译出颇多繁重。时有信士聂承远，乃更详正文偈，删为二卷，今之所传经是也。承远明练有才理，笃志法务，护公出经，多参正焉。

惠怀之际，有沙门法炬者，不知何许人。译出《楼炭经》。炬与沙门法立共出《法句喻》及《福田》二经。法立又访得胡本，别译出百馀首，未及缮写，会病而卒。寻值永嘉扰乱，湮灭不存。

○竺叔兰传第八

竺叔兰，本天竺人也。祖父娄陀，笃志好学，清简有节操。时国王无道，百姓思乱，有贱臣将兵，得罪惧诛，以其国豪，呼与共反。娄陀怒曰：“君出于微贱，而任居要职，不能以德报恩，而反为逆谋乎？我宁守忠而死，不反而生也。反者惧谋泄，即杀之而作乱。娄陀子达摩尸罗，齐言法首，先在他国。其妇兄二人，并为沙门。闻父被害，国内大乱，即与二沙门奔晋，居于河南，生叔兰。叔兰幼而聪辩，从二舅谿受经法，一闻而悟，善胡汉语及书，亦兼诸文史。然性颇轻躁，游猎无度。尝单骑逐鹿，值虎堕马，折其右臂，久之乃差。后驰骋不已，母数诃谏，终不敢。

为之蔬食，乃止。

性嗜酒，饮至五六斗方畅。尝大醉卧于路傍，仍入河南郡门唤呼，吏录送河南狱。时河南尹乐广，与宾客共酣，已醉，谓兰曰：“君侨客，何以学人饮酒？”叔兰曰：“杜康酿酒，天下共饮，何问侨旧？”广又曰：“饮酒可尔，何以狂乱乎？”答曰：“民虽狂而不乱，犹府君虽醉而不狂。”广大笑。时坐客曰：“外国人那得面白？”叔兰曰：“河南人面黑尚不疑，仆面白复何怪耶？”于是宾主叹其机辩，遂释之。

顷之，无疾暴亡，三日还苏。自说入一朱门，金银为堂，见一人，自云是其祖父，谓叔兰曰：“吾修善累年，今受此报。汝罪人，何得来耶？”时守门人以杖驱之，入竹林中，见其猎伴为鹰犬所啄啖，流血号叫，求救于叔兰。叔兰走避，数十步，值牛头人欲掎之，叔兰曰：“我累世佛弟子，常供二沙门，何罪见治？”牛头人答：“此虽受福，不关猎罪。”俄而见其两舅来，语牛头曰：“我等二人恒受其供，恶少善多，可得相免。”遂随道人归。既而还苏，于是改节修慈，专志经法。以晋元康元年译出《放光经》及《异维摩诘》十馀万言。既学兼胡汉，故译义精允。

后遭母艰，三月便欲葬。有邻人告曰：“今岁月不便，可待来年。”叔兰曰：“夫生者必有一死，死者不复再生，人神异涂，理之然也。若使亡母栖灵有地，则乌鸟之心毕矣；若待来年，恐逃走无地，何暇奉营乎？”遂即葬毕。明年，石勒果作乱，寇贼纵横，因避地奔荆州。后无疾，忽告知识曰：“吾将死矣！”数日便卒。识者以为知命。

○尸梨蜜传第九

尸梨蜜，西域人也。时人呼之为高座。传云国王之子，当承继世，而以国让弟，闇轨太伯。既而悟心天启，遂为沙门。蜜天资高朗，风骨迈举，直尔对之，便自卓出于物。西晋永嘉中始到此土，止建初寺。丞相王导一见而奇之，以为吾之徒也。由是名显。

太尉庾元规、光禄周伯仁、太常谢幼珣、廷尉桓茂伦，皆一代名士，见之终日累叹，披衿至契。导常诣蜜，蜜解带偃伏，悟言神解。时尚书令卞望之亦与蜜致善。卞令风裁贵整，以度格物。须臾卞至，蜜乃更敛衿饰容，端坐对之。诸公于是叹其精神洒厉，皆得其所。桓廷尉曾欲为蜜作目，久之未得，有云，尸梨蜜可称卓朗。于是桓乃咨嗟绝叹，以为标题之极。

大将军王处仲时在南夏，闻王、周诸公器重蜜，疑以为失鉴。及自见蜜，乃振欣奔至，一面便尽虔。周顗为仆射领选，临入，过视蜜，乃抚背而叹：“若使太平世，尽得选此贤辈，真令人无恨！”俄而顗遇害，蜜往省其孤，对坐作胡呗三契，梵响凌

云。次诵咒数千言，声音高畅，颜容不变。既而挥涕拭泪，神气自若。其哀乐废兴，皆此类也。王公尝谓蜜曰：“外国正当有君，一人而已耳。”蜜笑而答曰：“若使我如诸君，今日岂得在此。”当时以为佳言。

蜜性高简，不学晋语。诸公与之语言，蜜因传译，然而神领意得，顿尽言前，莫不叹其自然天拔，悟得非常。蜜善持咒术，所向皆验。初江东未有咒法，蜜传出《孔雀王》诸神咒，又授弟子觅历高声梵呗，传响于今。年八十馀，咸康中卒。诸公闻之，痛惜流。宣武桓公尝云：“少见高座，称其精神渊着，当年出伦。”其为名士所叹如此。

○僧伽跋澄传第十佛图罗刹

僧伽跋澄，罽宾人也。毅然有渊懿之量。历寻名师，修习精诣，博览众典，特善数经。闇诵《阿毗昙毗婆沙》，贯其妙旨。常浪志游方，观风弘化。苻坚之末，来入关中。先是大乘之典未广，禅数之学甚盛。既至长安，咸称法匠焉。坚秘书郎赵政字文业，博学有才章，即坚之琳、瑀也。崇仰大法，尝闻外国宗习《阿毗昙毗婆沙》，而跋澄讽诵，乃四事礼供，请译梵文。遂共名德法师释道安集僧宣译。跋澄口诵经本，外国沙门昙摩难提笔受为梵文，佛图罗刹宜译，秦沙门敏智笔受为汉文。以伪建元十九年译出，自孟夏至仲秋方讫。

初，跋澄又赍《婆须蜜》梵本自随，明年，赵政复请出之。跋澄乃与昙摩难提及僧伽提婆三人共执梵本，秦沙门竺佛念宣译，慧嵩笔受，安公、法和对共校定。故二经流布，传学迄今。跋澄戒德整峻，虚静离俗，关中僧众，则而象之。后不知所终。

佛图罗刹者，不知何国人。德业纯白，该览经典，久游中土，善闲流言。其宣译梵文，见重苻世焉。

○昙摩难提传第十一竺佛念

昙摩难提，兜佉勒国人也。韶岁出家，聪慧夙成。研讽经典，以专精致业。遍观三藏，闇诵《增一》、《中阿含经》。博识洽闻，靡所不练。是以国内远近，咸共推服。少而观方，遍涉诸国。常谓弘法之体，宜宣布未闻。故远冒流沙，怀宝东游，以苻坚建元二十年至于长安。先是中土群经，未有《四含》。坚侍臣武威太守赵政，志深法藏，乃与安公共请出经。是时慕容冲已叛，起兵击坚，关中骚动。政于长安城内集义学僧写出丙经梵本，方始翻译。竺佛念传译，慧嵩笔受。自夏迄春，绵历二年方讫。具二《阿含》，凡一百卷。自经流东夏，迄于苻世，卷数之繁，唯此为广。难提学业既优，道声甚盛，坚屡礼请，厚致供施。在秦积载，后不知所终。

竺佛念，凉州人也。志行弘美，辞才辩赡，博见多闻，雅识风俗。家世河西，通习方语。故能交译华梵，宣法关渭，苻、姚二代，常参传经，二《含》之具，盖其功也。

○僧伽提婆传第十二

僧伽提婆，罽宾国人也，姓瞿昙氏。入道修学，均匀求明师，兼通三藏，多所诵持。尤善《阿毗昙心》，洞其纤旨。常诵《三法度》，书夜嗟味，以为入道之府也。为人俊朗有深鉴，仪止温恭，务在海人，恂恂不担苻氏建元中，入关宣流法化。初，安公之出《婆须蜜经》也，提婆与僧伽跋澄共执梵文。后令昙摩难提出二《阿含》，时有慕容之难，戎世建法，仓卒未练。安公先所出《阿毗昙》、《广说》、《三法度》等诸经，凡百馀万言，译人造次，未善详审，义旨句味，往往衍谬。俄而安公弃世，不及改正。后山东清平，提婆乃与冀州沙门法和，俱适洛阳。四五年间，研讲前经，居华岁积，转明汉语，方知先所出经多有乖失。法和叹恨未定，重请译改，乃更出《阿毗昙》及《广说》，先出众经，渐改定焉。

顷之，姚兴王秦，法事甚盛。于是法和入关，而提婆度江。先是庐山慧远法师翹勤妙典，广集经藏，虚心侧度，延望远宾。闻其至止，即请入庐岳，以太元十六年，请译《阿毗昙心》及《三法度》等经。提婆乃于波若台手执胡本，口宣晋言，去华存实，务尽义本。今之所传，盖其文也。

至隆安元年，游于京师。晋朝王公及风流名士，莫不造席致敬。时卫军东亭侯王珣，雅有信慧，住持正法，建立精舍，广招学众。提婆至止，珣即延请。仍于其舍讲《阿毗昙》。名僧毕集，提婆宗致既精，辞旨明析，振发义奥，众咸悦悟。时王珣、僧弥亦在听坐，后于别屋自讲。珣问法纲道人：“僧弥所得云何？”答曰：“大略全是，小未精核耳。”其敷演之明，易启人心如此。

其年冬，珣集京都义学沙门四十余人，更请提婆于其寺译出《中阿含》，罽宾沙门僧伽罗叉执胡本，提婆翻为晋言，至来夏方讫。其在关、洛、江左所出众经，垂百馀万言。历游华戎，备悉风俗。从容机警，善于谈笑，其道化声誉，莫不闻焉。未详其卒岁月。提婆或作提和，盖音讹故不同云。

卷十四

鸠摩罗什传第一 佛陀耶舍传第二 昙无讖传第三 佛驮跋陀传第四

求那跋摩传第五 僧伽跋摩传第六 昙摩蜜多传第七 求那跋陀罗传第八

沮渠安阳侯传第九 功德直

求那毗地传第十

○鸠摩罗什传第一

鸠摩罗什，齐言童寿，天竺人也。家世国相。什祖父达多，倜傥不群，名重于国。父鸠摩炎，聪明有懿节。将嗣相位，乃辞避出家，东度葱岭。龟兹王闻其弃荣，甚敬慕之。自出郊迎，请为国师。王有妹，年始二十，才悟明敏，过目必能，一闻则诵。且体有赤胤，法生智子，诸国娉之，并不行。及见炎，心欲当之。王闻大喜，逼炎为妻，遂生什。什之在胎，其母慧解倍常，往雀梨大寺听经，忽自通天竺语，众咸叹异。有罗汉达摩瞿沙曰：“此必怀智子。”为说舍利弗在胎之证。既而生什，岐嶷若神。什生之后，还忘前语。

顷之，其母出家修道，学得初果。什年七岁，亦俱出家，从师受经，口诵日得千偈，偈有三十二字，凡三万二千言。诵《毗昙》既过，师授其义，即自通解，无幽不畅。时龟兹国人以其母王女，利养甚多，乃携什避之。什年九岁，进到罽宾，遇名德法师槃头达多，即罽宾王之从弟也。渊粹有大量，三藏九部，莫不缕贯，亦日诵千偈，名播诸国。什既至，仍师事之。遂诵杂藏、《中阿含》、《长阿含》，凡四百万言。达多每与什论议，深推服之。声彻义王，王即请入，集外道论师共相攻难。言气始交，外道轻其幼稚，言颇不顺。什乘其隙而挫之，外道折伏，愧惋无言。王益敬异，日给鹅腊一双，粳面各三升，酥六升。此外国之上供也。所住寺僧乃差大僧五人，沙弥十人，营视洒扫，有若弟子，其见尊崇如此。

至年十二，其母携还龟兹。至月氏北山，有一罗汉见而异之，谓其母言：“常当守护此沙弥，若至三十五不破戒者，当大兴佛法，度无数人，与沔波掬多无异。若戒不全，无能为也，正可才明俊艺法师而已。”什进到沙勒国，顶戴佛钵，心自念言：“钵形甚大，何其轻耶？”即重不可胜，失声下之。母问其故，答曰：“我心有分别，故钵有轻重耳”¹

什于沙勒国诵《阿毗昙六足诸论》、《增一阿含》。及还龟兹，名盖诸国。时龟兹僧众一万余人，疑非凡夫，咸推而敬之，莫敢居上。由是不预烧香之次，遂博览《四韦陀》、五明诸论，外道经书，阴阳星筭，莫不究晓。妙达吉凶，言若符契。性

率达，不砺小检，修行者颇非之，什自得于心，未尝介意。后从佛陀耶舍学《十诵律》，又从须利耶苏摩谘禀大乘。乃叹曰：“吾昔学小乘，譬人不识金，以镵石为妙矣。”于是广求义要，诵《中》、《百》二论。于龟兹帛纯王新寺得《放光经》，始披读，魔来蔽文，唯见空牒。什知魔所为，誓心愈固，魔去字显，仍习诵之。后于雀梨大寺读大乘经，忽闻空中语曰：“汝是智人，何以读此？”什曰：“汝是小魔，宜时速去！我心如地，不可转也。”停住二年，广诵大乘经论，洞其秘奥。后往罽宾，为其师槃头达多具说一乘妙义。师感悟心服，即礼什为师，言：“我是和上小乘师，和尚是我大乘师矣。”西域诸国伏什神俊，咸共崇仰。每至讲说，诸王长跪高座之侧，令什践其膝以登焉。

什道震西域，声被东国。苻氏建元十三年，岁次丁丑，正月，太史奏有星见外国分野，当有大德智人入转中国。坚素闻什名，乃悟曰：“朕闻西域有鸠摩罗什，将非此耶？”十九年，即遣骠骑将军吕光将兵伐龟兹及焉耆诸国。临发，谓光曰：“闻彼有鸠摩罗什，深解法相，善闲阴阳，为后学之宗，朕甚思之。若克龟兹，即驰驿送什。”光军未至，什谓其王帛纯曰：“国运衰矣，当有敌。日下人从东方来，宜恭承之，勿抗其锋。”纯不从而战，光遂破龟兹，杀纯获什。光性疏慢，未测什智量，见其年尚少，乃凡人戏之，强妻以龟兹王女。什拒而不受，辞甚苦到。光曰：“道士之操不逾先父，何所苦辞？”乃饮以淳酒，同闭密室。什被逼既至，遂亏其节。或令骑牛及乘恶马，欲使堕落，什常怀忍辱，曾无异色，光惭愧而止。光还中路，置军于山下，将士已休。什曰：“不可在此，必见狼狈，宜徙军陇上。”光不纳。至夜果大雨，洪潦暴起，水深数丈，死者数千。光始敬异之。什谓光曰：“此凶亡之地，不宜淹留，推数揆运，应速言归，中路必有福地可居。”光从之。至凉州，闻苻氏已灭，遂割据凉土，制命一隅焉。

正月，姑臧大风，什曰：“不祥之风，当有奸叛，然不劳自定也。”俄而梁谦、彭晃相继而反，寻皆殄灭。光龙飞二年，张掖卢水胡沮渠男成及从弟蒙逊反，推建康太守业为主。光遣子太原公纂率众五万讨之。时论谓业等乌合，纂有威声，势必全克。光以问什，什曰：“观察此行，未见其利。”既而纂败绩，仅以身免。光中书监张资，文翰温雅，识量沉粹，寝疾困笃。光博营救疗，有外国道人罗叉，云能差资病，光喜，给赐甚丰。什知叉诳诈，告资曰：“叉不能为益，徒烦费耳。冥运虽隐，可以事试也。乃以五色丝作绳结之，烧为灰末，投水中。灰若出水还成绳者，病不可愈。”须臾灰聚浮出，复绳本形。既而又治无效，少日资亡。顷之，吕光卒，子纂袭伪位。咸宁二年，有猪生子，一身三头。龙出东厢井中，到殿前蟠卧，比旦失之。纂以为美瑞，号大殿为龙翔殿。俄而有黑龙升于当阳九宫门，纂改九宫门为龙兴门。什奏曰：“比日潜龙出游，豕妖表异。龙者阴类，出入有时，而今屡见，则为灾眚。必有下人谋上之变。宜克己修德，以答天戒。”纂不纳。与什博，戏杀棋曰：“斫胡奴头。”什辄答曰：“不能斫胡奴，胡奴将斫人头。”此言有旨，纂终不悟。后纂从弟超，小名胡奴，果杀纂斩首。其预睹徵兆，皆此类也。

停凉积年，吕光父子既不弘道，故韞其经法，无所宣化。苻坚已亡，竟不相见。姚萇闻其高名，虚心要请，到晋隆安二年，吕隆始听什东。既至姑臧，会萇卒，子兴立，遣使迎什。弘始三年，有树连理生于庙庭，逍遥园葱变为薤。到其年十二月二十日，什至长安，兴待以国师之礼，甚见优龙。自大法东被，始于汉明，历涉魏、晋，经论渐多。而支、竺所出，多滞文格义。兴少崇三宝，锐志讲集。什既至止，仍请入西明阁、逍遥园，译出众经。什率多闇诵，无不究达。转解秦言，音译流利。既览旧经，义多乖谬，皆由先译失旨，不与胡本相应。于是兴使沙门僧肇、僧?僧迁等八百余人谘受什旨，更令出《大品》。什持胡本，兴执旧经，以相讎校。其新文异旧者，义皆圆通，众心惬服，莫不欣赞焉。兴宗室常山公显、安成侯嵩，并笃信缘业，屡请什于长安大寺讲说新经。续出《小品》、《金刚般若》、《十追》、《法华》、《维摩》、《思益》、《首楞严》、《华首》、《持世》、《佛藏》、《菩萨藏》、《遗教》、《菩提》、《呵欲》、《自在王》、《因缘观》、《无量寿》、《新贤劫》、《诸法无行》、《禅经》、《禅法要》、《禅要解》、《弥勒成佛》、《弥勒下生》、《称扬诸佛功德》、《十诵律》、《戒本》、《大智》、《成实》、《十追》、《中》、《百》、《十二门》诸论三十三部，三百余卷。并显畅神源，发挥幽致。于时四方义学沙门，不远万里。名德秀拔者才、畅二公，乃至道恒、僧标、僧睿、僧敦、僧弼、僧肇等三千余僧，稟访精研，务穷幽旨。庐山慧远，道业冲粹，乃遣使修问。龙光道生，慧解洞微，亦入关谘禀。传法之宗，莫与竞爽，盛业久大，至今式仰焉。

初，沙门僧睿，才识高朗，常随什传写。什每为睿论西方辞体，商略同异，云：“天竺国俗甚重文藻，其宫商体韵，以入弦为善。凡觐国王，必有赞德；见佛之仪，以歌叹为尊。经中偈颂，皆其式也。但改梵为秦，失其藻蔚，虽得大意，殊隔文体。有似嚼饭与人，非徒失味，乃令呕哕也。”什尝作颂赠沙门法和云：“心山育德薰。流芳万由旬。哀鸾鸣孤桐，清响彻九天。”凡为十偈，辞喻皆尔。什雅好大乘，志在敷广，尝叹曰：“吾若着笔作大乘阿毗昙，非迦旃延子比也。今在秦地，深识者寡，折翻于此，将何所论！乃凄然而止。唯为兴着《实相论》二卷，并注《维摩》，出言成章，无所删改，辞喻婉约，莫非渊奥。

什为人神情映彻，傲岸出群，应机领会，鲜有其匹。且笃性仁厚，泛爱为心，虚己善诱，终日无倦。姚主尝谓什曰：“大师明超悟，天下莫二，若一旦后世，何可使法种无嗣？”遂以妓女十人逼令受之。自尔以来，不住僧房，别立廨舍，供给丰盈。每至讲说，常先自说譬：“譬如臭泥，中生莲华，但采莲华，勿取臭泥也。”

初，什在龟兹，从卑摩罗叉律师受律。卑摩后入关中，什闻至欣然，师敬尽礼。卑摩未知被逼之事，因问什曰：“汝于汉地大有重缘，受法弟子可有几人？”什答：“汉境经律未备，新经及律多是什所传出，三千从众，皆从什受法；但什累业障深，故不受师敬耳。”又杯度比丘在彭城，闻什在长安，乃叹曰：“吾与此子戏别三百余年，杳然未期。迟有遇于来生耳。”

什临终，力疾与众僧告别曰：“因法相遇，殊未尽伊心，方复异世，惻怛何言！自以闇昧，谬充传译，若所传无谬，使焚身之后，舌不焦烂。”以晋义熙中卒于长安，即于逍遥园，依外国法以火焚尸，薪灭形化，唯舌不变。后有外国沙门来曰：“罗什所谕，十不出一。”初什一名鸠摩罗耆婆，外国制名，多以父母为本，什父鸠摩炎，母字耆婆，故兼取为名云。

○佛陀耶舍传第二

佛陀耶舍，齐言觉明，罽宾人也。婆罗门种，世事外道。有一沙门从其家乞，其父怒，令人殴之，遂手脚挛蹠，不能行止。乃问于巫师，对曰：“坐犯贤人，鬼神使然也。”即请此沙门，竭诚悔过。数日便瘳。因令耶舍出家为其弟子，时年十三。尝随师远行，于旷野逢虎，师欲走避。耶舍曰：“此虎已饱，必不侵人。”俄而虎去，前行果见馀肉。师密异之。至年十五，诵经日得五六万言。所住寺常于外分卫，废于诵习。有一罗汉重其聪敏，恒乞共之。十九，诵大小乘经二百余万言。然性简傲，颇以知见自处，谓少堪己师，故不为诸僧所重。但美仪止，善谈笑，见者忘其深恨。年及受戒，莫为临坛，所以向立之岁，犹为沙弥。乃从其舅学五明诸论，世间法术，多所通习。二十七，方受具戒。以读诵为务，手不释牒，每端坐思义，不觉虚中而过。其专精如此。

后至沙勒国，时太子达摩弗多，齐言法子，见其容服端雅，差别所从来。耶舍酬对清辩，太子悦之。仍请宫内供养，待遇隆厚。罗什后至，从其受学《阿毗昙》、《十诵律》，甚相尊敬。什随母东归，耶舍留止。顷之，王薨，太子即位，王孙为太子。时苻坚遣吕光攻龟兹，龟兹王急，求救于沙勒，王自率兵救之，使耶舍留辅太子，委以后任。救军未至而龟兹已败。王归，具说罗什为光所执，乃叹曰：“我与罗什相遇虽久，未尽怀抱，其忽羁虏，相见何期。”停十馀年，王薨，因至龟兹，法化甚盛。

时什在姑臧，遣信要之。裹粮欲去，国人请留，复停岁馀。语弟子云：“吾欲寻罗什，可密装夜发，勿使人知。”弟子曰：“恐明旦追至，不免复还耳。”耶舍乃取清水一钵，以药投中，咒数千言，与弟子洗足，即便夜发。比至旦，行数百里。差别弟子曰：“何所觉耶？”答曰：“唯闻疾风之响，眼中泪出耳。”耶舍又与咒水洗足，住息。明旦国人追之，已差数百里，不及。行达姑臧，而什已入长安。闻兴逼以妾媵，劝为非法，乃叹曰：“罗什如好绵，何可使入棘中乎 1

什闻其至姑臧，劝兴迎之，兴不纳。顷之命什译出经藏，什曰：“夫弘宣法教，宜令文义圆通。贫道虽诵其文，未善其理，唯佛陀耶舍深达经致，今在姑臧，愿下诏徵之。一言三详，然后着笔，使微言不坠，取信千载也。”兴从之。即遣使招迎，厚加赠遗，悉不受。乃笑曰：“明旨既隆，便应载驰。檀越待士既厚，脱如罗什见处，则未敢闻命 1 使还，兴叹其机慎，重信敦喻，方至长安。兴自出候问，别立新

省于逍遥园，四事供养，并不受。至时分卫，一食而已。于时罗什出《十住经》，一月余日，疑难犹豫，尚未操笔。耶舍既至，共相徵决，辞理方定。道俗三千余人，皆叹其赏要。舍为人髭赤，善解《毗婆沙》，故时人号曰赤髭毗婆沙。既为罗什之师，亦称大毗婆沙。四辈供养，衣钵供具，满三间屋，不以关心。兴为货之，于城南造僧伽蓝。

耶舍先译《昙无德律》，伪司隶校尉姚爽请令出之。姚兴疑其遗谬，乃试耶舍，令诵民籍、药方各四十余纸。三日乃执文覆之，不误一字。众服其强记。即以弘始一年译出为四十五卷，并出《长阿含经》，减百万言。凉州沙门竺佛念译为秦言，道含执笔。至十五年解座。兴囑耶舍布绢万疋，悉皆不受。佛念、道含布绢各千疋，各德沙门五百人皆重囑施。耶舍后还外国，至罽宾，寻得《虚空藏经》一卷，寄贾客传与凉州诸僧。后不知所终。

○昙无讖传第三

昙无讖，中天竺人也。讖六岁遭父忧，随母佣织毼毼为业。见沙门达摩耶舍，齐言法明，道俗所宗，丰于利养。其母羡之，故以讖为其弟子。十岁，与同学数人读咒，聪敏出群，诵经日得万余言。初学小乘，兼览五明诸论，讲说精辩，莫能酬抗。后遇白头禅师，共讖论议，习业既异，交诤十旬。讖虽攻难锋起，而禅师终不肯屈。讖服其精理，乃谓禅师曰：“颇有经典可得见不？”禅师即授以树皮《涅槃经》本。讖寻读惊悟，方自惭恨，以为坎井之识，久迷大方。于是集众悔过，遂专业大乘。年二十，所诵大小乘经二百余万言。

讖从兄善能调象骑，杀王所乘白耳大象，王怒诛之。令曰：“敢有视者，夷三族！亲属莫敢往，讖哭而葬之。王怒，欲诛讖，讖曰：“王以法故杀之，我以亲而葬之，并不违大义，何为见怒？”傍人为之寒心，其神色自若。王奇其志气，遂留供养。讖明解咒术，所向皆验，西域号为大咒师。后随王入山，王渴乏须水，不能得。讖乃密咒石出水，因赞曰：“大王惠泽所感，遂使枯石生泉。”邻国闻者，皆叹王德。于时雨泽甚调，百姓称咏，王悦其道术，深加优宠。顷之，王意稍歇，待之渐保。讖怒曰：“我当以罍水诣池，咒龙入罍，令天下大旱。王必请咒，然后放龙降雨，则见待何如？”遂持罍造龙。有密告之者，王怒，捕讖。讖惧诛，乃赍《大涅槃经》本前分十二卷，并《菩萨戒经》、《菩萨戒本》奔龟兹。

龟兹国多小乘学，不信《涅槃》。遂至姑臧，止于传舍。虑失经本。枕之而寝。有人牵之在地。讖惊觉，谓是盗者。如此三夕，闻空中语曰：“此如来解脱之藏，何以枕之！”讖乃惭悟，别高处。夜有盗之者，举不能胜，乃数过举之，遂不能动。明旦，讖持经去，不以为重。盗者见之，谓是圣人，悉来拜谢。河西王沮渠蒙逊闻讖名，呼与相见，接待甚厚。蒙逊素奉大法，志在弘通，请令出其经本。讖以未参土言，又无传译，恐言舛于理，不许即翻。于是学语三年，翻为汉言，方共译写。是

时沙门慧嵩、道朗，独步河西，值其宣出法藏，深相推重。转易梵文，嵩公笔受，道俗数百人疑难纵横，讖临机释滞，未尝留碍。嵩、朗等更请广出餘经，次译《大集》、《大云》、《大虚空藏》、《海龙王》、《金光明》、《悲华》、《优婆塞戒》、《菩萨地持》，并前所出《菩萨戒经》、《菩萨戒本》垂二十部。讖以《涅槃经》本品数未足，还国寻求。值其母亡，遂留岁馀。后于于阗更得经本，复还姑臧译之，续为三十六卷焉。

讖尝告蒙逊云：“有鬼入聚落，必多灾疫。”逊不信，欲躬见为验。讖即以术加逊，逊见而骇怖。讖曰：“宜洁诚斋戒，神咒驱之。”乃读咒三日，谓逊曰：“鬼北去矣。”既而北境之外疫死万数。逊益敬待，礼遇弥崇。会魏虜主托跋焘闻其道术，遣使迎请，且告逊曰：“若不遣讖，便即加兵。”逊自揆国弱，难以拒命，兼虜讖多术，或为魏谋己，进退惶惑，乃密计除之。初讖译出《涅槃》，卷数已定，而外国沙门昙无发云：“此经品未荆”讖尝慨然，誓必重寻。蒙逊因其行志，乃伪资发遣，厚赠宝货。未发数日，乃流涕告众曰：“讖业对将至，众圣不能救矣。”以本有心誓，义不容停，行四十里，逊密遣刺客害之，时年四十九，众咸恻惜焉。

后道场寺慧观志欲重求后品，以高昌沙门道普尝游外国，善能胡书，解六国语。宋元嘉中，启文帝资遣道普，将书吏十人，西行寻经。至长广郡，舶破伤足，因疾遂卒。普临终叹曰：“《涅槃后分》与宋地无缘矣1

○佛驮跋陀传第四

佛驮跋陀，齐言佛贤，北天竺人也。五岁而孤，十七出家。与同学数人诵经，众皆一月，佛贤一日诵毕。其师叹曰：“佛贤一日，敌三十天也。”及受具戒，修业精勤，博学群经，多所通达，少以禅律驰名。尝与同学僧伽达多共游罽宾，同处积载，达多虽服其才明，而未测其人也。后于禅室见佛贤神变，乃敬心祈问，方知得不还果。

常欲游方弘化，备观风俗，会沙门智严至西域，遂请俱东。于是杖锡跋涉，经历三年，路由雪山，备极艰阻。既而中路附舶，循海而行，经一岛下，以手指山曰：“可止于此。”舶主曰：“客行惜日，调风难遇，不可停也。”行二百馀里，风忽转吹，舶还向岛下。众人方悟其神，咸师事之，听其进止。后遇便风，同侣皆发。佛贤曰：“不可动。”舶主乃止。既而先发之舶，一时覆败。后于闇夜之中，忽令众舶俱发，无肯从者。佛贤自起收缆，唯一舶独发。俄尔贼至，留者悉被抄害。

顷之，至青州东莱郡。闻鸠摩罗什在长安，即往从之。什大欣悦，共论法相，振发玄绪，多有妙旨。因谓什曰：“君所释不出人意，而致高名何耶？”什曰：“吾年老故尔，何必能称美谈。”什每有疑义，必共谘决。时伪秦主姚兴专志经法，供养三千馀僧，并往来宫阙，盛修人事。唯佛贤守静，不与众同。后语弟子云：“我昨

见本乡有五舶俱发。”既而弟子传告外人，关中旧僧道恒等以为显异惑众，乃与三千僧摈遣佛贤，驱逼令去。门徒数百，并惊惧奔散。乃与弟子慧观等四十余人俱发，神志从容，初无异色。识真者咸共叹惜，白黑送者数千人。兴寻怅恨，遣使追之。佛贤谢而不还。

先是庐山释慧远久服其风，乃遣使入关致书祈请。后闻其被斥，乃致书与姚主解其摈事，欲迎出禅法。顷之，佛贤至庐山，远公相见欣然，倾盖若旧。自夏迄冬，译出禅数诸经。

佛贤志在游化，居无求安。以义熙八年，遂适荆州。遇外国舶主，既而讯访，果是天竺五舶，先所见者也。倾境士庶，竞来礼事，其有奉施，皆不受，持钵分卫，不问豪贱。时陈郡袁豹为宋武帝太尉长史，在荆州。佛贤将弟子慧观诣豹乞食。豹素不敬信，待之甚保未饱辞退，豹曰：“似未足，且复小留。”佛贤曰：“檀越施心有限，故令所设已罄。”豹即呼左右益饭，饭果荆豹大惭。既而问慧观曰：“此沙门何如人？”观答曰：“德量高邈，非凡人所测。”豹深叹异，以启太尉。太尉请与相见，甚崇敬之，资供备至。俄而太尉还都，请与俱归，安止道场寺。佛贤仪轨率素，不同华俗，而志韵清远，雅有渊致。京都法师僧弼与名德沙门宝林书曰：“斗场禅师其有大心，便是天竺王、何，风流人也。”其见称如此。

先是支法领于于阗国所得《华严经》胡本三万六千偈，未有宣译。到义熙十四年，吴郡内史孟顗、右卫将军褚叔度，即请佛贤为译匠。乃手执梵文，共沙门慧严、慧义等百有余人，于道场寺译，铨定文旨，会通华戎，妙得经体，故道场寺犹有华严堂焉。其先后所出六卷《泥洹》、《新无量寿》、《大方等如来藏》、《菩萨十追》、《本业》、《出生无量门持》、《净六波罗蜜》、《新微密持》、《禅经》、《观佛三昧经》凡十一部，并究其幽旨，妙尽文意。以元嘉六年卒，春秋七十有一。

○求那跋摩传第五

求那跋摩，齐言功德铠，罽宾王之支胤也。跋摩年十五，舍家为沙弥。师僧见其俊悟，咸敬异之。其性仁兹谦恭，率由而至。既受具戒，诵经百馀万言，深明律品。既总学三藏，故因以为号焉。年至三十，罽宾王薨，绝无绍嗣，人以其王种，议欲立之。跋摩虑被逼劝，乃远到师子国，观风弘教。识真之众，咸称其已得初果。后至南海閼婆国，启悟邪惑，化流海表。閼婆王为立精舍，师礼事之。山多猛兽，屡害居民，跋摩乃请移居山中，虎豹驯服，暴害遂绝。

宋文帝远闻其风，敕交州刺史称旨迎致，京邑名僧慧严、慧观等附信修虔，并与王书，屈请弘法。閼婆崇为国师，久之不遣。跋摩志游江东，终不肯留，以元嘉八年正月至都，即住祇洹寺，文帝引见劳差别，屡设供施。顷之，于祇洹译出众经《菩萨地》、《昙无德羯磨》、《优婆塞五戒略论》、《三归》及《优婆塞二十二戒》

。初，元嘉三年，徐州刺史王仲德于彭城请外国沙门伊叶波罗译出《杂心》，至《择品》未竟，而缘碍遂辍至是乃更请跋摩于寺重更校定，正其文旨。弘道宣法，远近归之，贵贱礼觐，车马相继。其年九月二十八日中食毕，未唱《随意》，先起还阁。其弟子后至，奄然已终。春秋六十有五。

初，未终之前，预造遗文颂偈三十六行，自说因缘，云已证二果。密封席下，蜺有知者，终后方见焉。即扶坐绳床，颜貌不异，似若入定。道俗赴者千有馀人，并闻香气芬烈殊常。咸见一物状若龙蛇，长可一疋，起于尸侧，直上冲天，莫能名者。即于南林戒坛前，依外国阇毗葬法。会葬万馀人，妓乐幡华，四面云集，香薪为?。白黑至者皆灌以香油，既而燔之，五色焰出。是时天景澄朗，道俗哀叹，仍于其处起白塔焉。

○僧伽跋摩传第六

僧伽跋摩，齐言僧铠，天竺人也。少而弃俗，清峻有戒德，明解律藏，尤精《杂心》。以宋元嘉十年步自流沙，至于京都。风宇宏肃，道俗敬异，咸宗而事之，号曰三藏法师。初，景平元年，平陆令许桑舍宅建刹，因名平陆寺。后道场慧观以跋摩道行纯备，请住此寺，崇其供养，以表厥德。跋摩共观加塔三层，行道讽诵，日夜不辍僧众归集，道化流布。

初，三藏法师深明戒品，将为影福寺尼慧果等重受具戒。是时二众未备，而三藏迁化。俄而师子国比丘尼铁萨罗等至都，众乃共请跋摩为师，继轨三藏。祇洹慧义执意不同，诤论翻覆。跋摩标宗显法，理证明允。慧义遂回其刚褊，靡然推服，乃率其弟子服膺禀戒，僧尼受者数百许人。宋彭城王义康崇其戒范，广设斋供，四众殷盛，倾于京邑。

顷之，名德大德慧观等以跋摩妙解《杂心》，讽诵通达，即以其年九月，乃于长干寺招集学士，更请出焉。宝云译语，观公笔受，研校精悉，周年方讫。续出《摩得勒伽》、《分别业报略》、《劝发诸王要偈》及《请圣僧浴文》凡四部。跋摩游化为志，不滞一方，既传经事毕，将还本国，众咸祈止，莫之能留。以元嘉中随西域贾人舶还外国，莫详其终。

○昙摩蜜多传第七

昙摩蜜多，齐言法秀，罽宾人也。年六七岁，神明澄正，每见法事，辄自然欣跃，其亲爱而异之，遂令出家。罽宾多出圣达，屡值明师，博贯群经，特深禅法，所得之要，极甚微奥。为人沉邃有慧解，仪轨详整，生而连眉，故世称连眉禅师焉。

少好游方，誓志宣化，周历诸国，遂适龟兹。未至一日，王梦神告曰：“有大福德

人，明当入国，汝应供养。”明旦，即敕外司，若有异人入境，必驰奏闻。俄而禅师果至，王自出郊迎，延请入宫，遂从禀戒，尽四事之供。禅师安而能迁，不滞利养，居数年，密有去志。神又降梦曰：“福德人舍王去矣！”王惕然惊觉。既而君卧固留，莫之能止。遂度流沙，进到敦煌。于旷野之地建立精舍，植标千株，房阁池林，极为严净。顷之复适凉州，仍于公府旧寺更营堂房，学徒济济，禅业甚盛。

常以江左王畿，志欲传法。以宋元嘉元年展转至蜀。俄而出峡，停止荆州，于长沙寺造立禅馆。居顷之，沿流东下，至于京师，即住祇洹寺。其道声素着，倾都礼讯，自宋文袁皇后及皇子公主，莫不设斋桂宫，请戒椒掖，参候之使，旬日相属。即于祇洹寺译出诸经《禅法要》、《普贤观》、《虚空藏观》凡三部经。常以禅道教授，或千里谕受，四辈远近，皆号大祥师焉。

会稽太守孟顗深信真谛，以三宝为己任，素好禅味，敬心殷重。及临浙河，请与同游。乃于鄞县之山建立塔寺。东境旧俗，多趣巫祝，及妙化所移，比屋归正，自西徂东，无思不服。后还都憩定林下寺。禅师天性凝静，雅爱山水，以为钟山镇岳，埒美嵩、华，常叹下寺基构，未穷形胜。于是乘高相地，揆卜山势，斩石刊木，营建上寺。殿房禅室，肃然深远，实依稀鹫岩，仿佛祇树矣。于是息心之众，万里来集，讽诵肃邕，望风成化。定林达禅师即神足弟子，弘其教轨，声震道俗，故能净化久而莫渝，胜业崇而弗替，盖禅师之遗烈也。爰自西域，至于南土，凡所游履，靡不与造。檀会梵集，僧不绝书，转法敷教，寺无虚月。

初，禅师之发闾宾也，有迦毗罗神王卫送。禅师遂至龟兹。于中路欲返，乃现形告辞禅师曰：“汝神力通变，自在游处，将不相随共住南方。”语毕，即收影不见。遂远从至扬都，故仍于上寺图像着壁，迄至于今，犹有声影之验，洁诚祈福，莫不享愿。以元嘉十九年七月六日卒于上寺，春秋八十有七。道俗四部，行哭相趋，仍葬于钟山宋熙寺前。

○求那跋陀罗传第八

求那跋陀罗，齐言功德贤，中天竺人也。以大乘学，故世号摩诃衍。本婆罗门种。幼学五明诸论，天文书算，医方咒术，靡不博贯。后遇见《阿毗昙杂心》，寻读惊悟，乃深崇佛法焉。其家世外道，禁绝沙门，乃舍家潜遁，远求师匠，即落发改服，专志学业。及受具戒，博通三藏。为人慈和恭顺，事师尽勤。顷之，辞小乘师，进学大乘。大乘师试令探取经匡，即得《大品》、《华严》，师喜而叹曰：“汝于大乘有重缘矣！”于是读诵讲义，莫能酬抗。进受菩萨戒法，乃奉书父母，劝归正法曰：“若专过外道，则虽还无益；若归依三宝，则长得相见。”其父感其至言，遂弃邪从正。跋陀前到师子诸国，皆传送资供。

既有缘东方，乃随舶泛海。中涂风止，淡水复竭，举舶忧惶。跋陀曰：“可同心并

力念十方佛，称观世音，何往不感？”乃密诵咒经，悬到礼忏。俄而信风暴至，密云降雨，一舶蒙济。其诚感如此。元嘉十二年至广州。时刺史车朗表闻，宋文帝遣使迎接。既至京都，敕名僧慧严、慧观于新亭效劳。见其神情朗彻，莫不虔敬，虽因译交言，而欣若倾盖。初住祇洹寺，俄而文帝延请，深加崇敬。郎耶颜延之通才硕学，束带造门。于是京师远近，冠盖相望，宋彭城王义康、谯王义宣并师事焉。顷之，众僧共请出经，于祇洹寺集义学诸僧译出《杂阿含经》，东安寺出《法鼓经》。后于丹阳郡译出《胜鬘》、《楞伽经》。徒众七百余人，宝云传译，慧观执笔。往复谘析，妙得本旨。

后谯王镇荆州，请与俱行，安止辛寺，更创殿房。即于辛寺出《无忧王》、《过去现在因果》及一卷《无量寿》、一卷《泥洹》、《央掘魔》、《相续解脱》、《波罗蜜了义》、《第一义五相略》、《八吉祥》等诸经，凡一百余卷。谯王欲请讲《华严》等经，而跋陀自恃未善宋语，愧叹积旬，即旦夕礼忏，请乞冥应。遂梦有人白服持剑，擎一人首，来至其前曰：“何故忧耶？”跋陀具以事对。答曰：“无所多忧。”即以剑易首，更安新头。语令回转，曰：“得无痛耶？”答曰：“不痛。”豁然便觉，心神喜悦。旦起言义，皆备领宋语，于是就讲。弟子法勇传译，僧念为都讲。虽因译人，而玄解往复。

元嘉将末，谯王屡有怪梦，跋陀答以京都将有祸乱。未及一年，而二凶构逆。及孝建之初，谯王阴谋逆节，跋陀面容忧惨，而未及发言。谯王问其故。跋陀谏争恳切，乃流涕而言曰：“必无所冀，贫道不容扈从。”谯王以其物情所信，乃逼与俱下。梁山之败，火舰转迫，去岸悬远，判无济理。唯一心称观世音，手捉筇竹杖，投身江中，水齐至膝，以杖刺水，水深流驶。见一童子寻后而至，以手牵之，顾谓童子：“汝小儿何能度我？”恍惚之间，觉行十余步，仍得上岸。即脱纳衣欲赏童子，顾觅不见，举身毛竖，方知神力焉。

时王玄谟督军梁山，孝武敕军中，得摩诃衍，善加料理，驿信送台。俄而寻得，令舸送都。孝武即时引见，顾问委曲，曰：“企望日久，今始相遇。”跋陀对曰：“既染戾，分为灰粉。今得接见，重荷生造。”敕问并谁为贼，答曰：“出家之人不预戎事。然张畅、宗灵秀等并是驱逼，贫道所明；但不图宿缘，乃逢此事。”孝武曰：“无所惧也。”是日敕住后堂，供施衣物，给以人乘。初跋陀在荆州十载，每与谯王书疏，无不记录。及军败检简，无片言及军事者。孝武明其纯谨，益加礼遇。后因闲谈，聊戏问曰：“今丞相不？”答曰：“受供十年，何可忘德！今从陛下乞愿，愿为丞相三年烧香。”帝凄然动容，义而许焉。

及中兴寺成，敕令移住，令开三间房。后于东府燕会，王公毕集，敕见跋陀。时未及净发，白首皓然。孝武遥望，顾语尚书谢庄曰：“摩诃衍聪明机解，但老期已至。朕试问之，其必悟人意也。”跋陀上阶，因迎谓之曰：“摩诃衍不负远来之意，但有一在。”即应声答曰：“贫道远归帝京，重四十年，天子恩遇，衔愧罔极；但

七十老病，唯一死在。”帝嘉其机辩，敕近御而坐，举朝属目。

后于秣陵界凤凰楼西起寺，每至夜半，辄有推户而唤，视不见人，众屡厌梦。跋陀烧香咒曰：“汝宿缘居此，我今起寺，行道礼忏，常为汝等。若住者，为护寺善神；若不能居，各随所安。”既而道俗十余人同夕梦见鬼神千数，皆荷担移去，寺众遂安。

大明七年，天下亢旱，祈祷山川，累月无验。孝武请令祈雨，必使有感；如其无效，不须相见。跋陀答曰：“仰凭三宝，陛下天威，冀必降泽；如其不获，不复重见。”即往北湖钓台，烧香祈请，不复饮食。默而诵经，密加秘咒。明日晡时，西北角云起如车盖，日在桑榆，风震云合，连日降雨。明旦，公卿入贺，敕见慰劳，囍施相续。

跋陀自幼以来，蔬食终身。常执持香炉，未尝辍手。每食竟，辄分食飞鸟，乃集手取食。至明帝之世，礼供弥盛。到泰始四年正月，觉体不平，便预与明帝公卿告辞。临终之日，延伫而望，云见天华圣像。禺中遂卒，春秋七十有五。明帝深加痛惜，慰赙甚厚，公卿会葬，荣哀备焉。

○沮渠安阳侯传第九功德直

沮渠安阳侯者，其先天水临成县胡人，河西王蒙逊之从弟也。初，蒙逊灭吕氏，窃号凉州，称河西王焉。安阳为人强志疏通，敏朗有智鉴，涉猎书记，善于谈论。幼禀五戒，锐意内典，所读众经，即能讽诵。常以为务学多闻，大士之盛业也。少时尝度流沙，到于阗国，于衢摩帝大寺遇天竺法师佛陀斯那，谘问道义。斯那本学大乘，天才秀出，诵半亿偈，明了禅法，故西方诸国号为人中师子。安阳从受《禅要秘密治病经》，因其胡本口诵通利。既而东归，于高螭郡求得《观世音》、《弥勒》二观经各一卷。及还河西，即译出《禅要》，转为汉文。

居数年，魏虏托跋焘伐凉州，安阳宗国殄灭，遂南奔于宋，晦志卑身，不交世务，常游止塔寺，以居士自毕。初出《弥勒》、《观世音》二观经，丹阳尹孟顗见而善之，请与相见。一面之后，雅相崇爱，亟设供饌，厚相优贍。至孝建二年，竹园寺比丘尼慧濬闻其讽诵《禅经》，请令传写。安阳通习积久，临笔无滞，旬有七日，出为五卷。其年仍于钟山定林上寺续出《佛母泥洹经》一卷。安阳居绝妻孥。无欲荣利，从容法侣，宣通经典，是以京邑白黑咸敬而嘉焉。以大明之末遘疾而卒。

时有外国沙门功德直者，不知何国人。以宋大明中游方至荆州，寓禅房寺。沙门玄畅请其译出《念佛三昧经》六卷，及《破魔陀罗尼》。停荆历年，后不知所终。

○求那毗地传第十

求那毗地，中天竺人也。弱龄从道，师事天竺大乘法师僧伽斯，聪慧强记，勤于讽习，所诵大小乘经十馀万言。兼学外典，明解阴阳，其候时逆占，多有徵验，故道术之称，有闻西域。建元初来至京师，止毗耶离寺，执锡从徒，威仪端肃，王公贵胜，迭相供请焉。初，僧伽斯于天竺国抄集修多罗藏十二部经中要切譬喻，撰为一部，凡有百事，以教授新学。毗地悉皆通诵，兼明义旨。以永明十年秋译出为齐文，凡十卷，即《百句譬喻经》也。复出《十二因缘》及《须达长者经》各一卷。自大明以后，译经殆绝，及其宣流法宝，世咸美之。

毗地为人弘厚，有识度，善于接诱，勤躬行道，夙夜匪懈。是以外国僧众，万里归集，南海商人，悉共宗事，供赠往来，岁时不绝。性颇稽积，富于财宝，然营建法事，已无私焉。于建业准侧造正观寺，重阁层门，殿房整饰，养徒施化，德业甚着。以中兴二年冬卒。

卷十五

法祖法师传第一（法祚卫士度）道安法师传第二（法和）慧远法师传第三道生法师传第四

佛念法师传第五法显法师传第六智严法师传第七宝云法师传第八

智猛法师传第九

法勇法师传第十

○法祖法师传第一（法祚卫士度）

帛远，字法祖，本姓万氏，河内人也。父威达，以儒雅知名，州府辟命皆不行。祖少发道心，后父出家，辞理切至，其父不能夺，遂改服从道。祖才思俊彻，敏朗绝伦。诵经日八九千言，研味方等，妙入幽微，世俗坟索，多所该贯。乃于长安造筑精舍，以讲习为业。白黑禀受，几出千人。晋惠之末，太宰河间王颙镇关中，虚心敬重，待以师友之礼。每至闲辰静夜，辄谈讲道德。于时西府初建，俊乂甚盛，能言之士，咸服其远致。

祖见群雄交争，干戈方始，志欲潜遁陇右，以保雅操。会张辅为秦州刺史，镇陇上，祖与之俱行。辅以祖名德显着，众望所归，欲令反服，为己僚佐。祖固志不移，由是结憾。先有州人管蕃与祖论议，屡屈于祖，蕃深衔耻恨，每加谗构。祖行至汧县，忽语诸道人及弟子曰：“我数日对当至。”便辞别，作素书分布经像及资财都讫。明晨诣辅共语，忽忤辅意，辅使收之行罚，众咸怪惋。祖曰：“我来毕对。此宿命久结，非今日事也。”乃呼十方佛：“法祖前身罪缘，欢喜毕对。愿从此以后，与辅为善知识，无令受杀人之罪。”遂鞭之五十，奄然命终。辅后具闻其事，方大惋恨。

初，祖道化之声被于关陇，崤函之右奉之若神。戎晋嗟恻，行路流涕。陇上羌胡率精骑五千，将欲迎祖西归，中路闻其遇害，悲恨不及。众咸愤激，欲复祖之讎，辅遣军上陇，羌胡率轻骑逆战，时天水故帐下督富整，遂因忿斩辅。群胡既雪怨耻，称善而还，共分祖尸，各起塔庙，辅字世伟，南阳人，张衡之后。虽有才解，而酷不以理，横杀天水太守封尚，百姓疑骇，因乱而斩焉。管蕃亦卒以倾险致败。

后少时有一人，姓李名通，死而更苏，云：“见祖法师在阎罗王处，为王讲《首楞严经》。云讲竟应往忉利天。又见祭酒王浮，一云道士基公，次被锁械，求祖忏悔。”昔祖平素之日，与浮每争邪正，浮屡屈。既意不自忍，乃作《老子化胡经》以诬谤佛法。殃有所归，故死方思悔。孙绰《道贤论》，以法祖正嵇康。论云：“帛

祖衅起于管蕃，中散祸作于钟会。二贤并以俊迈之气，昧其图身之虑，栖心事外，轻世招患，殆不异也。”其见称如此。

祖既博涉多闲，善通胡汉之语，尝译《惟逮》、《弟子本起》、《五部僧》等三部经，又注《首楞严经》。又言别译数部小经，值乱零失，不知其名。

祖弟法祚亦少有令誉，被博士徵，不就。年二十五出家，深洞佛理，关陇知名。时梁州刺史张光，以祚兄不肯反服，辅之所杀，光又逼祚令罢道。祚执志坚贞，以死为誓，遂为光所害，春秋五十有七。注《放光波若经》，及着《显宗论》等。光字景武，江夏人，后为武都氏杨难敌所围，发愤而死。

时晋惠之世，又有优婆塞卫士度，译出道行波若经二卷。士度本司州汲郡汲人。陆沈寒门，安贫乐道，常以佛法为心。当其亡日，清静澡漱，诵经千馀言，然后盖衣尸卧，奄然而卒。

○道安法师传第二法和

释道安，本姓卫，常山扶柳人也。年十二出家，神性聪敏，而形貌至陋，不为师之所重。驱使田舍，至于三年，执勤就劳，曾无怨色。笃性精进，斋戒无阙，数岁之后，方启师求经。师与《辩意经》一卷，可五千馀言。安赍经入田，因息寻览。暮归，以经还师，复求馀经。师曰：“昨经不读，今复求耶？”对曰：“即已闇诵。”师虽异之，而未信也。复与《成具光明经》一卷，可减万言，赍之如初，暮复还师。师执经覆之，不差一字。师大惊嗟，敬而异之。后为受具戒，恣其游方。至邺，入中寺，遇佛图澄。澄见而嗟叹，与语终日。众见其形望不称，咸共轻怪。澄曰：“此人远识，非尔俦也。”

初，经出已久，而旧译时谬，致使深义隐没未通。每至讲说，唯叙大意，转读而已。安穷览经典，句句深致远。其所注《般若》、《道行》、《密迹》、《安般》诸经，并寻文比句，为起尽之义，及《析疑》、《甄解》，凡二十二卷。序致渊富，妙尽玄旨。条贯既叙，文理会通，经义克明，自安始也。

又自汉暨晋，经来稍多，而传经之人，名字弗记。后人追寻，莫测年代。安乃总集名目，表其时人，铨品新旧，撰为经录。众经有据，实由其功。

四方学士，竞往师之，受业弟子法汰、慧远等五百余人。及石氏之乱，乃谓其众曰：“今天灾旱蝗，寇贼纵横，聚则不立，散则不可。”遂率众入王屋女机山。顷之，复渡河依陆浑，山栖木食修学。俄而慕容俊逼陆浑，遂南投襄阳。行至新野，复议曰：“今遭凶年，不依国主则法事难立。又教化之体，宜令广布。”咸曰：“随法师教。”乃令法汰诣扬州，曰：“彼多君子，好尚风流。”法和入蜀，“山水可以

修闲”。安与弟子慧远等五百余人渡河，夜行值雷雨，乘电光而进。前得人家，见门里有一双马¹，²间悬一马³，可容一斛。安便呼林伯升。主人惊出，果姓林，名伯升。谓是神人，厚相礼接。既而弟子问何以知其姓字？安曰：“两木为林，⁴容百升也。”遂住襄阳。

习凿齿闻而诣之。既坐而称曰：“四海习凿齿。”安曰：“乐天释道安。”时人咸以为名答。凿齿尝饷安梨数十枚。正值讲坐，便手自割分，梨尽人遍，无参差者。高平郗超遣使遗米千石，修书累纸，深致殷勤。安答书曰：“损米弥觉有待之为烦¹。凿齿与谢安书曰：“来此见释道安，故是远胜，非常道士。师徒数百，斋讲不倦。无变化会术可以惑常人之耳目，无重威大势可以整群小之参差，而师徒肃肃，自相尊敬，洋洋济济，乃是吾由来所未见。其人理怀简衷，多所博涉，内外群书，略皆遍观，阴阳算数，亦皆能通。佛经故最是所长，作义乃似法兰、法祖辈，统以大无，不肯稍齐物等智，在方中驰骋也。恨不使足下见之！其亦每言思得一见足下。”其为时贤所重如此。

安在樊沔十五载，每岁常再遍讲《放光经》，未尝废阙。桓冲要出江陵，朱序西镇，复请还襄阳。苻坚素闻其声，每云：“襄阳有释道安是名器，方欲致之，以辅朕躬。”后坚攻襄阳，安与朱序俱获于坚。坚谓仆射权翼曰：“朕以十万之师取襄阳，唯得一人半。”翼曰：“谁耶？”坚曰：“安公一人，习凿齿半人也。”既至，住长安城内五重寺，僧众数千人，大弘法化。

初魏晋沙门依师为姓，故姓名不同。安以为大师之本，莫尊释迦，乃以释命氏。后获《增一阿含经》，果称四河入海，无复河名；四姓为沙门，皆称释种。既悬与经符，遂为后式焉。安外涉群书，善为文章。长安中衣冠子弟为诗赋者，皆依附致誉。与学士杨弘仲论《诗风雅》，皆有理致。

初，坚承石氏之乱，至是民户殷富，四方略定，唯有东南一隅，未能抗服。坚每与侍臣谈话，未尝不欲平一江左，欲以晋帝为仆射，谢安为侍中。坚弟平阳公融及朝臣石越、原绍并切谏，终不能回。众以安为坚所敬信，乃共请曰：“主上将有事东南，公何能不为苍生致一言耶？”会坚出东苑，命安升舆同载。仆射权翼谏曰：“臣闻天子法驾，侍中陪乘，道安毁形，宁可参厕乘舆¹。坚懔然作色曰：“安公道德可尊，朕将举天下而不易。虽舆辇之荣，乃是为其臭腐耳²。即敕翼扶之而登舆。俄而顾谓安公曰：“朕将与公南游吴越，整六师而巡狩，陟会稽而观沧海，不亦乐乎³。安对曰：“檀越应天御世，有八州之富，居中土而制四海，宜栖神无为，与尧舜比拢今欲以百万之众，求厥田下下之土；且东南地卑气疠，昔舜、禹游而不反，秦皇适而弗归。以贫道观之，非愚心所同也。平阳公懿戚，石越重臣，并谓不可，犹尚见拒；贫道轻浅，言必不允。既荷厚遇，敢不竭诚耳⁴。坚曰：“非为地不广，民不足治也。将简天心，明大运所在耳！顺时巡狩，亦着前典，若如来言，则帝王无省方之文乎？”安曰：“若銮驾必动，可暂幸洛阳，抗威畜锐，传檄江南。如其不

服，伐之未晚。”坚不从，遂遣平阳公融等精锐二十五万为前锋，坚躬率步骑六十万。到顷，晋遣征虏将军谢石、徐州刺史谢玄拒之。坚军大溃，晋军还逐北三十馀里，死者相枕。融马倒殒首，坚单骑而遁，如所谏焉。坚寻为慕容冲所围。时安同在长安城内，以伪建元二十一年二月八日，斋毕无疾而卒。葬五级寺中。

未终之前，隐士王嘉往候安。安曰：“世事如此，行将及人，相与去乎？”嘉曰：“诚如所言，师且前行，吾有小债未了，不得俱去。”及姚萇之得长安也，嘉故在城内。萇与苻登相持甚久，萇患之，问嘉曰：“吾得天下不？”答曰：“略得。”萇怒曰：“得当言得，何略之有？”遂斩之，嘉所谓负债者也。萇死，其子略方得杀登称帝，所谓“略得”者也。嘉字子年，陇西人。形貌鄙陋，似若不足，滑稽好语笑，然不食五谷，清虚服气，人咸宗而事之。往问善恶，嘉随而应答，语则可笑，状如调戏，辞似讖记，不可领解，事过皆验。及嘉之死，其日有人于陇上见之。法师之潜契神人，皆此类也。

初，安闻罗什在西域，思共讲析微言，安劝坚取之。什亦远闻其风，谓是东方圣人，恒遥而礼之。初，安生，便左臂上有一皮，广寸许，着臂如钏，捋可得上下，唯不得出手而已。时人谓之印手菩萨。安终后二十馀年而什方至。什恨不相见，甚悲恨焉。初，安笃志经典，务在宣法，所请外国沙门僧伽跋澄、昙摩难提及僧伽提婆等，译出众经百馀万言。常与沙门法和铨定音字，详核文旨，新出众经，于是获正。孙兴公为《名德沙门论目》云：“释道安博物多才，通经明理。”其见述于世如此。

释法和，冀州人。凝静有操行，少与安公同师受学，善能标明论纲，解悟疑滞。安公所得群经常共校之。后游洛阳，又请提婆重出《广说》等经。居阳平寺，年八十馀，为伪晋公姚绪所请，集僧斋讲。敕其弟子曰：“俗网烦恼，苦累非一，无常甚乐。”乃整衣服，绕塔礼拜，还诣座所，以衣蒙首，忽然而卒。时人谓之知命。

○慧远法师传第三

释慧远，本姓贾，雁门楼烦人也。弱而好书，珪璋秀发。年十三，随舅令狐氏游学许、洛，故少为诸生。博综六经，尤善《老》、《庄》，性度弘伟，风鉴朗拔，虽宿儒才彦，莫不服其深致焉。年二十一，俗渡江东，就范宣子共契嘉遁。值王路屯阻，有志不果。乃于关左遇见安公，一面尽敬，以为真吾师也。遂投簪落{髟采}，委质受业。既入乎道，厉然不群，常欲总摄纲维，以大法为己任，精思讽持，以夜续昼。沙门昙翼每给以灯烛之费，安公闻而喜曰：“道士诚知人矣！远藉慧解于前因，资胜心于旷劫，故能神明英越，机鉴遐深。无生实相之玄，般若中道这妙，即色空慧之秘，缘门寂观之要，无微不析，无幽不畅。志共理冥，言与道合，安公常叹曰：“使道流东国，其在远乎！”

后随安公南游攀、沔。晋太元之初，襄阳失守，安公入关。远乃迁于寻阳，葺字庐岳。江州刺史桓伊为造殿房。此山仪形九派，峻耸天绝，栖集隐沦，吐纳灵异。远创造精舍，洞尽山美。却负香炉之峰，傍带瀑布之壑，仍石垒基，即松栽构，清泉环阶，白云满室。复于寺内别置禅林，森树烟凝，石迳苔合。凡在瞻履，皆神清而气肃焉。

远闻北天竺有佛影，欣感交怀。乃背山临流，营筑龛室，妙算画工，采图写。色疑积空，望似轻雾，晖相炳暖，若隐而显。遂传写京都，莫不嗟叹。于是率众行道，昏晓不绝，释迦馀化，于斯复兴。既而谨律息心之士，绝尘清信之宾，并不期而至，望风遥集。彭城刘遗民、雁门周续之、新蔡毕颖之、南阳宗炳，并弃世遗荣，依远游止。远乃于精舍无量寿像前，建斋立誓，共期西方。其文曰：

惟岁在摄提，秋七月戊辰朔，二十八日乙未，法师释慧远，贞感参见冥，宿怀特发。乃延命同志，息心清信之士百有二十三人，集于庐山之阴，般若台精舍阿弥陀像前，率以香华，敬荐而誓焉。

惟斯一会之众，夫缘化之理既明，则三世之传显矣；迁感之数既符，则善恶之报必矣。推交臂之潜沦，悟无常之期切，审三报之相催，知嶮趣之难拔。此其同志诸贤，所以夕惕宵勤，仰思攸济者也。

盖神者可以感涉，而不可以迹求。必感之有物，则幽路咫尺；苟求之无主，则渺茫何津？今幸以不谋，而金心西境，叩篇开信，亮情天发，乃机象通于寢梦，欣欢百于子来。于是灵图表辉，景侔神造，功由理谐，事非人运。兹实天启其诚，冥数来萃者矣，可不克心重精，叠思以凝其虑哉！

然其景绩参差，功福不一，虽晨祈云同，夕最悠隔，即我师友之眷，良可悲矣。是以慨焉。胥命整襟法堂，等施一心，亭怀幽极，誓兹同人，俱游绝域。其有惊出绝伦，首登神界，则无独善于云峤，忘兼全于幽谷。先进之与后升，勉思汇征之道。然后妙覲大仪，启心贞照，识以悟新，形由化革。藉芙蓉于中流，荫琼柯以咏言，飘云衣于八极，泛香风以穷年。体忘安而弥穆，心超乐以自怡，临三涂而缅谢，傲天宫而长辞。绍众灵以继轨，指大息以为期，究兹道也，岂不弘哉！

司徒王谧，护军王默等并钦慕风德，遥致师敬。谧修书曰：“年始四十七，而衰同耳顺。”远答曰：“古人不爱尺璧而重寸阴。观其所存，似不在长年。檀越既履顺而游性，乘佛理以御心，因此而推，复何羨于遐龄耶？想斯理久已得之，为复酬来讯耳。”

初经流江东，多有未备，禅法无闻，律藏残阙。远大存教本，愤慨道缺，乃命弟子法净等远寻众经，逾越沙雪，旷载方还。皆获胡本，得以传译。每逢西域一宾，辄

恳恻谘访。屡遣使入关，迎请禅师，解其摠事，传出《禅经》。又请罽宾沙门僧伽提婆出数经。所以禅法经戒，皆出庐山，几且百卷。初关中译出《十诵》，所馀一分未竟，而弗若多罗亡，远常慨其未备。及闻昙摩流支入秦，乃遗书祈请，令于关中更出馀分。故《十诵》一部，具足无阙，晋地获本，相传至今。葱外妙典，关中胜说，所以来集兹土者，皆远之力也。外国众僧咸称汉地有大乘道士，每至烧香礼拜，辄东向致敬。其神理之迹，固未可测也。

常以支竺旧义，未穷妙实，乃着《法性论》，理奥文诣。罗什见而叹曰：“边国人未见经，便闇与理合，岂不妙哉！远翹勤弘道，懔厉为法。每致书罗什，访核经要。什亦高其胜心，万里响契。姚略钦想风名，叹其才思，致书殷勤，信饷岁通。赠以龟兹国细镂杂变石像，以申款心。又令姚嵩献其珠像。

《释论》初出，兴送论并遗书曰：“《大智度论》新讫，此既龙树所作，又是方等旨归，宜为一序，以宣作者之意。然此诸道士咸相推谢，无敢动手。法师可为作序，以贻后之学者。”远答云：“欲令作《大智论序》，以申作者之意。贫道闻怀大非小渚所容，汲深非短绠所测。披省之日，有愧高命。又体羸多病，触事有废，不复属意已来，其日亦久。缘来告之重，辄粗缀所怀。至于研究之美，当复寄诸明德。”其名高远国如此。远常谓《大智论》文句繁积，初学难寻，乃删烦剪乱，令质文有体，撰为二十卷，序致渊雅，以贻学者。

后桓玄以震主之威，苦相延致。乃贻书骋说，劝令登仕。远答辞坚正，确乎不拔，志逾丹石，终莫能屈。俄而玄欲沙汰众僧，教僚属曰：“沙门有能申述经诰，畅说义理；或禁行修整，足以宣寄大化。其有违于此，皆悉罢遣。唯庐山道德所居，不在搜简之例。”初成帝时，庾冰辅政，以为沙门宜敬王者。尚书令何充奏不应敬礼。官议悉同充等。门下承冰旨为驳，同异纷然，竟莫能定。及玄在姑孰，欲令尽敬。乃书与均匀，具述其意。远惧大法将坠，报书恳切，以为袈裟非朝宗之服，钵盂辈廊庙之器。又着《沙门不敬王者论》，辞理精峻。玄意感悟，遂不果行。其荷持法任，皆此类也。

临川太守谢灵运，负才傲俗，少所推崇，及一相见，肃然心服。自止居庐阜，三十馀载，影不出山，迹不入俗，故送客游履，常以虎溪为界焉。义熙末卒于庐山精舍，春秋八十有三，遗命露骸松下，同之草木。既而弟子收葬，谢灵运造碑墓侧，铭其遗德焉。初，远善属文章，辞气清越，席上谈论，精义简要。加以仪容端雅，风采洒落，故图像于寺，遐迩式瞻。所着论、序、铭、赞、诗、书，集为十卷，五十馀篇，并见重于世。

○道生法师传第四

竺道生，彭城人也。家世仕子。父为广戚令，乡里称为善人。生幼而颖慧，聪悟若

神。其父知非凡器，爱而异之。于时法汰道人德业弘懿，乃携以归依，遂改服受学。既践法门，俊思卓拔。披读经文，一览能诵，研味句义，即自解说。是以年在志学，便登讲座，探赜索隐，思彻渊泉，吐纳问辩，辞清珠玉。虽宿望学僧，当世名士，皆虑挫辞穷，莫能抗敌。虽杨童之豫《玄》文，鲁连之屈田巴，无以过也。年至具戒，器鉴日跻，讲演之声，遍于区夏。王公贵胜，并闻风造席；庶几之士，皆千里命驾。生风雅从容，善于接诱，其性烈而温，其气清而穆，故豫在言对，莫不披心焉。

初住龙光寺，下帷专业。隆安中，移入庐山精舍，幽栖七年，以求其志。常以为入道之要，慧解为本。故钻仰群经，斟酌杂论，万里随法，不惮岭远。遂与始兴慧睿、东安慧严、道场慧观，同往长安，从罗什受学。关中僧众，咸称其秀悟。义熙五年还都，因停京师，游学积年，备总经论。妙贯龙树大乘之源，兼综提婆小道之要，博以异闻，约以一致。乃喟然而叹曰：“夫象以尽意，得意则象忘；言以寄理，入理则言息。自经典东流，译人重阻，多守滞文，鲜见圆义。若忘筌取鱼，则可与言道矣。”于是校练空有，研思因果，乃立《善不受报》及《顿悟义》，笼罩旧说，妙有渊旨。而守文之徒，多生嫌嫉，与夺之声，纷然互起。

又六卷《泥洹》先至京都，生剖析佛性，洞入幽微，乃说阿阐提人皆得成佛。于时《大涅槃经》未至此土，孤明光发，独见迁众。于是旧学僧党，以为背经邪说，讥忿滋甚，遂显于大众，摈而遣之。生于四众之中正容誓曰：“若我所说反于经义者，请于现身即表病疾；若与实相不相违背者，愿舍寿之时，据师子座。”言竟，拂衣而逝。星行命舟，以元嘉七年投迹庐岳，销影岩阿，怡然自得。山中僧众，咸共敬服。俄而《大涅槃经》至于京都，果称阐提皆有佛性，与前所说，若合符契。生既获斯经，寻即建讲。以宋元嘉十一年冬十月庚子，于庐山精舍升于法座。神色开明，德音骏发，论议数番，穷理尽妙。观听之众，莫不悟悦，法席将毕，忽见尘尾纷然而坠，端坐正容，隐几而卒，颜色不异，似若入定。道俗嗟骇，远近悲凉。于是京邑诸僧内惭自疚，追而信服。其神鉴之至，徵瑞如此。仍葬于庐山之阜。

初生与睿公及严、观同学齐名，故时人评曰：“生、睿发天真，严、观注流得。慧义彭亨进，寇渊于默塞。”生及睿公独标天真之目，固已秀出群士矣。

初沙门法显于师子国得《弥沙塞律》梵本，未及译出而亡。生以宋景平元年十一月，于龙光寺请罽宾律师佛大什执梵文，于罽沙门智胜为译。此律照明，盖生之功也。关中沙门僧肇始注《维摩》，世咸玩味。及生更发深旨，显畅新异，讲学之匠，咸共宪章。其所述《维摩》、《法华》、《泥洹》、《小品》诸经义疏，世皆宝焉。

○佛念法师传第五

竺佛念，凉州人也。弱年出家，志业坚清，外和内朗，有通敏之鉴。讽习众经，粗涉外学，其《苍》、《雅》诂训，尤所明练。少好游方，备贯风俗。家世西河，洞晓方语，毕戎音义，莫不兼解。故义学之誉虽阙，而洽闻之声甚着。

苻坚伪建元之中，外国沙门僧伽跋澄及昙摩难提入长安，坚秘书郎赵政请跋澄出《婆须蜜经》胡本，当时名德莫能传译，众咸推念。于是澄执梵文，今译汉语，质断疑义，音字方明。昙摩难提又出《王子益坏目因缘经》，念为宣译，并作经序。至建元二十年，政复请昙摩难提出《增一阿含》及《中阿含》，于长安城内集义学沙门，请念为译，敷析研核，二载乃讫。《二含》光显，念之力也。至姚兴弘始之初，经学甚盛，念续出《菩萨瓔珞》、《十住断结》及《出曜》、《胎经》、《中阴经》，于苻、姚二代，为译人之宗。自世高、支谦以后，莫逾于念。关中僧众，咸共嘉焉。后卒于长安，均匀近白黑，莫不叹惜。

○法显法师传第六

释法显，本姓龚，平阳武阳人也。显有三兄并韶皤而亡。其父惧祸及之，三岁便度为沙弥。居家数年，病笃欲死，因送还寺，信宿便差。不复肯归，母欲见之不能得，为立小屋于门外，以拟去来。十岁遭父忧，叔父以其母寡独不立，逼使还俗。显曰：“本不以有父而出家也。正欲远尘离俗，故入道耳。”叔父善其言，乃止。顷之母丧，至性过人。葬事既毕，仍即还寺。尝与同学数十人于田中刈稻，时有饥贼欲夺其谷，诸沙弥悉奔走，唯显独留。语贼曰：“若欲须谷，随意所龘但君等昔不布施，故此生饥贫，今复夺人，恐来世弥甚。贫道预为君忧，故相语耳。”言讫即还。贼弃谷而去。众僧数百人，莫不叹服。

二十受大戒，志行明洁，仪轨整肃。常慨经律舛阙，誓志寻求。以晋隆安三年，与同学慧景、道整、慧应、慧嵬等发自长安，西度沙河。上无飞鸟，下无走兽，四顾茫茫，莫测所之。唯视日以准东西，人骨以标行路耳。屡有热风恶鬼，遇之必死，显任缘委命，直过险难。有顷，至葱岭。岭冬夏积雪，有恶龙吐毒，风雨沙砾，山路艰危，壁立千仞。昔有人凿石通路，傍施梯道，凡度七百馀梯。又蹶悬絙过河数十馀处。仍度小雪山，遇寒风暴起，慧景噤战不能前，语显云：“吾其死矣！卿可时去，勿得俱殒。”言绝而卒。显抚之号泣曰：“本图不果，命也奈何。”复自力孤行，遂过山险。

凡所经历三十馀国，至北天竺。未至王舍城三十馀里，有一寺，逼暮仍停。明旦，显欲诣耆闍崛山，寺僧谏曰：“路甚艰峻，且多黑师子，亟经啖人，何由可至？”显曰：“远涉数万，誓到灵鹫。宁可使积年之诚，既至而废耶？虽有峻难，吾不惧也。”众莫能止，乃遣两僧送之。显既至山中，日将曛夕，遂欲停宿。两僧危惧，舍之而还。显独留山中，烧香礼拜，翹感旧迹，如睹圣仪。至夜，有三黑师子来蹲显前，舐唇摇尾。显诵经不辍，一心念佛，师子乃低头下尾，伏显足前。显以手摩之。

，咒曰：“汝若欲相害，待我诵竟；若见试者，可便退去。”师子良久乃去。明晨还反，路穷幽深，榛木荒梗，禽兽交横，正有一径通行而已。未至里馀，忽逢一道人，年可九十，容服粗素，而神气俊远。虽觉其韵高，而不悟是神人。须臾进前，逢一年少道人。显问：“向逢一老道人是谁耶？”答曰：“头陀弟子大迦叶也。”显方惋慨良久。既至山前，有一大石横塞室口，遂不得入。显乃流涕，致敬而去。

又至迦施国，精舍裹有白耳龙，与众僧约，令国内丰熟，皆有信效。沙门为起龙舍，并设福食。每至夏坐讫日，龙辄化作一小蛇，两耳悉白。众咸识是龙，以铜盂盛酪，置于其中，从上座至下行之，遍乃化去。年辄一出，显亦亲见此龙。

后至中天竺，于摩竭提巴连弗邑阿育王塔南天王寺得《摩诃僧祇律》，又得《萨婆多律抄》、《杂阿毗昙心》、《楞经》、《方等泥洹经》。显留三年，学梵书梵语，躬自书写。于是持经像，寄附商客到师子国。显同侣十馀，或留或亡，顾影唯己，常怀悲慨。忽于玉像前见商人以晋地一白团扇供养，不觉凄然下泪。停二年，复得《弥沙塞律》、《长阿含》、《杂阿含》及《杂藏》本，并汉土所无。

既而附商人大舶还东。舶二百许人，值大暴风，舶坏水入。众人惶怖，即取杂物弃之。显恐商人弃其经像，唯一心念观世音，及归命汉土众僧。大风昼夜十三日，吹舶至岛下，治舶竟前。时阴雨晦冥，不知何之，唯任风而已。若值伏石及贼，万无一全。行九十日，达耶婆提国。停五月日，复随他商侣东趣广州。举帆月馀日，中夜忽遇大风，举舶震惧。众共议曰：“坐载此沙门，使我等狼狈，不可以一人故，令一众俱亡。”欲推弃之。法显檀越厉声呵商人曰：“汝若下此沙门，亦应下我，不尔便当见杀。汉地帝王奉佛敬僧，我至彼告王，必当罪汝。”商人相视失色，龟勉而止。既水尽粮竭，唯任风随流。忽至岸，见藜藿菜依然，知是汉地，但未测何方。即乘小船入浦寻村，遇猎者二人，显问：“此何地耶？”猎人曰：“是青州长广郡牢山南岸。”猎人还，以告太守李嶷。嶷素敬信，忽闻沙门远至，躬迎劳。显持经像随还。

顷之，欲南归。时刺史请留过冬，显曰：“贫道投身于不返之地，志在弘通，所期未果，不得久停。”遂南造京师，就外国禅师佛驮跋陀罗，于道场寺译出六卷《泥洹》、《摩诃僧祇律》、《方等泥洹经》、《楞经》、《杂阿毗昙心》未及译者，垂有百万言。显既出《大泥洹经》，流布教化，咸使见闻。有一家失其姓名，居近杨都朱雀门，世奉正化，自写一部，读诵供养。无别经室，与杂书共屋。后风火忽起，延及其家，资物皆尽，唯《泥洹经》俨然具存，煨烬不侵，卷色无异。扬州共传，咸称神妙。后到荆州，卒于辛寺，春秋八十有二。众咸恻惜。其所闻见风俗，别有传记。

○智严法师传第七

释智严，不知何许人。弱冠出家，便以精勤着名，纳衣宴坐，蔬食永岁。志欲广求经法，遂周流西域。进到罽宾，遇禅师佛驮跋陀罗，志欲传法中国，乃竭诚要请。跋陀嘉其恳至，遂共东行。于是逾涉雪山，寒苦峻绝，饮冰茹木，频于危殆。绵历数载，方达关中。常依随跋陀，止于长安大寺。顷者，跋陀横为秦僧所摈，严与西来徒众并分散出关，仍憩山东精舍，坐禅诵经，力精修学。

晋义熙十二年，宋武帝西伐长安，克捷施旆，涂出山东。时始兴公王恢从驾，游观山川，至严精舍。见其同志三僧，各坐绳床，禅思湛然。恢至，良久不觉。于是弹指，三人开眼，俄而还闭，不与交言。恢心敬其奇，访诸耆老，皆云：“此三僧隐居积年，未尝出山。”恢即启宋武，延请还都，莫肯行者。屡请恳至，二人推严随行。道怀素笃，礼事甚备。还都，即住始兴寺。严性虚静，志避嚣尘。乃于东郊之际更起精舍，即枳园寺也。

严前还于西域，得胡本众经，未及译写。到宋元嘉四年，乃共沙门宝云译出《普曜》、《广博严净》及《四天王》凡三部经。在寺不受别请，远近道俗敬而服之。其未出家时，尝爱五戒，有所亏犯。后入道受具足，常疑不得戒，每以为惧，积年禅观，而不能自了。遂更泛海，重到天竺，谘诸明达。值罗汉比丘，具以事问罗汉。罗汉不敢判决，乃为严入定，往兜率宫谘弥勒。弥勒答称得戒。严大喜跃，于是步归。行至罽宾，无疾而卒，时年七十八。外国之法，得道僧无常，与凡僧别葬一处。严虽苦行绝伦，而时众未判其得道信否，欲葬凡僧之墓。抗举严丧，永不肯起，又益人众，不动如初。众咸惊怪，试改向得道墓所，于是四人舆之，行驶如风，遂得窆葬。后严弟子智羽、智达、智远从西域还，报此消息讫，俱还外国。

○宝云法师传第八

释宝云，未详其氏族，传云凉州人也。弱年出家，精勤有学行。志韵刚洁，不偶于世，故少以直方纯素为名。而求法恳惻，忘身徇道，誓欲躬睹灵迹，广寻群经。遂以晋隆安之初，远适西域。与法显、智严先后相随，涉履流沙，登逾雪岭，勤苦艰危，不以为难，遂历于阗、天竺诸国，备睹灵异。乃经罗刹之野，闻天鼓之音，释迦影迹，多所瞻礼。云在外域，遍学胡书，天竺诸国音字诂训，悉皆贯练。后还长安，随禅师佛驮跋陀罗受业，修道禅门，孜孜不担俄而禅师横为秦僧所摈，徒众悉同其咎，云亦奔散。会庐山释慧远解其摈事，共归扬州，安止道场寺。僧众以云志力坚猛，弘道绝域，莫不披衿谘问，敬而爱焉。

云译出《新无量寿》，晚出诸经，多云所译。常手执胡本，口宣晋语，华戎兼通，音训允正。云之所定，众咸信服。初，关中沙门竺佛念善于宣译，于苻、姚二世，显出众经。江左译梵，莫逾于云。故于晋、宋之际，弘通法藏，沙门慧观等咸友而善之。云性好幽居，以保闲寂。遂适六合山寺，译出《佛所行赞经》。山多荒民，俗好草窃，云说法教诱，多有改恶，礼事供养，十室而八九。顷之，道场慧观临卒

，请云还都，总理寺任。云不得已而还。居岁馀，复还六合。以元嘉二十六年卒，春秋七十馀。其所造外国，别有记传。徵士豫章雷次宗为其传序。

○智猛法师传第九

释智猛，雍州京兆郡新丰县人也。禀性端明，砺行清白。少袭法服，修业专至，讽诵之声，以夜续昼。每见外国人说释迦遗迹，又闻方等众经布在西域，常慨然有感，驰心遐外，以为万里咫尺，千载可追也。遂以伪秦弘始六年，戊辰之岁，招结同志沙门十有五人，发迹长安。渡河顺谷三十六渡，至凉州城。既而西出阳关，入流沙，二千馀里，地无水草，路绝行人。冬则严厉，夏则瘴热。人死，聚骨以标行路。橐驼负粮，理极辛阻。遂历鄯鄯、龟兹、于阗诸国，备观风俗。

从于阗西南行二千里，始登葱岭，而同侣九人退还。猛遂与馀伴进行千七百馀里，至波沦国。三度雪山，冰崖皓然，百千馀仞，飞絙为桥，乘虚而过，窥不见底，仰不见天，寒气惨酷，影战魂栗。汉之张骞、甘英所不至也。

复南行千里，至罽宾国，再渡辛头河，雪山壁立，转甚于前。下多瘴气，恶鬼继路，行者多死。猛诚心冥彻，履险能济。既至罽宾城，恒有五百罗汉住此国中，而常往反阿耨达池。有大德罗汉见猛至止，欢喜赞叹。猛谘问方土，为说四天下事，具在其传。猛先于奇沙国见佛文石唾壶，又于此国见佛钵，光色紫紺，四边灿然。猛花香供养，顶戴发愿：“钵若有应，能轻能重。”既而转重，力遂不堪，及下案时，复不觉重。其道心所应如此。

复西南行千三百里，至迦维罗卫国，见佛发、佛牙及肉髻骨，佛影、佛迹，炳然具在。又睹泥洹坚固之林，降魔菩提之树。猛喜心内充，设供一日，兼以宝盖大衣，覆降魔像。其所游践，究观灵变，天梯龙池之事，不可胜数。

后至华氏城，是阿育王旧都。有大智婆罗门，名罗阅宗，举族弘法，王所钦重。造纯银塔高三丈，沙门法显先于其家已得六卷《泥洹》。及见猛，问云：“秦地有大乘学不？”答曰：“悉大乘学。”罗阅惊叹曰：“希有希有，将非菩萨往化耶！”猛就其家得《泥洹》胡本一部，又寻得《摩诃僧祇律》一部，及馀经胡本，誓愿流通。

于是便反，以甲子岁发天竺，同行四僧于路无常，唯猛与昙纂俱还于凉州。译出《泥洹》本，得二十卷。以元嘉十四年入蜀，十六年七月七日于钟山定林寺造传。猛以元嘉末卒。

○法勇法师传第十

释法勇者，胡言昙无竭，本姓李氏，幽州黄龙国人也。幼为沙弥，便修苦行，持戒

讽经，为师僧所敬异。尝闻沙门法显、宝云诸僧躬践佛国，慨然有忘身之誓。遂以宋永初之元，招集同志沙门僧猛、昙朗之徒二十有五人，共赍幡盖供养之具，发迹北土，远适西方。

初至河南国，仍出海西郡，进入流沙。到高昌郡，经历龟兹、沙勒诸国，前登葱岭雪山。栈路险恶，驴驼不通，层冰峨峨，绝无草木，山多瘴气，下有大江，浚急如箭。于东西两山之胁，系索为桥，相去五里，十人一过。到彼岸已，举烟为帜，后人见烟，知前已度，方得更进若久不见烟，则知暴风吹索，人堕江中。行葱岭三日方过。复上雪山，悬崖壁立，无安足处，石壁皆有故栈孔，处处相对。人各执四栈，先拔下栈，手攀上栈，展转相代。三日方过，乃到平地相待，料检同侣，失十二人。

进至罽宾国，礼拜佛钵。停岁馀，学胡书竟，便解胡语。求得《观世音受记经》梵文一部。无竭同行沙门馀十三人，西行到新头那提河，汉言师子口。缘河西入月氏国，礼拜佛肉髻骨，及睹自沸水船。后至檀特山南石留寺，住僧三百人，杂三乘学。无竭便停此寺，受具足戒。天竺沙门佛陀多罗，齐言佛救，彼方众僧云其已得道果。无竭请为和上，汉沙门志定为阿闍梨。于寺夏坐三月日。

复北行至中天竺，旷绝之处，常赍石蜜为粮。其同八人路亡，五人俱行，屡经危棘。无竭所赍《观世音经》，常专心系念。进涉舍卫国，中野逢山象一群，无竭称名归命，即有师子从林中出，象惊怖奔走。后渡恒河，复值野牛一群鸣吼而来，将欲害人。无竭归命如初，寻有大鹫飞来，野牛惊散，遂得免害。其诚心所感，在嶮克济，皆此类也。后于南天竺，随舶泛海达广州，所历事迹，别有记传。其所译出《观世音受记经》，今传于京师。后不知所终。